





5




XXVIII. 3. p

K.1.

Disputations Chre- STIENNES, TOUCHANT l'estat des trepassez, faites par dia- logues : desquelles la premiere partie est intitulée Les Enfers.

L'ordre & les tiltres des dialogues.

1. *La Cosmographie infernale,*
2. *Le Purgatoire,*
3. *Le Limbe,*
4. *Le Sein d'Abraham,*
5. *La Descente aux enfers,*



PAR PIERRE VIRET.

Avec vne Epistre de Iean Caluin.

A GENEVE,
DE L'IMPRIMERIE DE
Iean Gerard.

M. D. LII.

Disquisitiones Arithmeticae

Libri I. De divisibilitate
et primis. De fractionibus
et de rationibus. De
arithmetica. De geometria.

Libri II. De arithmetica
et de geometria. De
arithmetica. De geometria.

Libri III. De arithmetica
et de geometria. De
arithmetica. De geometria.

Libri IV. De arithmetica
et de geometria. De
arithmetica. De geometria.

3
IEAN CALVIN AVX
Lecteurs.



La dilection de Dieu nostre Pere, & la grace de nostre Seigneur Iesus Christ, vous soit donnée, & multipliée de iour en iour, par la communion du saint Esprit. Il y a vn Poete ancien, qui dit, que celuy qui delecte & profite tout ensemble en ses escrits, a gagné le pris & faueur enuers tous. Cela est dit à cause de la diuersité des natures. Bien est vray, que la seule doctrine, quand nous la cognoissons bonne & vtile, nous deueroit bien suffire, pour nous inciter à lire volontiers vn liure, y appliquer nostre estude, l'aymer & le priser, & finalement y prendre plaisir. Mais il y en a plusieurs, & quasi la plus-part, qui seront beaucoup plus aises, qu'on les enseigne auec vne façon ioyeuse & plaisante, qu'autrement: en sorte, que, comme en s'esbatant, ilz profitent & reçoient instruction. Tout ainsi donc, que ceux qui s'occupent à composer li-

ures de passe-temps vain & frivole, & amusent le monde à les lire, sont à vituperer, encore qu'il n'y eust nulle corruption: aussi d'autre costé, ceux qui ont la grace de tellement enseigner, qu'ilz delectent quant & quant, & induisent les lecteurs à profiter par le plaisir qu'ilz leur donnent, sont doublement à louer. Et de-fait, c'est vne vertu & faculté, qui n'est pas en tous. Mesme, les plus sauës quelquefois n'y pourront pas aduenir: & qui plus est, se feront ridicules, en affectant ce qui ne leur est pas donné. Car vn homme qui veut vser de faceties, se doit donner garde de deux vices. L'un est, qu'il n'y ayt rien de contraint, ou tiré de trop loing: comme il y en a aucuns, qui ont des froides risées, lesquelles il semble aduis qu'on leur ayt arraché du gosier par force. L'autre est, de ne point decliner à vne iaserie dissolue, laquelle en Latin se nomme Scurrité, en nostre langage, Plaisanterie. Ainsi de tenir le moyen, c'est, de sauoir bien à propos, & avec grace, & par mesure parler ioyeusement, pour recréer tellement qu'il n'y ayt rien d'inepte,

d'inepte, ou ietté à la volée, ou débordé, ce n'est pas vne vertu cōmune ou vulgaire. Je dy cecy à propos des dialogues presens : desquelz on peut tellement recueillir instruction bonne & solide, que cependant on aura occasion de rire. Car la matiere de foy est ioyeuse : & est deduite avec telle grace, qu'il ne se peut faire qu'on ne prenne grand plaisir à la lecture. Nostre frere & compaignon en l'œuvre du Seigneur Iesus, Pierre Viret, qui en est l'auteur, a de nature la vertu que i'ay dit estre requise en vn homme qui s'en veut mesler. Il est bien vray, que comme en toutes autres choses, il s'est appliqué à meilleure estude & d'autre importance : aussi en ces dialogues sa principale intention n'est pas de delecter & resjouyr les oreilles. Et de fait, ce seroit vn labeur trop maigre, & vne peine mal employée à vn hōme de tel esprit & sauoir. Dauantage, outre les dons qu'il a de Dieu, il est appelé à vne vocation plus haute. Mais d'autant que le subiet qu'il a entrepris de traiter, portoit qu'il enseignast comme en s'esbatant & par

forme de risée, il a pretendu à la doctrine, comme à son droit but, meslant ce pèdant avec icelle les faceties, comme vn accessoire. Voire en sorte que ce liure est tesmoing suffisant qu'il a vne dexterité singuliere à ce faire, autant qu'il s'y veut mettre : cest à dire, autant qu'il conuient, & que mestier est. Je say que c'est chose dangereuse & qu'on ne doit pas faire à la volée, que d'approuuer vn liure. Mais ie ne crain pas d'auoir aucune reproche entre gens de bon esprit & sain iugement, d'auoir recommandé la lecture de ce liure, comme d'un liure auquel le temps sera bien employé. Je n'aurois que faire d'en rēdre tesmoignage, ny d'en parler entre ceux qui cognoistroyent l'hōme. Car ceste seule cognoissance suffiroit, pour les asseurer qu'ilz ne pourroyent faillir de s'y mettre. Mais pource qu'il pourroit estre, qu'aucuns par faute d'aduertissemēt, ne tiendroyent conte d'esprouuer que c'est: i'ay bien voulu testifier en partie ce qui en est, pour donner courage à ceux qui s'en voudront fier en moy, & les inciter à voir, iusques à ce qu'ilz en puissent

sent iuger d'euxmesmes. Non pas que ie presume tant, que de m'attribuer le iugement dessus les œuvres des autres, pour en prononcer comme par autorité : ou de ranger à mon opinion & aduis tous les lecteurs. Toutesfois pource que ie pense & suis tout persuadé, que plusieurs ne refuseront point d'aquiescer à ce que ie leur en affermeray : ie me suis ingeré pour le profit d'iceux d'en dire mon semblant. Combien qu'il n'est iamestier de deduire au long tout le profit qui s'en pourra recueillir, & le plaisir qu'on y prendra. Seulement ie puis certifier, que tous ceux qui auront la patience de continuer la lecture, ne se repentiront point de s'estre si bien adressez. Il y a vn poinct seul, que ie sache, qui pourroit diminuer la grace du liure enuers aucuns. C'est qu'il semble bien aduis, que les matieres de la Chrestienté se doyuent traiter avec vne grauité correspondante à leur dignité & hauteſſe : & pourtant qu'il n'est pas conuenable de les mesler avec propos ioyeux, attendant mesme qu'il y a danger, qu'en ce faisant on ne les tourne en risée. Principalement au

temps present, auquel l'impieté s'est debordée plus que d'puis le commencement de l'Eglise Chrestienne: ou, pour le moins, elle s'est plus clairement descouuerte. Afin que nul, pour estre preoccupé de ceste raison, ne soit desgousté de la lecture, il est à noter, qu'on dispute des matieres de la Chrestienté en deux sortes: premierement, en taxant les folles superstitions, qui sont suruenues entre les Chrestiens sous ombre de la religion, lesquelles touteffois ne sont que corruptions d'icelle, pour la renuerser & destruire. Secondement, en monstrant la simple & pure verité, selon qu'elle nous est reuelée de Dieu par sa sainte parolle. Quant à ceste seconde espece, il est certain qu'incontinent que nous auons ouuert la bouche pour parler de Dieu, nulle facetie ne doit entrer en nos propos: mais de uons en tout ce que nous disons, demöstrer quelle reuerence nous portons à sa Maiesté, ne prononçans vn seul mot qu'en crainte & humilité. Mais endeschiffrañt les superstitions & folies d'ot le poure monde a esté embrouillé par cy deuant, il ne se peut faire qu'en parlant de matieres si ri-

di-

dicules on ne s'en rie à pleine bouche. Bien est vray, qu'il y a bien aussi occasion de plorer & gemir: d'autant que ce n'est pas icy, que la gloire de Dieu ait esté ainsi obscurcie, & sa verité éternelle, laquelle nous doit estre en singuliere recommandation, ait esté ainsi abolie par mensonges infiniz: que tant de pures ames ayent esté menées de Satan en ruine & damnation. Mais l'un n'empesche pas l'autre, qu'en ayant tristesse telle que nous devons, de reduire en memoire comme Dieu a esté ainsi blasphemé, ayant aussi pitié & compassion de la calamité où le monde a esté si long temps, & est encore à present: neantmoins en racontant des resueries si sottes, & des badinages tant ineptes, nous vsions de moqueries telles qu'ilz les meritent. Quand nous en ferons ainsi, ce sera à l'exemple des Prophetes: lesquelz en traitant la simple verité de Dieu, parlent avec vne maiesté, qui doit faire trembler tout le monde: mais en blasmant les resueries des idolatres, ne font nulle difficulté d'vser de risées, pour monstrier combien elles sont ridicules. Combien que c'est autre chose des

Prophetes, que de nous . Car d'autant que nous ne parlons pas au Nom de Dieu comme eux, afin que tout ce que nous prononçons soit receu comme reuelation venant du ciel: il nous est bien licite d'vser d'un style plus bas. Mais i'ay allegué ceste comparaison seulement, pour monstrier que ce n'est pas donner occasion aux Lucianiques & Epicuriens & autres contempteurs de Dieu, de vilipender la religion Chrestienne, ou l'auoir en mespris, quand on se moque des corruptions d'icelle.

PIERRE VIRET

au Lecteur.



Nreuoyant mes Disputations Chrestiennes, auxquelles ie dispute par dialogues, principalement des enfers & de l'estat des mortz, & des erreurs & abuz commis autour d'iceux: ie les ay tellemēt reueues, que ie les te presente derechef (Chrestien Lecteur) tellement renouvelées, qu'elles te pourront sembler, pour la pluspart, comme de nouveau nées. Car outre ce que i'y ay adiousté de nouveau, que i'ay obserué, en ce que i'ay leu, appartenāt aux choses traitées en icelles, depuis la premiere fois qu'elles ont esté imprimées, ie dispose les matieres contenues aux premieres,

par vn ordre beaucoup meilleur, cōme il me semble, & mieux conioignāt enfēble les matieres sēblables, que parauant. Je diuise toute l'œuure en diuerses parties, comme i'auoye desia fait à l'autre fois, mais vn petit d'autre forte. Car ie baille à vne chacune des parties vn propre tiltre, & à vn chacun des dialogues, contenuz en icelles, le leur aussi, desquelz les causes & raisons seront exposées aux sommaires d'vn chacun d'iceux. En apres, vne chacune partie contient plus de dialogues, que parauant, mais vn petit plus brefz. Nous mettons en auant la premiere partie, pour le present, qui est appellée, Les Enfers, pour les causes qui seront declairées au sommaire du pre-

premier dialogue. Ceste partie contient cinq dialogues, desquelz le premier est intitulé La Cosmographie infernale: le second, Le Purgatoire: le troisieme, Le Limbe: le quatr'ieme, Le Sein d'Abraham: le cinqiesme, La descente aux enfers. En apres, la seconde partie appellée La Physique infernale, ou la Physique Papale: & puis la troisieme, appellée L'office des mortz: & la quatr'ieme, intitulée Les Funerailles de Purgatoire, l'ensuyuront avec leurs dialogues, s'il plait au Seigneur. Or en reuoyant & disposant ainsi ces choses, il m'est venu quelque fantasie, d'oster du corps de ceste premiere partie, & de tout cest ceuvre, la preface, laquelle y auoit esté mise au com-

menacement, craignant que par-
uventure elle ne fust vn petit trop
fascheuse aux lecteurs, & principa-
lement incontinent au commen-
cement de l'œuure, à cause de sa
prolixité. Toutefois, voyant qu'el-
le estoit desia escrite, & qu'elle a-
uoit desia esté imprimée vne fois,
ie n'ay pas suyuy ce premier aduis,
pour beaucoup de causes. La pre-
miere, pource qu'il m'a semblé,
qu'outre ce qu'elle me peut seruir
comme d'Apologie & de purgati-
on & satisfaction contre les calom-
niateurs, elle contient aussi beau-
coup de bons aduertissemens, bien
necessaires à vn chacun, en ce téps
cy. Car en rendant raison des cau-
ses, non seulement qui m'ont es-
meu à escrire, mais aussi à vser de
la

la maniere d'escrire, de laquelle ie ay vsé: i'admoneste pareillement les fideles du soing qu'un chacun doit auoir à instruire son prochain & à s'enquerir de la verité, & des moyens pour ce faire, & des liures, lesquelz il conuient lire ou fuir, & de la maniere comment il les faut lire, & principalemēt ceux qui traitent des abuz: item, du profit qu'il en conuient retirer, & du dangier & de l'abus qui y peut estre. En apres, de la maniere de traiter les choses appartenantes à la religion, & de proposer la verité: & des ieux & faceties licites ou illicites aux Chrestiens, en telles choses, & de l'vsage & abus des lettres humaines, & de la lecture d'icelles & des diuines. Item, des desgoustez

d'icelles, & des Lucianistes, des delicatz, des affectateurs de langage & d'eloquēce, des Epicuriens, des moqueurs, des fascheux & difficiles à cōtēter: des curieux, tētriques, gaudisseurs, & de ceux qui masquent verité, & des hypocrites: de la necessité que nous auōs de bien cognoistre les abuz, & la source & naissance & accroissement d'iceux, & les nous reduire souuent en memoire, & du fruit que nous en pouuons rapporter: & plusieurs autres telles choses, qui seroyent longues à specifier par le menu. Si aucuns se faschent de lire ces aduertissemens, ilz en pourront omettre la lecture, & commencer par là où il leur plaira. Ie requier seulement des lecteurs, qui n'aurent point
leu

INDICE PREMIER, DES

LIEUX PRINCIPAUX DE L'ESCRITURE,

lesquelz l'auteur du present liure
a interpreté.

*Le premier nombre denote le chap. de l'Ecriture:
le second, la page de ce liure.*

Genese.

- 15 17 a, Il est nostre Dieu,
& le Dieu de noz en-
fans 306
17 b, L'ame de laquelle la
chair du prepuce ne se-
ra circoncise, perira de
son peuple: car elle a
violé mon alliance 301

Exode.

- 3 b, Je suis le Dieu d'Abra-
ham, Isaac & Iacob 385
4 f, Zippora prit vne pier-
re aigue & circoncit son
filz Eleazard 360
19 a, Je vous ay cogneu de
entre toutes les gēs 459

Iob.

- 4 d, Il ne trouue point ve-
rité estre en ses serui-
teurs, & iuge folie estre
en ses Anges 455.
12 c, Laisse moy dōc, pour
lamētervyn petit ma dou-
leur, auāt que ie voise à
la terre tenebreuse, &c.
103

Les Pseaumes.

- 16 b, Act. 2. d, Tu ne lairras
point mon amē en en-
fer, & ne permettras
point que tō saint voye
corruption 439 569.
68 b, Eph. 4. b, Quād il est
mōté en haut, il a ame-
né multitude de captifz
en captiuité 429 430

Prouerbes.

- 17 d, Si le fol se taist, il sera
reputé sage 152

Iesaie.

- 39 c, 66. e g, La gehēne est
desia ordonnée, &c. 177
178 179.

Ezechiel.

- 18 e, Le filz porte l'iniquité
du pere 243.

Jonas.

- 4 d, Et moy, ne pardōne-
ray-ie pas à Ninive la
grande cité: en laquelle
&c. 558

Zacharie.

- 9 c, Tu as aussi mis de-

I N D I C E I.

- hors les prisonniers, par
le sang de tō Testamēt,
du puits auquel il n'y a
point d'eau 520.
2. Machabéens.
- 12 g, C'est chose bonne de
prier pour les trepassez
239.
- Au mesme g, Afin qu'ilz
soyent deliurez des pe-
chez 236.
- Matthieu.
- 7 c, Allez, ie ne vous co-
gnoy point 459.
8. c, Laissez enseuelir aux
mortz, leurs mortz 501.
8. d, Marc 1.c, & 5.a, Iesus
filz de Dauid, pourquoy
nous es-tu venu tormē-
ter deuāt le temps? 470
471.
- 16 b, & 18 c, Ce que tu lie-
ras & delieras en terre,
fera lié & délié aux
cieux 563.
- 27 f, Mon Dieu, mō Dieu,
pourquoy m'as tu laissé?
485.
- 24 c, Marc 13. d, Nul ne fait
ce iour la & celle heure,
non pas mesme les An-
ges du ciel, ny le Filz,
sinon le Pere 457 458
&c. Marc.
- 16 d, Qui croira & fera
- baptizé, il sera sauué: qui
ne croira point, sera con-
damné 230 563.
- Luc.
- 2 c, Marie gardoit toutes
ces paroles, les rumināt
en son cœur 408.
- Au mesme e: Seigneur, tu
laisses maintenant ton
seruiteur en paix. &c.
407 413.
- Iean.
- 3 a, Qui ne sera nay dere-
chef de l'eau, & du S.
Esprit: il n'entrera point
au Royaume de Dieu.
3 c 1 319 320 329 335.
- 3 b, Nul ne mōte au ciel,
sinon le Filz de l'hom-
me, qui est descendu du
ciel, & est au ciel 404
405
- Au mes. c, 5.e, 6.d, e, Qui
croit au Filz de Dieu a
la vie eternelle, & ne
gousterā point la mort.
Car il est desia passé de
la mort à la vie. Mais
qui ne croit point au
Filz de Dieu, il est desia
iugé & cōdamné 464.
- 6 f, Si vous ne mangez la
chair du Filz de l'hom-
me & ne beuez son
sang, &c. 324 328.

I N D I C E I.

- 6 g, La chair ne profite rien, c'est l'Esprit qui vivifie 494.
- 8 g, Abraham a veu mon iour, & s'en est resiouy 393 399.
- 14 a, Il y a plusieurs demeures en la maison, de mon Pere 414 415 418.
- Au mesme a, Vous savez la voye 416.
- Au mesme a, Je viendray derechef, & vous prendray avec moy, afin que vous soyez aussi là ou ie suis 418 419
- L'Epistre de S. Paul aux Romains.**
- 8 b, Vous n'estes pas en la chair mais en l'Esprit, entant que l'Esprit de Dieu habite en vous 505.
- 8 c, Nous n'auons point receu l'esprit de seruitude & de crainte, mais l'Esprit d'adoption & de liberté 474
- La premiere aux Corinthiens.**
- 1 c, Je ne suis pas venu pour baptizer, mais pour annoncer l'Euangile 367.
- 10 a, Tous ont mangé d'une mesme viande spirituelle 397
- Aux Galatiens.**
- 3 d, Vous tous, qui estes baptizez auez vestu Christ 348.
- Aux Ephesiens.**
- 1 b, Toutes choses sont reпарées & restaurées en Christ 454
- La 1. aux Theſſalon.**
- 4 c, Ne vous contristez point pour ceux qui reposent en nostre Seigneur, comme les infidelles, qui n'ont point de esperance de la resurrection 277.
- La 1. à Timothée.**
- 5 a, La vesue qui vit en delices, icelle en viuant est morte 501.
- La 2. à Timothée.**
- 2 c, Le Seigneur cognoit les siens 458
- Aux Hebreux.**
- 9 c, La voye des lieux saintz n'estoit point encore manifestée 422.
- Au mesme f, Car Iesus n'estoit point entré es lieux saintz faitz de mains d'hommes, qui estoient figures des vrais: mais au ciel mesme 423 424 &c.

I N D I C E II.

10 d, Veu que nous auons
liberté d'entrer és lieux
sainctz , &c. par la voye
fresche & viuante 426.

11 g, Tous ceux la , ayant
aquis tesmoignage par
Foy, ne receurent point
la promesse , Dieu ayât
proueu quelque chose
meilleure pour nous, afin
qu'ilz ne fussent con-
sommez , & vinsent à
perfection sans nous
446.

13 b, Christ est depuis hier,
d'aujourdhuy , & à tout
iamais 393 & 395.

La 1. de S. Pierre.

1 a, Pour auoir le salut qui
est appareillé à estre de-
monstré au dernier tēps
394.

3 d, Christ est allé par son
Esprit , & a presché aux
espritz qui estoient en
prison 478 479 486
487 580 &c.

4 b, Car pource aussi a
il esté euangelizé aux
mortz, afin qu'ilz soyēt

iugez en chair, selon les
hommes, &c. 492. 493.
548.

La 2. de S. Pierre.

2 a, Si Dieu n'a pas espar-
gné les anges, qui auo-
yēt péché: mais par chai-
nes d'obscurité les ayāt
iettez en enfer 470 530

2 b, Le Seigneur fait deli-
urer de tentation les fi-
deles: & reseruer les in-
iustes, pour estre tor-
mētez au iour du iuge-
ment 460 461.

La 1. de saint Iean.

3 d, Si nostre cœur nous
cōdamne, Dieu est plus
grand que nostre cœur,
& cognoit toutes cho-
ses 464.

L'Apocalypse.

13 b, L'Agneau a esté occis
dés le commencement
du monde 393.

Du Symbole.

Il est descendu aux enfers
435 456, &c.

I N-

INDICE SECOND, QVI

EST DES PRINCIPALES

matieres contenues en ce
Liure.

Le nombre se rapporte à la page.

A

Abraham, figure de Iesus

Christ, 386

Abgarus Roy, 436

Abuz, 172

Administration de la Pa-
role & des Sacremēs, 367

Admonition de saint Ia-
ques, 513

Aiguillon de la mort, 443

Ames captiues delurées,
421

Amy de cuisine, 224

Anabaptistes, 343

Anges.

Anges, quelle est leur na-
ture & excellence, 532.

ne peuuent estre cōsom-
mez en toute beatitude,

sans les Chrestiens, 460.

en quel pris ont la scien-
ce des Chrestiens, 457.

leur cheute, 531. ac-
croissent iournellement

en gloire & ioye, 456.

n'ont point demeuré fer-
mes par leur vertu, 454.

reçoquent tristesse, 451.

cōment faut entēdre ce
qui est dit qu'ilz reço-
uēt ioye & tristesse, 452.

profitent en cognoissan-
ce, 453. attendēt leur

perfection, 453 454.

Anniuersaires, 113

Ansegisus abbé du Liege,
325.

Apocryphe, que c'est à di-
re, 200

Apelles, 153

Apostres, quel est l'autho-
rité, 205

Arbre de vie, 387

Archeilaus, 159

Auernus, 119

B

Bacchus, 160

Banquetz pontificaux, 168

Baptême.

Baptême, 539. vray, 540.

de Iesus Christ seul, 253.

n'est pas tousiours ne-
cessaire aux petis en-
fans, 314. 315. des

I N D I C E II.

femmes, n'est pas Ba-	Captifz de Christ, quelz,
ptefme, 373. nul ne le	431.
doit administrer, s'il n'y	Caroli, 254
est ordonné, 366. don-	Catechumenes, 337
né sans foy, 352. des	Cene
femmes, 350. delayé.	n'est à distribuer aux petiz
344. delayé iusques à	enfans, avant le temps,
l'article de la mort, 344.	326. de Iesus Christ seu
de sang, 338. de feu,	le, 253
330. de deuotion, 322.	Chair, en quelle significa-
de l'Esprit & de Foy,	tion, 494. 502
336. d'eau, s'il est touf	Chanefius, 323
iours neceffaire à falut,	Chimere montagne, 120
320. 324. 350. d'eau	Christ
ne faut pas mefpriser,	cōmun à tous fideles, 427
315 321. sans Baptefme	figuré par l'arbre de vie,
aucns font iustifiez, 322.	387 388. par fa feule
trois sortes de Baptef-	mort a fatisfait pour les
me, 336. question du	pechez, 214. demy fau
Baptefme, 312. mou-	ueur selon la doctrine
rir sans Baptefme exte-	papale, 238. son fecōd
rieur est meilleur à l'en-	aduenement, 419. no-
fant, que le receuoir des	stre plege, 445. restau
femmes, 372	rateur de toutes choses,
l'Eglise ne peut donner	454 456. fa vraye na
cefte charge aux fem-	ture, 438. soufferte de
mes de baptizer, 367.	son ame, 483. quelles
deux fois l'année, 345	angoiffes & douleurs a
en l'enfentemēt, 371. au	soutenues, 484. a
S. Esprit & au feu, 330.	deux espritz, 494. en
Bohemiens, 326	quel esprit est descendu
C.	en enfer, 495. iuge de
Canons des Apostres, 198	tous, 528. en quel en-
Canonifation des Sainctz.	fer est descendu, 485.
143	en fa paffion, en quel e-
	ftat

flat, 488. cōment s'est
manifesté aux espritz
des trepassez, 548.
eternel, 541 542. Sau-
ueur des Anges, 543.
a clos & despoullé les
enfers, 550. en com-
biē de manieres est de-
scendu aux enfers, 568.
vertu de Christ, 553
Chrestiens comparez avec
les Peres anciens, 474.
Cimeriens, 164

Circoncision

pour l'homme, & non au-
contraire, 312. diffe-
rée, 307. par Zippo-
ra, 360
Cité de Dieu, 534

Cognoissance.

charnelle de Christ, 410.
double, 458. de Dieu
necessaire à salut, 565

Communion

des reprouuez, 544. des
éleuz, 545

Confirmation, sacrement,
356.

Conformité avec Christ,
490

Concile Laodicéen, 194

Conscience

est bourreau d'elle mesme,
462. coupable, est touf

iours en peine, 463.
nous accuse, 462. mō-
stre, qu'il est vn Dieu,
464

Corneille, 564

Corbeaux infernaux, 122

Cyprien en quel temps il
estoit, 327

D

Deluge, 534

Desgreffeurs des vsuriers,
141

Dieu

pardonne entieremēt, 238.

comparé aux tyrās, 238.

ou c'est qu'il regarde, 535

Dieux des Payens, quelz,

434. dieux, 534. le

dieu des hypocrites, 223

Difference entre le Vieil

& nouveau Testament,

391.

Dimœrites heretiques,

440

Diables,

leur peine va en augmen-

tant, 469. diables,

466. ou ilz apparois-

sent visibles aux hom-

mes, 122. diablesses,

465.

Doctrine

de l'Euangile, a precedé

celle de la Loy, 399. de

Christ, est dès le com-

- commencement, 399. des
 faux prophètes, 162
 Dormeurs sept, 169
 Dormeurs, 471.
E
 Eau
 pour le saint Esprit, 332.
 pour graces du S. Esprit
 333. au Sein d'Abrahā,
 526. en l'autre monde,
 que c'est, 525. 526
 Eglise,
 l'Eglise de Christ cōbien
 elle est excellente, 456
 457. des Peres anciens
 & des Chrestiens, vne,
 391. de Lausanne, 256
 Election, 415
 Enceladus la fable, 116
 Endymion, 169
 Enfer
 toujours avec les infide-
 les, 473. comment il
 croist iusques à sa con-
 sommation, 473. des
 diables, 532. en quelle
 signification les anciens
 docteurs l'ont prins, 435
 de Christ quel, 485.
 trois Enfers, 228. la
 descente de Christ aux
 Enfers, selon les Do-
 cteurs anciens, 434.
 des Origenistes & Ca-
 tabaptistes, 226. en
 quelle signification il le
 faut prendre, 568 569.
 Enfers, comment plu-
 sieurs theologiens les
 confinent, 102. Enfers,
 ou en est la descēte, 109.
 Enfers, en quel lieu se-
 lon Platon & Pythago-
 ras, 105. Enfer des mes-
 chans, 468. Enfer, ou
 c'est qu'il commence,
 464. d'Enfer les clo-
 stures & verroux, 441
 442. vn Enfer, 130.
 descendre en Enfer se-
 lon le langage de l'E-
 scriture, 437.
 Epiphanius, 354 359
 Epymenides, 169
 Epicurus, 467
 Epicuriens de nostre tēps,
 173
 Erreur
 de Cyprien & Origene,
 326. des Papistes, tou-
 chāt le vieil & nouveau
 Testament, 396. des
 Manichéens, 293 294.
 Erreurs autour des Sa-
 cremens, 343 Erreurs,
 172 174.
 l'Ecriture, à qui en appar-
 tient le iugement, 202.
 Esprit
 de Christ de quelle ver-
 tu,

I N D I C E II.

- tu, 492. de Christ com-
muniqué aux mortz,
492 493. de Christ
comment se doit enten-
dre, 493 494. de
Christ, 505. de Dieu,
505. en quelle signifi-
cation, 494 506 507.
l'Esprit de Christ qui a
presché aux mortz, quel
a esté: & cōment le faut
entendre, 495 503 517.
Espritz dōt parle saint
Pierre, en quel sens doi-
uent estre prins, 497
517. Espritz, prison-
niers, 506. Espritz fan-
taistiques & desperatifz,
515
- Esauz, quelz, 546
Escarmoucheurs, 257
Esperance des meschans,
vaine, 531. Esperance des
meschans, 531
- Etna, 111
Etna est décrit, 114 115
l'Euangile deliure les con-
sciēces de toutes faus-
ses opinions, 317
Eutichiens heretiques, 438.
- F
- Fable
sur l'histoire de Lazare,
128. de Gregoire, 216.
de Theseus & Pyritho-
us, 217.
- Faunes, 123
Faux-bours d'enfer & pa-
radis, 292
Festes des ames, quelz en
ont esté les inuenteurs,
110
- Feu
- pour le saint Esprit, 331.
nourry par l'eau, 121
en l'autre monde, que
c'est, 525
Filz de Dieu, 534
- Fideles
- sont admonestez de leur
assurance, 537. quand
est-ce qu'ilz entrent en
la possession de Christ,
400 401. comment
se doiuent regarder en
Christ, 489.
Fiace en la multitude, vai-
ne, 535
Figures, pour les choses fi-
gurées. 348
Fictions poetiques, 162. 163.
- Foy
- des Peres, quelle vertu, 399.
des Peres anciens, 432.
suffit à salut, 370. de
quelle vertu, 416. quel
est son heritage, 416.
sauue sans Baptisme,
323 324 336 337.
de Simon magiciē, 348.
Furies, 465
- aa 5

I N D I C E I I.

Furies des meschans, 465.	Jean hus, prophetie, 264
G	Image de mort, 473
Gaurus, 119	Imposition des mains, 356
Gerion, 260	l'Iniquité du pere cōment la porte l'enfant; 243
Geans du temps du delu- ge, 534	Incrédules decedez, quelle peut estre l'assurance de leur salut, 562
Gerson, 339 340	Infideles, sont tousiours ca ptifz du diable, 433
Glaive flamboyāt, à l'huis de paradis, 387	Iosēphe, 194
Glaive flamboyāt que c'est qu'il figure, 388	Iugemens de Dieu horri- bles, 530
Grace à demy, 237	Iugement de Christ. 536
H	Iugement de Dieu a ses degrez, 469
Hechelberc montagne, 121	Iustice & misericorde de Dieu, 220
Herostratus, 254	Iustice de Dieu, ne laisse rien impuny, 139
Herax, quelle estoit son he- resie, 314	Iudas Machabéen, pour- quoy il prioit pour les pechez des trepassez, 244
Heraut, 505	Iudas Machabéen, à quoy sert son exēple, 235 236.
Hercules, 260	L
Hercules ne peut contre deux, 374	L'autorité de l'Eglise, 202
Holtcot, 337 338	L'autorité de l'Écriture, 203
Homme de verité ne peut perir, 536	Letanie nouvelle, 250
Hōme, diuisé en trois, 502.	Lembe, 293
Humanité, 558	Limbe
Hydra, 159 260	pour Lēbe, 293. que c'est à dire, 290. des Peres, feloni
Hierome, quel iugement il donne des liures des Machabéens, 193	
Hypocrites enuieux de la grace de Dieu, 212	
I	
Iacobites, 325 330	
Icelos, 165	

I N D I C E II.

selon Chrysostome, 380.
 des enfans ruiné, 340.
 des petis enfans, 133 134
 & Purgatoire, ont esté
 escritz par Platon, Plu-
 tarche & Xenocrates,
 132. par metaphore, 291
 des enfans, 297. Lim-
 bes, quelle opinion en
 ont eu les Papistes, 211

Liures

Canoniques, 193 200.
 Canoniques, Ecclesia-
 stiques & Apocryphes,
 quelle est la difference,
 207. des Machabéens,
 pourquoy sont esté re-
 ceuz en l'Eglise, 195.
 des Machabéens ne sont
 point nombrez entre les
 Canoniques, 194 199.
 des Machabéens, quel
 en est l'usage, 199. des
 Machabéens Apocry-
 phes, 193 194 200.
 Apocryphes, quel en
 doit estre l'usage, 201.
 des Machabéens, de quel-
 le autorité, 191 193 196
 197. Apocryphes, 193.
 Liure 2. des Mach. insuf-
 fisant à prouver Purga-
 toire, 235. Liures des
 Machabéens, quel en est
 l'auteur, 194. Liure

second des Machabé-
 ens, en quel langage, &
 quel temps il a esté es-
 crit, 204
 Logis des ames, 417
 cinq Logis pour les ames,
 419
 Loy abolie, comment l'A-
 postre l'entend, 428
 Loy naturelle, 559
 Lunatiques, 295

M

Mahumet, 229 231
 Medecins d'ames, 146 149
 Meschanceté, en horreur,
 467

Messe

des innocens, 300. de Re-
 quiem pour les Saintz,
 252. Messes pour Iesus
 Christ, 285. Messes
 pour les petiz enfans,
 284. Messes & suffra-
 ges font lamenter les
 Diables, 110
 Mere du somme, 164
 Ministres des Sacremens,
 351

Ministere

de l'Evangile a precedé le
 ministere de la Loy, 399
 de la Parole & des Sa-
 cremens, sont coniointz
 inseparablement, 351.
 particulier, 369. des fé-

I N D I C E I I.

- mes, 353 354. Eccle-
 siastique defendu aux
 femmes, 352
- Montagnes**
- de Dieu, 534. ardentes,
 quelle doctrine en de-
 uons recueillir, 176.
 Mons d'Islande & No-
 uergie, 117. Mont Gi-
 bello, 111. Mont dolo-
 reux, 123. Moderne, 119
- Môde vieux & chenu, 533.
- Môde premier, & de main
 tenant quelle comparai-
 son, 533
- Mort, 165
- Mortz en quelle significa-
 tion, 499 501 504
- Mortifié en chair que c'est,
 488.
- Morauiens, 326
- Morpheus, 165
- Moyens ordōnez de Dieu
 doiuent estre en vsage,
 366
- Moyens à garder, pour in-
 terpreter les passages ob-
 scurs de l'Escripture, 515
 516.
- N**
- Nadhegryn, 112
- Nature humaine par des-
 sus l'Angelique, 461
- Negabyfus, 153
- Necessité, 305 & 307
- Necessité aucune ne peut
 excuser pour faire con-
 tre la parole de Dieu,
 363
- Niniuites, 558
- Noé, pourquoy est appellé
 Heraut de iustice, 505.
- O**
- Obstination, 375
- Odilo, abbé, 110 111 113
- Oeuures bonnes, 222.
- Oeuures des hypocrites,
 223.
- Office des sages femmes,
 372
- Ordre Ecclesiastique. 370
- Ostendorpius, 264
- P**
- Passages obscurs de l'E-
 criture, quel profit nous
 apportent 512 513 514
- Parole de Dieu, quel est
 son office, 158
- Parole de Dieu, quelle est
 son autorité, 553.
- Palmoni, 450
- Papistes.**
- de mesme opinion que les
 Manichéés, 211 surmon-
 tent les erreurs de Ma-
 humet & Payens, quant
 aux logis des trepassez,
 231. font Dieu cruel en-
 uers les enfans des Chre-
 stiens, 313. entre Papi-
 stes

I N D I C E I I.

stes & Catabaptistes difference, 227. prient pour la vierge Marie & pour les Saintz, 251. avec Mahumet conforme; 231 preuent leur doctrine par feu & fagotz 297. comment ilz imaginent Dieu & les ames en paradis, 417.

Paradis

de Dieu 534. Paradis 266 386. tousiours avec les fideles 473. ou c'est qu'il commence. 464. comment il croist iusques à la cōsommation 473. terrestre & celeste 386. terrestre, figure du celeste, 387 Payens, ayāt en leur cœur la loy de Dieu, si on doit desesperer de leur salut, 564.

Peché

originel 346. à la mort 255 Pechez de trois sortes 144 Pelagiens 345 Peine de Christ. pourquoy est suffisante pour nostre salut 483. de coulpe 236 de peché,eternelle 271 des brigans 469. de

meschanceté 467 pour Satisfaction 213 de Dam & de Sens 228 ne purge pas 270 peines diuerfes 144 des diables ne les purge point 272 de Purgatoire 215 216 228 que c'est qui les aggrauē 485 du Limbe 227 Phantasos 165 Phobētor 165

Portes

de corne, d'iuoire, de sommeil, de songe, 159

Predication

spirituelle 550 aux espritz 541 548 550 verbale en l'autre monde, selon aucuns 555 aux infirmes apres leur mort 563 entre les mortz, cōment s'entend 551 pour les petiz enfans 558 hors ceste vie, si elle est 560

Preparation aux saintes Escritures 189 Preparation à la descente du trou saint Patrix & Trophonius 188 Prestres papistiques, quel besoing on en a 554 Presomption humaine 512 presumption des femmes 364

I N D I C E I I.

Prier

pour la resurrección des
corps , & l'aduenement
de Christ 247 Prieres
pour la resurrección 240
pour les Sainctz & sain
ctes de paradis 250 pour
la Vierge Marie & les
Sainctz 251 des trespas
sez selon Vvessel 274
pour les trespassez, n'en
est faite aucune mētion
en toute l'Escriture 278
280

Prison 479 480 502 507
par Priuilege, Salut 213
Priuilege, selon les Legi
stes 213

Prophetes,
quel est l'autorité 205
quel est leur langage
204 quelz sont les der
niers 204 faux, quelle
est leur nature 260 pro
pheteſſes 355 prophe
ties cachées 511

Prouerbe Latin 165
Puits selon saint Augu
stin 524

Puits sans eaue 522
Punition des pechez 220

Purgatoire

d'Adam & Eue 269 sur
quelles raisons est fon
dé 212 219 de deux for

tes 293 lieu des riche^s
140 nourrice des pe
chez 222 pour les corps
261. Limbe & Enfer, la
difference 224. pour la
probatō duquel ne sert
de rien, le passage des
Machabéens 209. com
ment se deuoit pluſtoſt
autrement nōmer 274.
combien les peines d'i
celuy ſont grandes ſe
lon l'opinion des Papi
ſtes & de Plutarque 215
216. quel est le feu 167
268. quelle difference
entre ſon feu & celuy
d'enfer 218. Platoni
que 141. deſcrit par Vir
gile 149. ou le Limbe
n'eſtoient point auant
la mort de Christ 209
210. & Limbes brulez
131. nouueau 265. de
Vvessel & des papistes
differant 276 277.
ſans peine 267. en pa
radis 480. noſtre purga
toire, est l'Euangile 271.
Purgation vraye 270
purgations diuerſes 144
purgation accídétale 272.

Q

Quinte eſſence, extra
cteurs 150

R

I N D I C E . I I .

R

Rebellion contre la parole
de Dieu 305
Regeneration 328 329
Remord de cōscience 462
Remuneration des biens
faitz 221
Renaistre d'eau 329
Reprouuez & leur com-
munion 544
Resurrectiō de Christ 439
resurrection, propre priui-
lege à Christ 439
Reuelation de l'Euangile
161.

S

Sacremens

du vieil & nouveau Testa-
ment 397 pourquoy
ilz sont en partie ordon-
nez 370. quelle chose
y faut chercher principa-
lement 334 335
Sacrifice de Christ,eternel
393
Sacrifices pour les trepas-
sez les premiers 113
Saintz , iuges avec Christ
544

Salut

souz le vieil Testamēt 428
de l'hōme,ou il git 305
306. sans sacremens
exterieurs 308. des en-
fans , ou le faut chercher

561. des enfans 559 560.
par priuilege 213. sans
Baptesme 338.
Sang de Christ , de quel-
le efficace 425.
Satan , chef des malheu-
reux 544
Satan effrayé 544.
Satyres 123

Sein

d'Abraham 289 290. d'A-
braham , que c'est 382
388. d'Abraham, pour-
quoy est dit 383. d'A-
braham , pourquoy est
ainsi appellé 519. d'A-
braham ou se doit cer-
cher 381 382. au Sein
d'Abraham , consolati-
on 318. d'Abraham,e-
stoit l'estat des ames 381
382 385. d'Abraham,
n'est plus l'estat des a-
mes 385. d'Abraham,
pour Limbe 290. d'A-
braham, selō saint Au-
gustin 389. des Peres,
auant Abraham 382.
d'Abraham,fait Sein de
Christ 384. de Christ
383 385.

Semence de Dieu 564
Sichemites 311
Signes , pour les choses si-
gnées 348

I N D I C E I I.

Symboles anciens	457	ment ilz sont puniz en	
Simeon 407. & sa paix		leurs successeurs 245. en	
413.		tre Trepassez, du vieil	
Sommaire des deux Epi-		& nouveau Testament	
stres de S. Pierre 527		différence	392
528 529.		Tribulations sont comme	
Somme	165 166	Sacremens	490
Songe d'Encas	162	Triomphe de Iesus Christ	
songes des veillans	471	431	
songes faux	161	Trou saint Patrice 124 125	
Synodoche	502	157	
T		Trou de Trophonius 126.	
Tabernacle	502	V	
Tathee	436	Vertu de Verité	136
Temps ordonnez de Dieu		Ver qui ne meurt point	
396		465	
Tesmoignage		Ver des meschans	2 468
de Dieu 206 de nature		Vesuius	119
465. de conscience, qu'il		Vierge Marie	355
est vn Dieu 464. de		Vigilius	434 438
conscience	462	Vin theologal	168
Theologie poetique	109	Viuiifié de l'Esprit que ce	
Theologiés Papistes, quel-		est	489
le licece ilz prennent 291		Voile de la chair de Iesus	
Thomas incredule	156	426	
Tyrans des tyrans	141	Voile rompu	422
Torment des reprouuez		Voix de Christ	545 552
aggrauiez	460	Voutours infernaux	122
Trepassez		Vsage des moyens ordon-	
quel est leur estat selon Ie-		nez de Dieu	366
sus Christ 230. quel est		Vulcain & ses tiltres	111
leur estat selon Mahu-		Vulcanales	112
met 231. comment on		Vvessel	263 264 265
peut prier pour eux 242		Vvessel, prophetie	264.
l'estat d'iceux 104. com		Fin des indices.	

Car si ie suis pource orateur en Latin, ie ne le suis guere meilleur en françoys. Parquoy, si ie ne parle pas le lāgage Attique, ne fort orné & rhetorique, ains m'aduient souuent, que ie retombe en mon patois: ou si ie me foruoye en France, & que ie reuienne au pays, ie pense que le lecteur fauorable & equitable supportera bien telles fautes, & principalement aux rimes & vers Françoys, lesquelz ie mesle quelquesfois parmy ces dialogues, s'uyuāt l'exēple des bons auteurs, qui ont volōtiers gardé ceste coustume, de translater en vers, selon leur langue, ce qu'ilz alleguent des Poetes, qui ont escrit en autre langage: ce que ie fay, pour mieux descouurer les abuz & les superstitions, afin qu'il ne soit aduis à aucuns, que ie fay parler les personnages des dialogues à plaisir, & sans iuste occasion. S'il y a donc peu de rime en mes vers, il me suffit qu'il y ait quelque raison. Car ie ne fay pas profession de poesie. Il m'a suffit de les tourner de gros en gros. Car avec ce que si ie suis pource orateur, ie suis encore moins poete. Toutesfois i'ay bien confiance, que tant de bons espritz que la France nourrit, fort habiles & experts & en poesie & en prose françoise, n'aurōt point d'occasion d'auoir enuie sur moy, ne de reprendre ma poesie. Car ilz pourront bien iuger, que ie ne preten pas par mes vers, à la courōne de laurier,

Anachar-
sis.

& que ie ne leur veux pas oster leur mestier ne leur bruit. I'espere aussi, que ceux à qui Dieu a donné plus de dons & de grace de parler, considereront, pour supporter mon rude stile, que les Atheniens, qui estoient les plus exquis de toute la Grece, & en doctrine & en langage, n'ont pas mesprisé la doctrine & la langue du philosophe Anacharsis, combien qu'il fust Scythië, & de nation barbare. Il faut aussi qu'ilz considerent, que cognoissant la portée du pais auquel ie suis, i'ay quelquefois vsé expressement d'aucuns motz, qui ne seroyent pas receuz de ceux qui s'estudient à la purté de la langue françoise: mais ie fay cela, pour condescendre à la rudesse & capacité des plus ignorans, qui entendent mieux ces motz, prins de leur langage, que des autres plus exquis: Dauantage, combien qu'il y a plusieurs bons personnages, qui ont desia escrit des matieres de la religion, en la langue françoise, en plus haut stile & plus elegant & aorné que ie ne puis, & d'un fauoir plus profond & plus solide: toutesfois ie ne pense pas, que ceux qui fauent que c'est, que la simplicité & modestie chrestienne, mesprisent ne mon langage, ne ma doctrine, mais qu'ilz prendront le tout en la meilleure partie: considerans que si Amos, qui estoit vn bergier, & plusieurs autres Prophetes, de basse condition, n'ont pas vsé de stile si haut

Amos 7.

haut & magnifique, & n'ont pas parlé tant profondement, & tant doctement, que Dauid le Prophete royal, ou ce grand orateur Eſaie, de la lignée royale, & nourry en la court: ilz n'ot pas pourtāt laiffé d'estre Prophetes, & de parler par l'Esprit de Dieu, & de profiter beaucoup en son Eglise, par le stile duquel ilz ont vſé. Semblablemēt les Niniuites n'ont pas mesprisé Ionas pourtant qu'il estoit estrāgier, & d'autre religion qu'eux, & qu'il leur parloit choses mal plaisantes selon le iugement de la raison humaine. Et combien que les Euangelistes & les Apostres, n'ayent pas escrit en telle pompe de parolles, & qu'ilz n'ayent point tant travaillé apres le langage, que Demosthenes & Ciceron, si ne pouuōs nous pas pourtant nier, qu'ilz n'ayent plus profité, à tout le genre humain, par leur rude stile, que les autres, par toute leur pompe d'eloquence humaine, sans nulle comparaison. Mais si nous considerons les œuures de Dieu, nous cognoistrōs, que le ſainct Esprit, combien qu'il ne reiette pas l'eloquence, qui est vn de ses dons: s'est neantmoins plus delecté en simplicité de langage, pour mieux declairer sa vertu & efficace, que en eloquence pompeuse, comme ſainct Paul le tesmoigne bien clairement, afin qu'on n'attribuast à l'eloquence humaine, ce qui luy appartient. Je dy cecy, à cause d'aucuns palais

Dauid
Eſaie.

L'eloque-
ce aposto-
lique, &
humaine.

*Affecta-
teurs de
Langage.*

delicatz, & d'aucuns affectateurs de langage, qui ne regardent que le stile & la maniere de dire, sans considerer la sentence, & ce qu'on dit: comme si on escriuoit pour la langue, & pour l'apprendre seulement pour iaser, comme les pies & les perroquetz, non pas plustost pour instruire l'esprit, l'ame & la conscience. Ilz ne regardét qu'aux fleurs, & ne se soucient du fruit. Mais, qui pis est, il s'en trouue de iugement tant corrompu, qu'ilz preferent les fleurs peintes, aux naturelles, & cuydant bien aorner leur langage, & enrichir la langue françoise, Dieu fait quelle escorcherie ilz tiennent, & comment ilz escorchent le latin, tellement qu'ilz ne parlent ne latin ne françois: mais voulât fuyr tout ce qui leur semble vulgaire, afin qu'ilz soyent estimez plus grans orateurs, ilz forgent vn langage tout nouueau, & mesprisent les bons motz françois, pour mendier & defrober ceux des langues estranges. Ceste curiosité & affectation de langage, est cause que plusieurs se delectent plus à lire les liures pleins de iaserie, de fables, de menfonges, de vilenies & de blasphemes, que ceux des lettres diuines, ou de quelques bons theologiens & saintz personnages. Et ce vice n'est point seulement en la langue françoise, mais aussi en la langue latine. Car il y en a aucuns, qui ont si grand peur de souiller leur langue dorée,

*Escor-
cheurs de
Latin.*

dorée, & de brouiller leur beau stile, parmy la simplicité & rudesse du langage prophetique & apostolique : qu'ilz ayment mieux fouiller & maculer leurs âmes, leurs entendemens, & espritz, en folz liures, & curieux, ou aux escritz des Payens & idolatres, que lire aux saintes Escriptions, auxquelles ilz n'osent toucher : ou s'ilz y vont quelquefois boire, ce sera comme le chien au Nile. Ilz ne feront que leicher l'eau hastiuement, comme s'ilz auoyent peur d'y toucher, & qu'il y eust des crocodiles. Ilz y toucheront, cōme chat sur brase. Je ne veux pas condamner la lecture des bons auteurs, & des poetes, orateurs & philosophes, desquelz nous nous pouuons seruir à la gloire de Dieu, si premierement nous sommes bien instruitz à la religion chrestienne. Mais ie ne puis approuuer, ains condamne grandement, ceux qui s'addonnent du tout à telz auteurs, ou à d'autres beaucoup pires, & ne tiennent du tout conte, de la sainte Bible & des lettres diuines, ausquelles toutes les autres sciences & disciplines doyuent seruir. Ne iugerions nous pas bien fol, & despourueu d'entendement ce luy qui se voudroit tousiours arrester en la grammaire, & aux fondemens, & rudimens d'icelle, & mespriseroit l'estude des autres artz liberaux, & de philosophie, & n'y voudroit nullement toucher, ne s'exerciter à parler ou

*Ceux qui
fuyent la
lecture
des lettres
diuines.*

*Prouerbes
Velut canis
à Nile.*

*Tous arts
& discipli-
nes, cham-
brières
des lettres
sainctes.*

*Le doctri-
nal d'Ale-
xandre.*

*Eloquen-
ce sans
crainte
de Dieu.*

escrire, craignant d'oublier & de perdre ces fondemens & reigles de grammaire? Qui ne iugeroit vn tel hōme enragé, veu que la grammaire, voire la rhetorique (quelque louange que Ciceron luÿ baille) & la dialectique aussi, ne sont que chambrieres & seruantes des autres disciplines, lesquelles on apprend pour seruir à icelles? Nous nous moquons maintenant des maistres d'escoles barbares, que nous auons eu, qui ne nous fauoyent lire que le doctrinal d'Alexandre, & nous y entretenoyent toute nostre vie, sans iamais nous faire goustier vn bon autheur: tellement qu'on n'y trouuoit iamais point de fin, mais estoit tousiours la chose à recōmencer. Ceux cy ne me semblēt pas guere differēs à iceux. Car cōbien qu'ilz lisent de meilleurs autheurs, & qu'ilz s'exercitēt mieux à parler & à escrire: toutesfois ie n'estime tout ce qu'ilz font, non plus que la grāmaire d'Alexādre, ou que Grecismus & Roiolis, & la logique de Tartaret, & des autres sophistes, s'ilz ne font seruir tout leur sauoir à l'honneur & à la gloire de Dieu, & s'ilz mirēt & visent à autre blāc, & tendent à autre but & fin. Car de quoy leur seruira autremēt, toute leur sciēce & eloquēce, plus qu'aux Payēs & aux gēs sans Dieu? laquelle est plus dōmageable & dangereuse, qu'vtile & profitable au bien public, en celuy qui n'a la crainte de Dieu, & qui n'est bien instruit

struit en la doctrine Chrestienne. Et quãd ilz au-
 ront bien estudié toute leur vie, à aorner & à
 polir leur langage: ie ne pense pas toutesfois,
 qu'il s'en trouue beaucoup entre eux, qui puis-
 sent paruenir à telle perfectiõ, par laquelle ilz
 approchent tant de Ciceron, que ce seditieux *Ciceron,*
 Catilina, qui estoit fort eloquent. Mais quand *& Catili-*
 ilz surmonteroyent bien Demosthenes, ne *na.*
 pourrions nous pas à bon droit dire d'eux, ce
 qu'Eschines a dit de luy, le comparant à vne *Eschines,*
 fleute, qui n'a que le bec, laquelle est inutile, *& Demo-*
 apres qu'elle a le col couppé? Qu'y a-il aussi *sthenes.*
 en ceux cy, que la langue? laquelle nuit bien
 souuent beaucoup, & profite peu. N'est pas à *La vraye*
 preferer vn pource laboureur, qui cognoit son *science &*
 Dieu, & Iesus Christ son Sauueur, & le confes- *eloquence.*
 se en son rude langage, & l'honore par sa
 bonne vie & conuersation, à tous ces grans
 poetes, orateurs & philosophes, qui en font du
 tout ignorans, & qui ne seruent qu'à la chair, *Iean 14.16*
 au monde, & à Satan prince d'iceluy? Ne sont *2. Cor. 3.*
 ilz pas grans asnes & bestes, au pris d'iceluy,
 & encore pires? Car le beuf, cõme le Prophe- *Es. 1.*
 te le dit, cognoit son maistre, & l'asne la creche
 de son seigneur, lequel ceux cy, qui veulent
 estre tenez pour vrays Israelites, pour peuple
 de Dieu & Chrestiens, ne veulent recognoi-
 stre ne seruir, luy faisant tant d'honneur, que
 le beuf & l'asne en font à leurs maistres. Com-

Iean 17.

ment s'osent ilz estimer sauans, estās ignorans de la science de Dieu, laquelle seule est vraye science, pour mener à la beatitude eternelle: au pris de laquelle toutes les autres, qui sont appellées sciences, ne sont que opiniōs humaines, erreurs & mensonges, si elles n'ont ceste icy pour guide.

Degou-
ster du
pain de
vie.

Il est bien difficile de trouuer medecine à telz personnages propre pour les guerir, & viande pour les mettre en appetit, veu qu'ilz fōt tāt degoustez du pain de vie, & de la māne celeste, à laquelle ilz preferent les aulx, les oignons, la chair & les poissōs d'Egypte. Car qui leur baillera la viande, telle qu'ilz la desirēt, on ne fera que nourrir leur maladie d'auantage. Et si la viande n'est apprestée à leur guise, ilz n'en voudront pas seulement goustier. Parquoy ie laisse ceux cy à traiter, à ceux qui ont plus de graces que moy, & qui pourrōt mieux obuier à leur maladie.

Ie requier seulement d'eux, puis qu'ilz estiment plus les liures des Payens, que ceux des Prophetes & des Apostres & des autres vrayz seruiteurs de Dieu, & qu'ilz y prennent plus de plaisir, qu'ilz retiennent pour le moins d'iceux, ce qu'ilz peuuent apprēdre du Poete Euripides, qui a dit: que le siege de verité n'estoit pas en la langue, mais au cœur, & qu'elle ne requeroit point tant l'elegāce, que la propriété,

priété, ayant sa parolle simple & sans fard.

Ie desire aussi qu'ilz se souuiennent, que les histoires payennes nous tesmoignent, qu'il s'est trouué des empereurs Romains, qui n'ont pas desdaigné de s'arrester & de faire arrester toute leur armée, seulement pour ouir parler vne femme. Si les empereurs & leurs armées, ont fait tant d'honneur à vne femme, ceux cy feront ilz difficulté, de s'arrester & s'amuser vn petit, pour ouyr parler verité, cel le grande royne & princesse qui est plus forte que tous, apres qu'ilz auront eu long temps presté l'oreille bien patiëte, à vanité & à mensonge.

Si la rudesse du stile & du langage les fasche, qu'ilz facent comme le roy Archefilaus, qui vouloit quelquefois ouyr tout expressement; des homes enrrouez & de voix rude, aspre & mal plaisante: afin que le plaisir qu'il prendroit par apres, à ouir les hommes eloquans & bien parlâs, & les grans orateurs, fust plus grand, & qu'il en receust plus grande delectation. Ainsi faisans, ilz pourront pour le moins rapporter ce fruit, du rude & aspre stile de verité. Qu'ilz notent aussi, ce que Theophraste a dit, assauoir: qu'il estoit loisible aux hommes rudes & ignorans, de parler deuant les eloquëtz & grans personnages, mais qu'ilz parlassent par raison, & qu'ilz dissent verité.

*Curieux,
lecteurs
de folz
liures.*

*Odeurs à
porceaux*

*Liures vi
lains.*

Il y en a des autres, qui font quelque peu differens à ceux cy, & qui ne se soucient pas du tout tant du langage: mais ilz ont encore vn grand vice, commun avec les premiers: c'est qu'ilz ne prennent point plaisir à lire quelque bonne matiere & graue, & qui touche à la parolle de Dieu, & au salut de leurs ames, sinon à choses mondaines, delectables à la chair, pernitiueuses & dommageables à l'esprit & à la conscience. Et pourtant, ia soit que plusieurs bons personnages ayent escrit en françois, fort doctement & en beau langage, touchant les matieres de nostre religion: toutesfois ceste sorte de gens, ne se peuuent appliquer à lire ces bons liures, & n'y peuuent prédre goust, à cause qu'ilz n'ont pas le palais idoine à telles viandes, & qu'elles sont trop précieuses pour eux. Car les fleurs odoriferantes ne flairêt pas si bon aux porceaux, que les boubiers & fumiers. Pour ceste cause, telz hommes charnelz prérent plus de voluptez & de delectations aux liures qui parlent leur langage, qu'à ceux qui parlent le langage des enfans de Dieu. Mais la chose est encore plus detestable, aux femmes, qui prennent plaisir à lire, les liures de paillardise. Car tous ceux cy les entendent mieux, pour ce qu'ilz sont de la terre, & qu'ilz parlent de la terre: & ne peuuent comprendre le langage

ge celeste, à cause qu'il ne leur est point naturel.

Or telz liures qu'ilz desirent, ne leur defaillēt point. Car il y a assez de badins, par- *Badins des*
my le monde, qui ne seruent que de plaissan- *folz*
ter & farcier, & qui n'ont autre soing, & n'ap-
pliquent leur estude, qu'à plaire aux hom-
mes & à nourrir leur vaine curiosité: aymans
mieux dire choses plaissantes que salutaires, &
delecter la chair & les oreilles, qu'edifier la
conscience.

Cecy a encore esté l'une des causes, qui
m'ont esmeu à escrire, & à proceder d'une au-
tre maniere, que plusieurs de ceux qui ont e-
scrit deuant moy. Car ie considere, que plu- *Bons li-*
sieurs laissent de les lire, non point seulement *ures mes-*
pource qu'il est defendu en plusieurs roya- *prises &*
mes, pais & seigneuries, de lire les bons liures, *defendus.*
qui parlent de Dieu, permettant toutesfois
les autres, qui n'induisent qu'à le deshonnorer
& blasphemer: mais aussi pource que cōbien
qu'il soit permis à plusieurs de les lire, ilz n'en
tiennent toutesfois conte, à cause ou qu'ilz
leur semblent trop obscurs, & tant graues que
ilz ne les peuuent bonnement entendre: ou
que le temps leur dure, & ne prennent point
plaisir à lire liures, qui n'ont quelque plaissan-
terie, & quelque delectation, pour leur faire
passer le temps. Car ilz sont encore trop char-

nelz , & ne trouuent point de passe-temps en ces liures , qui ne parlent que de Dieu , & du salut de l'ame, s'il n'y a quelque chose pour la chair, laquelle ilz veulent seulement entretenir.

Il n'y a point de doute, que ceste maladie ne soit perilleuse, & que telles natures tant vitieuses & corrompues, ne desplaisent fort à Dieu , veu qu'elles ont tant peu de reuerence à luy & à sa parole, & qu'elles preferēt la poison, à la bonne viande. Toutesfois, à cause que entre ces natures, il y en peut encore auoir aucunes , qui ne sont pas du tout peruerfes, & malicieuses, ains ont encore quelque semence de la crainte de Dieu en elles , il me semble qu'il n'en faut pas du tout desespérer, & les abandonner totalement, comme malades incurables: mais qu'il se faut encore essayer de les gagner, s'il est possible , & se transfigurer en toutes formes , pour les induire à lire les saintes Escritures, & leur en donner quelque goust . Car si nous pouuons conuertir en bons vsages, les moyens desquelz le Diable se sert, pour distraire l'hóme de la parole de Dieu, & le fourrer du tout & l'entretenir aux vanitez de ce monde , & en pouuons vser comme d'une amorse & d'une esche , pour le retirer de telles vanitez , & l'inciter à l'estude de verité : il me semble que nous ne ferons rien indigne

digne de l'office de l'homme chrestien. Car
 ainsi que le saint Apostre a esté fait tout à *Le Chre-*
 tous, & s'est accommodé à vn chacun, en tout *sien tout*
 ce qu'il luy a esté possible, sans contreuenir à *à tous.*
 la volonté de Dieu, se faisant Iuif aux Iuifz, &
 Gentil aux Gentilz : aussi me semble il, qu'en
 mon endroit ie puisse faire la pareille, mais
 que ie n'oublie du tout la modestie chrestien-
 ne, & l'honneur & reuerence que le Chrestien
 doit à la parolle du Seigneur. Car si les maque-
 reaux de Satant aschent par belles mignotises
 & plaisanteries, de suborner les pources ames,
 espouses de Iesus, & les retirer de luy, pour
 les faire seruir & s'abandonner à leur maistre:
 ne nous fera-il pas loisible, d'vser d'un autre
 artifice, pour empescher le leur, pour descou-
 urir leurs ordures, pour les mettre en abomi-
 nation à tout le monde, & retirer les ames de
 ses bourdeaux, pour les reioindre & appoin-
 ter avec Iesus leur Sauueur?

Si vn empoisonneur couure sa poison de
 quelque viande friande, pour empoisonner &
 meurtrir les hommes: ne fera il pas, à plus iuste
 raison, permis à vn medecin, de mesler du su-
 cre & du miel parmy l'absynthe, l'aloine & le
 aloes, pour adoucir vn petit l'amertume de
 ces bruuages? qui nonobstant qu'ilz soyent a-
 mers à la bouche, sont toutesfois salutaires au *Sainte*
 corps. Car si vnetelle sainte tromperie, est di- *trouperie.*

gne de louange aux medecins des corps: pour quoy fera elle à vituperer aux medecins des ames? Pleust à Dieu, qu'il nous eust fait la grace, de pouuoir ainsi tromper sainctement tout le monde, à son profit & salut. Car le malade est heureux, qui est trompé par le medecin, à sa santé & guerison: qui est la fin, à laquelle & l'un & l'autre pretend, tant le medecin que le malade.

Liures des courans les abus. Je say bien qu'il y a desia plusieurs liures escritz, qui descouurent beaucoup d'abus, & qui se moquent assez des vaines ceremonies, idolatries & superstitions qui sont entre les Chrestiens: mais cela ne suffit pas, si quant & quant on n'enseigne quelle est la verité, & si on ne baille ferme & solide doctrine. Ce que plusieurs ont desia fait: mais à cause qu'ilz semblent trop seueres & trop graues, à ceux avec lesquelz nous auons principalement affaire, ilz ne les lisent pas, & n'y profitent point.

Il y en a des autres, qui ont suyuy vne maniere d'escrire, toute differente & contraire à ceux cy. Car ainsi qu'iceux n'ont regardé à autre chose, qu'à traiter la Parolle de Dieu en toute grauité, meureté, modestie & reuerence, adressans leurs escritz à gens de bon iugement, de sens rassis, & pleins de la crainte de Dieu: les autres au cōtraire, n'ont prins leur visée qu'au blanc de la vanité & curiosité humaine,

ne, & ont proposé de s'abstenir de toute matière graue, honneste & sainte, & d'escrire seulement des folies, plaisanteries, farceries, jeux & passetemps, cōme badins, morisqueurs, farceurs & plaisanteurs.

Et quand ilz se seroyent contenuz dedans ces limites, ilz seroyent plus tolerables: mais plusieurs ne se contentans point d'estre badins entre les hommes (ia soit que cest office ne soit guere conuenable à vn homme honnestes) ilz font encore pis. Car ilz ne s'adonnent qu'à scurrilité, & leur semble qu'ilz ne pourroyent assez delecter les hommes, si leurs deuiz n'estoyent tous pleins de propos de ruffiens & de maqueriaux, de vilainies & de blasphemes, non seulement intolerablet aux Chrestiens, mais qui seroyēt iugées dignes de grieue punition entre les Iuifz, les Turcz, les Payens & les infideles. Car si les Gentilz & les Payens n'ont pas tenu pour honnestes gens, & dignes d'estre auancez en quelque honorable office en la Re-publique, les morisqueurs, farceurs, basteleurs, bufons, mommons & plaisanteurs: quel honneur est-ce aux Princes & au peuple Chrestien, d'auoir non seulement en delices telz personages auec leurs liures, mais des autres trop plus detestables, & plus debocquez en toutes parolles fales & vilaines, que ruffiens de bourdeaux & renieurs de Dieu, &

*Office de
badin &
basteleur.*

*Liures &
propos
vilains.*

n'en vouloir point voir ny ouyr d'autres.

Parolle
oyseuse.
Matt. 23.

Penſons nous que Ieſus Chriſt ait dit ſans cauſe, De toute parolle oyſeuſe, que les hommes auront parlé, il leur en faudra rendre conte au iour du iugement? Puis que la verité, qui point ne ment, nous dit cela tant clairement, & nous menace, qu'il nous faudra rendre conte de toute parolle oyſeuſe: c'eſt à dire, vaine & inutile, qui ne ſert nullement à la gloire de Dieu, ny à edification aucune du prochain: eſtimons nous que noz ſcurrilitez ne viennent point en ce iugement: & noz detractions, meſdiſances, propos debocquez, parolles infames & diſſolues, qui ne ſeruent qu'à peruertir les entendemens des hommes, & d'adiouſter mal ſus mal, & de ietter de l'huile au feu d'auantage, & l'approcher des eſtoupes, pour mieux enflammer la concupiſſence humaine à toute meſchanceté & abomination, à laquelle elle eſt deſia par trop enclinée? Eſtimons nous que telz langages ne nous viennent point en conte, & qu'ilz ne nous ſoyent point reprochez & r'amenez deuant les yeux au iugement de Dieu?

Langage
de Chre-
ſtiens.
Col. 4.
Ephes. 4.

Ne vaudroit il pas trop mieux ſuyure l'admonition, que le ſainct Apoſtre nous fait, diſant: Voſtre parolle ſoit touſiours conſite en ſel, avec grace, afin que vous ſachiez comme il vous faut reſpondre à vn chacun. Que nulle

pa-

parolle infecte & vilaine ne procede de vostre bouche, mais seulement celle qui est bonne à edification, selon qu'il en fera mestier, afin qu'elle donne grace à ceux qui l'oyent. Et ne contristez point le saint Esprit de Dieu, ^{Ephes. s.} par lequel vous estes signez, pour le iour de la redemption & deliurance. Que paillardise & toute souillure, ou auarice, ne soit pas mesme nommée entre vous, ainsi qu'il appartient aux saintz: ou chose vilaine, ou parolle folle, ou plaisanterie: qui sont choses qui ne conuiennent rien, mais plustost que ce soit action de graces.

Voila la leçon que le Docteur des Gentilz donne aux Chrestiens, pour leur apprendre comment ilz doiuent parler, laquelle plusieurs ont tresmal estudiée & retenue. Car ilz ne profitent à autre chose par leurs parolles & escritz, qu'à infecter & empoisonner les ames, & empescher beaucoup de bons espritz, de lire de meilleurs liures, & plus profitables à leur salut. Car l'homme ne peut estre oyssif: & s'il ne trouuoit point de folz & meschans liures, pour y appliquer son estude, il seroit contraint d'en querir de meilleurs, & d'y occuper du tout son entendement, sans aucune distraction à choses inutiles.

Je say bien qu'on me pourra repliquer sur cecy, que telz personnages descourent

*Montrer le
mensonge
sans veri-
té.*

les abuz du monde en se iouant. Mais il vaudroit mieux ne les point remuer ne descouvrir, que les descouvrir & eüenter en telle sorte, que nul n'en soit edifié, mais qu'on adiouste tousiours infection sur infection: qu'on remplisse tout de puantise, & qu'on n'apprenne aux hommes sinon à se gaudir, railler, moquer & bauer de toute religion. Car par ceste maniere de faire, ilz peuuent plustost faire d'un superstitieux & d'un hypocrite, vn homme sans Dieu & sans religion, qu'un bon religieux & vn saint personnage. Car ia soit qu'ilz monstrent la folie des hommes, & ce qui n'y doit point estre, ilz ne monstrent pas toutesfois ce qui y doit estre, & quelle est la vraye sagesse, & le remede pour pouruoir à telles maladies.

*Les dispu-
tations de
Ciceron.*

Il est assez facile de se moquer du mensonge, & de monstrier ce qui n'est point: mais cela ne suffit pas, si on ne monstre la verité & ce qui est. Il ne suffit pas de cognoistre l'Ante-christ, si quant & quant on ne cognoit Iesus Christ. C'est enseigner à la maniere que Ciceron dispute de la nature des dieux, laquelle est plus propre pour monstrier ce qui n'est point Dieu, que ce qui est Dieu. Telle façon de faire n'apporte point de resolution à la conscience, mais la laisse tousiours en doute & erreur. Et quand ceux cy ne feroient point pis, encore feroit-ce quelque chose. Ilz n'auroyent pas

pas du tout perdu leur temps, d'auoir incité les hommes, & mis vn desir en eux de s'enquerir de verité, pour la cognoistre. Car ce n'est pas vn petit profit, ny vn petit auantage, d'auoir desia auancé iusques là. Mais ceux-cy, desquelz ie parle, ne suyuent point le stile, ie ne dy pas de quelque bon Theologien, mais seulement de quelque bon Philosophe Payen: ains semble qu'ilz se soyent totalement adonnez à l'imitation de Lucian, homme sans Dieu & sans religion, moqueur & contempteur de Dieu & des hommes.

*Lucia &
Lucianis-
tes.*

S'il est question de passer le temps, de se rire, iouer & gaudir des superstitions & idolatries, des bigoriz, des caphars & des hypocrites, & de tous les estatz du monde, il ne nous faut ia chercher autre autheur. Nous n'auons point besoing de ces nouveaux Lucianistes, qui ne sont que ses petis disciples, pour luy porter le liure apres. Car s'il faut faire comparaison du langage, ilz n'approchent point de son eloquence. S'il faut comparer l'esprit & le sa- uoir, il y a autant à dire, que de l'apprenty au maistre. Parquoy, si les escritz de Lucian, & les matieres qu'il traite, estoient fort vtiles & necessaires à ceux qui ne les peuuent lire en langue Greque, ou translatée en la Latine: ie conseilleroye plustost à ses disciples, de trauailler & employer leur eloquence à le bien transla-

ter en langue Françoisse, qu'à nous forger des nouueaux Lucians, qui ne luy font que desrober ses inuentions & argumens, pour les attribuer à eux, comme s'ilz en estoient les premiers auteurs & inuëteurs. Car quelque meschant & ennemy de Dieu & de toute religion qu'il ait esté, toutesfois nous ne pouuons nier, qu'il n'ait esté sauant homme, grand orateur & philosophe, & qu'il n'ait escrit beaucoup de choses bonnes, & trop meilleures, que ne font ceux cy: desquelles l'homme fidele peut bien faire son profit aucunement, pour cognoistre plusieurs grans abuz, & corriger les mauuaises mœurs, mais qu'il les lise d'un autre esprit & intention, que luy n'a escrit, & qu'il sache trier l'or du milieu de la fiente, & separer la poison de la bonne viande. Car il y a beaucoup de meschancetez aux escritz d'iceluy, & beaucoup de propos d'Epicuriens & de meschant homme. Parquoy, il est dangereux de tōber en la lecture de telz auteurs, si premierement on ne s'y est preparé comme par vne contrepoison, par la lecture des saintes Escritures. Pour laquelle cause, il n'y auroit pas grand dommage, quand tous telz liures seroyent periz, desquelz les lecteurs peuvent tirer plus de venin que de bonne doctrine. Mais ceux que ie repren à present, sont encore pires. Car ilz n'enseignent rien qui puisse
 ser-

feruir à la gloire de Dieu, ny aux bonnes mœurs, ny à l'edification de l'Eglise, ny à la ciuilité, ou à la cognoissance des choses naturelles, humaines ou diuines, fors qu'à iouer le badin, & se bauer de tout le monde, & se moquer & despriser aussi bien la vraye religion Chrestienne, que les superstitions & abominations de l'Antechrist. Car s'ilz veulent dire vne parolle honneste, il la faudra accompagner de cinquante deshonestes. S'ilz mettent vne verité sur les champs, il faut qu'elle soit tousiours enuironnée de mille infametez, comme de damoiselles d'honneur & de garde-corps, pour la couvrir, defendre & contregarder, qu'elle ne soit prinse au descouuert.

Combien peut profiter ceste maniere d'escrire & de parler? Car l'oraison de verité *La nature de verité.* est simple & ouuerte. Parquoy, elle ne veut point telles couuertes & telz mâteaux, mais veut cheminer au descouuert. Si nous auons compassion des loix ciuiles & imperiales, à cause qu'estés belles en ellesmesmes, elles sont deshonorées par les bordures de ces gloses *Bordure des loix & de verité.* & fientes Accursianes & Bartolines, & commentateurs barbares: que pouuons nous dire de verité, tant noble & fille du Roy eternal, accompagnée de damoiselles tant sales & vilaines, & deformée de tant d'ordures qui la corrompent & luy ostent toute sa beauté?

De repliquer, qu'il n'est pas seur & sans dangier, de dire verité en autre maniere: ie respon à cela, qu'il se vaudroit mieux taire du tout, que la prescher en telle sorte: & qu'il seroit meilleur de ne bailler point de viande à vn homme, que de luy bailler de la poison, pour le tuer. Parquoy, tout bien conté & rabatu, ie ne say qu'on peut conclurre autre chose de telle doctrine, sinon que les auteurs d'icelle donnent occasion à ceux qui ont quelque crainte de Dieu, de les tenir pour Lucianistes: & à ceux qui n'en ont rien, ou bien peu, de le deuenir du tout, & de les reculer plus de la verité, qu'ilz n'estoyent. Nous voyons cecy tous les iours, par experience, en plusieurs ieunes enfans, & marchans, & gentils-hommes, & damoiselles, & courtisans: qui apres auoir gousté telz liures, sont dégoustez de tous les autres, qui ne leur sont semblables. Parquoy, ie voudroye bien conseiller à ces personnages de si bon esprit, qui s'adonnent à composer telz liures, & les prier au Nom de Iesus Christ, & tant qu'ilz ayment son honneur & le leur, d'apliquer ce beau entendement, que Dieu leur a donné, & celle rhetoricue & don d'eloquence, duquel ilz sont douez, en quelque meilleur estude & matiere plus vtile & plus profitable: afin qu'ilz ne soyent reprins d'auoir abusé du don de Dieu, contre son honneur & gloire.

Pour

Pour ceste cause ie me suis mis à escrire d'vnē sorte, qui paraüenture semblera vn petit mal conuenable à vntheologien, c'est à dire, à vn qui veut parler des lettres diuines, & des matieres concernäntes la religion: mais ie pense, que quand on aura entendu mes raisons, on prendra mon aduis & deliberation en bonne part, & que ie ne laisseray à nul iuste occasion de m'accuser & reprendre en ce que ie repren les autres, si on n'ayme mieüx seruir à ses affectiöns & à calomnie, que iuger des choses à la verité & selon equité.

J'ay desia touché quelques raisons, qui m'induisoyent à ce faire, outre lesquelles i'en adiouste encore plusieurs autres. La premiere c'est, que i'ay voulu essayer d'induire par mon exēple, ceux qui ont meilleur esprit que moy, de faire ce que moymesme ne say pas faire si bien qu'il seroit requis: laquelle chose ne doit pas sembler trop estrange. Car vne pierre & vne queux à aiguiser le fer, l'aiguise bien, & le fait couper, & si est neantmoins rembouchée & ne coupe point. Pour le moins ie tasche de monstrier à ces bons espritz, qui se delectent à choses plaïsantes, & s'occupent à telles vanitez, de la matiere en laquelle ilz pourröt exercer leur entendement & eloquence plus à leur hōneur deuät Dieu & les gens de bien, & à plus grand profit qu'ilz ne font, s'ilz ne se

veulent appliquer à matieres plus hautes & plus grandes, comme plusieurs ont fait, tant entre les anciens que les nouveaux.

Et si moymesme ne say pas faire ce que ie veux enseigner aux autres, pour le moins ie leur feruiray de quelque patron, auquel ilz pourront trouuer quelque chose pour ensuyure: ou, au pis aller, la faute qu'ilz trouueront en ma maniere de proceder, les admonnestera des vices qu'ilz deuront fuir en leurs escritures: lesquels s'ilz trouuent en mon stile, ou en mon inuention, ou disposition, ie suis certain qu'ilz ne trouueront rien en la sentence & en la substance des choses, indigne d'un homme Chrestien. Car quelque chose qu'il y ait, ie croy qu'on n'y trouuera chose qui puisse induire à heresie, si la faute ne vient, non pas de moy & de mon intention, mais de ceux qui de euxmesmes pretendent à cela, & qui, comme les araignées, tirent le venin de par tout, & les heresies des saintes Escritures mesmes, qui nous sont données, pour nous garder de toute heresie.

Combien que ie me moque des abuz, des erreurs, des heresies, des superstitions & idolatries de l'eglise de l'Antechrist: toutefois, qui considerera la matiere de pres, & qui aura la patience de lire toute la teneur de la sentence & de l'argument, iusques à la fin, s'il n'est

*Maniere
de se mo-
quer à la
gloire de
Dieu.*

n'est de peruers iugement, il fera contraint de cognoistre & confesser, que ie ne me moque de chose qui ne soit digne, non seulement de moquer, mais de la haine & abomination de tout le genre humain: il cognoistra, que ie ne descouure pas seulement les abuz, sans monstrier quant & quant le vray vsage des choses, qui ont esté corrópues par iceux: & que ie ne condamne pas les erreurs & le mensonge, sans móstrer la verité qu'il faut suyure, & en quoy le fidele se doit arrester: & que ie ne manifeste pas l'Antechrist, pour le fuir, sans monstrier Iesus Christ, pour le suyure.

Parquoy il me semble, que ceux qui ont les oreilles tant delicat^{es}, qu'ilz ne peuuent seulement endurer vn petit mot ioyeux, contre l'idolatrie & la superstition, & les grans abuz qui menēt tout le monde à ruine, ne sont pas iuges fort equitables, mais de iugement trop corrompu & peruert^y. Car quel iugement est-ce, de voir & d'ouyr blasphemer le Nom de Dieu, la mort & la passion de Iesus Christ tous les iours, tant horriblement, & tant euidemment & publiquement, & n'en sonner mot: & estre cependant tant inique & aigre reprenneur, & iuge tant seuer^e contre ceux qui seulement en se iouant, admonnest^{er}ont & reprendront telz blasphemateurs?

Ilz endureront bien que telz persona-

*Zelateurs
de l'hon-
neur hu-
main, trai-
stres du di-
uin.*

ges se moquent de Dieu publiquement, qu'ilz le blasphement sans honte aucune: qu'ilz renuersent toute la religion & la verité de Iesus Christ: qu'ilz aneantissent la vertu & l'efficace de sa mort & passion: qu'ilz mangent & deuorent ses pources brebiz deuant leurs yeux: qu'ilz menent les pources ames à perdition & à damnation eternelle: qu'ilz detiennent tout le monde en erreur & idolatrie, pour le ruiner du tout: & ne pourront souffrir cependant, qu'on donne seulement vn petit d'eau beneite de court, à telz blasphemateurs & moqueurs de Dieu & des hommes, & qu'on les arrouse le moins du monde, seulement de quelque petit dicton, ou de quelque parolle ioyeuse, laquelle ne peut porter dommage à personne, & n'est point au deshonneur de Dieu, mais sert à descouurer les abuz, & à dégouster les fidelles d'idolatrie & de superstition, & leur manifester les seducteurs, pour le salut de leurs ames.

Je suis esmerueillé de ces grans zelateurs de l'honneur des hypocrites, des seducteurs, des faux-prophetes, des rauisseurs & mangeurs des pources vesues & des orphelins, des moqueurs, contépteurs & blasphemateurs de la Parolle de Dieu, qui tant peu se soucient de l'honneur de Dieu & de Iesus Christ nostre Seigneur: lequel ilz voyent tous les iours crucifier

*L'honneur
de Iesus
foielle.
Heb'. 6.*

cifier deuant leurs yeux, & cōculquer & fouler le sang de son Testament & alliance, & si n'en osent sonner mot. Mais qui pis est, ilz ne veulent pas encore permettre, que les autres, à qui Dieu a donné le moyen & la hardiesse, parlent, & reprenent telz abuz & sacrileges importables à tout bon cœur Chrestien.

Il me semble que telles gens n'ont point iuste occasion de nous condamner en cest endroit. Car s'ilz sont trop sages, & s'il leur semble que telles choses ne conuiennent pas à la grauité de leurs personnes, qu'ilz les laissent donc dire aux folz, puis qu'on dit, qu'ilz ont *Trop sages.* priuilege & congé de tout dire. Car de mon costé, ie seroye bien content, que Dieu m'eust fait la grace, que ie leur peusse dire, cōme l'Apostre aux Corinthiens: Vous estes sages, & nous folz, pour l'amour de Christ. *Priuilege des folz.* *1. Cor. 4.*

S'ilz veulent prescher Iesus Christ couuert & masqué, qu'ilz ne soyent pas marriz si nous le preschons tout nud, & iceluy crucifié, & si nous ne nous sauons glorifier, qu'en la folie de sacroix, comme l'Apostre: laquelle toutesfois est la vraye sagesse de Dieu, combien que le mode la reputé folie. Car nous voyons bien quel profit il vient de leurs predications tant couuertes, desquelles nul ne peut guere rapporter de fruit, s'il n'entéd la matiere qu'ilz traitent, presque aussi bien qu'eux. Car quel- *Prescher Iesus Christ masqué & couuert.* *1 Cor. 1. 2.* *Gal. 6.*

le vtilité en peut il reuenir aux poures ignorans, pour lesquelz les sermons doyuent estre principalement faitz? Ne demeurent ilz pas tousiours en leur erreur? & n'y font ilz pas confirmez d'auantage, par leurs enigmes, & parolles couuertes & enueloppées? Car les auditeurs les tirent à leur auantage, & les interpretent selon leur sens, non pas selon celuy du diseur, s'il ne s'explique clairement, ou pour le moins, en maniere que on ne puisse entendre vne chose pour autre. Car le pource peuple ne peut pas entendre facilement celle sophisterie, ne cōprendre leurs enigmes & problemes, veu qu'il est encore bien empesché à entendre ce qu'on luy declare comme aux petis enfans. Si vn homme sauant fait bien tirer de leurs sermons les consequences auxquelles ilz veulent mener, combien s'en trouuera il d'autres qui feront tout le contraire? Et quand il n'y auroit que leur silence, par laquelle ilz dissimulent les abuz, & l'idolatrie, n'approuuent ilz pas assez la fausse religion?

Je crain fort, qu'il ne s'en trouue plusieurs, entre ces tant sages & discretz, qui sont tant promptz à iuger & à condamner tous ceux qui ne suyuent leur conseil & prudence charnelle, semblables à Demades, qui se moquoit des Atheniens, à cause qu'ilz se metto-

yent

yent en dangier de tomber en l'indignation du grand Alexandre, & de perdre leurs terres, & leur ville & pais, pourtant qu'ilz refu-
 foyent de bailler audit Alexandre, les hon-
 neurs diuins, & de l'adorer comme vn Dieu. Et pourtant il leur disoit: Donnez vous garde, qu'en cuidant garder le ciel, vous ne perdiez la terre. Il vouloit donner à entendre aux Atheniens par cela, qu'ilz estoient de grans sotz, de se mettre en tel danger, pour garder l'honneur des dieux: & qu'il leur valloit mieux estre idolatres des hommes, & honorer Alexandre comme vn dieu, que perdre corps & biens. Ilz suyrirent aussi ce conseil.

Pour ceste cause Diogenes leur disoit, en se moquant de leur vanité & flaterie: Puis que vous avez fait Alexādre dieu, & que vous le tenez & hōnorez pour Bacchus, faites moy aussi Serapis, & m'honorez comme luy. Car ainsi que Bacchus estoit adoré entre les satyres, aussi Serapis estoit adoré & honoré en Egypte, en espee de beuf, & tenu pour le grand dieu: duquel il y auoit loy, que qui l'appelleroit homme, & ne le tiédroit pour dieu, perdrait la vie. Parquoy presques en tous les temples auxquelz Serapis estoit honoré, & Isis pareillement, ilz auoyent de coustume de tenir vne image semblable à celle que les Romains auoyent dressée pour représenter An-

Vale.
 Max.
 lib.7.cap.
 2.
 Ambition
 d'Alexan
 dre.

Diogenes

Bacchus
 Serapis.
 August.
 de ciui.d.
 lib.18.c.5.

Macro.
 lib.3.ca.9.
 Varro de
 ling.lar.

Plin. li. 3. gerona la deesse de silence, appellée aussi Ta-
Sol in. cita. Pour ceste cause ilz la peignoyent ayant
Plutar. la bouche serrée & bouchée, & l'honoroyēt
in Num. deuant les portes: voulant signifier par cela
Sempro. qu'il n'estoit loisible à personne de publier ce
lib. de di- que les anciens vouloyent estre tenu secret en
nif. Ita la poitrine à bouche serrée, pour le salut de la
Epiph. chose publique. Les Egyptiens auoyent au
cōt. har. lieu de ceste deesse leur dieu Harpocrates, le-
lib. 3. quel ilz peignoyent en forme d'enfant tenant
Terul. son doigt sur sa bouche. Cela estoit vn signe,
in Apol. par lequel les Egyptiens vouloyent admone-
Angerona ster vn chacun de tenir silence, afin qu'on ne
Harpo- dit rien contre ces beaux dieux, qui peust por-
crates. ter dommage aux diseurs.
Silance.
Ouide
Metam. 9.

Or pleust à Dieu, que nous n'eussions pas tant d'Alexandres, de Serapis & d'Isis, qui estans hommes mortelz, veulent neantmoins estre tenus comme des dieux entre les hommes: entant qu'ilz veulent que leurs idoles, leurs loix, leurs ceremonies, leurs traditions, leurs statuz & ordōnances soyent preferées à Dieu & à sa parolle. Car ceux qui se glorifient d'estre prelatz de l'eglise, & princes du peuple chrestien, qui font des editz tant cruelz, pour imposer silence à tous, & empescher les hommes fideles de confesser Iesus Christ & sa verité, & magnifier sa parolle, & parler franchement contre l'Antechrist & sa fausse doctrine,

ne, & les faux-prophetes: en quoy font ilz differentz à ceux là? N'est-ce pas mettre les hommes au lieu de Dieu? & contraindre les hommes à tenir pour dieux, les hommes mortelz? Car celuy qui met les loix humaines, au lieu des loix diuines, iceluy met l'homme au lieu de Dieu, & le prefere à luy. Et celuy qui defend de publier la loy & la parole d'iceluy, la quelle il a commandé de publier à tous: n'entreprend il pas, comme les geans, de monter au ciel, pour abbatre Dieu de son siege: Combien auons nous maintenant de ces dieux terriens sur la terre, qui cōbien qu'ilz ne s'osent pas faire dieux tant manifestement comme Alexandre, ou Serapis, & Isis: toutesfois ilz approchent fort de leur tyrannie, mais par autre voye, & souz autre couleur? Car il faut que presque tous les Chrestiens ayent la bouche cousue, pour sanctifier le nom du haut Dieu, comme ilz en ont le commandement: & qu'ilz l'ayent seulement ouuerte, & leur langue franche, pour blasphemer Iesus Christ, & magnifier l'Antechrist, & les traditions d'iceluy.

Pleust à Dieu qu'il n'y eust pas aussi tant d'Harpocrates, qui ne font pas seulement signe du doigt, à ceux auxquelz Dieu a donné le cœur de confesser verité, qu'ilz se taisent, & qui ne sont point aussi images muetes, mais savent bien parler pour reprendre ceux, qui ont

meilleure affectiō qu'eux, & qui disent ce que eux n'oferoyent entreprendre. Car ilz ne veulent point perdre la terre, pour garder le ciel: ains tiennent pour folz, & pour temeraires & enragez ceux qui se font persecuter, pour soutenir la parolle du Seigneur. Mais il y a danger, qu'en cuydant garder la terre, laquelle ilz preferent au ciel, ilz ne perdent & le ciel & la terre: comme est aduenü à plusieurs, qui ont mieux aymé fuyure le conseil de Demades, que celuy de Iesus Christ, & l'exemple d'iceluy & de ses Apostres. Or ceux cy, qui ont les oreilles tant delicates & tant chatouilleuses, qu'à peine ilz peuuent endurer, non seulement qu'on reprenne aigrement les superstitions & idolatries, desquelles toute la Chrestienté est tant infectée qu'à peine elle retient plus aucune marque de Chrestienté, mais ne peuuent aussi endurer qu'on en parle seulement en ieu: comment endureroient ilz la liberté & l'aigreur, & les irrisions fort ameres, & les brocardz poingnans iusques au sang, des vieilles comedies des Grecz, & des Satyres anciennes des Latins? Comment endureroient ilz aux ministres de Dieu, vne telle liberté à reprendre la fausse doctrine, que celle de laquelle le poete Epimenides a vsé contre les Candiens, les appellant menteurs ordinaires, mauuaises bestes, ventres paresseux, pour raison de ce qu'ilz

qu'ilz se vantoyent d'auoir vers eux, le sepulchre de Iuppiter. Toutesfois nous auõs beaucoup plus de raison que luy, pour reprendre aigrement noz idolatres. Car s'il trouuoit estrange, que les Candiens se ventassent, d'auoir entre eux le sepulchre de Iuppiter, qui a esté homme mortel, pourtant que l'erreur des Payens le tenoit pour Dieu immortel: cõbien auons nous plus iuste occasion d'estre offenze de noz idolatres, qui nous retirent totalement du ciel, auquel nous deuõs aller chercher Iesus Christ, & l'adorer en esprit & verité, pour nous enseuelir du tout en la terre, & nous y faire chercher Iesus Christ, entre les choses corruptibles: Lequel non seulement remplit le ciel & la terre par sa diuinité, mais aussi est esleué par dessus tous les cieux, iusques à la dextre du Pere, en son humanité. Ceux qui ne peuvent endurer qu'on reprenne telz idolatres & telz seducteurs, comment endureroient ilz qu'on les reprinst euxmesmes? Je parle des sages, qui se glorifient del'Euangile, qui ne peuvent supporter vne telle liberté & rondeur, pourtant qu'ilz se sentent condamnez par telles reprehensions, entant qu'ilz se taisent, & supportent telz blasphemies: ou pourtāt qu'ilz craignent, que ceste liberté des autres, ne leur nuise, & leur diminue leur repos, auquel ilz veulent pouruoir, en obeissant à l'admonition

du Dieu Harpocrates.

Il y en a entre ceux cy aucuns, qui se meslent de prescher, mais ilz y procedēt quelquefois si sagement, qu'ilz ruynent plus par leurs dissimulations, qu'ilz n'edifient par leur doctrine. Car quelle edification font ceux la, qui en leurs sermons couuers, mettent tousiours vne verde entre deux meures, ou plustost vne meure entre deux verdes, desguifans tant qu'ilz peuuent la verité de Dieu:& puis apres auoir presché, pour la moindre crainte qu'ilz auront, se desdiront de tout ce qu'ilz auront presché de bon, & renieront Iesus Christ publiquement, en grand scandale de tous les pources fideles, lequel ilz n'ont iamais confessé, qu'en particulier, en secret & cachette?

Ie ne dy pas cecy pour reprocher à personne son infirmité, & son inconstance, ou crainte charnelle, par laquelle tel qui cuide estre bien hardy & constant, se trouue surprins: mais ie parle seulement à vntas de glorieux, qui font ces choses, & des autres encore pires, & toutesfois ilz veulent encore pallier leurs fautes, & condamnent les pources fideles, qui hazardent leur vie pour auancer & amplifier le royaume de Dieu, & qui viuement & constamment reprennent l'idolatrie & les abzuz. Il me semble qu'ilz entendent fort mal quel doit estre l'office du Prophete, auquel il n'est

*L'office
de Pro-
phete.*

n'est pas seulement cōmandé du Seigneur, de planter & d'edifier: mais aussi d'arracher & de ruiner, pour pouuoir planter & edifier par apres: & de crier à haute voix, comme vne Hier. 1.
Esa. 58. trompette, pour annoncer au peuple non pas ses vertuz & louanges, mais ses iniquitez, & à la maison de Iacob ses pechez. S'ilz veulent bien satisfaire à cest office, il est necessaire qu'ilz obeissent plustost à Iesus Christ leur Dieu & leur sauueur & redempteur, qu'à ce dieu muet Harpocrates, qui ne parle que par signes. Car ilz sont trop contraires l'un à l'autre. Iesus Christ dit: Dites en public, ce que ie vous dis en secret: & preschez sur les toitz, ce que ie vous dis en l'oreille. Au contraire, le dieu Harpocrates, mettant le doigt sur sa bouche, dit, sans sonner mot, ce dequoy le Satyrique nous admoneste, disant: Tiens les leures ferrées du doigt. Iesus Christ dit: Parlez: & l'Antechrist, Ne sonnez mot. Auquel faudra'il plustost obeir?

S'ilz veulent dire, que nous, qui sommes hors du dangier: auons beau iaser: qu'ilz nous laissent donc faire, ce qu'ilz ne veulent, ou n'osent ou ne peuuent faire. S'il leur semble que ce soit matiere trop abiecte pour eux, & qu'ilz ne se veulent occuper qu'à choses graues & d'importance, qu'ilz nous laissent enfantiller avec les enfans, & abbaïsser avec les petis, &

vser de nostre rusticité avec les rustiques, & edifier les pources ignorans, ainsi qu'ilz edifient les sauans, & descourir les erreurs, à ceux qui ne les cognoissent. S'ilz sont grans theologiens, & philosophes, seueres & tetriques, que ilz noustiennent pour petis grammariens, qui ne faisons qu'un petit desgrosser les matieres, & mascher aux simples, & aux petitz, la viande un petit plus menue, pour les preparer à leur escole, & à vne plus haute philosophie.

Les manieres de parler iointes en la sainte Esriture.

S'il leur semble qu'il faille traiter telles matieres, en plus grande grauité & modestie, ie ne nye pas, qu'on ne sauroit traiter la parole de Dieu, en trop grand honneur & reuerence. Mais ie voudroye bien aussi, qu'ilz considerassent, que la parole de Dieu n'est pas tellement seuer & tetrique, qu'elle n'ait ses ironies, ses ieux honnestes, ses brocardz & dictions cōuenables à sa grauité & maiesté, quand la chose le requiert. Qui en voudra faire l'experience, qu'il considere comment Dieu luy mesme, & Iesus Christ ce grand orateur celeste, parle quelquefois, en reprennant ou ses disciples, ou les hypocrites & les reprouuez. Et sans amasser beaucoup d'exemples, qu'ilz regardent seulement, quelle responce Ioas, le pere de Gedeon a faite aux bourgeois & citoiens de sa ville, qui se plaignoyent à luy de son

son filz, qui auoit abattu l'idole Baal & son autel. Qu'ilz aduisent aufsi, quelz propos Helie ^{3 Rois. 18.} tient aux prophetes de Baal, & Efaie, contre ^{Esa. 41.} les Babyloniens & leurs idoles. Quelz brocardz leur baillent ilz? Ceux cy toutesfois estoient tous deux Prophetes, fort graues & fort seueres. Et au liure de Sapience, & en Baruch, & en l'epistre attribuée à Hieremie, ^{Sap. 13. 14.} comment y sont traitées les idoles? ^{17. 16.}

Ie me deporté d'alleguer aufsi les exemples de tât de bons docteurs anciē, qui se sont tant moquez par leurs liures & leurs escritz, ^{Les anciens docteurs.} des superstitions & des heresies des heretiques, & des idolatries payennes: qui auoyent neantmoins trop plus de raison & d'apparence, que celles contre lesquelles nous bataillōs à présent. Qui ne m'en voudra croire, lisē leurs œuures, principalement de Tertullian, d'Eusebe, de Lactance, d'Arnobius, d'Augustin, de Hierosme & autres semblables, sur tout celles qu'ilz ont escrit, contre les Payens & les heretiques.

Pourquoy ne nous fera donc permis en dialogues, ce que nous ne reprenons pas en ces grans personnages, quand ilz ont parlé en leur personne mesme? laquelle requiert toutesfois plus grande grauité, que s'ilz introduisoient des autres personnages parlans & disputans ensemble, comme ie fay en mes dialogues.

gues & disputations. Car il n'y a nul de bon iugement, qui n'entende bien, qu'il n'y a maniere d'escrire, qui ait guere plus de liberté & de licence, apres la poesie, que les dialogues & les colloques. Car il faut introduire les personnes parlantes, selon celuy qu'elles representent: lesquelles parlent bien souuent plus selon leur sens, & le sens du personnage qu'elles iouent, que selon celuy de l'auteur. Cōbien que l'auteur ait volontiers accoustumé d'en elire quelqu'une, par laquelle il donne assez à cognoistre, quelle est son opiniō, & la meilleure sentence.

*Les per-
sonnages
des dialo-
gues.*

Pourtant i'ay introduit quatre personnages, de diuerses qualitez & opinions, & les fay parler, selon les propos qui se tiennent au iourd'huy entre les hommes, & selon l'affection & la nature d'un chacun d'eux. I'en introduy vn, comme homme fort deuot & craignant Dieu, qui toutesfois est encore tout enueloppé de superstition & d'erreur, & maintient les traditiōs humaines: mais non pas d'un mauuais cœur, comme font plusieurs, qui resistent à verité plus par malice & obstination, que par simplicité & affection qu'ilz ayent à leur religion. Et pourtant il est appellé Eusebe, qui signifie presque autant comme Religieux, ou deuot. Cestuy represente la personne d'un homme craignant Dieu, avec
zele

zele sans la vraye science & cognoissance de verité, qui n'est toutesfois pas indocile.

I'en introduis vn autre, qui n'est point bien asseuré, ne d'un costé ne d'autre, ains est troublé en sa conscience, & ne fait bonniement à qui croire: mais chancelle d'une part & d'autre, & toutesfois desire savoir la verité, & s'en enquierit. Il cognoist desia beaucoup d'abuz, mais non pas tous, ny à quoy il se peut asseurément resoudre. Et pourtant il est appellé Thomas. Car il ne veut croire sinon à bonnes enseignes. Cestuy n'est pas tant pesant & graue, que le premier. Parquoy il parle vn petit plus ioyeusement, & ne se soucie pas tant des traditions humaines: & n'est pas tant affectionné apres, ne tant seueré qu'Eusebe, qui est encore du tout enraciné en ses vieilles superstitions.

En apres il y en a vn, qui represente la personne d'un homme fort graue, honneste, & sauant aux lettres diuines & humaines, qui parle tousiours en grand honneur & reuerence de la Parolle de Dieu: & baille pour la plus part la resolution des questions & des propos les plus difficiles, demenez d'un costé & d'autre, iouste la sentence des saintes Escritures, & des anciens docteurs Ecclesiastiques. Cestuy s'appelle Theophile, qui signifie autant comme Amy de Dieu: & represente la

personne d'un theologien exercité aux saintes Escritures, & aux anciens docteurs de l'Eglise & ayant la crainte de Dieu.

Pour le quatr'ieme, il y en a vn, qui est vn petit plus euété que cestuy cy, & vn petit plus desgorgé, pour parler libremēt cōtre les abuz: mais il le fait en plus grande modestie & honnesteté que les Caphars ne parlent contre les ministres & amateurs de verité. Je feing cestuy cy plus exercité aux lettres humaines que les autres, & qui parle volontiers plus ioyeusement: mais en telle sorte, qu'il se ioue à bon escient, & qu'il ne dit rien, qu'au deshonneur de l'Antechrist, pour magnifier Iesus Christ, & qui ne soit corrigé par son compagnon, s'il y a quelque chose à reprendre. Cestuy est appelé Hilaire qui signifie ioyeux: & represente la personne d'un homme facetieux, cognoissant la verité, qui combien qu'il n'est des plus graues & seueres, toutesfois il n'est pas sans grande crainte de Dieu, ny tant addonné à faceties & ioyeusetez, qu'il ne sache parler graueement, & tenir sa grauité, quand il est expedient.

Puis qu'ainsi est, si quelcun me vouloit trouuer à dire, pource qu'il semble quelque fois, que cestuy ioue le personnage d'un moqueur, & qu'il mesle les lettres humaines, les histoires & poesies parmy les diuines: qu'il
confi-

confidere la personne qu'il represente, & qu'il ne dit chose tant absurde ne tant estrange, qui ne serue à la matiere presente, & qu'il ne s'en face encore d'avantage & de plus enragées.

Outreplus, si saint Paul, par occasion, a bien quelquefois allegué le tesmoignage des Payens, voire des poetes mesme, pour servir à son propos, en matieres si hautes & si graues, que celles qu'il a traitées : & si les anciens Docteurs de l'Eglise, desquelz i'ay desia parlé, le ont encore fait d'auantage, & se sont si bien seruy de leurs liures, pour combattre leurs ennemis par leurs ennemis mesmes, & les conueindre de leurs vanitez & erreurs par leur propre tesmoignage : il me semble que ie ne doy pas estre condamné, en la cause que i'ay commune avec eux, suyuant leur exemple. Car ceste maniere de faire sert beaucoup pour esclaircir les matieres, & fasche beaucoup les aduersaires. Il appert en Iulien l'apostat. Car il a esté tellement fasché de ce que les Chrestiens monstroyent la vanité qui estoit en la religion des Payens, par leurs liures mesmes, qu'il a esté contraint, par despit, de faire defense aux Chrestiens de les lire, disant : Nous sommes transpercez de noz plumes. Il ne doit donc point sembler estrange, si i'ensuy leur exemple en choses semblables : principalemēt quād ie veux monstrier à l'œil comment les supersti

*Lettres humaines
meslées
parmy les
diuines.
Aa. 17.
1. Cor. 15.
Tit. 1.*

*Decret de
Iulien
l'Apostat.
Hist. Tri.
li. 9. c. 17.*

tions & les idolatries des Chrestiens sont prises des Payens & des idolatres anciens, & du tout semblables aux leurs, ou pires, & dont elles ont prins leur source & naissance, & accroissement, & par quel moyen. Laquelle cognoissance est aujourdhuy grandement necessaire. Car la plus grande cause du trouble, que plusieurs ont en leur conscience, quand ilz oyent condamner pour abus, erreur & heresie, ce qu'ilz ont tenu pour vraye religion, avec leurs predecesseurs, & pour vray service de Dieu, c'est qu'ilz ne savent quelle est la source de telles choses, ne dont elles sont prises, ne par quel moyen elles ont esté transportées en la religion Chrestienne. Et pourtant ilz pensent que Dieu ait ordonné la forme de religion qu'ilz tiennent, & qu'elle leur ait esté apportée par les Prophetes, & les Apostres, & vrais serviteurs d'iceluy. Pour ceste cause ilz disent, quand on reprend leurs superstitions & idolatries: Si ce que nous faisons n'estoit de Dieu, d'ou seroit il venu? Noz peres d'ou l'auroient ilz prins? Comment eust il tant duré? Il est donc bien requis que telz personages cognoissent quel Dieu, quelz legislateurs, & quelz Prophetes & Apostres ilz ont.

Et pourtant ie n'allegue pas le tesmoignage des Payens, par faute que la verité de Dieu ne soit suffisante d'elle mesme, pour s'approu-

prouer & maintenir, mais pour luy faire ser-
 uir toutes choses, & pour mieux faire cognoi-
 stre la lumiere aupres des tenebres, & la verité
 aupres du mensonge : & pour mieux conuain-
 cre les effrontez seducteurs, qui veulent enco-
 re pallier leurs heresies & abominations, si on
 ne les leur monstre avec le doigt, & si on ne
 les prend comme le larron sur son larrecin, &
 la putain effrontée avec son paillard. D'autre-
 part, il faut aussi considerer, que quand nous
 parlons des abuz, des erreurs, des heresies &
 des superstitions & idolatries des hommes :
 nous sommes contrains de recourir aux tes-
 moignages de ceux vers lesquels nous pou-
 uous trouuer telles choses, & des theologiens
 qui en ont traité. Car quand il est question de
 la religion Papale, nous en trouuerons plus de
 fondement aux liures des Payens & des anci-
 ens heretiques, qu'aux saintes Escritures. Par-
 quoy, il nous est force d'alleguer telz tes-
 moingz à ceux qui veulent maintenir telle do-
 ctrine, pour la leur approuuer. I'ay aussi con-
 sideré qu'il y a beaucoup d'estudians, qui ont
 cognoissance des lettres humaines, qui pour-
 ront aucunement voir en la procedure que ie
 tien, comment ilz les pourront faire seruir à
 l'honneur de Dieu, & y pourront aucunemēt
 refreschir la memoire de leurs estudes, & y
 trouuer beaucoup de choses, qui leur pourrēt

seruir à l'auancement d'iceux. Voila donc beaucoup de raisons, qui m'ont peu esmouuoir iustement à vser de tel stile.

*2. lib. de pa-
rien. ca. 33.*

S'il y a encore quelcun qui ne se vueille cōtenter de ces raisons, ie luy mettray au deuant telle excuse & defense, que Mantuan fait pour soy, en cause presque semblable, disant: Ne pense pas que ie soye à reprendre, pource que i'ay recours à l'autorité d'un homme Payen. Car saint Augustin, qui est de noz Docteurs, dit: Si les Philosophes ont dit quelques choses conformes à nostre Foy, tant s'en faut que les deuions fuir ne craindre, que plustost les deuons conuertir en nostre vsage & profit, comme choses recourées & ostées aux possesseurs iniustes, pour les faire seruir à leurs vrais possesseurs. S'ilz admittēt donc l'excuse de Mantuan, & attribuent quelque autorité à saint Augustin, ilz ne me doiuent pas pis faire qu'aux autres.

*Les abus
ne sont
encore as-
sez des-
couuers.*

Et s'il semble à quelcun de noz sages, que cela soit temps perdu, & qu'il ne soit desia plus besoing de descouuir les abus d'auantage, à cause qu'ilz sont desia assez descouuers: ie suis de contraire opinion, pourtant que ie cognoy tout le contraire, par experience. Ie ne say pas ou ces sages ont veu les abus tant descouuers, & si eux (qui n'osent parler de Iesus Christ qu'à demy bouche, & ne l'osent prescher que masqué)

qué) ont trouué des peuples par deuers eux, de esprit tant aigu, qu'ilz sçachent tout, & n'ignorent rien. Mais quant à nous, qui sommes par deça, nous auons l'experience toute autre. Car apres que l'Euangile a esté presché desia dix, douze, ou vingt ans en aucuns lieux, & en toute liberté (ce qu'on n'ose pas par tout) & les abus ont esté manifestez autant clairement que le soleil est clair à plein midy: nous sommes encore tous ébahiz, que nous trouuons des refueries, des erreurs & des superstitions si grandes en aucuns, voire de ceux qu'on ne penseroit pas, & que nous cuiderions auoir desia beaucoup profité en la cognoissance de Dieu.

Mais c'est merueilles du cautere & du caractere du Diable, qui est tant difficile d'effacer: & d'une vieille coustume, qui est tant difficile d'arracher, & d'autant plus, que pire elle est. Parquoy, ie seroye bien ébahy, si là ou on n'ose parler de Iesus Christ, ny ouurir la bouche contre l'Antechrist, les erreurs & les abus estoient tous tant clairs & manifestes, qu'il n'y fust plus besoing d'en parler, veu qu'icy & là ou la verité est clairement & librement preschée, on n'en fait tant dire, qu'on les puisse defraciner des cœurs des hommes, & qu'il ne soit requis d'en dire d'auantage. Ou il faut que Dieu ait là plus amplement respandu de sa grace, ou qu'il y ait icy des espritz bien lourdz, au pris des autres.

Mais ie crain bien plustost, que ceux qui se glorifient de lestant bien cognoistre, n'en cognoissent pas euxmesmes la moitié, & quilz n'entendent mal, ce qu'ilz cuident cognoistre. Cars'ilz en auoyent l'intelligence, telle qu'ilz pensent auoir, & qu'ilz cogneussent l'abomination, telle qu'elle y est, & combien elle desplaist à Dieu, & est nuisante à son Eglise: ilz s'en retireroient plus loing qu'ilz ne font, & seroit impossible qu'ilz la peussent voir n'endurer, mais s'en fuiroyent plustost hors de là, ou se feroient plustost brusler tous vifz, que la dissimuler n'y cōsentir. Ilz diroyēt comme les fideles, desquelz le Prophete a escrit, qui considerant la grace que Dieu leur a faite, & la comparant avec leur premier estat, disent, en grande abomination de toute idolatrie: Fy, vuyde hors.

Esa. 30.

*Le profit
de descou-
urir les
abus.*

Et pourtant, comment qu'il en soit, on ne sauroit trop manifester les abus. Car verité ne peut estre cognue, sans les descouvrir & abatre. Et en ce faisant, on les manifeste à ceux qui ne les cognoissent pas encore: qui seront tousiours en plus grand nombre, que nous ne voudrions, lesquelz il faut retirer.

En apres, la chose pourra seruir à ceux qui en ont desia la cognoissance, en maintes sortes. Premièrement, pour leur refreschir la memoire, des tenebres auxquelles ilz ont esté,
afin

afin qu'ilz apprennēt en eux-mêmes de mieux cognoître l'aueuglissement & l'infirmité de l'entendement humain, & qu'il peut de soy-mesme, quand il se veut conduire par sa teste, & delaisser Dieu & sa Parolle, pour suyure les hommes & leurs traditions,

En apres, cela leur seruira d'un memorial & signe du triomphe de Iesus Christ & de sa verité, en la cōfution de Satan, de l'Antechrist, de mensonge, & de la sapience humaine, qui se veut éleuer par dessus la science de Dieu, afin qu'ilz ayent plus d'occasion de se humilier, de recognoître la misericorde que Dieu leur a faite, & luy en rendre graces: & qu'ilz foyent plus prudens & mieux aduisez pour l'auenir, & prient le Seigneur plus affectueusement, que il les garde de iamais retomber en telz ou semblables erreurs & inconueniens.

D'auantage, cela leur seruira d'aiguillon, pour les mieux inciter à indignation contre l'Antechrist, & à compassion des pures ignorans, & de leurs freres errans, & à prendre de plus grand cœur la cause de verité en main, veu l'indignité de la chose. Celuy qui sera encore debile, se fortifiera: celuy qui sera desia ferme, se confirmera d'auantage.

Pour toutes ces causes & raisons, Dieu a voulu que les erreurs & les pechez de son peuple fussent redigez par escrit, & a tant de fois

Es. 44. 46 cōmandé qu'ilz en eussent memoire. Et le Prophete Esaie n'admoneste pas tant de fois sans cause le peuple, apres qu'il s'est bien moqué de l'idolatrie, qu'il ait memoire de ces choses, afin qu'il puisse mieux cognoistre le iugement de Dieu, qui est sur les infideles, qui sont comme bestes brutes: & quel thresor c'est d'auoir la verité de Dieu & sa Parolle.

Parquoy, tout ainsi comme Dieu commande au peuple d'Israel de se reduire souuēt en memoire la captiuité & la seruitude en laquelle il a esté en Egypte, & qu'il la luy remet souuentefois deuant les yeux: aussi il nous feroit necessaire de faire le semblable en la memoire des abus & erreurs, & de la captiuité en laquelle nous auons esté souz eux: & sur tout en ce temps cy, auquel nous voyons que l'Antechrist tasche par si subtilz moyens, de reduire en celle captiuité ceux qui en sont vne fois issus, & d'y entretenir ceux qui y sont encore. Car la memoire & la consideration de ces choses & de l'impudence de l'Antechrist, à vouloir encore maintenir & colorer telles abominations, apres qu'elles ont esté tant descouuertes, nous engendrera vn grand horreur en nousmesmes, & nous rendra plus soigneux à garder ce precieux thresor de la Parolle de Dieu, qui nous a esté mis entre les mains, que nous ne sommes: craignans de retomber en telle ser-

le seruitude, & telles tenebres & abominations. Car nous n'estimons pas beaucoup ceste benediction. Mais si nous nous propositions deuant les yeux ou nous auons esté, & de quel abyssme nous auôs esté tirez, nous aurions grãd horreur de nousmesmes, & de iamais y retourner: & tiendrions bien chere ceste Parolle diuine, qui nous en a retirez, & nous garde d'y recheoir, de laquelle nous tenons si peu de cõte. Et pourtant que nous sommes ingrats, ne considerans pas ces choses, Dieu fait retourner plusieurs en celle captiuité, lesquelz il en auoit deliurez.

Sur cecy, si quelcun vouloit encores dire, que ia soit qu'il ne soit pas mauuais, mais bien vtile & necessaire de monstrier les abus: toutesfois il ne falloit pas proceder en telle maniere, qui semble parauẽture à aucuns plus propre pour scandalizer, que pour edifier: ie respon à cela, que ie ne say pas qui seront ceux qui liront ces liures, ne quelle occasion ilz pourront auoir de se scandalizer. Ie pẽse bien qu'ilz ne seront pas tant estimez, que beaucoup de gens les vueillent lire: outre ce que plusieurs parauẽture le voudrõt, qui ne pourront. Mais comment qu'il en soit, si ceux qui les liront, sont gens de bien & craignans Dieu, ilz cognoistront que ie ne tasche qu'à manifester la verité, & à glorifier Iesus Christ: & que ceux

que ie repren, ne sont pas seulement dignes de moquerie, mais indignes que la terre les porte, s'ilz ne veulent recognoistre leurs fautes, & donner gloire à Dieu. Ciceron a escrit, que

*Cic. de O-
rato. li. 2.* Caius Lucilius, homme sauant, & fort ciuil, & facetieux, auoit acoustumé de dire, qu'il ne vouloit point que ce qu'il escriuoit fust leu ny de ceux qui estoient du tout ignorans, ny des plus sauans: pource que les vns n'y entendroyent rien, & les autres y entendroyent parauenture plus que luy de soymesme. Quant à moy, combien que ie ne presume point, comme ie ne doy par iuste raison, auoir les vertuz que Ciceron attribue à cest homme icy: toutesfois ie desire des lecteurs, qu'ilz ne soyent ny du tout bestes & trop ignorans, ny trop sauans ny trop speculatifz. Car ia soit que i'aye traouillé à escrire & à traiter le plus familièrement qu'il m'a esté possible, les matieres que i'ay entrepris de traiter: toutesfois ie crain qu'il n'y ait encore aucuns pointz, qui parauenture ne soyent assez difficiles à entendre à ceux qui seront par trop ignorans & des lettres diuines & humaines, & que cela ne soit cause que telz personnages prennent mes parolles en autre sens que ie ne les enten. I'admoneste ceux cy, s'il s'en trouue de telz, qu'ilz ne condamnent point temerairement ce qu'ilz ignorent, & qu'ilz ne peuuent entendre. Car

ce vice est fort commun & naturel aux ignorans. Ceux semblablement qui sont fort sauâs, ou qui ont opinion de l'estre, ou qui sont trop speculatifz : iceux voyent quelquefois trop clair, ou cuident plus voir qu'ilz ne voyent, & sont souuentefois fort difficiles à contenter, & fort faciles à dégouster de tout ce qui est fait par autres que par eux. Car d'autant qu'ilz se plaisent plus, d'autât les autres leur déplaisent d'auantage. l'admoneste iceux, que s'ilz peuuent mieux faire, qu'ilz le facent, & qu'ilz recognoissent que les graces qu'ilz ont sont de Dieu, & qu'ilz ne mesprisent celles des autres.

S'ilz sont Epicuriens & contempteurs de Dieu, ilz ne peuuent pas deuenir pires qu'ilz *Epicuriens* sont: ains pourront cognoistre en quelle reputation ilz doiuent estre à toutes gens de bien, & qu'ilz sont indignes d'estre tenuz non seulement pour Chrestiens, mais pour hommes, estans beaucoup pires que les bestes brutes.

S'ilz sont Pharisiens & hypocrites obtenez, & qu'ilz quierent l'occasion de scandale, *Hypocrites.* Mat. 18. ilz la trouuent bien mesme en Iesus Christ. *Scandale de Phari-* Parquoy, il ne s'en faut pas beaucoup soucier. *sens.* Car ilz prennent le scâdale, sans ce qu'on leur en donne l'occasion, & sont scandale à euxmesmes, & ne peuuent ouyr verité, sans en estre scandalizez. Parquoy, il s'en faut tenir à ce que Iesus Christ a dit d'eux: Laissez les, car ilz *Mat. 18.*

*Malo no-
do, malus
cuius.*

sont aueugles, conducteurs des aueugles. Il faut qu'ilz entendent, qu'un mauuais nœud & un bois dur & difficile à fendre, a besoing de un mauuais coing, & plus dur que luy, pour le pouuoir fendre.

S'ilz sont tant effrontez, qu'ilz n'ayent point de honte, & s'ilz ont le cœur tant obstiné, qu'ilz n'ayent point de remord de conscience, en se moquant de Dieu & le blasphemât si horriblement, qu'ilz font tous les iours, & se iouant ainsi des hommes, à leur grand perte & dommage : aurons nous plus de honte de leur annoncer leur iniquité, & de reprendre leurs abuz & abominatiōs, qu'eux de les faire?

S'ilz ne veulent point qu'on en parle, qu'ilz se deportent de les faire. Car ie croy qu'il n'y a homme de bon cœur, qui prenne grand plaisir à remuer celle ordure, s'ilz ne contraignoient de ce faire par leur importunité, impudence & visage déhonté. Car quel bon cœur Chrestien peut souffrir, que tousiours on pallie ces abominations, & qu'on vienne couurir telles vilainies, nous voulant faire accroire que leur fiète est du baume: que leur poison est le pain de vie: que mensonge est verité: enfer est paradis: malediction est benediction: les tenebres sont lumiere: & la mort vie. Ne voyons nous pas encore auiourdhuy comment la synagogue de Satan est assemblée, pour
colo-

colorer & maintenir toute fa fausse doctrine, ses sacrileges & blasphemes, auxquelz on ne peut penser sans frayeur : & pour condamner hardiment ceux qui parlent au cōtraire, & repandre leur sang, & meurtrir les pources brebis de Iesus?

Quant à moy, ie ne say point colorer ne flater les choses, & ne les say nommer que par leur nom. Car tel est le langage & le stile *Le stile du* de l'Esprit de Dieu, qui ne veut point parler *S. Esprit.* selon la fantasie des hommes, & pour leur cōplaire, comme les orateurs, qui sauent bailler aux vices les noms des vertüz, & telle couleur qu'il leur plait : mais parle en verité, ainsi que la chose est, appellant Idolatrie, ce que les hypocrites & idolatres appellent Service diuin : & leurs idoles, Diables, lesquelles ilz appellent Dieux.

Parquoy, si telz hypocrites ont les frōtz *Le front* de pierre & de fer, tant durs & immuables, *des hypo-* qu'on ne les puisse faire rougir, ains demeurent *crites, &* asseurez comme meurtriers, & effrontez *des Pro-* comme ribaudes : qu'ilz entendent de l'autre *phetes.* costé, que Dieu a baillé à ses seruiteurs, comme il le dit à Ezechiel, vn front d'erain & de diamant, qui est encore plus dur, & qui a moins de honte de dire verité, & de donner louange à Dieu, qu'eux de maintenir le mensonge, & le blasmer. Et pourtant le Seigneur comman-

Ezech. 5.

de à Ezechiel : Va parler à eux , & leur dy ce que ie t'ay commandé . Ie say bien toutesfois qu'ilz n'en feront rien , mais ie veux que tu leur dies.

Ie ne say plus quelle excuse telz personnages peuuent auoir . Car on les a desia prins de toutes fortes . S'ilz se plaignent qu'on les a prins trop asprement , & en trop grande seuerité & rigueur : ie les ay voulu prendre vn petit plus ioyeusement , & plus par faceties que par amertumes . S'ilz trouuent encore ma maniere de faire trop aspre , il y en a tant d'autres qui ont escrit le plus modestement qu'il est possible : & toutesfois ilz n'en trouuent point de bon , & ne laissent pas de tousiours perseuerer de pis en pis en leurs erreurs & heresies.

Matt. 11.

Parquoy , ie ne say plus quelle chanson on leur puisse chanter , sinon leur reprocher ce que Iesus Christ a reproché au peuple Iudaïque , & ce que les petis enfans , qui se iouent en la place , reprochent à leurs compagnons : Quand nous vous auons chanté choses tristes , vous n'auiez pas voulu plourer . Quand nous vous auons chanté choses ioyeuses , vous n'auiez pas voulu danser & vous resiouyr . Iean Baptiste est venu en grande seuerité & austerité : ilz l'ont trouué trop austere , & ont dit , qu'il auoit le Diable au corps . Iesus Christ est venu en grande douceur & benignité : & ilz ont

ont dit, qu'il estoit vn yurogne & vn gourmand, amy des pecheurs, & des Publicains & Fermiers. Si on parle à eux asprement, comme leur iniquité le requiert, ilz diront, qu'on est furieux & enragé. Si on leur parle ioyeusement, ilz appelleront Badin. Bref, ilz trouueront par tout à dire, comme nous le voyons par experience de nostre temps.

Plusieurs se sont mis au commencement à toucher quelque peu aucuns abuz, encore des plus gros & des plus apparens. Ces hypocrites ne les ont peu endurer, mais les ont persecutez par mer & par terre. Ilz n'ont pas seulement peu endurer qu'on ait touché du petit doigt leur idolatrie & superstition, & qu'on ait ouuert la bouche, pour parler vn mot, pour reformer leur estat: mais, qui plus est, se sont declairez ennemis de tous les hommes sauans, qui ont trauaillé à abolir la barbarie & la sophisterie, pour remettre les bonnes lettres & les autres disciplines au dessus: & les ont tenuz & condamnez pour heretiques, & mis en gros dangier de leur vie.

Puis donc qu'ilz n'ont peu endurer ceux icy, qui y alloient tant doucement, non pas seulement des petis dialogues & colloques familiers, pour les petis enfans, qui leur faisoient encore trop plus d'honneur qu'ilz ne meritoient & les flattoient plus qu'il n'estoit de besoing:

Dieu en a fuscité d'autres , qui ont tellement remué leur ordure , laquelle les autres n'a-uoient fait qu'un petit chatouiller par dessus , qu'ilz en ont fait sortir la puantise , en sorte que tout le monde s'en est aperceu , & qu'on ne la peut plus porter . Quand ces aspres chirurgiens sont venuz , qui ont fourré leur fer si auant dedás l'apostume , qu'ilz les ont percez iusques au cœur & aux os , ilz ont commencé à regretter les premiers , qui ne faisoient qu'un petit toucher les playes par dehors , & qui par leur douceur les faisoient rogneuses , ne faisant que quelque cure palliative . Quand ilz ont eu expérimenté les secondz , ilz ont crié au meurtre contre eux , & ont esté contrains de louer , au pris de ceux cy , les premiers qu'ilz condamnoient .

En apres il en est venu consequemment tousiours des autres de suite à suite , qui ont encore mieux descouuert le pot aux roses , & ont mieux manifesté la vilainie & les fornications de la grande ribaude de Babylone : tellement que ceux qu'on tenoit pour tant aspres & tant heretiques , ont commencé d'estre estimez par eux doux & gens de bien , à cōparaison des derniers . Et parainssi ilz en ont eu de toutes sortes , & si ne veulent encore rien entendre . Parquoy il me semble , qu'ilz ne peuuent plus prétendre ignorance n'infirmité ,
ou

ou aucune iuste excuse, mais qu'il est temps de
 respondre au fol selon sa folie, afin qu'il ne cui
 de tousiours estre sage. Il leur faut donner à Pro. 10.
 entendre, qu'on les tient pour telz qu'ilz sont,
 & ne les faut plus tant espargner, veu qu'ilz
 empirent de garder: & que quand plus on les
 cuide appriuoiser en les flattant, ilz deuennēt
 plus sauages, plus felons & enragez.

Et pourtant ie pense que ceux qui sont
 de bon iugement, & qui considerent les cho-
 ses à la verité, seront contrains de confesser,
 que ie ne flatte que trop. Combien que ie ne
 doute point, qu'il ne s'en trouue aucuns, qui
 pourront dire de moy, ce qu'on dit commu-
 nement de l'asne, qui se voulāt iouer avec son Singes re
 maistre, comme il auoit veu faire au chien, luy quis en la
 donnoit des piedz au visage. Ie suis certain, court de
 que telz ieux sont mal-plaisans au roy de Ba- Babylone.
 bylone, & à toute sa court, & qu'ilz ne veulēt La fable
 point de telz singes: mais que s'ilz les teno- du chiē &
 yent ilz les acoustreroyent bien d'autre sorte, de l'asne.
 que ce pource asne ne fut acoustré. Car ilz ne Chiens da
 ont accoustumé que ces petis chiens damere- mereaux.
 aux, qui leur font feste de la queue, & qui sont
 apprins de faire la court aux damoiselles: &
 ces plaisans singes & marmotz, pour leur faire
 passer le temps. Mais le Seigneur ne veut point
 d'autres singes en son Eglise, que telz lour-
 daux, selon le iugement du monde, qui se iou-

ent à bon escient, & y vont comme ilz l'entendent, en toute simplicité, sans dissimuler, ce qui ne doit point estre dissimulé. Il ne veut point de ces petis chiens plaisanteaux, pour estre en delices aux dames, mais veut de bons mastins, & de gros leuriers, qui ne sont point pour porter à la manche, mais pour abbayer & chasser le loup du parc.

*Isa. 56.
Les ma-
stins & le
uriers de
I E S V S
Christ.*

*Horat.
Hæ nunc
seria du-
cant.*

*Ridentem
dicere ve-
rum*

*Quid ve-
tat.*

*Rire aux
despens
du Pape
Democri-
tus.*

*Heracli-
tus.*

Parquoy s'il y a des personnages qui mordent en riant, ilz donnent à entendre, qu'ilz ne prennent pas grand plaisir à telz ieux, mais qu'ilz voudroyét bien auoir autre passe-téps, & occasion de parler de meilleurs matieres. Toutesfois ilz montrent à ceux qui ayment les passe-temps, & qui y prennent plaisir, comme Democritus, à se rire & moquer des folies & refueries des hommes, qu'il n'est ia besoing qu'ilz aillent chercher autre matiere. La court de l'Antechrist leur en donne assez, & de plus digne de rire, & en laquelle on se peut mieux iouer sans offenser Dieu, qu'en beaucoup de choses, que les hommes iugent dignes de grand moquerie. Ceux aussi qui seront plus tetricques & seueres, & qui comme Heraclitus, iugeront les folies & les miseres humaines plus dignes de pleurs & de lamentatiõs, que de riz & de ieux, ilz aurõt icy assez matiere de plourer: voyant le iugement de Dieu, qui a esté, & est encore sur le peuple Chrestien, à cause de

noz pechez & du mespris de sa parolle.

Tant y a, qu'il me semble, que ie n'ay pas escrit chose, qui puisse porter dommage à la religion Chrestienne. Et si ie n'y profite pas beaucoup, toutesfois le vouloir ne me defaut pas. Parquoy i'espere, que les bons prendront tout en la bonne partie: lesquelz seulz ie crains d'offenser. Si les meschans se faschent sans cause, ie les laisse pour telz qu'ilz sont: si dy-ie toutesfois la verité, comment qu'ilz la vueillent prendre. Si les plus sauans n'y peuuent pas beaucoup profiter, ce m'est assez, que les pources ignorâs en rapportét quelque fruit: combien que tel cuyde estre bien sauant, qui y pourra encore trouuer quelque chose à apprendre. Or comme ie n'approuue pas, ny ceux qui ont les oreilles tant delicates, ny ceux qui sont trop seueres & trop tetricues: aussi i'estime dignes de grande reprehension, ceux qui lisans les liures qui traitent des abuz, n'en recueillent, sinon ce qu'ilz en peuuent tirer en gaudisserie & en motz de gueule, pour brocarder ou les prestres, ou les moynes, & les pources superstitieux & idolatres, ne se soucians au reste, de la doctrine principale qui leur est proposée, ny de reformer leur vie par icelle. Il est toutesfois assez de telz Euangelistes esuentez, qui ont assez de bec, pour piquer les prestres & les moynes, & pour se rail-

ler des pources abusez: mais de doctrine solide, & pleine d'edification, il n'en faut rien attendre d'eux, & encores moins qu'ilz mettent la main à quelque bonne œuvre. Les fauces qui se baillent en vn banquet, ne se baillent sinon pour bailler gouft aux viandes. & les rendre plus appetissantes, & principalement aux malades & aux degoustez. Celuy donc ne prendroit pas bonne refection, qui ne mangeroit que les fauces, sans prendre de la viande ferme avec icelles: ou pour le moins il ne feroit pas si bien repeu, que celuy qui prédroit & l'un & l'autre. Ceux cy font le semblable. Si on leur propose la viande sans sauce, ilz n'en prendrôt rien, ou bien peu, & sans grand appetit: car ilz sont degoustez. Si on leur baille la viande, avec quelque sauce, ilz laisseront la meilleure viande, & ne prendront que quelque peu de la sauce: & ne la prendront pas encore comme il la faudra prendre, mais la tourneront à leur dommage. Ilz se desborderont à parler à bride auallée, sans regarder ne qu'ilz disent, ny à qui, ny en quel téps, ny en quel lieu, ny à quel propos, ne s'il peut edifier, ou ruiner ny eux ny les autres. Car il s'en est quelque fois trouué de telz moqueurs & esuentez, qui se cuidans ainsi moquer & iouer, sans rien proposer de bonne edification, auxquelz il est eschappé des propos, ou qui leur ont cousté la vie, ou
 qui

qui les ont mis en grand dangier & en grande fascherie. Il faut donc bien aduifer, que c'est qu'on dit, & comment, & à quelle fin, & ne point parler des choses de la religiõ, sinon en grãde crainte de Dieu, & ne s'y point iouer, sinon à bon escient. Car Satan est cauteleux, & fait par ses cauteles, que sans nous en prendre garde, nous tournons souuentesfois toute la religion en iaserie & en gaudissèrie. Or ie n'entens point de trauailler, pour bailler occasion à telles choses, mais plustost pour attirer par icelles à meilleures cõsiderations & à meilleur deuïs, ceux qui sont addonnez à telles manieres de faire. Parquoy i'ayme mieux, que ceux qui ne voudront lire mes liures pour la fin, à laquelle ie pretens en iceux, qu'ilz s'en deportent totalement, que d'en rapporter vn profit si maigre. Car s'ilz veulent Lucianiser & Pantagrualiser, qu'ilz aillent à leurs maistres, qui font profession de telle sciẽce: de laquelle Dieu vueille purger la Chrestienté. I'ay bien voulu aduertir les lecteurs de cecy, afin qu'ilz ne se conuertissent en fiel, le miel qui leur est présenté, & la bonne viande en poison.

Quant au reste, il est certain, que la matiere que ie delibere traiter à present, auroit plus de grace, & requerroit mieux, cõme il a desia esté dit, d'estre traitée en latin, qu'en fran

goys. Car elle contient des choses, qui eussent esté plus claires, & eussent peu estre traitées plus briuement, auxquelles parauenture ie pourray estre reprins de trop grande prolixité. Mais il y a plusieurs raisons, qui en font cause. La premiere, c'est pourtant que ie suis vn orateur assez lourd. La seconde, pource que i'escry le plus pour les ignorans & les rudes, auxquelz il faut mjeux macher les viandes par le menu, & declairer les matieres plus grossièrement, lesquelles ilz ne peuuent entendre en vn mot, comme les sauans, qui comprénent facilement: cōme sont ceux qui ont leu les auteurs, desquelz i'ay prins la matiere. Pourtant il y a encore vne autre raison: c'est qu'il me faut souuēt vser de grandes circumlocutions & narratiōs, pour exprimer & bien expliquer, ce qui se pouuoit dire en vn mot en Grec ou en Latin. Car les choses sont plus difficiles, à ceux qui n'ont leu les auteurs grecz & latins. Mais i'ay desia dit parauant les causes, qui me ont esmeu d'escire plustost en ce langage, qu'en vn autre. Et si la chose est digne d'estre mise en lāgue latine, s'il plait au Seigneur, il se pourra quelquefois faire avec le tēps: ou touchera le cœur de quelcun, qui le fera mieux.

Quoy qu'il en soit, ce m'est assez moyen-
nant que ie serue quelque peu aux bons. Si ie
scandalize les hypocrites, ie seroye content
de

de les tant scandalizer & desgouster de moy, qu'ilz trouuassent meilleur goust en tous les autres, qui ont parlé & escrit de la religion trop mieux que moy, & qu'ilz les eussent en tel honneur & reuerence, qu'ilz doyuent.

Ie pense aussi, que nul ne trouuera hors de propos, plusieurs histoires de nostre temps, *Histoires de nostre temps.* lesquelles i'ay quelque fois inferées & meslées parmy ces matieres. Car s'il nous est loisible d'alleguer les anciènes, escrites par les autres: pourquoy tairons nous, ce qui se fait de nostre aage, quand l'occasion le requiert? veu qu'il aduient tant de choses, tous les iours, plus dignes de memoire, que plusieurs que les anciens ont escrit? Parquoy ie n'ay pas estimé la chose mal conuenable, ny indigne de memoire, ce de quoy ou nous-mesmes, ou noz peres sont tesmoins.

I'ay aussi mis pour la plus part, les citations par les marges des autheurs, desquelz i'ay prins ce que i'allegue: afin qu'il ne semble que ie l'aye controuué & inuenté de ma teste, tant des philosophes, des poetes, des historiens, que des docteurs questionnaires sophistes, & des anciens docteurs Ecclesiastiques & des saintes Escritures.

LE SOMMAIRE DV PREMIER Dialogue des enfers , appellé La Cosmographie, ou, La Geographie infernale.

I'appelle la premiere partie de ces disputations Chrestiennes, Les enfers, pource que ie traite en icelle, les matieres qui sont auourd'huy en differant entre les Chrestiens, touchant l'estat d'iceux & des trespassez. Et puis ie nomme vn chacun des Dialogues, du nom de la chose principalement traitée en iceux : comme il sera declaié plus à plein, au sommaire de tous. I'appelle ce premier icy, La Cosmographie, ou La Geographie infernale, pource qu'il cõtient vne description de ces basses regions, selon la diuision que les sophistes & les nouueaux theologiens en ont faite. Or quand i'vse de ces motz Enfer, ou Infernal, ie n'en vse pas seulement au sens auquel ilz sont prins communement par le simple peuple: mais au sens que les Latins ont acoustumé d'en vser, & les Grecz & les Hebreux de leurs equiuallens: pourtant que ie ne say trouuer mot bien propre, en nostre langue, pour bien exprimer tout ce que les Hebreux, les Grecz & les Latins comprennent par ces manieres de parler. Car nous ne prenons presques en nostre langage, le nom d'Enfer, sinon pour le lieu & l'estat qui est appellé la gehenne du feu aux saintes Escritures, qui est assigné aux Diables & aux reprenez. Et pour ceste cause, Infernal, nous signifie presques autant, comme diabolique. Mais ie ne le prens pas proprement en ceste signification, quād i'appelle ceste premiere partie, Les Enfers, & ce premier Dialogue, La Cosmographie & la Geographie infernale: ains i'en vse au sens que les Latins, desquelz nous auõs receu ces motz, les prennent: & les Grecz & les Hebreux, leur equiuallens. Car tous ces motz latins, Infernus, Inferi, & autres,

autres semblables, sont pris de ce mot *Infra*, qui signifie dessous. Et pourtant que nous enseuelissons les corps mortz en terre, sur laquelle nous marchons, & qu'il ne nous reste rien de l'homme, que nous puissions appercevoir de noz sens corporelz & extérieurs, sinon le corps, & ce qui se fait autour d'iceluy: les anciens ont parlé des mortz & de leur estat, comme s'ilz eussent imaginé vn autre monde, remply d'autres peuples souz nous. Pour ceste cause, ilz ont appelé les mortz, *Inferi*, & leur estat aussi: & *Infernus*, pourtant qu'au regard de leurs sepulchres, auxquelz on regarde le plus, d'autant qu'on voit cela à l'œil, il semble qu'ilz soyent inferieurs à nous, & qu'ilz soyent comme entrez en leur fosses, pour descendre comme par vn trou en vn autre pays plus bas, & en vn autre monde. Nous disons aussi communement, qu'un homme est allé en l'autre monde quand il est mort, pource que nous ne le voyons iamais plus en ce monde depuis. Outre cela, les fictions des poetes & les opinions de la situation des enfers, des limbes & du purgatoire, ont fort aidé à ces choses: donques ce mot *Enfer*, à le prendre en sa large signification, nous signifiera ces pays bas, & le logis & l'estat des trespassez: & ce mot *Infernal*, autant qu'une chose appartenante à cest estat. Parquoy *Cosinographie* ou *Geographie infernale*, nous signifiera autant, comme vne description du monde inferieur, ou du pays bas, ou de la terre basse. Car *Cosmographie*, signifie description du monde: & *Geographie*, description de la terre. Mais principale intention est de monstrier non seulement en ce dialogue, mais aussi en tous les autres suivans, ce que l'Escripture tesmoigne des enfers & de l'estat des trespassez, & en quoy la doctrine papale y est differente, & quelle est la conformité d'icelle & des resueries des caphars, avec celles des Payens, en ceste matiere, & la fondation du limbe & de purgatoire, & combien la teme-

rité, la vanité & curiosité & sottise des folz prescheurs & refuseurs theologastres est à reprendre, qui ont delaisé les principaux poinctz de la doctrine chrestienne: qui nous sont reuelez manifestement aux saintes Escritures, & necessaires de sauoir, pour s'occuper à des contemplatiōs vaines & des questions inutiles, & à s'en querir des choses qu'ilz ne peuuent sauoir ny entendre, & à affermer tant hardiment cela dequoy non seulement ilz n'ont point de tesmoignage aux saintes Escritures, mais leur est du tout contraire. Pour entrer en ces matieres, ie introduis des personnages, qui prennent l'occasion d'en disputer, sur vn sermon qu'ilz en ont quy: laquelle chose n'est pas du tout feinte, ains a fonde-
ment sus vne vraye histoire. Quant aux poinctz principaux traitez en ce dialogue, il est parlé premierement de l'Enfer, appellé la gehenne: & du lieu & de la situation & du feu d'iceluy, & de l'estat des trespassez, selō le tesmoignage des saintes Escritures, & les opinions des docteurs anciens & nouueaux, & des Platonistes & des Pythagoriens. En apres il est parlé des limites & confins de purgatoire, & du soing que les prestres & les moynes en ont, & de la cause pourquoy: de la descente aux enfers, qui est en Sicile, & de la description d'iceux selon les poetes: de l'opinion de Odilo & de Gregoire, touchant les enfers de Sicile, & de l'institution de la feste pour les trespassez: de la montagne de Etna & de mont Gibello, & des feuz & gemissemēs d'icelle, & de Vulcain, & de son temple, & des Vulcanales: du tesmoignage d'Aristote & de Ciceron, touchant ces feuz: de la fable des geans, enseuelis en celle montagne: des autres situations d'enfer, & des montagnes, lacz & isles ardentes, principalement des montagnes de Nouergie, Islande, Italie, Lyrie, Alemagne & Escosse: du puy & du voyage de S. Patrix & de Tropheus: des fables poetiques, de ceux qui sont descendus
en

en enfer:& de la fiction des Papistes,touchant les nou-
 uelles que Lazare en a apporté: de la diuision d'enfer,
 & de ses parties , & du feu qui y est emprins : du limbe
 des enfans , de l'enfer , & du Purgatoire:de Gôbrias,
 Socrates , Platon , Xenocrates , Plutarque, Orphée &
 Vergile,& de leur description: & des peines qui y sont
 des bons & des mauuais Anges,qui cōduisent les ames:
 des fondateurs d'anniuersaires, des peines des Princes
 & des riches , & des pources , & du menu peuple , &
 des differences d'icelles, selon l'estat d'vn chacun,& la
 gravité des pechez: de la certitude qu'on peut auoir de
 toutes ces choses , & de qui & par quel moyen : des
 portes du somme & du songe,des fictions poetiques tou-
 chant icelles,& de la diuerlité des songes,des resueries
 monachales , de la generation du somme & du songe,
 & de leur parentage , & des grans dormeurs & son-
 gears:du profit que nous pouuôs faire de la cognoissan-
 ce & consideration des erreurs & resueries des hômes,
 & des montaignes ardentes & feuz terrestres , pour la
 confirmation de verité,& pour nous apprendre humi-
 lité & la crainte de Dieu . Et pour finale conclusion,
 ie metz aussi la description que Esaie fait de la gehen-
 ne, avec la declaration d'icelle.Or pour entrer en pro-
 pôs , Hilaire commence,interrogant ses compagnons,
 sur le sermon qu'ilz ont ouy,

LE PREMIER DIALOGUE
des enfers, qui s'appelle *La Cosmographie,*
ou *La Geographie infernale.*

Les personnages:

Hilaire, Eusebe, Theo-
phile, Thomas.

Hilaire.



I mes yeux ne m'ont deceu, il me
semble que ie vous aye veuz au-
iourd'huy tous trois au sermon.
Parquoy ie desire d'en ouyr vo-
stre opinion, pour sauoir comment il vous a
pleu, & qu'il vous semble du prescheur. **E V.**
Le sermon m'a fort pleu: & à ce que i'en puis
iuger, le prescheur me semble fort sauant & e-
loquent. Car il a parlé fort disertement & fort
profondemēt, & de matieres bien obscures &
profondes. **H I.** Il ne pouuoit pas parler plus
profondemēt. Car il est allé iusqu'au centre de
la terre. Pource ie suis plus ébahy de ce qu'il a
parlé si clairement, de matieres tant obscures,
& de ces lieux tant tenebreux, auxquelz on ne
voit goutte. Car iamais le soleil n'y luit. **T H E.**
A ce que i'ay peu ouyr de luy, il m'est bien ad-
uis ou qu'il n'a pas esté aux lieux desquelz il a
parlé

parlé, ou s'il y a esté, c'est depuis long temps. Si
 l'opinion d'Isidore estoit vraye, nous aurions
 quelque peu plus d'occasion d'adiouster foy
 au beau pere, & à son sermon. E v. Isidore a il
 esté d'autre opinion, que les autres docteurs
 Chrestiens, touchât ceste matiere? THE. Il n'y
 a nul entre les Chrestiens, qui doute qu'il n'y ait
 des enfers, veu que l'Escripture sainte en rend
 tant certain tesmoignage: duquel nous nous
 deuriõs bien contenter, sans en vouloir sauoir
 plus outre, qu'elle nous en a reuelé. Il nous
 doit suffire que Iesus Christ nous tesmoigne,
 qu'il y a la gehenne du feu eternel & inextin-
 guible: en laquelle le ver ne meurt point, mais
 y a horreur sempiternel, pleurs & grincemens
 de dens. Nous n'auons besoing de nous enque-
 rir du lieu. Car ie pense qu'il n'y a nul, qui ait
 desir d'y aller. Parquoy, ie trouue bon le con-
 seil que Chrysostome baille, contre ceste cu-
 riosité, disant: Aücun demãdera, en quel pays,
 ou en quelles terres diras-tu que ceste gehen-
 ne est située? Mais qu'as tu besoing de te sou-
 cier de cecy? Car quand il est question de s'en-
 querir, assauoir-moi s'il y a point de gehenne,
 il n'est point encore besoing de s'enquerir en
 rien du lieu, ou de la situation: combien qu'il y
 en a plusieurs qui ne doutent point, qu'elle ne
 soit située pour certain en la vallée de Iosaphat,
 laquelle chose les saintes lettres n'affirment

*Enfer &
la gehenne*

Mat. 3. 12.
 Esa 66.
 Marc 9.
 Job 10.
 Matt. 22.

*Chrysost.
de pra.
santo. &
de geh.
serm. 19.*

nulle part. Mais si tu demandes de la situation & du lieu, ie respondray & diray, qu'elle est située en quelque lieu hors de ce mode terrien. Il ne se faudra donc pas enquerir en quel lieu elle sera située, mais plustost cōment elle pourra estre euitée.

HI. Voila tresbon conseil. Car puis que nous auons le tesmoignage de Iesus Christ & de tous ses Prophetes & Apostres, que la chose est telle, c'est assez. THE. Il est vray. Et pourtant nous n'auons mestier, que de prier Dieu, qu'il luy plaise nous donner grace, de bien cognoistre sa volonté, & de la pouuoir accomplir par son filz Iesus Christ: afin que nous puissions euitter ce feu de la gehenne, & ces tenebres extremes. Il ne nous faut ia beaucoup amuser, pour sauoir en quel lieu les enfers sont: s'ilz sont ou au centre de la terre, selon la commune opinion des Theologiens de nostre temps: ou en la vallée de Iosaphat: ou s'ilz sont dessouz la terre, en la region des Antipodes, selon l'opinion d'Isidore, qui a dit, qu'apres le iour du iugemēt, le soleil & la lune se tiendroyent si fermes au ciel, qu'ilz ne tornoieroyēt plus à l'entour de la terre, mais qu'ilz bailleroient leur clarté & leur lumiere seulement en ceste partie de la terre, laquelle nous habitons: & que les damnez seroyent tous renuoyez souz la terre, en ces tenebres horribles,

aux

*Les cōfins
des enfers.*

*Thomas
in 4. dist.*

42. art. 2.

D. I. Rich.

in 4. dist.

42.

Bapt. Māt.

de parien.

li. 3. ca. 23.

Io. Maio. 4

aux lieux auxquelz on estime maintenant que les Antipodes habitent. *Sent. dist.*
44. *Que. 1*

H 1. Si maintenāt que le soleil & la lune y luyssent ; encore la chose estoit telle, nous pourrions penser , qu'il seroit venu quelcun de ce pais des Antipodes, qui auroit raconté & confiné à nostre prescheur, la situation d'enfer, des limbes & de purgatoire , avec tous leurs confins , en la sorte & maniere qu'il les nous a exposez. THE. Mais cecy contreuient trop manifestement , à ce qu'ilz chantent si souuent en leurs vigiles pour les trepassez ; pris du liure de Iob, ou il dit: Laisse moy donc, pour lamenter vn petit ma douleur, auant que ie voise à la terre tenebreuse & couuerte de l'obscurité de la mort: de laquelle ie ne retourneray point, à la terre de misere & de tenebres, ou est ombre de mort , en laquelle il n'y a nul ordre , mais horreur sempiternel qui y habite. Il est certain que Iob fait , par ces parolles, vne description de la mort & du sepulchre , & de l'estat des trespassez , telle que la chose apparoit à la raison humaine, & à nous qui demourōs encore sur ceste terre . Or si ces choses nous apparroissent telles generalement en la mort, nous ne deuons douter , qu'elles ne soyent encore plus horribles , & à la verité: & non seulement selon le iugement de la raison humaine (qui ne peut passer si outre) en ces enfers deputez aux

Iob 10.

*De l'estat
des mortz.*

tourmens des meschans & des reprouuez auxquelz ceste premiere mort, qui est corporelle, est entrée à la secōde, qui est eternelle: & comprennent le corps & l'ame, qui estans mortz de ceste mort, vivent neantmoins pour soustenir tousiours peines eternelles. Or il y a en ces parolles de Iob, principalement trois poinctz, bien dignes de noter. Le premier est, qu'il n'y a point de retour de la mort à ceste vie, c'est assavoir, deuant le temps ordonné de Dieu, à la resurrection des corps: & que nulz d'iceux qui sont departiz de ce monde, n'y retournent plus. L'autre c'est, qu'il n'y a point de lumiere, mais que tout y est couuert d'un grand abyfme de tenebres fort espesses & fort obscures. Le troisieme, qu'il n'y a nul ordre ne nulle distinction de temps. Car il n'y a point de cours de soleil ne de lune, pour le cōpasser & mesurer: ny ordre de personnes, ny de leurs estat, car tous y sont egaux: mais toutes choses y sont confuses. Il n'y a donc point de limites, de lieux, de places & de territoires. Vn petit de terre suffit à vn chacun, pour couvrir son corps: & ceux qui se sont fait bastir les plus beaux sepulchres, n'y ont pas vn pied de terre d'auantage que les autres, sinon entât que leurs corps peuuent estre plus longs.

HI. Puis qu'ainsi est, c'est donc merueilles, cōment ces grans docteurs ont veu si clair,
par:

parmy ces grandes tenebres, tant profondes & tant obscures, pour y deuiser & bastir de si beaux edifices, & y confiner si bien à plaisir les terres & les contrées, & y disposer & ordonner tant bien toutes choses, sans y auoir adresse quelconque par la lumiere de la Parolle de Dieu: qui comme tu as dit, veut que nous nous contentions de ce qu'elle nous a manifesté de telles choses. **T H E.** Quant à moy, ie me contente tresbien de cela, & n'en veux pas sauoir d'auantage.

H I. La premiere opinion que tu as alleguée des theologiens, n'est pas fort differente à celle de Platon & de Pythagoras, & des Platonistes, & des Pythagoriens. Car Platon a esté d'opinion, que les enfers estoient au profond de la terre. Pythagoras & les Pythagoriens ont dit, que le feu estoit espart par tout; mais qu'il changeoit de nature, selon les lieux auxquels il estoit: Parquoy, il est clair & plaisant au ciel, & aux enfers obscur & tenebreux, & deputé pour tormenter: mais en terre, pource qu'il est entre deux, il participe de la nature qu'il a, & au ciel & aux enfers. Dont il s'ensuyuroit, selon ceste opinion de Pythagoras, assez conforme à celle de Platon, que les enfers seroyent plus bas que ceste terre habitable: mais toutesfois Pythagoras & les siens recognoissent aussi qu'il n'y a que tenebres extremes, &

*L'opinion
de Platon
& de Py-
thagoras.
Plato. in
Phædo.*

peines & douleurs. Parquoy, ie suis tousiours plus ébahy comment nostre beau pere prescheur nous a peu si bien pourmener par ces obscurs territoires, & pays tant tenebreux. Qu'en dis-tu Thomas?

THO. Vous en direz ce que vous voudrez, & i'en croiray ce qu'il me plaira: mais ie ne peux estimer, ou qu'il n'y ait esté, ou qu'il n'en ait ouy parler à quelcun qui en est venu, & qui y a bien visité tous les lieux. Car onques en ma vie ie n'en ouy mieux deuifer. Il n'y a salle, chambre, ne cabinet, poelle, cuisine, ne caue, cheminée, ne cromailliere, chaudiere, ny chauderon, chaines ne crochets, & autres vtésiles infernaux, qu'il ne nous ait descrit si viuement, qu'il me sembloit que ie visse la chose là deuant mes yeux, en sorte que i'ay encore horreur quand i'y pense. Les grephiers & les notaires sont fort diligens & curieux, pour bien exprimer en leurs lettres & instrumens la situation & les limites des maisons, des terres & des possessions desquelles ilz escriuent: mais ie n'en ay point trouué de tant expert & habile, qui sache confiner & limiter si parfaitement les terres, que nostre prescheur d'auourd'hui a limité & confiné enfer, le limbe & le purgatoire. A ce que i'en ay peu apercevoir, il fait en quel climat ilz sont tous: quelle éléuation du pole ilz ont: cōbien il y a de degrez, de lieues &

& de pas des vns aux autres: de quel costé ilz sont situez: s'ilz ont l'Orient ou l'Occident, le Septentrion ou le Midy.

HI. Tu ne le prens pas mal. Mais il ne te faut pas estre ébahy, si luy & ses semblables prennent tant de peine à bien confiner & limiter ces lieux & places, & singulieremēt le Purgatoire. Car ilz n'ont point de meilleure possession que celle la, ne qui leur rende plus de fruit, ne de laquelle ilz reçoivent & recueillent plus de censés & de reuemuz. Il n'y a Royaume, seigneurie, terre ny heritage qui apporte tant de profit à leurs seigneurs & possesseurs, que purgatoire leur en apporte. Parquoy, ce n'est pas de merueilles s'ilz ont peur de le perdre, & qu'on ne leur change & transporte ailleurs leurs bornes & limites. On estime fort Ptolomée & plusieurs autres grans & excellēs geographes, fort renommez, tant entre les Grecz, qu'entre les Latins: mais ie ne cui de point qu'il y en ait vn entre tous eux, qui en sa geographie ait iamais si bien peint & descrit la terre avec toutes ses parties, pays & regiōs, comme cestuy nous a descrit & pourtrait deuant les yeux ces parties basses & regions infernales.

*Purgatoire
re & son
reuenir.*

THO. Nous pouuons cognolstre par cela, ou pour le moins presumer, qu'il n'en parle pas seulement apres ouyr dire, mais ou qu'il y

a esté en propre personne, ou qu'il a eu quelque maistre bien expert en celle geographie. Car ie voy que les meilleurs geographes mesmes, & les plus expertz cosmographes se faillent bien souuent en la description de la terre, & de plusieurs pays & regions, qui nous sont plus familiers, & desquelz on peut auoir plus grande & plus certaine experience, que de ces bas territoires.

H I. Sans aller plus loing, nous l'expérimentons assez aux cartes Gallicanes. Il n'y a guere pays plus cognu que les Gaules, & toutesfois nous voyons bien souuent de grans erreurs en ces cartes, auxquelles elles sont descrites: voire en celles mesmes qui ont esté composées ou par ceux du pays mesme, ou qui l'ont veu & frequenté. Parquoy, nous pouuons bien estimer qu'il peut auenir aux autres tables, mappes & cartes cōtenantes la description du ciel & de la terre, & principalement des regions incognues.

Cartes infernales. T H O. Je ne doute point que ce moyne n'ait bien l'esprit pour composer & bien compasser vne table & vne carte de ces regions inferieures, trop mieux que les peintres ne les ont peintes par les temples, ou les Imprimeurs aux Calandriers des bergiers. Et pourtant i'ay grand desir de parler à luy. Car i'ay entrepris vn voyage, auquel il me pourra bien seruir.

seruir. Car i'espere ou qu'il m'y donnera quelque bonne adresse, ou qu'il me satisfera, en telle sorte que ie gagneray parauenture le voyage & les despens.

II I. Quel est ce voyage que tu as entrepris? Veux tu aller en Sicile? T H O. Quoy faire en Sicile? II I. Pour descendre aux enfers. Car ie ne puis entendre autre chose par tes propos, veu que tu veux chercher adresse vers ce moyne pour parfaire ton voyage. Ie pense que tu le veux demander pour guide, pour te conduire en ce dangereux voyage, ainsi que Circe guida Vlysses, pour le faire parler à Helpenor: & la Sibylle, Eneas, pour le mener vers son pere Anchises.

T H O. Ie pense que tu es deuin. Tu as droit frappé au blanc. Mais à quel propos me parles-tu de Sicile? Y a il quelque porte, pour descendre en ces pays bas? II I. Tu fais autant de l'ébahy, comme si iamais tu n'en auois ouy parler. Il n'y a rien plus cōmun en la theologie poetique. T H O. Tu m'allegues vne belle theologie. I'ay bien que faire des poetes, ne de leurs fables & fictions. Ne fait on pas bien qu'elles sont inuentées à plaisir, & qu'il n'y a rien de verité, mais que ce sont menfonges toutes euidētes? Ciceron mesme n'a il pas dit de ces fictions: Quelle vieille pourroit on trouuer tant hors du sens, qui ait peur de ces

*Descente
aux enfers
en Sicile.*

*Hom.
Odyss. 10.
c. 11.*

*Verg.
AEn. 9.
Ouide.
Metam. 14*

*Theologie
poetique.*

*De Natu.
Deo. lib. 2.*

mōstres & choses vaines, & dignes de moquerie, qu'on croyoit iadis estre aux enfers?

*Le tesmoi-
nage vul-
gaire.* H I. Si tu estimes si peu le tesmoignage des poetes, ie pense que tu ne mespreras pas du tout l'opinion vulgaire & commune, laquelle a duré & perseueré constamment tant long temps, qu'il le cōferme d'auantage. T H O.

*Odilo ab-
bé.*

Tu me mets en beau pays. Tu m'allegues vn tesmoignage bien digne de foy, pour confirmation de l'autre, me remettant au commun peuple. Y a il rien plus inconstant, plus fol, plus legier, plus muable, ne plus prompt à croire toutes mensonges, fables & folies? H I. Ie pense que tu ne reietteras pas, pour le moins, le tesmoignage de ce saint homme Odilo, Abbé des moynes de Cluny, & de tant d'autres bons moynes & fort deuotz, qui l'ont ensuiuy. Car ce bon Abbé n'a point esté de ces nouueaux caphars & cagotz, qui depuis n'aguere ont remply toute la terre de leurs songes & fictions. Car il a vescu du temps de l'Empereur Otho 3. & mourut l'an 1048.

*Petrus de
Natali.
in Catal.
sanct. li. 2.
cap. 26.*

T H O. Quand ie l'auray ouy, ie l'approuueray, ou ie le reproueray. Qu'en dit il?

*Durand.
in Rat. di
ni. off. li. 7
Ru' r. de
offic. mor.*

H I. Pierre d'Amien a escrit, que du temps de Pape Iean 8. à l'enuiron de mille ans' apres la mort & passion de Iesus Christ, Odilo estoit en Sicile. Et pourautant qu'il oyoit souuent le bruit, les cris & les gemissemēs qui se font cōtinu-

tinuellement à l'entour de celle ardente montagne d'Etna, il pensoit qu'ilz venoyent des Diables, se lamentans, pource que les ames des fideles trepassez estoient deliurées des tourmens par les messes, vigiles, prieres, sacrifices & offrandes des Chrestiens. Et pourtant il entint incontinent propos avec ses moynes, & demeurèrent d'arrest ensemble, qu'apres qu'ilz auroyent sacrifié le premier iour de Novembre, & célébré la feste de Tous-sainctz, en l'honneur de tous les sainctz, qui sont désia à repos avec Dieu: ilz feroient pareillement feste le lendemain, & prieres & bienfaitz pour les ames de tous les fideles trepassez, qui estoient encore en peine & torment au feu de purgatoire. En apres, par succession de temps, les autres ont receu & approuué ceste maniere de faire, comme bonne & sainte. Ceste montagne d'Etna est auiourdhuy appelée Mont Gibello, par les Italiens. Ce nom semble auoir esté fait par corruption de langage, de la langue Latine en l'Italienne, de ce mot Mulciber, qui est l'un des noms & des tiltres qui ont esté baillez au dieu Vulcain, qui est aussi appelé Le dieu Etneen, c'est à dire d'Etna, pource qu'il a esté tenu par les Payens pour le dieu du feu, & pour grand mareschal, & le patron des mareschaux. Et pourtant il a esté appelé Mulciber, c'est à dire emolissant l'erain, & a eu

*Polid. vii
gi. de l'inné.
re. li. 6. c. 9*

*Per. de Na
tali. in ca
tal. sanct.
li. 2. c. 26.
La feste des
trepassez.
Supple-
mēt. Chr.
li. 12.*

son temple en celle montagne d'Etna, auquel on dit qu'il y auoit feu perpetuel, & inextinguible, & des chiens qui faisoient merueilles, flarans ceux qui venoyent reueremment à ce temple, & leur faisant bon accueil: & abayans contre les autres, & les mordans. Les Romains celebroyent la feste d'iceluy, appelée Vulcanales, le 29. iour du mois d'Aoust.

THO. Quelle raison auoit Odilo d'imaginer que ces cris & gémissemens venoyent des lamentations que les Diables faisoient?

HI. Je ne puis entendre qu'il ait eu autre raison ne fondement, que les fictions des Poëtes, & l'erreur du commun peuple, pour estimer

*Enfer en
Sicile.*

que là estoit la descente pour descendre aux enfers, & le lieu auquel les ames des meschans estoient tormentées, à cause de leurs pechez:

*Plin. li. 3.
c. 8.*

pource qu'il y a feu perpetuel en celle montagne, qui tousiours ard, & de si long temps. Parquoy, ilz ont cuidé que les damnez fussent detenez en ces grans gouffres ardens.

*Dialo. li.
4. c. 26.*

Il semble mesme, par ce que Gregoire a escrit en ses dialogues de la mort d'Eumorphius & de Estienne, qu'il ait presque esté luy mesme d'opinion semblable. Il raconte qu'Eumorphius, estant prochain de la mort, manda par son seruiteur à cest Estienne, qui estoit aussi prochain de la mort, qu'il vint hastiement. Car la naui re estoit desia preste, pour les mener tous deux

en

en Sicile. Surquoy rendant la raison de cela, il dit, que c'estoit à cause que les olles & les porz des tormens y ont esté ouuers par le feu qui se dégorge plus en celle isle qu'en autre terre. Laquelle chose il estime auoir esté ordonnée par la prouoyance de Dieu, pour la correction des viuans en ce monde : afin que les infideles, qui ne croient point qu'il y ait des tormens d'enfer, veissent les lieux destormens, lesquelz ilz ne vouloyent croire, quand ilz en oyoyent parler. Par ceste mesme raison Odilo a esté esmeu avec ses moynes, & ont esté la cause que les Chrestiens se sont adonnez à celebrer festes, & faire sacrifices pour les trespassez au mois de Novembre, ainsi que les Payens Romains le faisoient anciennement au mois de May & de Feurier, par l'institution de Romulus & de Numa Pompilius, le premier & le second Roy des Romains.

*Aminuer-
saires.*

*Oni. Fast.
li. 2. 4.*

*Liui. li. 1.
dec. 1.*

THO. Toute la raison laquelle a esmeu Odilo, ne procedoit donc que d'ignorance, pource qu'il n'entendoit pas la cause de laquelle ces gemissemens procedoyent, & ce bruit & ces cris espouantables qu'il ouyoit en Sicile à l'entour de celle montagne. HI. Je le pense ainsi. Et pourtant il a imaginé que c'estoyent les Diables qui se tiroyēt par les cheueux, menant dueil, du grand despit qu'ilz auoyent de ce qu'ilz voyoyent les ames sortir des peines

& tormens, Mais son imagination n'a point porté de dommage à son conuent, ny à sa cuisine, ny à tous les autres moynes & prestres. Car ce iour la est bien l'une des meilleures foires que ilz ayent de toute l'année : & vne iournée, en laquelle ilz font moisson & vendenges tout ensemble, sans se guere eschauffer. Si les ames des trespassez y ont autant de gaing qu'eux, elles se peuuent bien resiouyr de la feste.

THO. Je voudroye bien entendre d'ou procedent ces cris & ces gemissemens. Car se ilz ne viennent des Diables, ou des ames des dānez, ou de celles qui sont detenues en purgatoire, il faut qu'ilz viennent de quelque cause

Lucr. li. 1. naturelle. *H 1.* La cause est facile à cognoistre à celuy qui entendra quelle est la situation & la nature du lieu. Car la tormente de la mer est d'un costé, qui fremit mout horriblement. De l'autre costé, les grans gouffres de feu qui sortent de la mōtagne. Parquoy, quād les vens vehemens soufflent, & entrent violemment par les conduis & les cauernes qui y sont & se meslent parmy ces veines de soulfre, enflammées de ce feu impetueux : il ne faut pas estre esmerueillé, quand toutes ces choses se rencontrent, meslées & confuses ensemble, s'il y a bruitz espouantables, & telz que le Poete les a descrit, disant:

Clau. de rapt. pro. li. 1.
Sil. li. 14.
Diodo. li. 6. & 16.
Polyb. li. 1.
bel. pu.
Strab. li. 6.
Ouid. Metam. 15.
La description de Etna.

Là est le mont Etna, qui par horribles

Ruines tonne & fait bruitz mont terribles:
Qui maintesfois iette obscure nuée,
Fortz tourbillons avec noire fumée:
Et estincelle ardente & grans flammeaux
Leue de feu, qui touchent aux cieuz hautz
Souuent vomit entrailles & boyaux
De durs rochers, pierres & lourdz monceaux
D'emprains cailloux, qui fonduz & bouillans,
Du fond rouller fait des gouffres bruslans.

THO. Voila des choses espouantables.

HI. Tu les trouuerois beaucoup plus espou-
antables, si tu auois veu par experience ce que
Aristote, Ciceron & plusieurs autres autheurs
racontent estre quelquefois aduenü, quand ces
feuz se sont débordéz aux regions prochain-
es. Il est aduenü quelquefois que les grans
brandons de feu en issoyent comme grandes
riuieres, qui se débordoyét iusques bien loing
au pays circonuoisin, en telle sorte que les hō-
mes estoyent bien empeschez de fuir deuant,
hors de leurs villes, pour se sauuer, & que plu-
sieurs perissoyent. Car à cause que ce feu se
nourrissoit de soulfre, comme de graisse, il de-
couloit comme des flotz d'eau. Il iettoit vne
fumée si espesse, & qui obscurcissoit tellement
tout le pays, qu'il n'y auoit homme qui peust
cognoistre l'vn l'autre de deux iours. Par-
quoy, quand ilz veirent le soleil luisant le troi-
sieme iour, il leur sembloit qu'ilz fussent ressus-
citez des mortz. Il menoit aussi vn bruit es-

Aristo. de
mira. aud.
Cic. de na.
deo. li. 2.

pouantable, qui estoit ouy de fort loing en grande frayeur. Il dégorgeoit & vomissoit de grans masses comme de fer. Il a quelquefois laissé si grande abondance de cendres apres soy, qu'estans transportées deça & dela par les ventz, elles remplissoyent tout le pays iusques à cent lieues Italiennes à la ronde. Qu'eust dit Odilo, s'il eust veu cela?

THO. Je doute fort, si ainsi est que tu dis, que le bon Odilo n'ait bien esté deceu: & que luy & tous ses moynes n'ayent grandement refué. HI. Ilz ont pour le moins autāt refué, & ceux qui ont creu à leurs songes, que ceux qui s'arrestans aux fables poetiques, ont cuidé que Enceladus, Typhon, Briareus, & les autres Geans, fussent enterrez dessouz celle pesante & ardente montagne d'Etna, depuis que Iuppi-
ter les foudroya, & leur renuersa les montagnes dessus, qu'ilz auoyent dressées pour mōter au ciel, quand ilz luy faisoient la guerre. Car ainsi que ceux la feignoyent que ces Geans espouantables & terribles, estoient encloz dessouz celle montagne, qui se remuans d'un costé & d'autre, iettoient ces grans cailloux, ces feux ardens, ces tourbillons & ces fumées: ceux cy y mettent les Diabes au lieu des Geans, & attribuent à iceux ce qui se fait naturellement. Car il n'y a point de doute, que les Poetes, qui ont feint celle fable, n'ayent entendu

Fable poetique d'Enceladus & des Geans. Virg. AE. pe. 3.

par

par les Geans, les vens encloz en celle terre, qui ne trouuans point d'issue, la se baillent par grande violence. Dont il aduient que les hautes montagnes en sont tellement esmeues, que elles en tremblent souuentefois, & se rompent, ou iettent de grans monceaux de rocz contre le ciel: lequel les poetes ont entendu par Iupiter, auquel ilz ont attribué la foudre, qui briſe & consume tout ce qu'elle rencontre, pour ce qu'elle s'engendre là haut en l'air, qui est aussi appellé ciel. Cecy a donné occasion à Pindare poete lyrique entre les Grecz, de feindre que Typhon le Geant, frappé de foudre, estoit là enseuely: lequel Virgile a ensuyuy, comme Macrobe le tesmoigne, escriuant le semblable d'Euceladus.

A Enei. 3.

Macrob.

lib. 5.

THO. Je cognoy bien par ce que tu dis, qu'ignorance est cause de beaucoup de refuerries & d'erreurs entre les hommes. HI. Il y ena encore bien d'auantage, touchant ceste mesme matiere. Car il y a eu des autres refueurs & rassotez, qui ont fait le semblable des montagnes d'Islande & de Nouergie. Ceux qui ont escrit de ces regions & contrées, tesmoignent, qu'elles sont presques en tout semblables à celle de Êtna, & singulierement aux fins de Nouergie. Quant au pays de Islande, ilz disent qu'il y a troys de ces montagnes: l'une nommée De la croix, l'autre Helga, c'est

*Les mons
de Islande
& de No-
uergie.
Ziegler. in
Schond. ia*

à dire Sainte: la troisieme, Hecla. On a escrit presque le semblable de ceste derniere, que d'Etna: car elle est aussi pleine de soufre, & en a les mines aupres de foy, qui en rendent en si grand abondance, qu'il n'y a presque autre marchandise, ny autre meilleur reuenu en celle isle. Quand celle montagne est en sa fureur, elle bruit comme des horribles tonnerres, & iette des cendres, desquelles elle couure la terre fort loing, tout autour de foy, en sorte que on ne la peut cultiuer. Aucuns voulans quelquefois approcher d'icelle, pour contempler la nature de ce feu, ont esté engloutiz tous vifz en des grans gouffres, qui y sont en grand nombre, faitz par le feu, & tellement couuers de cédres, qu'on ne s'en apperçoit pas. Il sort aussi aupres d'icelle vn feu qui consume l'eau, & ne brusle pas les estoupes. τ η ο. Voila merueilles.

η ι. Je te parle maintenant des pays qui n'ont pas esté si bien cognuz du temps des anciens auteurs, tant Grecz que Latins, qu'ilz sont à present. Car si ie vouloye faire mention par le menu des terres & des fontaines, qui iettent le feu, & des montagnes ardentes, desquelles les anciens auteurs ont escrit, nommément Strabo, Pline, Mela, Solin & autres semblables, la chose seroit bien longue: voire quand nous ne voudrions parler sinon des montagnes qui
font

sont en Italie. Car nous auons en celle contrée, qui est appellée La campagne, la montagne appellée Gaurus, & l'autre appellée Vesuius, qui n'est aussi guere differente à Etna, & qui a quelquefois ietté des cendres en si grand abondance, comme tesmoigne Dion Cassius, que tout le pays circonuoisin en a esté couuert comme de neige, & ont esté transportées quelquefois par la violence des vens iusques en Afrique, & en Egypte, & en Syrie. C'est là ou Plin l'ancien mourut bien miserablement: car se voulant approcher pour contépler le grand feu qui y estoit, la fumée l'estouffa. Il y en a encore vne autre, appellée Moderne, pource qu'il n'y a pas long temps qu'elle a esté faite des pierres de ponce, & des cendres qui ont esté iettées à la plaine. Depuis que le feu en est sorty, elle a fait beaucoup de maux, quand ce ne seroit que des cendres qui ont esté espan- dues iusques bien auant en Apulie, qui ont tout gasté les arbres & les fruitz des regions prochaines. Elle est pres du lac, que les anciens ont appellé Auernus, auquel semblablement les Payens anciens, & principalement les poetes, ont mis l'entrée & la descente aux enfers, & ont prins le nom d'iceluy mesme pour enfer. Parquoy, si celle montagne ardente y eust esté desia pour lors, cela eust bien seruy pour la confirmation de celle opinion. Il y en a aussi

encore vne autre en la contrée de Hetrurie, non pas fort loing du pied de la montagne Appennine, qui fume & iette tousiours flambes.

THO. En voila bien pour faire beaucoup de enfers & de purgatoires, si on les veut forger à la façon d'Odilo.

HI. Or si en vn mesme pays on en peut tant trouuer, que pourroit ce estre de tout le monde? Car on en pourroit aussi bastir des autres au pays de Lycie, en la montagne appelée Chymere: laquelle a donné si grand matiere aux poetes, pour raison des merueilles qui y sont, d'en feindre le monstre qu'ilz en ont feint. Derechef, l'isle appelée Enarie, en fourniroit d'autres, & les isles appellées Aeolies, qui pour ceste cause ont esté dédiées à Vulcain, & ont esté appellées Hephestiades par les Grecz, & Vulcanies par les Latins, du nom de Vulcain mesme, & sont trois en nombre: assauoir, Hidra, Lipara, Strongyle, qui iettent quelquefois le feu iusques dedans la mer. Je me deportte de parler du rocher appelé Nymphæum, qui est en la contrée des Apoloniates, & de la montagne appellée Argeus, qui est en Cilice, & de la montagne des charbons, qui brusle tousiours au dessus, au pays d'Allemagne, en la contrée de Mysene, non pas loing de la ville appellée Zuicca. Je laisse aussi à part des lacx, comme celuy de Turingie &

Tra-

Trafimenus, qu'on a veu quelque fois ardre, & autres semblables. Quât à la montagne Chy mere, le feu qui y est, est de telle nature, qu'il s'alume & se nourrit & augmente d'avantage de l'eau qui y est iettée: pourtant que la terre d'icelle, est limonneuse & pleine de ce limon glueux, comme poix, appelé par les Latins bitumē, duquel on peut vser en lieu de mortier, & de plastre, ou és lampes pour bruler au lieu d'huile. Car il est de nature de soulfre. τ η ο. Ce feu la est merueilleux, qui se nourrit de l'eau, au lieu d'en estre esteinct. A ce que ie puis entendre, par tes parolles, il y a beaucoup de pais, qui ont de telles montagnes & de telles terres.

HI. Si n'ay ie toutesfois touché que les plus renommées, entre lesquelles nous auons encore laissé aucunes des principales, & de celles qui seruent mieux à nostre propos. Car nous n'auons point encore parlé de celle de Nouergie, nommée communement Hechelberg. Ilz disent, que ceste icy est des plus horribles & des plus espouantables qui soyent au monde, & qu'elle est enuironnée de la mer. Mais pour la rendre encore plus terrible, & pour mieux enrichir le conte, il y en a qui disent encore, que de là on oyt les voix, les cris, *Cris des* les pleurs & les lamentations des ames qui vont *damner* en enfer; tellement que ces horribles sons &

*Vaulteurs
& corbe-
aux infer-
naux.*

*Fontaines
de froideur
& chaleur
excessiue.*

*Nadhe-
gryn. Dia-
bles visi-
bles.*

bruitz s'espandent & estendent iusques à vne lieue à la ronde. Ilz y adioustent encore d'auantage, qu'il y a de fort grans vaulteurs, & des corbeaux merueilleusement noirs, qui volent autour, iettans aussi des horribles cris, en sorte qu'ilz espouantent tellement vn chacun, que nul n'ose approcher de celle montagne. En apres, qu'il sort deux fontaines d'icelle, desquelles l'vne est de froideur si grande & si excessiue, & l'autre de chaleur, qu'elles sont intolerables & l'vne & l'autre: & n'y a elemēt tant froid ou tant chaut soit il, qu'elles ne surmōtent en chaleur & froideur. Et qui plus est, en celle mesme contrée, du costé de Mydi, selon leur dire, il y a encore vn lieu nōmé Nadhegryn, auquel les diables de ce lieu apparoisfent aux hommes, qui les voyent en leur presence, ayans des corps d'air. I'ay leu aussi presques le semblable du puy d'Islande, ce que ie n'ay pas encore touche: c'est assauoir qu'il y a des espritz, qui se presentent manifestement, pour seruir aux hommes. En apres qu'on y voit des phantosmes, de ceux qui ont esté noyez, ou occiz par quelque autre maniere violente, qui se presentent aussi deuant les hōmes de leur cognoissance: en telle maniere, que ceux qui ne sauent rien de la mort de ceux qu'ilz representēt, cuydent que ce soyēt ceux la mesmes, & qu'ilz les voyent deuant leurs yeux.

yeux, viuans : & leur tendent la main , & ne se aperçoient point que ce sont phantosmes, iufques à ce qu'ilz les voyent euanouyr deuant leurs yeux. Mais ce n'est pas de merueille s'il y a de telles illusions, à cause qu'il y a tout plein de forcellerie , cōme en Laponie. **THO.** Odi-lo eust bien la trouué encore meilleur occasion pour y situer enfer & purgatoire , qu'au mōt Etna. **HI.** Il eust bien eu plus d'apparēce si ces choses estoient vrayes. Mais si nous nous voulous arrester à telles choses, ce ne seroit iamais fait . Il nous cōuiendroit aussi forger encore vn autre enfer & purgatoire en Escosse, *Le mont dolo- reux en Escosse.* en laquelle on dit qu'est le mont dolo- reux, fort espouantable, à cause des cris de ceux qui y pleurent & se lamentēt. Et en Thuringie, *Thuringie* on dit qu'il y a encore vne montagne, en laquelle on oyt des mout horribles bruits : & qui n'a pas seulement le nom d'auoir des Faunes & *Faunes & Satyres.* des Satyres, qui sont vne sorte de diables , qui ont seduit en maintes sortes les Payens : mais aussi aucuns afferment qu'ilz ont veu cela par experience : & aucuns escriuains & auteurs, qu'ont tiēt pour gēs dignes de foy, l'ont escrit.

THO. Il fera donc beaucoup d'enfers & de purgatoires à ce conte . Mais pourtant que ie crains fort, qu'il n'y ayt de grandes reſueries & mensōges en ces histoires, il me semble qu'il sera le plus seur , & le plus expedient

pour moy , de tirer du costé que i'auoye proposé, parauant, que prendre le chemin, n'en Sicile , n'en point de tous ces lieux que tu m'as nomméz. Car le voyage n'y est pas maintenant tant frequenté ne tant cogneu , que celuy que i'ay entrepris: excepté que tu as nommé l'un des pays, ou ie voloye tirer.

*Le voyage
du puyez
S. Patrix.*

HI. De quel costé as tu donc entrepris de tirer? THO. Je faisoye mon cōte de m'en aller droit en Escosse ou en Hybernie. HI. Y a il là quelque entrée , pour descendre en ces regions infernales? THO. N'as-tu iamais ouy parler du voyage & du Trou & Puitz S. Patrix? Ne te souuiet il point des liures que nous en auions à l'escole, du temps que nous estions petis enfans? Ces liures la me seruiron t bien maintenant à ce voyage, pour sauoir commēt ie m'y dois cōduire. HI. Tu me reduis maintenant en memoire les contes de ma grand mere . N'estions nous pas bien-heureux en ce temps la , que nous auions telz liures entre les mains, au lieu de quelque bon autheur, & de la Bible, & des sainctes Escritures? Si nous considerons bien la misere de ce temps la, & la barbarie & l'ignorance & de Dieu & de toutes bonnes disciplines, qui pour lors occupoit toute la terre, & la comparions avec la misericorde que Dieu nous fait maintenant: nous aurions bien occasion de luy en rendre graces. Pense
que

que ce liure, auquel est descript le voyage de saint Patrix, & les autres semblables, pleins de fables, encore plus sottes & plus lourdes, estoient fort propres, pour donner quelque bonne doctrine aux enfans. Vn nouveau Testament ne leur eust il pas esté beaucoup meilleur entre les mains?

THO. Non certes. Car il y auoit danger qu'ilz ne fussent venuz heretiques, s'ilz se fussent mis à lire les liures de la sainte Escriture si ieunes. Mais il n'y auoit point de tel danger en ceux cy. HI. Tu as raison: pour crainte que les chrestiens ne deuiennent heretiques, il leur faudra defendre la lecture des saintes Escritures, & leur permettre tous folz liures, pour en faire des bestes brutes. Vrayement nous sommes en beau pays, puis que nous sommes desia iusques à saint Patrix. THO. Tu n'ignore pas, que ce pertuis est en Hybernie. HI. Les vns le mettent en Hybernie: les autres en Escosse: mais ce m'est tout vn ou il soit. Car ie, n'y veux pas faire le voyage. THO. Ce me est aussi tout vn. Car ces pays ne sont pas fort separez l'vn de l'autre. Ce m'est assez, mais que ie le puisse trouuer. Pour ceste cause i'auoye proposé de m'en aller là tout droit: mais depuis que i'ay ouy le beaupere, ie ne me veux pas mettre en chemin, sans auoir premieremēt parlé à luy: & puis ie me gouuerneray selon

*Escosse &
Hybernie.
Eras. inchi
li. Vadia.
in cōm. in
Pomp. Mel*

le conseil qu'il me donnera.

H I. Te ioues-tu, ou si tu refues? T H O.

Perdre le
rire.
Trophonius
antrum.
Lebadie.
Phylostr.
Eras. chil.
1.604.7.

Ce n'est pas vn pais, duquel il se faille iouer, veu que tous ceux qui y ont esté, en perdent le rire, & toute resiouyſſance. H I. Il est donc semblable au trou, & à la cauerne de Trophonius, qui est au pais de Lebadie, de laquelle les anciens ont escrit presque tout en la mesme sorte, que noz refueurs du puitz S. Patrix. Parquoy ie ne doute point, que l'une des fables n'ait engendré l'autre. Si ne puis-ie toutesfois penser, que tu parles à bon escient. T H O. Tu penses que ie soye vn moqueur comme toy. H I. Si tu n'es moqueur, tu es donc vn refueur. T H O. Je ne dors pas pour refuer. H I. Aussi ne dormoit pas aujourd'huy le frere prescheur: mais si ne pense-ie point iamais auoir ouy vieil refueur, refuer en telle sorte en veillant. Mais ces refueurs qui refuent en veillant, sont les plus grans & les plus lourdz refueurs de tous. Je ne puis croire qu'il n'ait estudié en l'escole de quelque vieille sempiterneuse pleine de Requiem, de laquelle il nous a apporté ceste belle theologie. E V. N'as-tu point honte de te moquer, & de mesdire en telle sorte, d'un homme tant sauant & tant vertueux? H I. Je ne say pas quel sauoir il peut auoir: mais cela peux-ie bien dire seuremēt, que ie n'ay ouy chose de luy, par laquelle ie puisse cognoistre, qu'en

qu'en luy ait ne fauoir, ne science. S'il auoit e-
 studié aux lettres humaines, ie penferoye que
 il auroit leu ce qu'il a presché, ou en la poesie
 de Homere, ou de Virgile, ou de quelques au-
 tres poetes, tant Grecz que Latins: ou en Plu-
 tarche. Car ie suis certain, que l'on trouuera
 celle mesme matiere, traitée presque totale-
 mēt de la sorte qu'il l'a nous a deduite, en ces
 bons anciens theologiēs & sur tout aux liures
 de Plutarque: qui raconte les choses merueil-
 leuses, que Timarchus a veu en la cauerne de
 Trophonius, qui sont en peu differentes, à cel-
 les que nous auōs ouy du beaupere, & que plu-
 sieurs theologiēns ont escrites des enfers. Mais
 ie crain bien, qu'il n'ait pas tant profité en Grec
 n'en Latin, qu'il ait iamais leu ces auteurs, ne
 qu'il les feust entendre, quād il les liroit. Pour
 en dire ce que i'en pense, ie croy plustost qu'il
 a leu cela au Calendrier des bergiers, ou en
 Dantes. τ η ο. Ie ne say. η ι. Quel aage peut
 il bien auoir, à tō aduis Thomas. τ η ο. Pour
 quoy me demādes-tu de son aage? η ι. Pour-
 ce que s'il auoit yescu du temps d'Alcestis, &
 de Protefilaus, ou d'Hercules & de Theseus,
 ou d'Vlysses & d'Eneas, lesquelz les poetes tes-
 moignent auoir esté aux enfers, & auoir visité
 toutes ces regions & chambres, tant des lim-
 bes, que du purgatoire, & ces beaux & plaisans
 champs Elysées: nous pourriōs presumer qu'il

Home. O-
dyss. 11.

Virg. AE-
ne. 6.

Plutar. in
cōment. de
dam. So-
crat.

Dātes. Le
calendrier
des ber-
giers.

auroit parlé à eux, & apprins d'iceux ceste theologie. Mais il faudroit, qu'il eust pour le moins, plus de mille & neuf cens ans, & qu'il fust au double plus vieux, que Mathusalé. **THO.**

*Ioan. 11.
Fable feinte
sous l'histoire
de Lazare, à l'imitation
des Poetes.*

N'auons nous pas Lazare, lequel Iesus Christ ressuscita, qui en est venu long temps apres tous ceux la, & qui en a peu dire ce qui en est? Tu ne peux pas dire, que cela soit vne fable, comme des autres. **HI.** Ie ne nye pas que nostre Seigneur Iesus Christ n'ait ressuscité Lazare par sa vertu diuine. Car nous en auons trop certain tesmoignage. Mais ie nye les fables & resueries, qui ont esté adioustées à celle histoire, en grande moquerie de la Parolle de Dieu. Mais quand bien ainsi seroit, encore ne pourroit auoir parlé à luy le beaupere, qu'il ne fust aagé, pour le moins de plus de mille cinq cens ans.

THO. Ne le pourroit il pas bien auoir ouy, de ceux qui par longue succession, l'ont apprins & entendu de ceux qui l'auoyent ouy de Lazare? **HI.** Il y a bien icy des ouy dire. Ie voudroye bien sauoir lequel a esté le premier, auquel Lazare l'a raconté: & si Lazare en a parlé plus amplement que Iesus Christ, & tous ses Prophetes & Apostres. Ne voyōs nous pas icy bien clairement, comment nous nous sommes iouez de Dieu, conuertissans ses œuvres & miracles, en fables & fictions plus que poeti-

poetiques? En pouuoient faire d'auantage les ennemis de nostre religion? Ces vieux refueurs qui ont songé telles fables, ne font ilz pas de Lazare vne Alceftis, & vn Theseus, ou vn Vlyffes, ou vn Eneas, qui font reuenuz des Enfers, pour raconter ce qu'on y faisoit? De quoy seruent toutes ces fictiōs, & ces narratiōs fabuleuses, & ces contes de vieilles raffotées: qui pour reuoquer en doute, la verité de Dieu, & pour dōner occasion aux Epicuriens, & aux moqueurs & contempteurs de Dieu & de sa Parolle, de se rire de la religion Chrestienne, & de la doctrine Euangelique, ainsi que Pythagoras, Lucrece, Lucian & plusieurs autres, se sont moquez des fables & fictions poetiques, touchant leur enfer, & de la vaine credulité & grande sottise du peuple ignorāt, qui y adioustoit foy, comme nous aux songes des Caphars. **THO.** Tu appelles songe, tout ce qui n'est à ta fantasie. **HI.** J'appelle songe, les songes. Car ou est ce qu'ilz ont pris ce qu'ilz nous ont presché de ces fables? Ilz nous ont voulu faire autant de parties, des regions infernales, que les cosmographes en ont fait de la terre habitable. Car ainsi qu'ilz l'ont partie en Asie, en Afrique, & en Europe: aussi ceux cy ont diuisé les habitations infernales, en limbe, en purgatoire & en l'enfer des damnez. Et si ont fait toutes ces regions habita-

*Ouid.
Met. 15.*

*La diuisiō
de la cosmographie
infernale.*

bles, & tant peuplées, qu'il n'y a si petit coing ny anglet, que tout n'y soit plein, principalement en purgatoire: si nous les en voulôs croire. Car les ames y entrent tous les iours par beaux millions. N'es-tu pas bien de mon opinion, Theophile?

THE. Nostre Seigneur Iesus Christ n'a pas ressuscité Lazare, ne les autres, lesquelz il a r'appellez de mort à vie, pour entretenir les hommes par telles moqueries, & pour rendre la Parole de Dieu semblable à vne poesie. Car sa simplicité ne le peut porter, ne sa grauité & maiesté aussi. Il luy suffit de nous enseigner, qu'il y a vn enfer, & nous nous deuons contenter de cela, sans nous enquerir, côme il a desia esté dit, ny ou il est, ne quel il est. Car ceux qui par le iuste iugement de Dieu y seront condamnez, le sauront par experience trop tost, & plus qu'ilz ne voudroïent. Les esleuz, & les biéheureux, qui en sont deliurez par Iesus Christ, ne se soucient d'en sauoir d'auantage, que Dieu leur en a reuelé: & qu'ilz en ont sentu en leur conscience, quand ilz l'ont offensé, & qu'ilz ont esté presséz du sentiment de leurs pechez. Car comme saint Augustin le dit, la chose mesme monstrera plus ouuertement ce qui en est, quand la science des saintz sera si grande, que l'experience ne leur sera point necessaire pour cognoistre ces peines.

HI. Que

*Qu'il s'us-
fit de sa-
noir d'enfer.*

*August. de
Ciuil. Dei
li. 21, c. 9.*

H I. Que fais-tu si ce beaupere est point des disciples de Pythagoras, & de celle mesme opinion? Parauenture que l'ame de quelcun de ceux, lesquelz iadis les poetes tesmoignent estre descenduz aux enfers, est entrée en son corps, tellement qu'il est vn de ceux la mesme.

T H E. Nous aurions bien occasion de le penser, en oyant ces songes & resueries, si nous ne sauions certainement que l'opinion de Pythagoras est fausse (combien que plusieurs entre les Iuifz en sont encore enyurez:) & que ce que les poetes & les moynes ont inuenté, ne sont que songes, & mensonges. Mais encore que nostre moyne seroit quelque Theseus, ou Vlysses Pythagorique, si se pourroit il bien tromper. Car depuis que ceux la n'ont esté en ces pays, & regions, le feu y a prins, qui a brûlé toutes les parois, & toutes les murailles de ces diuerses habitations & chambres infernales, forgées, basties, & edifiées premierement par les philosophes & par les poetes, & derechef par les moynes & les prestres: tellement qu'il n'y est demouré, ne limbe, ne purgatoire, fors qu'enfer seulement, ou est le feu de la gehenne.

*La trans-
migration
Pythago-
rique.*

*Le feu em-
prins en
purgatoire*

T H O. Vous parlez du limbe & du purgatoire, tout ainsi cōme s'il n'y en auoit point, & comme si tout ce qu'on nous en a presché eust esté inuenté à plaisir, & que ce ne fussent

que fables. Mais l'Eſcriture n'en fait elle point de mention? Penſez vous que tant de bons preſcheurs, qui ont eſté le temps paſſé, euſſent enſeigné telles choſes, ſi elles n'eſtoient vrayes?

*Enſans
mornez.*

II. I'ay bien ouy preſcher à pluſieurs, que les enfans mornez, & tous ceux qui trepaſſent, auant qu'eſtre baptizez, s'en vont droit aux limbes, auxquelz ilz ont leurs chambres à part, ſeparées d'enfer & de purgatoire, & qu'ilz n'en trent iamais en paradis, mais qu'ilz ſont priuez eternellemēt des ioyes d'iceluy. En apres, il n'y a rien que i'aye ouy tant recommander aux ſermons, que les ames de Purgatoire, auxquelles ilz baillent auſſi chambres à part, & les detiennent cōme priſonnieres, en celles chartres, & priſons, iuſques à ce qu'elles ayent payé leur rançon.

*Priſonniers
de Purga-
toire.*

*Plato. lib.
de anima,
& in Gor-
gia & in
Phedone.
Plutar. in
cōm. de
d. m.
Socrat.*

*Crinit. de
hon. diſcip.
li. 5. ca. 11.*

EV. Ne croys-tu pas fermement, que cela ſoit vray? & qu'il y ait vn limbe, & vn purgatoire? II. Ie le croiroye ſans doute & ſans contradiction aucune, ſi ie l'auoye auſſi bien leu au vieil & au nouueau teſtament, que aux liures de Platon ou de Plutarque, & aux autres ſemblables, qui ont eſté d'une meſme opinion, nommēmēt Xenocrates Academique, diſciple de Platon, qui raconte bien ample-ment, ce que Socrates ſe diſoit auoir ouy de Gobrias magicien, touchāt les peines & la bea-
titude des ames. Ceſtuy cy deſcrit fort ample-

ment

ment les situations des enfers. Je y pourray encore adiouster, entre les poetes Grecz Orphée & Homere, & Virgile entre les Latins: qui a si bien descrit le limbe, l'enfer, le purgatoire, & le paradis du Pape, que ie ne pense pas, qu'il soit possible de les mieux peindre: & ne puis croire qu'il n'ait esté inspiré du mesme esprit par lequel ceux ont parlé qui nous ont forgé ces limbes, & ce purgatoire: & duquel ceux-la ont esté inspirez, qui ont asisté aux conciles, ausquelz telle doctrine a esté approuuée, & confirmée. Parauenture qu'il se pourra trouuer quelque chose aux descriptions de Virgile, qui semblera quelque peu differente à la Theologie Papale: mais toutesfois, si les matieres sont bien examinées & espluchées, on n'y trouuera pas des erreurs si grans, que pour iceux il le faille iuger heretique en theologie Papale, ne repugnance, qui ne soit plus facile d'accorder, que d'appointer l'Escot & Thomas ensemble: les Reaux & les Nominaux, & les sophistes & docteurs questionnaires entre eux. Mais pour en faire l'esprouue, escoute parler le poete en la maniere que ie le pourray faire parler en nostre langue. Et pour aller mieux par ordre, ie te reciteray premier, la description du limbe des enfans.

*L'esprit au-
teur du pur-
gatoire.*

*Le limbe
des enfans.
Virg.
AENE. 6.*

*Tantost onys sons, cris & voix subites,
Avec grans pleurs aux premiers introites:*

quelle iamais ceux ne sortent qui vne foys y ont esté abyfmez . Celle prison est le vray enfer, auquel sont puniz les pechez & les crimes si grans & si enormes, qu'ilz sont infanables, & ne peuuent aucunement estre purgez: comme sont les sacrileges, les meurtres, les tyrannies, les violences, & les paillardises execrables, & autres semblables crimes : & principalement ceux des tyrans, des roys, des princes & seigneurs . Car Platon, duquel ceste philosophie procede, les loge tous en enfer : si au lieu d'estre bós princes & bós pasteurs, ilz ont esté les tyrans, & les loups du genre humain.

THO. Je voy desia icy vn grand accord, avec noz prestres & noz moynes . Quant aux limbes des petis enfans, il n'y a difference, sinon que Virgile les y met tous, & ceux cy n'y logent, sinon ceux qui sont mortz sans baptesme. II. Aussi ne leur est il pas tant rude. Car il ne les priue pas de route ioye & consolation, comme ceux cy font les pources petis enfans des Chrestiens. THO. Quant aux enfers, ie ne trouue pas trop mauuaise l'opinion de Platon. Premièrement, pource qu'elle approche aucunement de la verité des saintes Escritures, & qu'il monstre le iuste iugement de Dieu sus les tyrás. Car il est bien raison, puis qu'ilz n'ont personne qui les chastie en ce monde, & qu'ilz ne veulent estre subietz ny à Dieu ny à crea-

Plat. li. de anima. & in Gorgia. Les pechez des Princes, & des tyrans. Euseb. de preparat. Euang. li. 12. ca. 3.

ture qui soit, mais faire tout ce qu'il leur plaît, qu'ilz soyent puniz au double en l'autre monde : & qu'ilz rendent gorge de leurs grandes cruautéz, violences, & crimes énormes qu'ilz ont commis, pource qu'ilz ne craignoyent ne iustice ne punition. Que t'en semble Theophile.

*La vertu
de verité.*

THE. Combien que le tesmoignage des saintes Escritures nous suffit, toutesfois cecy nous doit bien encore esmouuoir, & confondre les infideles, quand nous voyons la vertu de verité estre si puissante qu'elle contraint & les Philosophes, & les poetes, & les autres qui ont esté ignorans de la vraye science de Dieu, de la confesser, & luy rendre tesmoignage. Ce que Platon a dit des enfers, ne se fait pas seulement aux enfers, ains en voyons en ce monde souuentesfois de grandes experiences. THO. Comment donc? THE. Nous voyons souuentefois, que Dieu fait de grandes vengeancez sur la terre, principalement par guerres cruelles: & que par icelles, non seulement plusieurs grans & fors peuples sont cruellement traitez & defaitz & destruits, mais aussi plusieurs grâs Empereurs, Rois, Princes & seigneurs: & cecy par des autres Princes estranges & infideles, & des cruelz tyrans. Or telles punitiōs sont plus que iustes & necessaires. Car tout va presque par tout le monde, par cōpere & par cōmere, sans auoir

auoir regard à Dieu ny à iustice . Parquoy, il est presque loisible à vn chacun de faire tout ce qu'il veut , sans crainte de punition : sinon à quelque poure malheureux, vil & abiet, qui n'a credit ny autorité au monde , ny parent, ny amy qui en ait soing, ne qui procure pour luy . Car les autres, qui ont du credit & de l'autorité, ou des parens & des amis qui peuuent quelque chose, trouuent facilement moyen d'eschapper la main des hommes, combien qu'ilz seront grandement coupables de beaucoup de grans crimes. Car pour le premier, s'ilz sont princes, il ne faut pas, non seulement que personne mette la main sur eux, pour en faire iustice : mais, qui pis est, il leur faut applaudir en toutes choses : & ne est pas seulement permis d'ouurir la bouche pour les admonester, ou reprendre de leur iniquité, sans grand dangier de la vie . S'ilz sont des amis des princes, leur appointment est aisé à faire. Si on a affaire à vne communauté, & la matiere vient en vn conseil, ou en vne iustice: la plus grande part, & quelquefois presque tous les conseillers & officiers se trouueront la pluspart du temps ou des parens, ou des affins, ou des amis de celuy auquel la cause appartient: ou des amis de leurs parens, affins & amis . Et combien qu'on fera retirer ceux qui leur attoucheront de plus pres par parentage

ou affinité : toutesfois iustice trouuera encore de grans empeschemens . Car quand ceux cy seront issus , il aduiendra souuentefois que le reste de ceux qui demoureront dedans , & le nombre sera moindre que de ceux qui seront dehors . Or ceux qui demoureront dedans , se ilz ne sont des parens & des affins , ou ilz serōt amis d'iceux , ou du personnage mesme duquel le iugement se doit faire : ou ilz seront corrompus : ou ilz craindront de déplaire & à la partie & à ceux qui seront dehors . Et parain si innocence demeure le plus souuent affoulée , & iustice chassée & bannie par iniustice , des lieux auxquelz elle deuoit regner & presider . Quand cela se fait , tout le monde est conuertie en vne vraye briganderie . Car ceux qui la deuroient empeschier , la mettent au dessus , & ouurent la porte à toute licence effrenée à tous les meschans . Puis donc qu'il n'y a personne en vn pays de ceux du pays , pour punir les iniquitez qui se commettent contre Dieu & contre son peuple , ny pour punir ceux qui les deuroient punir , quand euxmesmes les commettent & nourrissent & maintiennent : le Seigneur prend des seruiteurs d'estrange pays , & souuentefois de grant tyrans & de grans brigans & bourreaux , pour punir les autres tyrâs & les brigâs & bourreaux de son peuple . Ceux cy n'espargnent ne Roy , ne prince , ne riche , ne po-

poure, ne parés, ny affins, ny amis. Car ilz n'en cognoissent point. Toutes les histoires tant diuines que humaines, nous rendent tesmoignage euident de cecy: qui est vn commencement d'enfer pour les reprouuez, qui ne s'amendent point par l'admonition des fleaux de Dieu: & vn aduertissement pour les autres qui ne sont pas encore du tout desesperez: à celle fin que ilz ne viennent en ce iugement qui sera executé en enfer, au feu de la gehéne: lequel feu est appellé inextinguible, non pas seulement pour ce qu'il ne s'esteint iamais, mais aussi pour ce que la matiere qui ard en iceluy, & de laquelle il se nourrit, y ard sans fin, & sans se pouoir iamais consumer. Car s'il n'auoit matiere perpetuelle, il ne feroit point de besoing qu'il fust perpetuel. Il nous faut donc cōclurre que la iustice de Dieu est de telle vertu, qu'elle ne laissera rien impuny: & que cela qui n'aura esté corrigé en ce monde, par vraye repentance, ou qui sera demouré impuny, sera puny en ce lieu de torment, auquel les Diables seront executeurs du iuste iugement de Dieu.

T H O. Tu conclus, à ce que ie voy, que Dieu fera ce deshonneur aux hommes, qu'il punira par les Diables, par ses ennemis mesmes, les iniquitez, que les hommes n'auront voulu ne corriger ne punir, ny en eux ny aux autres. **T H E.** Il est ainsi. Mais ne fera ce

*Les riches
en purga-
toire.*

*Plato de
Repu. li. 2.*

pas vn grand deshonneur aux hommes qu'il leur faille bailler de telz lieutenans, pour ex-
cutter la iustice de Dieu, laquelle eux ont mes-
prisée? **THO.** Ouy certes. Mais il me semble,
que noz prestres & noz moynes ont trouué
vn fort bon remede par le purgatoire, pour
obuier à cecy : & qu'ilz foyent fort differens à
Platon & à Virgile, en ce qu'ilz logent tous les
plus gros, les plus riches, & les plus grans prin-
ces & seigneurs, plustost en purgatoire qu'en
enfer. **HI.** N'entens-tu pas la cause? Il ne re-
uenoit point de profit à Platon n'à Virgile du
purgatoire, cōme à ceux cy : & croy que quād
il leur en fust venu encore quelque profit, que
ilz eussent esté de meilleure conscience que
les nostres : & que pour leur gaing particulier,
ilz n'eussent pas ainsi voulu seduire les pources
ignorans. Car ilz monstrent par leurs escritz,
qu'ilz auoyent encore quelque crainte & co-
gnoissance de Dieu, plus que nous n'en pou-
uons recognoistre en ceux cy. Platon se mo-
que des vsuriers, des paillardz, des pariures &
des trompeurs : en ce qu'apres qu'ilz ont com-
mis beaucoup de cruauté, de tromperies, de
rapines, d'extorsions, de vilainies & de toutes
meschancetez & abominations, pensoient en
estre quites, s'ilz fondoient des anniuersaires
pour effacer la memoire de leurs iniquitez. Il
condamne cela comme vne grande folie. Car
il en-

il entend bien qu'il ne faut pas payer Dieu de telle monoye. Aucontraire, il n'y a rien que noz prestres & noz moynes recommandent tant, comme ces choses: car ilz en vivent grasfement: & pourtant ilz veillent apres les charognes, comme les corbeaux. Et s'ilz peuuent rencontrer quelcun qui ait la bourse bien fournie, & dequoy payer sa rançon, ilz luy feront bien dire, qui a mangé le lard. Ilz le mettront en lieu, duquel il n'aura garde de sortir, qu'ilz ne l'ayent bien degraissé. Car ilz sont les tyrans des tyrans, & les degraisfeurs des gros rongeurs & vsuriers: lesquelz ilz ne veulent pas laisser rostir & tormenter aux Diables, mais en veulent estre les bourreaux euxmesmes, & oster cest office à ceux auxquelz Dieu l'a baillé. **THO.** Ilz auront donc beaucoup de mal, à ce conte. Car ilz feront tyrannizez en ce monde, & encore en l'autre, apres leur mort, comme ilz ont tyrannizé le monde, durant leur vie. Et si ne laisseront pas pourtant de tomber entre les mains des Diables. Mais ie voudroye bien encore sauoir quelle peine ont les autres, qui ont commis des pechez plus legiers.

HI. Plato & Virgile logent ceux cy en purgatoire, & principalement les simples gés, & les hommes priuez, qui n'ont pas eu grand credit ny autorité. Parquoy, ilz n'ont pas peu auoir si grande licence de mal faire, que les

*Les tyrans
des tyrans,
& les deg-
raisfeurs
des vsu-
riers.*

*Purgatoire
Platoni-
que.
In Gorgia
Plutar.
deseranu-*

*mi.vind.
Les pechez
des simples
gens, &
des Princes* autres. Et s'ilz ont commis quelques crimes, ilz n'ont pas peu tant nuire à la société humaine, que ceux des autres. Car les pechez des princes ne nuisent pas seulement à eux: mais tant par iceux, que par leur mauuais exemple, ilz ruinent tout le monde, au lieu que les simples gēs ne nuisent guere qu'à euxmesmes. Et pour tant ilz estimoyent que leurs pechez estoient sanables, & qu'ilz pouuoient estre purgez.

*La différen
ce des pe
chez, & la
diuersité
des estats
des tres-
passez.* Pour ceste cause ilz ne les condamnoient pas à damnation eternelle. Car il leur sembloit que ilz n'auoyent pas fait assez de maux pour estre damnez, & qu'il y auoit quelque remede, pour estre gueriz. Aussi ilz ne les logeoyent pas du premier coup aux champs Elisées, comme les autres grans & vertueux personnages, qui auoyent meritē par leur vertu d'estre incontinent receuz en beatitude, ou au nombre des dieux.

τ η ο. Ceux donc alloÿēt en purgatoire, qui auoyēt esté gēs de bien maugré eux, & qui n'auoyent pas eu puissance de faire tant de mal, que les autres. Mais assauoir-mon si Dieu en iugera ainsi? η ι. Les philosophes & les poetes parlent comme ilz l'entendent. Eux regardent seulement aux œures, mais Dieu regarde principalement le cœur, selon lequel il iuge des œures.

τ η ο. Il me semble que noz prestres
ne

ne sont pas d'opinion guere differente à ceste cy. Car ilz canonizent & logēt entre les sainctz *Canonisation des* ceux qu'ilz iugēt auoir esté les plus vertueux, *sainctz.* & les plus sainctz, & les ames parfaitement bō- *Extra. de cele. miss.* nes, disans qu'elles s'en volent droit au ciel, & *13. q. 2.* n'ont besoing de noz bien-faitz. *Tempus.* H I. Il y en a bien peu maintenant de telz, selon leur pratique. Ilz font accroire que tout va en purgatoire, pource qu'ilz ont plus de tributz de ceux la, que de ceux qui sont desia au ciel: excepté quand ilz leur peuuent bailler si bon bruit qu'ilz les font adorer enterre. Car par ce moyen ilz en tirent de beaux tributz par les offrandes. Mais poursuy ton propos, Thomas.

T H O. Ilz logent en purgatoire ceux qui n'ont pas icy accompli leur penitence, qui toutesfois sont mortz confés & repentans: ou qui n'emportent point de peché mortel avec eux, mais seulement des venielz, lesquels peuuent estre purgez par le feu. Car il y a quelque remede pour ceux la.

H I. C'est bien leur doctrine: mais toutesfois quand il vient à la pratique, ilz ne regardent guere aux pechez mortelz ou venielz, mais le plus aux richesses ou à la poureté. Ce leur est tout vn quelz soyent les pechez, ou mortelz ou venielz, sanables ou insanables, moyennant que le trepassé ait dequoy payer leurs drogues, & leurs medecines, & argent

pour la rançon, & pour les lettres de sa grace, qu'ilz font par leurs bulles, & indulgences. Des pources, avec lesquelz ilz n'ont point de profit, ce leur est tout vn ou ilz aillent, soit en paradis, en enfer, ou en purgatoire. Car ilz n'ont point de soing des ames, sinõ de leurs bourses.

ТНО. J'ay encore à te demander vne chose. En ce purgatoire des poetes, disent ilz qu'il y a du feu, comme en celuy des prestres?

НІ. Il me semble que les poetes soyent vn petit plus raisonnables, & plus misericordieux que les prestres & les moynes. Car ilz ne font pas vne telle rotisserie des pources ames.

ТНО. Comment donc? НІ. Pource que ilz leur ont assigné la peine vn petit plus legiere, & plus moderée, selon les méfaitz d'vn chacun. Car ilz ne condamnent pas tous generalement au feu. Mais ilz en font trois differences, selon la grauité ou legiereté des pechez. Ceux qui ont peché le plus grieuement, & qui sont plus pleins & plus farciz de pechez, & plus terrestres, & plus difficiles à purger, se tenans si fort engluez & engrobez à l'ame, qu'on ne les peut arracher, ne nettoyer en maniere que ce soit, fors que par le feu: iceux sont mis en la fornaise ardente. Car il les faut refondre tout de nouveau. Les autres qui ne sont pas du tout tant sales & vilains, & qui n'ont pas les pechez si fort accolés en l'ame, qu'on ne les puisse arracher

Trois différences de pechez, & la diversité des peines.

racher par remedes plus legiers & plus gracieux: ceux la sont detenuz quelque espace de temps dedans des grans gouffres d'eau, pour estre là lauez & purgez . Il y en a des autres, qui sont encore moins coupables, & qui n'ont commis que quelques petis pechez bien legiers, qui n'ont pas besoing de si forte purgation. Et pourtant, on ne les fait que pendre seulement vn petit en l'air, pour les éuenter . Car il ne faut qu'un petit de vent pour escouuer la poudre qui est demourée adherante & attachée à l'ame , à cause de la conionction qu'elle a eu avec son corps & sa chair.

*Diversité
de purga-
tions.*

THO. A ce que i'en puis entendre , on fait des ames en ce purgatoire , comme nous faisons des habillemens, des linges, des vaisseles & des metaux. Car quand nous auons quelques robbes , ou quelques linges vn petit poudreux, ou qu'ilz craignent les tignes, les gerfes & la vermine : nous les estendons & pendons sur vne perche en l'air , pour les éuenter & espouffer. S'il y a quelque tache ou macule, qui ne s'en vueille pas facilement aller, nous les lauons avec d'eau . Et si cela ne suffit, nous les ensauonons , ou les mettons à la lexiue , & faisons la buée, ou les baillons aux desgraisseurs, pour en oster la male-tache. Si nous auons aussi des metaux, qui soyent meslez & corrompuz, & qui ayent besoing de purgation, nous

les iettons au feu , qui purge tout , & consume l'escume, & autres matieres fausses, & les separe d'auec les bons & fins metaux.

*Medecins
d'ames.*

1. Pler. x.

H I. Tu peux cognoistre par cela que les poetes ont eu en cest endroit plus d'esprit & de raison, & plus belle couleur que les prestres. Car ilz ont consideré la nature des pechez, & des pecheurs semblablement, comme vn bon medecin contemple la complexion des malades, pour bailler à vn chacun remede conuenable à sa maladie. Ilz ont aduisé, que le corps humain estoit composé de diuers elements, & que la complexion & les affections de l'homme, suyuoient souuentefois la temperature du corps, & la nature des elements, desquelz il estoit composé. Puis donc que le corps est la maison & habitation de l'ame, & que l'ame a esté detenue dedans ce corps terrestre, comme en vne prison & chartre obscure, il est impossible qu'elle n'ait esté maculée & souillée des ordures & de la bourbe de ce corps vicieux, comme celuy qui sortiroit d'une prison infecte, ou de quelque puât borbier. Et pourtant, Platon, & les autres philosophes, & les poetes semblablement, qui ont suyuy son opinion, ont estimé que les ames auoyent besoing de quelque purgation, apres qu'elles estoient separées du corps: pource qu'apres leur sortie, il estoit impossible qu'elles n'emportassent,

sent, & retinsent avec soy encore quelques ordures & macules de ceste chair corrompue, à cause de la conionction, & de la conuersation & familiarité, laquelle elles auoyent eu ensemble. Toutesfois, à cause que les corps ne sont pas tous d'une mesme complexion, mais selon la disposition & la temperature des elemens, desquelz ilz sont composez : les vns sont plus terrestres, & les autres plus celestes. Semblablement, selon la doctrine qu'ilz ont receue, & l'exercice qu'ilz ont eu en vertu, les vns sont plus vitieux, ou plus vertueux que les autres. Aussi ilz ont estimé que les ames estoient differentes, selon la difference des corps, desquelz elles sortoyent.

ТНО. Puis qu'ilz ont prins ce fondement, il semble bien que leur opinion a quelque apparence. И I. Et pourtant ilz ont considéré, qu'il y a aucuns pechez qui sont plus minces, plus gresles & legiers que les autres, tenans plus de la nature de l'air & du vent, que de la terre. Et pourtant ilz les font purger par l'element qui approche plus de leur nature, & qui leur semble le plus propre remede. Les autres qui sont vn petit plus pesans & plus espez, comme l'eau est plus pesante & espesse que l'air & le vent, ceux sont lauez en l'eau. Car ilz tiennēt plus de la nature de l'eau. Et pourtant ilz les mettent en la lèxiue, & les font tref-

bien lauer. Outre ceux cy, il y en a des autres fort pesans, & du tout terrestres, lesquels le vent ne l'eau ne peuuent nettoyer. Et pourtant les ames qui ont esté tellement souillées des ordures de ce corps vicieux, & tellement adonnées à ces voluptez corporelles, qu'elles sont presque du tout degenerées & deuenues terrestres: icelles sont purgées par le feu. Car elles ont besoing d'un element qui soit plus actif & plus violent, pour les pouuoir purifier: & pour consumer tellement toute l'ordure & l'escume, qu'il n'y demeure rien que le pur metal de la nature celeste. Car les contraires

*Crit. de
honest. dis
ci, li. 3. c. 11*

sont gueriz par les contraires. Strabo fait mention qu'il y a vne certaine sorte de linges qu'il faut mettre au feu pour les purger, qui sont faitz de la matiere d'une certaine pierre, nommée Carystius. Je ne say si ces philosophes & poetes ont estimé que ces ames, qu'ilz veulent purger par le feu, & leur faire vne telle lexique, fussent de quelque telle matiere.

THO. Je ne say de quelle opinion ilz ont esté quant à la substance des ames, mais il me semble qu'ilz ont esté grans refuseurs.

HI. Ne pense pas toutesfois que ie soye auteur & inuenteur de ceste philosophie, & que ie dise ces choses à ma poste & à mon auantage. Et pourtant escoute comment Virgile en parle. Car tu trouueras comprise en briues

pa-

parolles vne grande partie de ceste theologie
Platonique, & Plutonique, aux vers d'iceluy,
ou il escrit des ames separées des corps, intro-
duisant Anchises parlant d'icelles à son filz E-
neas, en tel sens, & parolles semblables:

Et quand leur corps mortel la vie laisse,
Tout mal pourtant soudain ne les delaisse
Totalement, ne le pestilent vice
Du terrien corps, confit en malice:
Mais force il est, par facons merueilleuses,
Qu'il croisse & tienne aux ames malheureuses.
Parquoy, puniz par griefs tormens leurs faictz
Sont, que iadis ont commis trop infectz.
Les vnes sont en l'air haut élouées,
Pour estre mieux par les vens essorées.
Les autres ont gouffres d'eaux spatieux,
Pour fort lauer leurs forfaitz vitiens.
D'autres en a, lesquelz au feu faut estre,
Pour ce brusler qu'en eux est de terrestre.
Nous souffrons tous selon nostre deserre:
Et puis de là nous est la porte ouuerre
A ces beaux champs & amples Elysées:
Auxquelz passons, en faisons disposées.
Mais peu ces champs bienheureux possedons,
Iusqu'au grand iour, auquel nous attendons,
Qu'en temps parfait, parfaitement purgez,
Nous en allions de pechz allegex:
Et que du tout la celeste nature
Bien nette soit de la puante ordure
Des vilains corps, & tant bien affinée,
Qu'en elle soit du tout exterminée.

Virg.
A Ene. 6.
Purgatoi-
re.
August. de
civit. Dei.
li. 21. ca. 13.

Purgation
par vent.

Purgation
par eau.

Purgation
par feu.

Champs
Elysées.

THO. Je pense que les Alcumistes, ont
pris leur fondement, sur ceste philosophie.

*Extrai-
teurs de
la quinte
essence.*

Car ceste est la vraye maniere, pour extraire la quinte essence. Mais il me semble, que ces medecins d'ames, auroient besoing de voir de leur vrine, & de leur taster le poux: afin qu'ilz peussent mieux cognoistre leur cõplexion, & leur savoir mieux bailler la medecine, selon icelle, & la purgation plus propre.

Н I. A ce que ie voy, en sortant de la geographie infernale, tu me vas mettre en la physique & en l'alchymie, & la medecine, auxquelles nous trouuerons bien encore de la besogne taillée, si nous nous y voulons fourrer. Parquoy, ie suis d'aduis que nous entrelaissons vn petit ce propos & ceste matiere, pour le present, & que nous poursuyuions ce que nous auõs commencé.

Т Н О. Ie suis entré en ce propos, à l'occasion de ce qu'en parlant du purgatoire des poetes, nous auõs aussi parlé des medecines & des drogues & purgations ordonnées aux ames par iceux. Parquoy il me semble, qu'il n'estoit pas impertinent & hors de nostre propos, de parler plus amplement de ceste alchymie & medecine infernale, en laquelle nous estions entrez. Н I. Ce que tu dis n'est pas sans raison. Et quant à moy, ie suis bien d'aduis que nous traitions ces matieres. Car elles nous seruiron t beaucoup à l'intelligence des choses desquelles nous auõs commencé à disputer.

Mais

Mais ie seroye d'aduis pour le present, qu'elles fussent remises à vne autre fois, & que tu nous declarasses maintenant la cause de ton entreprise touchant ton voyage de sainct Patrix, du quel tu nous as parlé parauât. Car ie desire fort de ma part, de l'ouyr & de l'entendre, esperât que tu nous diras quelque chose de braue & de nouueáu. Il y a desia bonne piece, que i'auoye proposé de te ramenteuoir cecy, mais les propos sur lesquelz nous sommes tombez, ont esté cause que ie l'ay delayé iusques icy, & que ie l'ay presque oublié. Et puis quand tu nous auras declairé cecy, nous baillerons lieu à Theophile & à Eusebe, de parler plus amplement de ces matieres infernales: & nous les escouterons, comme ilz nous ont escouté. Car ie ne doute point, qu'ilz ne traitent de meilleures matieres que nous, & plus doctement, & en plus grande grauité.

THO. Ie desire bien cela: & quât à moy, il ne te doit ia beaucoup chaloir de m'ouyr: car tu n'orras de moy chose qui guere vaille. Parquoy, ie suis bien encore content de me taire, si vous voulez. Car ie crain fort, qu'apres m'auoir ouy, vous ne vous moquiez de moy, principalement toy, Hilaire, qui es tant expert en ce mestier. Ie croy que c'est la principale cause, pour laquelle tu as si grand desir d'ouyr mes propos. Parquoy, ie suis d'aduis, que nous

nous taisions toy & moy , vn petit de temps , pour ouyr Theophile & Eusebe , pour les raisons alleguées par toy . Car quant à moy , ie puis beaucoup profiter en oyant : mais en parlant , ie ne puis qu'occuper le temps , lequel pourra estre employé à meilleurs deuis . Et pourtant mettez vous entrein : & puis , s'il y a du temps de reste , ie verray que ie feray .

THE. Ie croy que nous aurons du temps assez . Ne crain donc pas de commencer . Mais tu nous veux faire trouuer la chose bonne . Pour ceste cause tu te fais tant prier , sachant que quand plus tu refuseras de nous raconter ce que nous demandons , tant plus le desire-
rons . THO. Ie regarde bien autre chose . Ie

*Prouer. 17
Iugement
par la pa-
rolle.*

considere ce que Salomon a escrit , disant : Si le fol se taist , il sera reputé sage . Car il en préd de l'hôme , comme d'un voirre , ou d'une cloche . On cognoit ceux au son , s'ilz sont fendus ou entiers , & s'ilz sont en rien cassez , ou rompus & vicieux . Aussi pareillement l'on iuge de l'homme à l'ouyr parler , s'il est fol ou sage . Car on voit l'esprit de l'homme en sa parolle , comme sa figure en vn miroir : & on contemple en icelle la nature d'iceluy , comme la complexion du corps , en son poulx & en son vrine . Parquoy il est facile à iuger par icelle , quelles drogues il a en la boutique de son cerueau .

HI. Tu crains paraenture , qu'on ne dise
de

de toy, ce que Plutarque a escrit, qu'Apelles, ce peintre tant excellent, dit vne fois à Negabyfus, vn grand seigneur de Perse, en sa boutique: cōbien qu'Aelian qui a aussi escrit la mesme histoire, met Zeuxis, vn autre excellent peintre, au lieu d'Apelles. Mais le sens reuient tout à vn. *Plutar.* *Aelian.* *de vari.* *histo.li.2.* *т н о.* Je ne say pas celle histoire.

н и. Ce grand monsieur se mit à parler à plaisir, tāt de l'art de peinture, que d'aucunes images que ledit peintre auoit desia faites, louant fort celles qui estoient le moins dignes de louange, & desprisant celles qui estoient les plus ingenieusement & exquisement faites. Le peintre qui estoit hōme d'esprit, ne peut endurer celle arrogance & outrecuydance. Parquoy il luy dit: Auant que tu te manifestasses par ta parolle, quād nous te voyiōs avec cest or & ce ste pourpre & ces beaux & riches habillemēs, qui ornoyent ton silence, nous auions quelque grande opinion de toy, & te tenions pour quel que grand & sauant personnage. Mais maintenant, puy que tu as parle, mes valletz, qui broyent les couleurs en ma boutique, & les petis enfans se moquent de toy & de ta folie.

т н о. Cela conuient bien à mon propos. *н и.* Mais en voulant tant faire du sage, aduise aussi de l'autre costé, à ce que dit vne fois vn Philosophe de quelcun, qu'il voyoit assis en vn banquet, sans sonner mot, ia soit que tous

les autres missent quelque propos en auant, & luy donnassent assez matiere de parler à son tour. Si ce personnage, dit-il, est homme sage, il fait le tour d'un fol: s'il est fol, il ioue le personnage d'un homme sage. т н о. Ie ne puis bien entendre ce propos. Car il me semble, qu'il implique contradiction. н и. Il veut donner à entendre par cela, qu'ainsi que trop parler appartient aux folz & inconsideres, qui comme Salomon le dit, espandent tout leur esprit: aussi se taire tousiours, conuient aux bestes, non pas aux hommes. Parquoy il faut tenir moyen en toutes choses. т н о. C'est cela à quoy ie preten: & m'est bien aduis, que ie parle assez, selon le lieu & les personnes, avec lesquelles ie suis. I'ay tousiours ouy dire, qu'il y auoit plus de dangier à trop parler, qu'à se taire: & que l'homme estoit plustost repris de l'un, que de l'autre. Parquoy ie trouue fort bon le conseil de saint Iaques, qui dit: Soyez legiers à ouyr, & tardifz à parler. Ne soyez pas plusieurs maistres. Et pourtant i'ayme mieux estre disciple que maistre, & ouyr que parler. Car si c'est vne belle science, que sauoir bien dire, il me semble, que la science de se sauoir bien taire, n'est pas guere moins à louer ne moins difficile. Mais si ie l'osoye dire, elle me semble plus difficile. Car on en trouue plus qui sauēt parler que de ceux qui se sauēt taire:

taire : combien toutesfois que se sauoir bien taire, & bien parler, ne sont iamais separez de ensemble. Or à cause que ie ne suis pas sage pour sauoir bien parler, ie veux pour le moins en quelque endroit par silence, contrefaire le sage. Car on dit: qu'il fait mal parler latin deuant les cordeliers. Quand ie suis avec gens ignorans comme moy, ie parle comme vn docteur, principalement s'il me semble que i'aye la moytié d'une dragme, ou d'un scrupule de science plus qu'eux. Mais quand ie me trouue deuant vous, & voz semblables, ie pers incontinent tout mon caquet.

*Prouerbe
commun.*

H I. Tu veux icy fort faire du fin & du theologien. Mais si faut-il que tu nous faces ce conte que tu nous as promis. T H O. Puis que tu me pressentant, tu l'auras: mais si tu te moques de moy, tiens-toy pour asseuré, que i'auray bien aussi beau champ sur toy, pour te rendre la pareille. Car tu penfes ouyr quelque grand secret, & tu te trouueras trompé. Ne me cognois-tu pas encore, Hilaire? Premièrement tu n'ignores-pas, que ie ne fus iamais guere sage. Tu peux donc presumer, quelle marchandise ie puis desployer de ma boutique, & quel docteur contemplatif ie puis estre. Tu fais bien que ie m'appelle Thomas. Or si ie suis Thomas de nom, encore approche-ie plus de la nature de mon parrin, duquel ie porte le nom.

*L'incrédu-
lité de Tho-
mas.*

1e a 20. 21.

Luc 24.

Marc 16.

Matt. 28.

que de son nom. S'il a esté incrédule, tellement qu'il ne vouloit pas mesme croire la resurrection de Iesus Christ, s'il ne le voyoit luy-mesme de ses propres yeux, s'il ne le touchoit de sa propre main, & s'il ne mettoit les doigtz en ses playes: aussi de mon costé, ie suis en doute, & ne say bonnement à qui ie doy croire, voyant la grande diuersité qui est auourd'huy entre ceux mesmes, qui s'appellent Chrestiens, voire les plus sauans touchant le fait & la matiere de la religion. Enquoy i'ay plus grande occasion de douter, que saint Thomas. Car il auoit ouy la promesse que Iesus Christ auoit faite de sa resurrection, de laquelle il n'auoit pas si iuste occasion de douter, veu qu'il auoit desia tant de foys trouué par experience Iesus Christ veritable en toutes ses parolles: & qu'il auoit tous ses compagnons, qui d'un mesme accord luy tesmoignoient, comme il s'estoit apparu à eux, apres sa resurrection, & l'auoyét veu & touché. Mais moy, qui suis vn pource idiot, & vn pource ignorant, que doy-ie penser, & à qui me doy-ie arrester, quand ie considere ceste grande diuersité d'opinions, qui est entre les homes, touchant la Religion, & nommément touchant l'estat des trepassez, & des regions & habitations infernales & celestes, voire entre les plus sages? Ie l'ay experimenté sans aller plus loing entre vous-mesmes, qui estes

estes icy de sentence autant contraire les vns aux autres, que le feu & l'eau. Pourtāt i'auoye entrepris le voyage de saint Patrix, auquel, *Le puy s. Patrix.* comme l'on dit, on voit tout l'estat de tous les trepassez. On y voit les tormés des dānez, qui sont en enfer, & des ames detenues en purgatoire, & au limbe, & les ioyes de paradis semblablement. Pource i'auoye esperance, que ie me pourroye là informer à la verité, de toutes ces choses, & qu'apres les auoir veues, ie seroye hors de toute doute. Car ie ne sauoye plus quelz autres remedes querir. Toutesfois, depuis que i'ay commencé a ouyr debattre ces matieres plus amplement & clairement entre vous, & les mieux espluchées par le menu que iamais ie n'auoye encore par cy deuāt, i'en ay desia fort perdu ma fantasie. Il te souuiēt bien que ie disoye, qu'apres auoir parlé au beau-pere, qui auoit si bien deschiffre ceste matiere, que par-auenture i'auroye gagné mon voyage: mais sans aller à luy, ie crains fort, qu'auant que ie departe de vous, vous ne me coppiez du tout le chemin, & que ne le me rēdiez plus court. Car i'espere, à l'aide de Dieu, que nous visiterons en brief temps toutes ces chambres & habitations infernales, vn petit mieux par le menu, sans nous bouger de ce lieu. Car vous estes tous sauans, non seulement en theologie, mais aussi en toutes autres sciences. Parquoy ie

ne doute point, que si vous voulez desployer vostre sauoir, vous ne me peussiez aisément monstrier, ce que ie desire voir. Car puis qu'il est question, de ces pays, desquelz les autres Geographes & Cosmographes ne peuuent auoir cognoissance par leur art, sinon par presumptions, i'espere que si vous voulez mettre en auant les passages de la sainte Escriture, qui en font mention, que vous me pourrez mettre deuant les yeux, tout ce que ie desire en voir & en sauoir, comme en vne carte & en vntableau. Car puis que le saint Esprit est l'ame des saintes Escritures, ie tien pour chose asseurée, que luy cognoit bié toutes ces choses la, & qu'il en a parlé à la verité, & que tout ce que les autres en disent autrement, ce n'est que refuerie & mésonge. Parquoy si vous voulez prédre sa parolle pour le iuge de vostre disputation, ie suis bien conten de la prendre, pour ma guide: & suis certain, qu'elle me guidera mieux, que la Sibyle ne guida Enée. N'es tu pas bien de mon aduis, Theophile?

La parolle
de Dieu in
ge & gui
de.

AEne. 6.

Isa. 119.

THE. Quand tu ne t'en tiendras pas pour asseuré, Daud, qui en parle par experience, t'en peut certifier, disant: Ta Parolle, Seigneur, est la chadele & la lumiere à mes piedz. Celle guide ne te conduira pas à tes peres mortz, ainsi que Virgile fait conduire Eneas par la Sibyle, à son pere Anchises: mais t'adref
sera

fera au Dieu viuant, ton Pere immortel, lequel tu orras parler par icelle, pour te mettre hors de toute doute. Tu auras bien vne meilleure guide en elle, que toutes celles desquelles Hilaire a parlé.

II. Il y a bien aussi vn autre point, que quand nous aurons paracheué le voyage par la conduite d'icelle, nous ne sortirons pas par les portes de Songe, comme Eneas: ou comme nostre beau-pere, lequel nous auõs ouy si bien refuer, & comme tous ses semblables, qui se reposent en autre couche, que fus la pure Parolle de Dieu. Car elle a celle vertu, que qui se repose sur elle, iamais ne songe, & ne refuse: ou s'il songe à la maniere des vrais Prophetes de Dieu, c'est sans refuer. Parquoy il ne sort point par la porte d'iuoire, mais par celle de corne, qui est claire, & parmy laquelle on voit comme par les yeux. Car telz songes sont plus certains, que ce que les autres voyent à l'œil, en veillant: comme il appert en ceux de Ioseph & de Daniel. Mais qui se va coucher en autre liçt, iamais ne cesse de songer & refuer: & tous leurs songes, sortent par la porte d'iuoire, qui est espeffe, comme les oz. Parquoy on ne peut rien voir par icelle. Nous le voyõs par experience en noz theologastres & sophistes, qui sont tant obscurs & troubles, qu'on n'y voit goutte. Car apres qu'ilz ont

*Les portes
de Songe
& de Som-
ne.*

*La porte
d'iuoire
& de corne.*

*Songes des
sainctz &
des res-
ueurs theo-
logastres.*

*l'esprit de
Bacchus.*

bien bâqueté, & fort humé de ce bon vin theo-
logal, ilz sont pleins de l'esprit de vin, lequel le
grâd dieu Bacchus leur inspire, & le fait entrer
par la porte d'iuoir, c'est assauoir, entre les
dés & les maschoires: puis leur fait môter tant
d'exhalatiōs, de celle liqueur diuine, bien au-
née, & tât de fumées au cerueau, qu'ilz songēt
plus creux que le bas des Enfers, & le siege de
Lucifer. Puis s'en retournent rauiz, en leur fu-
reur poetique, comme s'ilz en estoient depar-
tiz tout fraichement. Mais ainsi que leurs son-
ges sont entrez par la porte d'iuoir, par force
de mascher, & de remuer les maschoires & ba-
bines, comme baboins d'orgues: aussi ilz sor-
tent par celle mesme porte.

*Homer.
Odyss. 19
Virg.
Æne. 6.*

THO. A ce que ie puis entendre, ce que
tu dis des portes du somne, c'est quelque fi-
ction des poetes, par laquelle ilz ont voulu si-
gnifier, les vrays songes & les faux. HI. C'est
vne fiction d'Homere & de Vergile, par la-
quelle ilz ont voulu signifier qu'il y auoit des
songes diuins, & qui apportoyent avec eux
quelque certaine signification, pour admonne-
ster les hommes. Pour ceste cause, Homere qui
a esté fort ancien poete, & le premier inuen-
teur de ceste fiction, comme ie puis entendre,
dit clairement, que les songes procedent de
Iuppiter, & les appelle souuentefois, enuoyez
de Iuppiter, messagiers de Iuppiter, & voix di-
uines

uines. Phurnutus les appelle pour scéblable cause, messagiers des dieux, exposant par cela, l'intétiō d'Homere, qui a pris Iuppiter pour dieu.

THO. Il m'est aduis que ce que tu dis ne conuient pastrop mal avec ce que nous lisons aux saintes Escritures des songes diuins, desquelz tu as desia fait mention. HI. Il est vray. Laquelle chose me fait penser, que cela que les Payens ont escrit de ces choses conforme aux saintes Escritures, a esté pris d'icelles, cōme plusieurs autres choses qui sont paruenues iusques à eux, par les trafiques & la frequentation qu'ilz ont eu ou avec le peuple de Dieu, ou avec ceux qui l'ont hanté. Or Vergi- *Songes* le a voulu signifier telz songes, par la porte de *faux* corne, pour les raisons qui ont desia esté dites. Il a aussi voulu donner à entendre, qu'il y en auoit des autres, qui estoient faux, comme ilz sont pour la plus part, mais presquestous, & principalement en ce temps icy : auquel celle maniere de reuelation, par laquelle Dieu a iadis admonesté ses Prophetes & son Eglise, par visions & par songes, est autant rare que le don de miracles, de la nature desquelz elle tient. Car puis que nous auons la reuelatiō de la volonté de Dieu si claire, par le moyen de l'Euangile qui nous a esté apporté, par le propre Filz de Dieu, en sorte qu'elle ne le peut estre d'auantage: Dieu veut que nous croyons

*Reuelatiō
de l'Euan
gile.
Heb. 1.
Mal. 17.
A. G. 3.*

totalement à icelle. Parquoy il ne nous faut
 pas beaucoup arrester, aux reuelations & aux
 songes des caphardz & des faux prophetes.
 Car ce ne sont point songes, qui entrent & qui
 sortent par la porte de corne, desquelz on puis
 se tirer quelque doctrine certaine: ains sont de
 la nature de ceux qui entrét & qui sortent, par
 la porte d'iuoire, qui est des dētz & des os des
 Elephans, & semblables à la fiction, qui a esté
 feinte par Virgile, touchant Aeneas. Pour ce-
 ste cause, il a dit clairemēt, que Aeneas est issu
 par celle porte d'iuoire, apres qu'il a eu visité
 toutes les regions infernales: pour donner à
 entendre, qu'il auoit feint à plaisir ce voyage
 d'Eneas, comme vn songe, qui esuanouit apres
 qu'on est esueillé. Car alors on aperçoit, que ce
 qui sembloit estre vray en songeant, n'estoit
 sinon vne fausse imagination, qui couroit par
 le cerueau de l'hōme. Si noz caphardz eussent
 fait cōme Virgile, ilz seroyent trop plus à sup
 porter. Car quād Virgile & les autres poetes
 proposent leurs songes & fictiōs, ilz ne les pro
 posent pas comme choses vrayes, ains veulent
 bien qu'un chacun entēde, que ce sont fictiōs.
 Mais quād noz caphardz nous proposent les
 leurs & leurs songes, ilz veulēt qu'on y adiou
 ste foy souz peine du feu, voire plus qu'à la pa
 rolle de Dieu, cōme nous le voyōs par experi
 ence, en la matiere de laquelle nous auōs parlé.
 Car

AENE. 6.
 le songe
 d'AENEAS.

Fictions
 poetiques.

Doctrine
 des faux
 Prophetes.

Car elle est pour la plus part fondée sur les songes & les resueries des prestres, moynes & caphardz. **THO.** Je ne say s'il y a grãd raison en leur doctrine: mais pour le moins, ilz font belle rostisserie par toute la Chrestienté, de voz semblables, qui n'y veulent croire. Puis que vous ne voulez pas croire qu'il y a vn purgatoire en l'autre monde, ilz le vous font bien sentir en cestuy cy.

HI. Nous y voudriõs bié croire s'ilz nous pouuoient monstrier, qu'il eust quelque fondement en la parolle de Dieu. Mais tu as peu voir clairement, par ce que nous auons desia deduit par ensemble, que toute leur theologie, touchant la matiere de laquelle nous disputons à present, n'est autre chose, sinon la vieille theologie payenne, renouuellée par iceux, & déguisée vn petit d'autre sorte: mais tellement, qu'il est tout euident, comment l'une a engendre l'autre. Parquoy tu ne dois pas estre esbahy, si nous tenons leurs resueries pour songes.

THO. Si ainsi est quetu dis, ie n'en suis pas esbahy. **HI.** Or tu dois encore noter, touchant ceste matiere des songes de laquelle nous auons desia parlé, que les poetes, nommément Hesiodé, Homere, Statius, Silius, Tibulle & Ouide, ont fait le somne, filz de la nuit, & l'ont tenu pour dieu, & pour frere de la mort, *Fictions des poetes touchant le somne & le foye. Hesio. Theog. Hom. Iliad. 14.*

Tibul. li. 2. ayant des ailes noires & vne verge, & vne cor-
 Philostr. de ne pleine de liqueur & d'humeur, pour en ar-
 imagini. roufer les cerueaux des hommes & les endor-
 Stat. li. 6. mir. Ilz ont aufsi tenu le fomne, pour le pere
 Theba. de fonge, Ouide a logé tant le pere que le filz,
 Silurus li. au pays des Cimmeriés, & leur a là assigné leur
 10. habitation & leur regne, au lieu qu'Homere
 Ouid. Me- les auoit logez parauant en Lemne. Derechef
 tamor. li. l'Ouide, qui les a là logez, fait le fonge pere de
 11. troys filz, desquelz l'un est nommé Morpheus,
 l'autre Icelos ou autrement Phobetor, & le
 troisiésme, Phantasos.

La mere
 du fomne,
 Hesio.
 in theogo.
 Cimmeriés
 Ouid.
 Meta. li. 11.
 Strab. li. 1.
 Home.
 Odyss.
 lib. 11.
 Cice. Acad
 quest. li. 4.

THO. Qu'ont voulu signifier les poe-
 tes, par ces fictions? H I. Il est assez facile à en-
 tendre. Ilz ont feint le fomne, filz de la nuit,
 pource que la nuit est plus humide que le
 iour; & que l'humidité du cerueau, comme
 la principale cause, sert grandement a engen-
 drer & faire venir le fomne. Les tenebres aus-
 si y sont fort propres, & principalement à cau-
 se que les sens interieurs sont moins distraitz,
 par les exterieurs. C'est la cause aussi, pour la-
 quelle ilz luy ont baillé son logis entre les Cim-
 meriens, qui sont en vn pays, auquel selon le
 tesmoignage de ceux qui en ont escrit, les rays
 & la lumiere du soleil ne paruiennét presque
 iamais. Parquoy ilz sont tousiours couuers de
 nuées & de tenebres obscures, en telle sorte
 qu'ilz ne peuuent guere auoir de lumiere, si-
 non

non par le moyen du feu, & des luminaires qu'ilz allument. Cela a donné lieu au proverbe latin, qui appelle vne grāde obscurité, & les grandes tenebres de l'entendement, Tenebres Cimmeriennes. Les ailes noires luy sont aussi baillées pour ceste mesme cause, & pource que legieremēt il vole decà & delà. Semblablement l'humeur de sa corne, de laquelle il arrouse les hommes, signifie cela que nous auons desia dit de l'humidité du cerueau & de la nuit, qui est mere du somne, & ce que nous auōs dit de la porte de corne. Quant à ce qu'ilz ont feint le songe, filz du somne, cela n'a point besoin d'exposition.

*Prouerbe
Laet. insti.
dini. li. 4.
Ailes du
somne.
Tibul. li. 2
Corne de
songe.
Philostr.
in imag.*

*Le songe
& ses filz.*

THO. Cela me semble assez clair. Mais que dis-tu de ses enfans? HI. Il est aussi facile à iuger, par la significatiō des noms, desquelz sont nommez, quel office & quelle propriété ilz ont. Car le premier signifie autant comme formateur: & le secōd, cōme imagier & espouuantable: & le dernier, fantasieux, pource que le songe engēdre de merueilleuses formes & images, & de merueilleuses fantasies & resueries, fort fantastiques, & souuentefois fort espouuantables au cerueau & en l'entendement de l'homme.

*Morphemus.
Icelos.
Phobetor.
Phantasos*

THO. Que distu aussi de sa sœur? HI. Le somne aussi est à bon droit appellé le frere de la mort, tant pour raison de la similitude

*La sœur du
somne.
Homo.
Ilia. li. 14*

*Hesio in
Theog.*

*Ouid. 2.
Eleg. 9.
Image de
mort.*

*Dioge.
Laer. de
vit. & mo
vi. philoso.*

*AElian. de
var. hist.
lib. 2.*

qui est de l'un à l'autre, que pour cela, que l'homme estant prochain de la mort, sommeille souuentefois, & s'en va presque comme en dormant: tellement qu'il semble que le somne nous liure, comme par la main, à la mort sa sœur. Pour ceste cause, Ouide a dit: Fol qu'est-ce que le somne, sinon l'image de la mort froide? Aussi ceux de Sparte, comme Pausanias le tesmoigne, ont mis les images du somne & de la mort tout ensemble, l'une pres de l'autre. Et Virgile appelle la mort, vne nuit éternelle, & vn somne de fer: & Homere, d'erain. Et le Philosophe Secundus, interrogué par l'Empereur Adrian, que c'estoit que la mort, respōdit entre les autres choses, qu'elle est vn sommeil éternel, & la mere du somne. Et Gorgias, estant fort ancien & malade, & prochain de la mort, pour ceste mesme cause respondit à vn sien amy, qui l'estant venu visiter & l'ayāt trouué sommeillant luy dit, Que fais tu? Le somne, dit-il, commence à me remettre entre les mains de sa sœur.

THO. Il y a bien des mysteres, en ceste theologie du somne & des songes. HI. Il n'y a toutesfois pas vn point, duquel nous ne trouuions la pratique en noz songe-creux & theologiens poetiques. Car pour le premier, cependant qu'ilz ne veulent point prendre la parole de Dieu pour leur guide, sans laquelle nous

ne

ne pouuons auoir aucune vraye lumiere, pour illuminer noz entendemens tenebreux, il n'y a point de doute qu'ilz ne demeurent en tenebres perpetuelles, trop plus obscures & tenebreuses, que les Egyptiennes ou Cimmeriennes. Parquoy ce n'est pas de merueilles, s'ilz sont fort endormis, & si en ce long sommeil, ilz nous forgent de merueilleuses resueries, & des songes merueilleusement monstrueux. Car ilz sont tât enuoloppez & tant couuers & abyfmez des brouillars & des nuées tenebreuses des traditions humaines, & de leurs sophisteries, que la lumiere de la parole de Dieu ne peut paruenir iusques à leurs yeux. Car il leur en préd cōme aux Iuifz, qui ne pouuoient regarder la lumiere de Iesus Christ, ny la gloire d'iceluy, à cause du voile qu'ilz auoyēt deuât les yeux: par lequel Satan, le Dieu de ce monde, leur auoit aueuglé leur cœur & l'entendement. Parquoy il n'est possible de les esueiller de ce sommeil tant profond, auquel ilz ont pour leur saint esprit, ces trois filz de songe, desquelz il a esté parlé: qui leur engendrent de merueilleuses formes & fantasies au cerueau, & principalement quand ilz reuiennent de leurs banquetz theologaux, & que le sommeil a vn petit remply à bon escient, sa corne de laquelle il arrouse les cerueaux des hommes, du tonneau de la douce liqueur de Bacchus, qui par

excellence est appellé Vin theologal : comme on appelloit iadis entre les anciens Souppes & banquetz pontificaux, les banquetz somptueux & frians.

THO. Puis que tu as fait mention du vintheologal, ie voudroye bien entendre la cause pour laquelle on a baillé ce tiltre au bon vin. Car i'en ay souuent ouy faire mention.

HI. C'est pourtant que noz maistres les theologiens Sorboniques ne boient pas volontiers du pire, ains leur en faut tousiours du meilleur quoy qu'il couste. Enquoy ilz ont plus que iuste raison. Car ilz vivent le plus des pechez du peuple, selon qu'il est escrit : Les prestres ont mangé les pechez du peuple, c'est à dire les ofrandes pour les pechez. Or les pechez sont vne viande fort dure, & bien difficile à digerer, & le bon vin aide fort la digestion. Parquoy, ce n'est pas sans bonne cause qu'ilz le quierent. Or quand ilz en ont bien trempé & arrousé leurs cappes & leurs chapperons, c'est alors qu'ilz songent creux, & qu'ilz voyent de merueilleux mysteres, & qu'ilz visitent ces regions infernales, & qu'ilz nous en apportent de si merueilleuses & estranges nouvelles, & tant espouantables aux pures vieilles & bigotes. THO. Je n'en suis pas ébahy. Car ilz ont dormy sus vn bon cheuet.

HI. Nous lisons aux fables anciennes, que
Endy-

Endymion & Epimenides, ont esté de grans dormeurs, dont les proverbes en sont encore aujourdhuy entre les Grecz & les Latins, par lesquels on signifie les grans dormeurs & refuseurs. Il a esté dit de Endymion, qu'il dormoit tousiours, sans iamais s'éveiller : & d'Epimenides, qu'il dormit cinquante & sept ans en vne cauerne: en sorte que quâd il fut éveillé, il luy sembloit que le monde fut tout changé. THO. Il se change beaucoup de choses en moins de temps. HI. Je ne say si les Papistes ont forgé leur fable & leur legende des sept dormâs sur celle là: mais il me semble qu'ilz en pouuoient bien adiouter d'auantage de sept en la legende. Car il y a vn nombre infiny de dormans entre eux, & de grans refuseurs, qui surmontent grandement & ces dormans là, & Epimenides & Endymion. Je penseroye, si la transmigration Pythagorienne, de laquelle nous auons desia parlé parauant, auoit lieu, que l'ame de ceux la auroit esté transportée en ceux cy: & principalement celle d'Epimenides, qui a aussi esté theologien, côme eux, entre les Creteins, appelez maintenant Candiens. Parquoy, saint Paul luy a bien fait cest honneur, d'alleguer son tesmoignage; contre les faux-prophe-
tes, menteurs, malles bestes, & ventres paresseux, de son pays mesme, pour les battre de leur propre baston. Mais le temps qu'il a dor-

Endymion
Epime-
nides.
Arist. li.
10. Mor. il.
Cice. Tus-
cu. Quest.
lib. 1.
Plin. li. 7.
c. 52.
Diogen.
laer.
Aul. Gell.
Tit. 1.

my, n'est rien, aupris de celuy de noz resueurs. Car leur somne est perpetuel. Parquoy, il y a grand dangier, s'ilz le continuent, qu'il ne soit mortel, & qu'il ne les liure à la fin à la mort éternelle. THO. Je m'en rapporte à eux, qui enseignent les autres.

HI. On peut iuger, du temps qu'ilz ont dormy, par leurs songes, lesquelz ilz ont manifestez tant par leurs sermons que par leurs escritz. Car quand ilz auroyent dormy deux ou trois mille ans, encore aurions nous iuste occasion d'estre esmerueillez, des grans songes & infinis qu'ilz ont songé. Cela est cause qu'ilz se trouuent maintenant, quand on les éveille vn petit par la Parolle de Dieu, plus estonnez & ébourdis, qu'Epimenides: & qu'il leur semble que le monde soit tout changé & tout renuersé c'en dessus dessouz. Je pense que cela a esté aussi la cause, qui a ainsi trompé nostre beau-pere, & qu'il ne s'est pas pris garde quand le feu a pris en ses logis infernaux, comme Theophile le nous a raconté, lesquelz ses predecesseurs auoyent bastis par leurs songes & resueries.

THO. Quand i'ay bien escouté toustes propos, il m'est aduis que tu veux conclurre, pour toute resolution, que tout cela que nostre beau-pere, & tous ses semblables, ont presché & escrit, tant du limbe que du purgatoire,

ne font que songes & refueries, & fictions semblables à celles des poetes & des Payens anciens, qui ont esté alleguez. Quant à moy, ie ne puis nier, qu'il n'y ait grande conuenance ensemble, si les tesmoignages, que vous auez alleguez, sont vrais. Mais puis que nous auons disputé assez longuement, selon la theologie Platonique, poetique & payenne: i'en voudroye bien aussi ouyr disputer vn petit mieux à bon escient, selon la theologie Chrestienne, qui seule est digne de ce nom. Parquoy, ie seroye bien content, que Theophile & Eusebe entraissent en ceste matiere, comme nous l'auons desia arresté entre nous: ou s'ilz trouuent plus conuenable, de remettre la chose à vne autre fois, pource que nous en auons desia assez deuisé pour vn coup, ie m'y accorde: mais par condition, que vous ne me faillez pas à la premiere occasion. Car i'ay grand desir d'estre vne fois bié resolu en ces choses, par la Parolle de Dieu.

T H E. Nous semblablemēt n'auons pas moins de desir, que toy & nous & tous les hommes de la terre, soyent tellement resoluz, non seulement en ce poinct icy, mais aussi en tous les autres de la religion Chrestienne, que Dieu fust honoré par tout, comme il le requiert de nous par sa Parolle. Mais auant que conclurre du tout la disputation que nous auons desia eue ensemble, il me semble qu'il sera bon que

nous aduisions à la doctrine que nous pouuons tirer des choses qui ont desia esté déduites iusques icy. Hilaire a mis enauant beaucoup de fables & de resueries & des poetes & des philosophes & des Payens anciens, & des prestres & des moynes, & des docteurs Papistes, touchant le limbe, purgatoire & enfer. En racontant ces resueries, plusieurs choses ont esté dites en ieu & par maniere de gaudisserie. Mais il nous faut aduiser, que combien que la vanité de l'entendement humain, qui se plait tant en sa sagesse, est bien digne de telle moquerie : toutesfois il nous en faut tirer du profit d'auantage, que du passe-temps qu'on pourroit auoir à s'en gaudir & iouer.

*Des mo-
queries des
resueries
des hōmes.*

*La cognois-
sance de la
source des
erreurs &
abus.*

HI. Quand nous n'en tirerions autre profit, sinon en cela, que la cognoissance de ces choses nous sert grandement, pour nous donner à cognoistre les superstitions, les idolatries, les blasphemes, les abus & les erreurs, par lesquels le merite de Iesus Christ est grandemēt aneanty & blasphemé entre les Papistes, & a nous monstrier la source dont ilz sont issus : il me semble que ce profit ne doit pas estre estimé petit. Car il y en a plusieurs, qui ne peuuent entendre, que ces erreurs soyent erreurs : ains cuidoient que ce soit la doctrine ancienne de l'Eglise Chrestienne : pource qu'ilz ne sauient dont ilz ont pris leur naissance, ne quand, ne

com-

comment ilz ont commencé : & ont esté entre-
tenuz & augmentez & déguisez & cōtrefaitz,
& paruenuz iusques à nous.

THE. Je t'accorde cela. Mais il y a enco-
re des autres poinctz , lesquelz il nous faut ap-
pliquer à noz vsages. Car l'homme fidele peut
tout faire seruir à son profit, au lieu que l'infide-
le conuertit tout à son dommage. Il nous
faut donc bien aduiser, que nous ne faisons
comme vn tas de moqueurs, & de chiens & *Epicuriens*,
porceaux Epicuriens : qui voyans les resueries
& les abus, auxquelz les hommes sont tombez
touchant les matieres de la religion, se moquēt
de toute religion, sans rien discerner entre la
vraye & la fausse, & entre verité & mensonge :
ains mesurent tout d'vn mesme pied, & font
semblable iugement de verité que de menson-
ge, & de la doctrine Chrestienne, que de la do-
ctrine Papiste & Payenne. Voila le profit que
telz personages rapportent de la cognoissan-
ce des abus, de laquelle ilz viennent à la theo-
logie de Pline & de Lucian, & des autres sem-
blables Atheistes, & hommes sans Dieu, sans
loy & sans foy, les hommes les plus pestilens
que la terre puisse porter, & les plus abomina-
bles. Or il nous faut bien garder, non seulemēt
de tomber entelz abysses, mais aussi de don-
ner occasion à personne de conceuoir telles o-
pinions. HI. Tu dist tresbien.

*1e profite
que nous
pouvons
surer des
erreurs des
hommes.*

THE. Donques, quand nous voyons les grandes diuersitez d'opinions & de superstitions, qui ont esté de tous temps en toutes nations, touchant l'estat des trepassez: nous ne deuons pas conclurre, pour raison des erreurs & des abus qui y ont esté, qu'il n'y ait du tout rien de vray, de tout ce qu'on en a dit, & qu'il n'y ait ne paradis, ny enfer, ne point de iugement, ne d'autre vie apres ceste icy: mais nous faut conclurre tout le contraire. Car s'il n'y en auoit point, il n'y auroit pas vn tel consentement de toutes nations, & de si long temps, & tant constant & perdurable en cest affaire. Car combien que les hommes ayent beaucoup réué en plusieurs choses, touchant l'estat des mortz: toutesfois si reuiennent ilz tous en vn point, & à vne verité: c'est assauoir, qu'il y a pour le moins vne immortalité d'ame, & vne autre vie apres ceste icy, & vn iugement, & vn estat diuers des bons & des mauuais. Il nous faut donc resoudre en cecy, enquoy tous peuples & toutes nations, sages & folz, sauans & ignorans, sont contrains par la vertu de verité, (laquelle ne peut estre totalement esteinte au cœur des hommes) de tomber en accord avec les saintes Escritures, qui nous sont baillées pour certaintesmoignage de la verité de Dieu.

*Cice. Tus.
qua. lib. 1.*

HI. Tu vses presque d'un semblable argument, duquel Ciceron a usé, pour prouuer l'immortalité.

mortalité des âmes, disant: Les anciens auoyēt ceste opinion imprimée en eux, que les hommes n'estoyent point tellement esteins par le decez de ceste vie, qu'ilz perissent totalement. Laquelle chose, comme ainsi soit que la pouuons entēdre par plusieurs autres choses, nous le pouuons singulièrement par les ceremonies des sepulchres: lesquelles ilz n'eussent iamais obseruées ny honorées, avec si grand soing, estans empeschés de tresgrans affaires, ny estably qu'elles ne fussent point violées par religion tant inuiolable, s'ilz n'eussent eu imprimé en leurs cœurs & entendemens, que la mort n'estoit point vne destruction, qui abolist & esteint tout: mais quasi comme vn depart & vn changement de vie, qui est guide & conduite au ciel, aux hommes vertueux, & aux femmes vertueuses, laquelle toutesfois estoit retenue & demouroit en terre, pour les autres contraires à ceux cy.

THE. L'argument n'est pas du tout à mespriser. Mais il y a encore vn autre point: c'est, que quand nous voyons que les entendemens des hommes, estans piquez & sollicitez de celle semence de la verité de Dieu eternelle, qui demeure encore naturellement imprimée en leurs cœurs, vont ainsi voltigeant deçà & delà, pour la chercher & trouuer: & qu'ilz tombent en si grandes vanitez & réueries, par

Lumiere
naturelle
& diuine

faute d'auoir la Parolle & l'Esprit de Dieu, pour leur guide: nous deuons apprendre à cognoistre, que c'est que nous pouuons de nous-mesmes, & quelle difference il y a entre la science diuine & humaine. Nous deuons apprendre à cognoistre comment la lumiere naturelle que nous auons, ne nous suffit point pour nous bien adresser & conduire aux choses de Dieu, si nous n'auons aide de celle grande lumiere celeste, qui nous est manifestée par les saintes Escritures, & qui nous est communiquée par l'Esprit de Iesus Christ. Parquoy, nous deuons bien estre soigneux de nous adresser à icelle, & de la prendre pour nostre guide, & de rendre graces à Dieu, de la cognoissance & portion qu'il nous en a desia baillée, & de le prier pour ceux qui en sont encore éloignez. **II.** Voila encore deux autres bons pointz.

La doctrine que nous deuons tirer des montagnes ardentes.

THE. Pour conclusion, nous deuons aussi apprendre à craindre Dieu, par les choses horribles qui ont esté dites des montagnes ardentes, desquelles il a esté parlé. Car combien que les hommes ayent pris occasiō d'icelles, de forger beaucoup de fables: toutefois ce que les bons auteurs ont escrit de telles montagnes, & des grans & horribles feux qui y sont, n'est pas du tout fable. Car l'experience y est euidente. Parquoy, quand nous voyons, ou quand nous oyons

oyons ou lifons telles choses, nous deuons pen
 ser combien Dieu, qui est le feu consumant, Deute. 4.
Heb. 12.
 doit estre espouuantable en sa fureur & en son
 ire, contre les meschans & les reprouuez : &
 quel horreur doit estre en ce feu eternel de la Mar. 9.
 gehenne, qui iamais n'est esteint, ains est tou-
 iours allumé par le soufflé de Dieu: duquel ce
 feu materiel de ces montagnes ardentes, n'est
 sinon vne bien petite image, comme les ton-
 nerres & les foudres. Car comme il est impos-
 sible à l'entendement humain, de comprendre
 le grand bien & le grand foulas, qui est prepa-
 ré aux enfans de Dieu, en la vie eternelle, plus
 grand que iamais œil d'hōme nevit, oreille ne 1. Cor. 2.
 ouit, cœur ne pensa: aussi il luy est impossible
 de comprēdre les grans horreurs, les grandes
 angoisses, douleurs & tormens preparez aux Les tor-
mens d'en
fer.
 meschans & aux reprouuez, en la mort eter-
 nelle. Parquoy, combien qu'il ne nous faut pas
 imaginer ces choses lourdement, comme char-
 nelles & materielles : toutesfois l'esprit de
 Dieu vse de comparaisons prises des choses
 humaines, lesquelles nous peuuent bailler plus
 d'horreur de celle vie malheureuse, laquelle
 n'est immortelle, que pour porter tormens im-
 mortelz. Et pourtant Esaie, parlant d'icelle, Esa. 37.
La gehēne
 dit: La gehenne est desia ordonnée: elle est ap-
 prestée pour le roy: laquelle il a faite profon-
 de & large. Sō bastiment est feu & force boys,

Esa. 66,

& le vent du Seigneur est comme vn torrent de feu, qui l'allume. Et en vn autre lieu, parlât de cela mesme: Ilz sortiront hors, & verront les corps mortz des hommes, qui ont transgressé contre moy. Car le vers d'iceux ne mourra point, & leur feu ne sera point esteint, & seront en diffame à toute chair.

III. Voila de merueilleux & estranges propos. Celuy qui parle icy nous rend vn tesmoignage d'autre autorité, que celuy qui a esté allegué des philosophes & des poetes. Par quoy, en reiettant ce qu'ilz ont dit d'auantage que la verité de Dieu ne porte, il nous faut bien garder de reietter la verité avec, & nous moquer de ce qu'il nous vaut trop mieux croire qu'experimenter. Esaie ne dispute point beaucoup de la diuersité des logis & des chambres qui y sont, ne de la diuersité des peines & tormens. Il ne met qu'un logis pour tous. Si les vns y souffrent plus grantormens que les autres, selon la qualité de leurs pechez: il me semble, que nous nous en deuôs pas beaucoup soucier. Il nous suffit d'estre aduertiz par l'Esprit de Dieu, que le meilleur estat qui y puisse estre, est si malheureux, & le plus legier tormēt, si grand & si horrible, qu'il n'est possible d'en pouuoir point imaginer ne comprendre de plus malheureux & plus espouantable.

THE. Je suis bien de ton aduis. Car E-
saie

faic comprend beaucoup de choses en peu de parolles. Pour le premier, il declare que nul des meschans n'eschappera son iugement. En apres, qu'il n'y a pas seulement peines temporelles pour eux, mais eternelles: voire telles, que nostre entendement n'en peut point comprendre ny imaginer de si grandes. Dauantage, combien que cecy soit caché à la raison humaine, & que les meschans ne le se peuuent faire accroire: toutesfois il est ordonné, non pas d'aujourd'hui, mais par le conseil eternel de Dieu. Parquoy, il ne faut point que les meschans s'asseurent & glorifient en leur prosperité, & que les bons leur en portent trop grande enuie, & en perdent le cœur. D'autre part, il declare qu'il n'y aura point là de regard de personnes, comme en la iustice des hommes. Les tyrans n'y ioueront point à la pelote des hommes, & le poure simple peuple n'y boira plus les folies des folz princes, & n'y portera plus les peines de leurs rages & fureurs: mais euxmesmes, estans faitz esgaux aux autres, respondront de leurs propres faictz en propre personne. Et pource il dit, que ceste gehenne est aussi preparée au Roy. Et à celle fin que nul ne se fie à sa force & à sa puissance & richesses, & que la pompe & la magnificence des personnes, & les masques de l'apparence humaine, & la multitude des meschans, & leurs complotz,

menées & pratiques ne nous éblouissent les yeux, & nous seduisent, nous faisans douter de ces choses, ou les estimer vaines: il dit que le lieu est si profond, qu'il n'y a point d'esperance que iamais nul en puisse sortir: & si long & si large & spacieux, qu'il y aura de la place assez pour tous: & que la puissance de celuy qui fera ceste vengeance est telle, qu'elle ne pourra estre lasse de punir, ny iamais deffaillir: & que toute la gloire des meschans, sera conuertie, en infamie & confusion éternelle. Voila l'image que ces montagnes ardentes nous doiuent reduire en memoire, pour nous apprendre, avec la crainte de Dieu, à rendre graces à Dieu nostre bon Pere, à tout iamais, de ce que il nous a deliuré de cest horrible gouffre de mort & de malediction éternelle, par Iesus Christ son Filz nostre Seigneur, auquel seul soit tout honneur & gloire aux siecles des siecles, Amen.

¶ 1. Voila vne tresbonne conclusion, à laquelle nous nous arresterons pour le present.

LE

LE SOMMAIRE DV SE- cond dialogue des enfers, appelé Le Purgatoire.

Combien qu'il est parlé generalement, en ce dialogue, tant de l'enfer, appelé La gehenne, que du purgatoire & des limbes, tant des peres anciens, que des enfans mornez: ie l'appelle toutes fois Le Purgatoire, pource que la disputation contenue en iceluy, traite plus specialement & plus amplement des matieres appartenantes au Purgatoire, que de celles qui appartiennent aux autres, desquelz il sera aussi parlé plus specialement en leur lieu, c'est assauoir, du limbe des petis enfans, & de celuy des peres anciens, pourtant que ceste matiere est aussi auiourdhuy en differât. Quât à l'enfer appelé la gehene, il n'est pas de besoing d'en faire l'og traité, attêdu qu'il n'y a nul differêt entre les Chresliens touchant iceluy. Ce dialogue, & les autres deux qui le suiuent prochainement, sont encore des dependances de la geographie infernale, de laquelle il a esté disputé au dialogue precedent. Parquoy ie les ay adiointz à iceluy & coniointz ensemble, afin qu'il y eust plus grande conuenance en la lieson des matieres, qui seruent à la declaration les vnes des autres. Or pour autant que le passage de la priere pour les trespassez, pris du second liure des Machabéens, est le principal & le plus euidêt, duquel noz aduersaires se puissent seruir, pour prouuer leur Purgatoire, & les suffrages pour les trespassez: & pourautât aussi, qu'il nous baille ouuerture à parler des limbes, ie l'ay voulu traiter en premier lieu, apres auoir touché quelque mot, de la preparation à traiter les saintes Escritures, & les matieres appartenantes à la religion. En apres, pourtant que les liures des Machabéens ne sont pas proprement du corps des Escritures canoniques, il est parlé à l'occasion de cela, de la difference

que les anciens ont mise entre les liures appelez Canoniques, & les Apocriphes, & les Ecclesiastiques, & de l'autorité d'iceux & de l'Eglise semblablement. Il est aussi monsté, en quoy ce passage des Machabéens peut seruir, pour prouuer le purgatoire: encore que le liure seroit canonique. Apres cela, les personages entrent en disputation, de la conuenance & difference qui peut estre entre l'enfer appellé La gehenne, & le Purgatoire, & le limbe tant des peres anciens, que des enfans mornez, & l'enfer des Origenistes & des Catabaptistes, & le Purgatoire de Mahumet. En deduisant ces matieres, les pointz qui sensuyuent, sont pareillemét touchez & traitez: assauoir, les raisons sur lesquelles le Purgatoire est fondé, & comment elles deroguent grandement à la grace de Dieu, & au merite de Iesus Christ: de la dignité & indignité de noz œuvres, & de la cause des afflictions, & des peines & tormens que nous endurons, & à quelle fin Dieu les nous enuoye, & commét il n'y a œuvre, punition ne torment d'homme quelconque, suffisant pour satisfaire à la iustice de Dieu: de la vehemence du feu & de la peine de purgatoire, & de la conuenance d'icelle, avec le feu & les tormens d'enfer, selon l'opinion des theologiēs sophistes, & de Plutarque. De la fable de l'ame de Traian, tirée & deliurée d'enfer, & de la conuenance d'icelle avec celle d'Orpheus, de Theseus, de Pyrithous & de Hercules. Commét tout peché est puny, pour satisfaire à la iustice de Dieu, mais en telle sorte, que les fideles obtiennent misericorde de Dieu, & sont deliurez de l'ire d'iceluy par Iesus Christ. Comment la doctrine de la iustification par la Foy, & l'abolitiō de purgatoire, n'est point nourrice de pechez, mais plustost la doctrine du purgatoire. De la source & de la cause & de la fin des bonnes œuvres des fideles, & de l'amour filiale & seruite. De la difference des œuvres des fideles & des hypocrites. Des vieux & des nouveaux Origenistes. De la difference que les sophistes mettent

mettent entre la peine de dam & de sentiment, ou de sens, & auxquelz l'vne & l'autre conuiennent. Finalement, des voyes qui menent à salut & à perdition, & des estatz & logis auxquelz les ames des trepassez sont receues: & la difference & conuenance qui est en ces choses, entre la doctrine de Iesus Christ, & de Mahumet, & des Payens & des Papistes: du sens du passage des Machabéens, & du fait de Iudas Machabéen, & de la maniere de sacrifier & prier pour les trepassez, qu'on peut approuuer par iceluy. De la distinction que les Papistes font de la peine & de la coulpe, du peché & du pardon de l'un & de l'autre, & de l'opinion qu'ilz ont des peines necessaires à satisfaction, après & avec la satisfaction de Iesus Christ, & de la demy grace faite par iceluy, & de la pleine remission donnée par le Pape. De la priere pour la resurrection & l'aduenement de Iesus Christ: de la maniere de prier pour les trepassez en la façon des anciens Prophetes: du moyen par lequel l'enfant peut porter l'iniquité du pere, & par lequel les mortz sont puniz aux viuans, & les viuans pour les mortz: du tēps de priere, & de la priere pour les saintz. Or pourautant que de nostre temps il s'est leué vn faux prophete, qui nous a voulu forger vn nouueau purgatoire pour les corps, & qui a tasché à troubler les Eglises reformées par l'Euangile, par sa fausse doctrine, & a fait de grans scandales, par tous les lieux auxquelz il a esté par son ambition, inconstance & apostasie: ie traite quelque chose de ceste histoire, & de ses erreurs sur la fin de ce dialogue, pour pouruoir à ceux qui pourroyent auoir esté offensez de la fausse doctrine & apostasie de ce malheureux, qui apres auoir beaucoup voltigé deçà & delà, s'est allé rendre à Rome, au siege d'abomination. Ie le fay semblablement pour monstrier le iugement de Dieu contre telz miserables personnages, qui se iouent de Dieu & de sa Parolle, & de son Eglise, la voulāt faire seruir à leur ambition: & pour admonester les fi-

deles des cauteles de Satan, des moyens qu'il a ou pour retenir ou renoueller ses vieux erreurs, ou en engendrer des nouveaux. Or pour raison que cestuy, duquel nous parlons à present, n'a pas du tout controuué de faulx ceste doctrine: ie declaire aussi de quel autheur il l'a prise, & en quoy il a esté different ou semblable à luy. Et pourtant ie fay mention de Vuessel, nommé autrement Basile, & du temps auquel il a régné, & de son estat & de sa doctrine touchant le purgatoire, & les peines & le feu d'iceluy, & de paradis semblablement, & des estatz de toutes les créatures raisonnables, tant en ce monde qu'en l'autre: & principalement des fideles, & de la purgation des ames apres ceste vie, & de la vertu que les peines ont à purger, & de la vraye purgation. Item, de la difference de purgatoire, punitoire & satisfactoire: & du sens auquel les anciens ont fait mention du purgatoire & du feu d'iceluy, & des prieres pour les trepassez: des prieres des Anges & des Saintz trepassez, pour nous, & des nostres pour eux. Du dangier que il y a à vser de parolles ambigues, & qui ont seruy à superstition & idolatrie en matiere de religion, &

de la clarté de parolles qui y est requi-

se, & des prieres & messes

pour les petits

en-

fans trepas-

sez.

LE SECOND DIALOGVE

des enfers, nommé Le Purgatoire.

Thomas, Theophile,
Hilaire, Eusebe.

Thomas.



Vas touché vn poinct, Theophile, en l'admonition que tu nous as faite, en la conclusion des propos & deuis qui ont esté tenuz entre nous, touchant les regions & habitations infernales, & l'estat des trepassez apres ceste vie: lequel i'ay principalement noté entre les autres, & par le moyen duquel ie suis entré en la consideration de la malice & des cauteles & pratiques de Satan, plus auant que ie n'auoye point encore fait.

THE. Comment donc? THO. Nous auons parlé de la diuersité des opinions, & des grans erreurs & grandes refueries, qui ont esté entre les hommes, en la matiere des enfers, & de l'estat des trepassez. Surquoy tu nous as fait vne admonition, qui est bien necessaire à plusieurs. Car il y a plusieurs hommes sur la terre, qui considerans celle diuersité, concluent plus tost, en la maniere que tu as condamnée, qu'en

celle que tu nous as proposée. Parquoy ie ne doute point, que le Diable ne trauaille tant qu'il peut, à induire les hommes tout expressement à ces diuersitez d'opinions, & à leur mettre tant d'estranges refueries au cerueau: à celle fin qu'il leur puisse reuoquer en doute, toute la verité de Dieu, & tout ce qui nous en est reuelé par les saintes Escritures. Car il ne tasche, sinon à leur troubler & confondre l'esprit & l'entendement, par ces contrarietez de sentences & lourdes imaginations, en telle sorte qu'ilz ne puissent rien iuger ne discerner, entre verité & mensonge: ains qu'ilz prennent l'une au lieu de l'autre, ou qu'ilz viennent en vn tel desdain & fascherie & desespoir, que ilz iugent esgalement de l'une comme de l'autre, & qu'ilz se moquent de toute la doctrine de Dieu.

THE. N'en doute point. THO. Or quât à moy, ie ne veux point ainsi conclurre. Il est vray, qu'il m'en prend comme à vn homme qui desire d'apprendre le chemin, pour paruenir en quelque lieu, auquel il desire paruenir: & ne peut trouuer homme bien certain, pour le luy monstrier, ains trouue autant de diuersité d'opinions, qu'il rencontre d'hommes, auxquels il demande son chemin. L'un luy dit, va de çà: l'autre, va de là: l'un, va à dextre: l'autre, va à senestre: l'un monte: l'autre, descēd. Il est

impossible, qu'un tel personnage ne soit bien troublé & bien fâché: mais toutesfois, s'il a bon courage, il ne cessera point de s'enquerir tousiours de son chemin, iusques à tant qu'il l'ait trouué. Et l'ayant trouué, de marcher par iceluy, iusques à ce qu'il soit paruenu au lieu auquel il pretent, estand asseuré qu'il y sera bien receu, quand il y sera arriué. Car depuis qu'on est en chemin, ou il faut tirer tout oultre, ou il faut demeurer au chemin, & perir là. Puis que il est question de paradis ou d'enfer, nous ne pouuons reculer, ne faillir d'arriuer ou à l'un, ou à l'autre. Et pourtant quelque diuersité d'opinions qu'il y ait entre les hommes, touchant la religion: ie suis neantmoins bien asseuré, qu'il y a vn Dieu, qui s'est reuelé à nous par sa parole, & vne vie eternelle pour ceux qui obeiront à sa volonté, & semblablement vne mort eternelle pour ceux qui feront le contraire. Parquoy ie ne cesseray iamais de m'enquerir de la voye, pour y paruenir, iusques à ce que ie l'aye trouuée. Or i'espere que ie la pourray trouuer, par vostre moyē, si vous tenez vostre promesse, toy & Eusebe. Car ie prens la voye, à laquelle nostre Seigneur Iesus Christ nous enuoye, disant: Cherchez les Escritures: car vous cuidez auoir vie eternelle en icelles. Ce sōt elles aussi qui portēt tēsmoignage de moy.

T H B. Tu ne pourrois prendre meilleur

JEAN 5.

conseil, ny voye plus certaine, que celle là.

THO. Il est vray. Mais pourtant que tous n'entendent pas si bien les Escritures les vns que les autres, & que le sens d'icelles est souuentefois corrompu par les fausses intelligences & interpretations des hommes: ie desire bien de ouyr l'exposition d'icelles, par ceux qui sont plus sauans que moy, & d'ouyr debattre par iceux les poinctz qui sont aujour d'huy en different, en la matiere de la religion, pour en estre tousiours mieux resolu en mon entendement. Ie vous prie donc, que vous mettiez la main à la besongne, sans plus délayer, si d'auenture Hilaire ne vouloit dire quelque chose de uant. HI. Ie n'ay à dire autre chose, sinon puis que tu as proposé de changer ton voyage de saint Patrix, à celuy que tu entreprends à present, que tu te disposes à le faire, cōme la chose le requiert. Ceux qui descendoient iadis au trou & à la cauerne de Trophonius, se prepa-royent parauant à ce voyage, certain espace de iours, se purifians par ceremonies ordonnées expressement à cela, se gardans purs & netz cependant. Puis ilz descendoient là, estans reuestuz d'une robe sacrée. I'ay aussi entendu, que ceux qui veulent descendre au trou saint Patrix, ont leurs ceremonies propres à leur affaire. Entre lesquelles il est requis, qu'ilz iusnent trois iours deuant, en grande ab-

stinence.

*Preparati-
on a la des-
cente de la
cauerne de
Trophoni-
us & de s.
Patrix.*

stinence. Or si ces esceruelez vsent de telles *Prepara-*
 preparations, en telles resueries & illusions de *tion aux*
 Satan, en quelle sobrieté & en quelle reueren- *sainctes E*
 ce & purté de cœur, nous deuons nous prepa- *critures.*
 rer, pour aller à ces grâs & diuins oracles, par
 lesquelz Dieu parle à nous, en ses saintes ESCRI-
 tures, & pour ouyr la voix d'iceluy par icelles:

THO. Tu m'aduertiz d'un bon point,
 auquel tu ne te ioues pas, comme tu as de cou-
 stume. HI. Il y a temps de se iouer, & temps
 de besongner à bon escient: combien que mes
 yeux ne sont pas yeux pour chacun, s'ilz sont
 bié entenduz. THO. Nô pas pour ceux qui en
 rechignent. Ce que tu as tâtoft dit, me semble
 reuenir à ce que tu as traité parauant, des por-
 tes du somne & du songe. Tu me veux donner
 à entendre, que si ie desire entrer & sortir par
 la porte claire, & trouuer clairté, pour esclai-
 cir les tenebres de mon entendement, il ne se
 faut pas mettre en chemin à ce voyage, après
 qu'on a bien fourré sa teste & sa pance de soup-
 pes & de vinage: mais qu'il y faut aller en grâ-
 de sobrieté, & clorre celle porte obscure, qui
 se espessit par les fourrures de la gueule. I'ay
 bien aussi tasché de pouruoir à tout cela de
 bonne heure. Car ie say bien, que le gras ven-
 tre, n'engendre pas le sens deslie: ne la grasse
 pance, l'entendement subtil.

HI. Tu dis vray. THO. Laissons donc

à part celle porte tenebreuse, qui est l'entrée des ventres paresseux, & l'huys par lequel ces grans refuseurs font entrez, qui ont tant remply le monde de refuseuries, & tant estranges : & y entrons par l'autre porte, en telle sobriété, que nous puissions cognoistre les choses, desquelles nous nous voulons enquerir à la verité, cōme si les auions veues à l'œil. Mais qui commencera à la nous monstrier? Il me semble que Eusebes s'y appreste. Commence donc à huster, & la nous fay ouurir.

E V S. J'entreray premierement par le vieil Testament. H I. Mais garde de nous mal guider, & de prendre l'vne pour l'autre: car si tu te foruoyes, nous te radresserons. E V S.

Mais moy mesme vous radresseray bien. Oyez donc ce qui est escrit de Iudas Machabéen, *Obiection.* c'est assauoir qu'il enuoya en Ierusalem douze mille dragmes d'argent, pour offrir en sacrifice, pour les pechez de ceux qui estoient morts, pensant iustement & religieusement de la resurrection. Car s'il n'auoit esperance que ceux qui estoient occiz ressuscitassent, il sembleroit estre superflu & vain, de prier pour les mortz. Il l'a fait aussi, pourtant qu'il consideroit, que ceux qui estoient endormis en vraye pieté, auroient grace tresbiē gardée. Parquoy il conclut: C'est donc vne sainte & salutaire pensée, que de prier pour les mortz, afin qu'ilz soyent

Obiection.
2. Mach. 12

foient desliez de leurs pechez. Est-il possible de trouuer texte plus clair & plus expres? Pourquoy eust enuoyé Iudas Machabéen, vne telle somme d'argêt, le nôbre de douze mille dragmes, qui valent enuiron mille & deux centz escuz, si on les veut reduire en nostre monnoye, s'il n'eust esté certain, que les offrandes & suffrages des viuans, profitoyent aux mortz?

La valeur de 12 mille dragmes.

THE. Tu nous ouures icy vn beau châp de disputation, qui nous engêdrera beaucoup de questiôns, lesquelles ie te proposeray: & puis les desduirons l'une apres l'autre: & iugerons à la fin, dequoy ce passage vous peut seruir, pour prouuer vostre purgatoire. Ie te demande donc premierement, en quelle reputation tu as ce liure des Machabéens? & si tu le tiens pour Canonique, ou pour Apocriphe? E V S. Ie ne le peux tenir que pour tel qu'il est, c'est assa- uoir saint, Canonique, & approuué de l'Eglise catholique. Car n'est-il pas cōtenu en la Bible?

L'autorité des li- ures des Ma- chabéens.

THE. Ie ne nie pas, qu'il ne soit inseré entre les liures de la Bible Grecque & Latine: mais il ne s'ensuit pas pourtant qu'il soit Canonique, & de telle autorité que les autres, que nous auons receu des Hebreux, qui ont esté receuz & approuuez de tous temps, par toute l'Eglise catholique, sans contradiction aucune.

E V. Ie ne suis pas maintenant esbahy, si

vous ne voulez pas receuoir l'autorité des Docteurs anciens, veu que vous estes tant des hontez, que vous osez bien condamner & reietter les propres liures de la sainte Escriture. Je cognoy par experience, qu'il vous faut vne Bible faite à vostre plaisir. Car vous estes semblables aux anciens heretiques, qui ne vouloyent prendre des saintes Escritures, que les passages qu'ilz estimoyent propres, pour donner couleur à leurs heresies : & reiettoient tous les autres, comme indignes de l'Esprit de Dieu. N'est-ce pas trop grande arrogance, de vouloir assubiettir l'Esprit de Dieu & sa parole, à vostre iugement ? Tu peux bien appercevoir, Thomas, que maintenant se sentent ilz bien pressezz, quand ilz sont contrains de refuser le iuge, duquel nous auons conuenu ensemble : & qu'au lieu d'estre iugez par luy, ilz le veulent iuger.

THE. Tout beau, Eusebe, Tu n'as pas encore gagné ton proces. Ne pense pas que nous soyons deuenuz Papes, depuis que nous n'auons parlé à toy : & que, comme luy, nous nous voulions attribuer autorité, puissance & iugement par dessus l'Esprit de Dieu, & les saintes Escritures. Nous laissons cest office à l'Antechrist, auquel seul il appartient. Nous n'auons pas accoustumé, de reprouuer vne seule syllabe des saintes Escritures : mais si nous
discer

discernons, & mettons difference entre les li-
ures Canoniques & les Apocryphes, tu ne nous
dois pas accuser pourtāt, si tu ne veux par celle
mesme raison, rendre coupables de semblable
crime, les anciens Docteurs de l'Eglise: singu-
lierement saint Hierome, & voz Decretz &
Canons pareillement. Car ilz separent les Ca-
noniques des Apocryphes, & mettent les li-
ures des Machabéens entre les Apocryphes.
E V. Je confesse bien qu'entre les Iuifz il n'a
point esté receu pour Canonique, en leur Syna-
gogue: mais il n'a pas pourtant esté reietté de
l'Eglise. Parquoy ie concluz, que ceux qui
nient qu'ilz ne soyent Canoniques, ne sont pas
filz de l'Eglise, mais bastardz de la Synagö-
gue. T H E. Tu as, pour le moins, retenu cecy
d'Eccius. Voila vn coup de ces Canons. Si ainsi
est, pourquoy ne l'a donc enrollé saint Hiero-
me entre les Canoniques, en ce prologue, au-
quel il les a recitez tous par ordre? Penses-tu
qu'il eust plustost omis ceux cy, que les au-
tres? Et au prologue qu'il appelle Galeatus,
qu'il a mis deuant les liures des Roys, ne fait-il
pas expresse mention de ces liures entre les
Apocryphes? & principalement du second, du
quel le passage, par toy allegué, est prins? Car
il dit, qu'il a trouué le premier escrit en He-
brieu: mais non pas le second, lequel a esté seu-
lement escrit en Grec. Laquelle chose, comme

*Liures Ca-
noniques
& Apo-
cryphes.*

*Le iuge-
ment de S.
Hierome
touchant
les liures
des Mach.
Hierö.
Pauli.*

de Iefus Christ. N'efcrit-il pas, que le conte & le calcule d'iceux, ne se trouue point aux saintes Efcritures, qui sont appellées Canoniques, mais aux autres, entre lesquelz sont les liures des Machabéens? Ne vois-tu pas clairement, qu'il separe ces liures, du corps des saintes Efcritures? E V. Pourquoy coppes-tu queuer Que n'adiouftes-tu ce qui s'ensuit apres? Lesquelz, dit-il, les Iuifz ne tiennent pas pour Canoniques, mais si fait bien l'Eglise. Enquoy il declare manifestement, qu'il tient la determination de l'Eglise, qui a esté faite sur cela, au concile de Carthage, auquel il a esté present luy-mesme. Innocence 1. tesmoigne le mesme. *Innocens. in Epist. ad Exuper. Episc. Tolos.*

THE. Mais saint Augustin n'adiouste-il pas quant & quant, la raison pourquoy? laquelle sert à mon propos. E V. Il dit, que c'est à cause des passions vehementes & merueilleuses d'aucuns Martyrs, qui ont cōbatu iusques à la mort, pour la Loy de Dieu, auant que Iefus Christ vint en chair, & qui ont souffert des griefz & horribles tormens. Il entend par ces Martyrs, les sept freres Machabéens, avec leur mere, qui ont plus cher aymé qu'Antiochus les ait fait desmembrer & tormenter cruellement, que vouloir obeir à ses commādemens, pour violer la loy de Dieu. *Martyrs, auant l'aduenement de Iefus Christ. Les Machabéens. 2. Mach. 7. Antiochus.*

THE. Je te confesse tout cela. Mais il est bien facile à entendre par les parolles, de

*Legendes
des saintz.
Dist. 15. c.
Sancta.*

sainct Augustin que l'Eglise n'a pas receu ces liures, en telle authorité, que ceux qui ont esté tousiours tenuz en l'Eglise Prophetique & Apostolique: ne pour suffisans, pour approuer & confirmer, ou fonder quelque doctrine, qui doyue estre tenue pour article de Foy, & pour conuaincre les heretiques: mais seulement en tel lieu, que nous auons auïourd'huy les histoires Ecclesiastiques, & les legédes des Martyrs: non pas vn tas de legendes fabuleuses, composées par vn tas de Caphars resueurs: comme sont, La vie des peres, La legende dorée, & autres semblables, plus dignes d'estre nombrées avec le Roman de Fierabras, d'Orson & de Valentin, des Cheualiers errans, de Mandeuille, ou avec les vrayes narrations de Lucien, & autres semblables faites à plaisir, qu'entre les histoires Ecclesiastiques. Mais ilz ont esté en telle reputation, entre les gens sauans, que les liures de Iosephe, d'Eusebe, de Sozomenus, Theodoritus, Socrates, & autrestelz qui ont escrit les histoires Ecclesiastiques, & les vies des Martyrs, pour en garder la memoire en l'Eglise, comme en vne chronique, pour l'edifier & consoler par bons exemples: mais il ne s'ensuit pas pourtant, qu'ilz soyent de telle authorité, qu'ilz soyent suffisans pour mettre quelque doctrine nouuelle en auant, de laquelle nous n'auons point de certain tesmoignage,

en

en la doctrine Apostolique. E v. Voyla vostre façon. Vous glôsez tousiours toutes noz raisons à vostre plaisir.

THE. Qu'ainfi soit que ie dy, ie ne le veux prouuer par autre tesmoing, que par celui mesme lequel tu produis contre moy: c'est assauoir, sainct Augustin, qui en escrit en vn autre lieu, en telle maniere, disant: Les Iuifz n'ont pas l'escriture des Machabéens, côme la Loy, les Prophetes & les Pseaumes, auxquelz le Seigneur Iesus rend tesmoignage, comme à ses tesmoingz, disant: Il falloit accomplir toutes les choses, qui sont escrites de moy en la Loy, aux Pseaumes, & aux Prophetes. Mais celle escriture est receue de l'Eglise, non pas sans vtilité, si on la lit & escoute sobrement. Note bien ce mot, Sobrement. Ne declare-il pas euidentement, par ces parolles, combien l'autorité d'icelle est basse, à cōparaïson des autres, lesquelles Iesus Christ prend pour tesmoingz. Autant en peut on cueillir d'un liure fort ancien, qui contient l'exposition du Symbole, & porte le tiltre de sainct Cyprien. Quiconque en ait esté l'auteur, il n'a pas esté ignorant, ne d'aujourd'huy. Il monstre clairemēt, que ce liure n'a point eu de lieu en l'Eglise ancienne. Parquoy c'est presque folie, d'en débattre tant long temps, si n'estoit pour cela que noz aduersaires font accroire aux pures ignorās,

Luc. 14.

qu'il est de la sainte Escriture, & que nous la renions. Les liures, appelez les Canons des Apostres, ont esté receuz & approuvez en celle mesme sorte. Parquoy nous en pourrions dire le semblable, que nous auons dit des liures des Machabéens. Car ilz ont esté aussi receuz & approuvez, par des grans personages, & mesme par des Conciles. Le Pape Spherin & Leon & le sixiesme Concile, les ont approuvez. Damascenus mesmement leur attribue telle autorité, qu'il les nombre entre les canoniques. Les autres au contraire, les ont tenuz pour Apocryphes, comme il appert clairement, en leurs Decretz. Et maintenant, il n'y a nul qui ne les tiennne pour telz. Car qui est celuy qui leur oseroit bailler telle autorité qu'aux liures des Apostres? Il n'y a donques point de doute, que les liures des Machabéens n'eussent autant peu d'autorité, entre vous, que ceux-la, si n'estoit ce passage, qui vous semble si propre, pour vostre purgatoire: ou s'il estoit, si rigoureux contre les gens d'Eglise, que ces canons des Apostres le sont, desquelz les prestres ne tiennent plus nul conte. Car s'il les leur falloit obseruer, ilz seroyent bien esbahys & fachez. Toutesfois cela qui plus desplait maintenant aux prestres, a esté la cause, pour laquelle

quelle les anciens les ont eu en telle reputation: mais ilz ne se font pas pourtant obligez à eux comme aux saintes Escritures, qu'ilz ne les puissent reietter, comme ilz ont fait souuentefois quand ilz y ont trouué quelque Canon, qui sembloit fort different à la doctrine Apostolique. Nous pouuons faire le semblable des liures des Machabéens. Nous en pouuons bien tirer des exemples, pour exhorter les fideles à patience, à constance, & à martyre, leur proposant la vertu & la foy de celle bonne mere, avec ses sept enfans, qui se sont exposez tant constamment à la mort, pour maintenir la Loy de Dieu: qui n'auoyent toutesfois pas telle occasion de ce faire, que nous qui auons plus certains tesmoignages de la resurrection, & d'exemples plus euidens, tant en Iesus Christ qu'en ses Apostres & disciples, qu'eux n'auoyent pas eu. C'est cela que saint Augustin veut dire, & la sobriété qu'il veut qu'on garde, à les lire, Gregoire en a aussi vsé en ceste maniere, declarant manifestement, que l'Eglise ne tenoit pas ces liures pour Canoniques. Car pource qu'il en met en auant quelque exemple, il dit: Nous ne faisons rien desordonnément, si nous amenons des exemples des liures, qui

*L'usage
des liures
des Macha
béens.*

*Distinc. 16
c. Canonēs
Gloss. ff.
Arque.*

Grego. iii. combien qu'ilz ne sont pas canoniques, toutes-
Iob. ca. 29. fois seruent à l'edification de l'Eglise. Or il
Moral. lib. ne s'ensuit pas pourtant, que touchant la doctri-
28. ca. 17. ne qui touche à la Foy & à la religion, ilz so-
 yent d'esgale autorité avec les autres. Et
 pourtant la glose mesme, faite sur le Decret,
 les recite entre les Apocryphes.

E V. Je voudroye bien puis que tu metz
 si grande difference entre ces liures, que tu
 m'explicassies vn petit plus claiement que tu en-
 tens par les Canoniques, & les Apocryphes.

Liures ca- T H E. J'appelle Canoniques, tous les liures du
noniques. nouveau Testament, lesquels nous auons : &
 du vieil pareillemēt, tous ceux qui sont conte-
 nuz en la Bible Hebraique, lesquels nous auōs
 receu des sainctz Prophetes, & des vrays serui-
 teurs de Dieu, & desquelz les auteurs sont cer-
 tains. Nous les appellōs Canoniques, qui signi-
 fie autāt que reguliers, à cause qu'ilz sōt de veri-
 té infallible : & vne certaine reigle, qui nous est
 donnée de Dieu, pour reigler & examiner toutes
 autres doctrines, & pour esprouuer les espritz,
 s'ilz sont de Dieu, & pour viure iouxte icelle.

E V. Et qu'entens tu, par les Apocryphes?

Apochry- T H E. Apocryphe, signifie vne chose occulte,
phes. cachée, secrette, ou obscure, qui n'a point de
 certain auteur, ou qui n'est pas autēthique. Et
 pourtant que les liures, ausquelz ce tiltre est
 approprié, sont de telle qualité, ilz ne sont met-
 tables.

tables, sinon entant que leur doctrine est conforme à celle des Canoniques. Parquoy, elle doit estre reiglée par iceux : & n'a point d'autorité ferme, sinon tant qu'iceux luy en bail-
lent. Car au lieu que nous pouuôs prendre certain fondement sur quelque passage prins des Canoniques: nous ne le pouuons en ceux cy, se ilz n'ont desia leur fondement aux autres. Ilz n'ont donc pas esté appelez Apocryphes, pour raison qu'il ne fust loisible de les auoir en sa librairie, & de les lire avec iugement, pour en faire son profit. Car cela n'estoit point defendu. Mais ilz ont prins ce nom, à cause qu'ilz n'estoyent pas de telle autorité, qu'on les tint pour doctrine certaine & infallible de l'Eglise de Dieu: & n'estoyent pas leuz & exposez publiquement en icelle, & en telle autorité, que ceux qui sans doute estoyent tenuz pour certaine Parolle de Dieu, auxquelz nous sommes tenuz de croire, & de soumettre nostre iugement souz eux, non pas le vouloir estendre par dessus eux, ou en iuger par les autres liures, qui doiuent estre subietz à iceux.

E V. Et pourquoy ont ceste autorité les vns plus que les autres? THE. Pourtant qu'on est certain des vns qu'ilz sont la pure Parolle de Dieu: mais non pas des autres, ains du contraire. E V. Par quel moyen? N'est-ce pas pource que l'Eglise les a approuuez: & non

pas les autres ? Or puis que leur autorité dépend de l'autorité de l'Eglise : si elle reçoit ceux-cy pour canoniques, & les fait d'égale autorité : pourquoy ne seront-ils en mesme degré ? **T H E.** Je pense que tu cuides que l'Eglise ait la coustume de legitimer les liures, comme le Pape legitime les bastars. L'Eglise Papale pourroit bien entreprendre cecy, mais ce n'est pas le propre de celle de Iesus Christ. Et quand elle les voudroit legitimer de son autorité, elle ne pourroit, & ne seroit point Eglise de Iesus Christ en cest endroit. Il en prendroit comme des bastars legitimez par le Pape, qui quelques legitimez qu'ilz soyent, ilz ne peuuent toutesfois estre naiz en loyal mariage, ains demourent tousiours bastars & filz de putains. La fille comment pourroit elle engendrer sa mere ou son pere ? L'Eglise comment peut elle bailler autorité à la Parolle de Dieu, veu qu'elle reçoit la sienne d'icelle, par laquelle elle a esté engendrée ? Le soleil de qui reçoit-il sa clarté ? La reçoit-il des hommes, lesquels il illumine ? **E V.** Non. Mais au contraire, les hommes de luy. **T H E.** Est-il clair & luisant, pource que les hommes le iugent & confessent tel ? **E V.** Non : mais pource qu'il est tel, les hommes qui le voyent, & en ont l'expérience, sont cōtrains de le recognoistre & confesser tel. **T H E.** Tu veux toutesfois que le soleil

*A qui appartient le iugement de l'Escri-
ture.
Legitima-
tion.*

*L'autorité
de l'Eglise.*

soleil soit clair & lumineux, pourtant que les
 hommes le tiennent pour tel. **E V.** Tu as tort,
 de m'imposer ce que ie n'ay pas dit, ains tout
 le contraire. **T H E.** Tu l'as dit, mais par au-
 tres parolles: parquoy tu ne t'en apperçois pas.
 Car quand tu dis que la sainte Escriture préd
 son autorité de l'Eglise, tu dis que les hom-
 mes esclairent le soleil. Car comme David le **Psal. 119.**
 tesmoigne, la Parolle de Dieu est pure & clai-
 re: c'est la lumiere qui illumine les yeux, & bail-
 le sagesse aux petis. Elle est donc certaine & **L'authe-
rité de l'E-
scriture.**
 veritable, non pas pourtant que l'Eglise la iu-
 ge telle: mais elle la iuge telle, pourtant qu'elle
 l'est, & n'en peut iuger autrement, non plus que
 celuy qui a les yeux clairs de la lumiere du so-
 leil, de laquelle l'aveugle n'est point capable.
 Parquoy, il n'en peut iuger: ainsi que les infide-
 les & les reprouvez ne peuvent iuger de la Pa-
 rolle de Dieu, ne l'approuver. Tu peux donc
 bien comprendre par cecy, que sa certitude, sa
 verité & fermeté, ne depend pas de l'opinion
 humaine, & du iugement des hommes, mais
 du saint Esprit, & de la propre force, vertu
 & effectz, par lesquels elle se verifie, & con-
 traint le cœur fidele de l'approuver & rece-
 uoir, comme la lumiere du soleil contraint les
 yeux. Car les brebis de Iesus oyent & enten-
 dent la voix de leur Pasteur, non pas celle de
 l'estrangier. Et tout ce que les Prophetes ont

preredit & enseigné, & les Apostres pareillemēt, a esté verifié & authorizé par la vertu d'iceluy, qui a parlé en eux, tellement que tout le monde n'y a peu résister. Or nous ne pouuons dire cela des liures des Machabéens, singulierement du second. **E V.** Pourquoi non?

*Le second
liure des
Macha-
béens.*

T H E. Pour le premier, pourtant que par ce qu'il ne se trouue point en Hebrieu, & que le stile d'iceluy tesmoigne clairement que il a esté premierement composé en Grec, & qu'il n'a point esté translaté de la langue Hebraïque en la Greque: nous pouuons prendre vn certain indice, qu'il n'a point esté escrit par aucun Prophete, ou homme digne d'être te-

*Langage
des Prophe-
tes.*

nu pour tel. Car les Prophetes ont escrit en leur propre langue, c'est assauoir Hebraïque: ou en Caldaïque, depuis le temps de la captiuité de Babylone. Dauantage, il est facile à cognoistre, que ce liure a esté escrit long temps apres le retour du peuple d'Israel en Ierusalem, & apres l'aage d'Esdras, de Nehemias, de Aggée, de Zacharie & de Malachie: depuis lesquels, nous ne lisons point que le peuple de Dieu ait eu Prophete, qui ait rien escrit: ne autres liures d'auteur certain & authentique. Parquoy, à bon droit cestuy est tenu pour Apocryphe. Et quand il n'y auroit autre raison pour diminuer son autorité, que l'excuse que l'auteur dudit liure fait en la conclusion de

*Les der-
niers Pro-
phetes.*

son

son œuvre, icelle te deuroit suffire.

EV. Qu'y a il à reprendre? THE. Ly le dernier chapitre, & tu le verras par experience. S'il estoit certain par l'Esprit de Dieu, que tout ce qu'il a escrit, procede d'iceluy, cōme les Prophetes & les Apostres l'ont esté: *L'autorité des Prophetes & Apostres.* pourquoy s'excuseroit-il ne du stile, ny de la maniere d'escire, ne des fautes qu'il pourroit auoir commises? S'il auoit esté tousiours inspiré du mesme Esprit, par lequel les Prophetes & les Apostres ont parlé, il parleroit asseurément, & en l'autorité de Dieu, comme eux, qui sans s'excuser ont dit, Le Seigneur Dieu l'a dit: La bouche du Seigneur a parlé. Et saint Paul, en quelle autorité parle il? Il afferme, *Gal. 1.* que l'Euangile, qu'il a presché, est si certain, que quand vn Ange descendroit du ciel, pour en apporter vn autre, il ne deuroit pas estre receu, mais anathematizé. Appren donc, Eusebe, de sauoir discerner les liures de la sainte Escriture, d'avec les autres: & ne pense point que l'Eglise ait tenu pour canonique ce second liure des Machabéens, sinon comme vn liure qui n'estoit pas du tout à reietter, & duquel l'Eglise se pouuoit seruir, pour declaration des Escritures, à cause des histoires contenues en iceluy, qui donnent quelque ouuerture pour l'intelligence de l'antiquité, comme feroient les histoires de Iosephe. Toutesfois, si on le re

garde de pres, il sera facile à iuger, que le premier & le second, ne sont pas tous d'un mesme auteur: non seulement par la diuersité du stile, mais aussi par ce qu'au second aucunes histoires sont reiterées, & plusieurs choses, qui auoyent desia esté traitées au premier, & beaucoup mieux qu'elles ne le sont en cestuy-cy.

E V. Tu en diras ce que tu voudras: mais il me semble que l'autorité d'un auteur si ancien, n'est pas à mespriser, & qu'il n'a pas escrit chose qui fust contraire à la doctrine de l'Eglise de son temps. T H E. Ie ne la mesprife pas aussi, nō pas d'un moindre que luy: mais ie ne luy fay point de tort, si ie ne luy baille autant d'autorité qu'aux Prophetes & aux Apostres, & si ie l'ay en telle reputation qu'il a esté en l'Eglise ancienne. Si on trouuoit en quelque autre liure digne de foy, du vieil ou nouueau Testament quelque semblable passage à celuy que tu as amené: l'argument que tu as amené d'iceluy, auroit quelque couleur par le lustre que l'autre luy donneroit. Mais puis qu'il est tout seul, son tesmoignage n'est pas suffisant, comme il seroit en l'un des autres. Car autant est à croire Dieu par un seul tesmoignage, que par mille: là ou mille tesmoignages de hommes, sans celuy de Dieu, ne doiuent auoir aucun lieu en la religion. Mais depuis que la superstition des suffrages pour les mortz a com-

men-

*Tesmoi-
gnage de
Dieu.*

mencé de s'introduire en l'Eglise, ce liure auf-
 si a commencé de prendre plus grande autho-
 rité : tellement qu'il a esté pluſtoſt leu & chan-
 té en l'Eglise Papale, que ceux qui contiennent
 plus certaine doctrine. Mais ce n'est pas de
 merueille. On y en a bien leu des autres de
 moindre autorité, & du tout indignes de l'E-
 glise Chrestienne. E v. Il te plait de le dire.
 T H E. Je ne le voudroye dire, s'il n'estoit vray.
 Mais outre ce qui a desia esté dit des liures ca-
 noniques & Apocryphes, tu dois aussi enten-
 dre que les anciens ont quelquefois mis diffé-
 rence, entre les liures Canoniques, les Apocry-
 phes, & les Ecclesiastiques, comme il appert
 par cest auteur qui a exposé le Symbole, lequel
 aucuns estimét, que ce soit saint Cyprien: com-
 me il a desia esté dit: les autres, que ce soit Ruf-
 fin. Mais qui que ce soit des deux, ilz sont tous
 deux fort anciens. Or il distingue ces liures en
 telle sorte: Il faut ſauoir, dit-il, qu'il y a des au-
 tres liures apres les Canoniques, qui ne sont pas
 appelez des Anciens & de noz predecesseurs,
 Canoniques, mais Ecclesiastiques: comme sont
 la Sapience de Salomon, & l'autre Sapience,
 qui est appellée de Iesus filz de Syrach: lequel
 liure est entre les Latins par ce general tiltre,
 appellé Ecclesiastique: par lequel mot l'au-
 theur du liure n'est pas nommé, mais la qualité
 de l'Eſcriture. Le liure de Thobie est de ce

*Différence
 entre les
 liures ca-
 noniques,
 Ecclesiastiques &
 Apocry-
 phes.
 Le liure de
 Sapience.
 L'Ecclesiastique.
 Le liure de
 Thobie.*

*de Iudith
& des Ma
chabéens.* mesme ordre, & de Iudith, & les liures des Machabéens: lesquelz ilz ont voulu que tous fussent leuz en l'Eglise, mais ilz n'ont pas pour tant voulu qu'ilz ayent esté mis enauant pour confirmer l'autorité de la Foy par iceux. Les autres escritures, ilz les ont appellées Apocryphes: lesquelles ilz n'ont pas voulu qu'elles fussent leues en l'Eglise. Tu vois icy clairement cômét ilz attribuēt plus d'autorité aux Canoniques qu'aux Ecclesiastiques: & aux Ecclesiastiques, qu'aux Apocryphes: mais ilz n'ont pas toutesfois estimé ces Ecclesiastiques (qu'ilz ont aussi appelé plusieurs fois Apocryphes) d'égale & telle autorité, que les lettres diuines: & ne les ont pas appellez Ecclesiastiques, pour ceste cause, mais pource qu'ilz estoient en telle reputation, qu'on les pouuoit lire & chanter en l'Eglise (ce qui n'eust pas esté permis en l'Eglise ancienne) ou pource que leur antiquité, ou la sainteté de leurs auteurs, leur adioustoit quelque autorité d'auantagé que aux autres.

Т Н О. Ace conte, Eusebe fera donc debastonné du principal baston qu'il pensoit auoir. Е V. S'ilz veulent faire en ceste sorte, les liures ou Canoniques, ou Apocryphes, à leur plaisir: c'est bien folie de disputer avec eux. Car tous ceux qui ne leur duiront, seront Apocryphes. Т Н Е. Si tu ne te veux conten-
ter

ter des raisons alleguées par moy, va-en plai-
 der contre saint Hierome, & voz Decretz. Si *Ad Chro-*
 les anciens n'eussent vſé de iugement & de pru *ma. Dist.*
 dence, combien eussent les heretiques intro- *5. c. sancta*
 duiz de liures en l'Eglise, souz le nom des Pro-
 phetes, & des Apostres, & de leurs disciples?
 Lesquelz ilz ont reiettez, suyuant ceste mes-
 me reigle que ie t'ay donnée: comme il appert
 par voz Decretz mesmes, qui en font vn grãd
 rolle. *EV.* Ie ſay bié que les Decretz en disent:
 mais vous prenez tout à vostre auantage. *THE.*
 Afin que ie te laisse moins d'occasion de dire
 telles choses, & de te mescôntenter: ie te feray
 d'auantage. Ie suis cõtent, par maniere de dispu-
 tatiõ, de poser le cas que ce liure fust autèthi-
 que, & d'autorité diuine. Quand bien ainsi se-
 roit, il ne te seruiroit toutesfois en rien, pour
 prouuer qu'il y ait vn purgatoire, & qu'il fail-
 le offrir pour les mortz, à telle intention, & en
 telle maniere que vous faites. Et pour te mon-
 strer cecy plus clairement, ie te demãde, pour
 entrer en matiere, en quel temps a esté fait ce
 que celle histoire contient? A ce esté deuant
 l'aduenement de Iesus Christ, ou apres? *EV.* *Purgatoi-*
 Deuant. *THE.* Dy moy plus outre: Estoit *re deuant*
 desia en ce temps la le purgatoire, tel que vous *l'adue-*
 le croyez maintenant? *EV.* Il n'y a point de *nement de*
 doute. *THE.* Puis qu'ainsi est, dy moy quel- *Christ.*
 les ames y alloient? Car ou il estoit du tout

vuyde, ou il falloit qu'il en y allast quelques vnes: ou celles des éleuz & des fideles, ou celles des infideles & des reprouuez. Or ie ne pense pas que tu vueilles dire que le purgatoire fust pour les infideles & les reprouuez.

LUC 16.

Le limbe.

E V. L'on en peut bien ainsi iuger par ce qui est escrit du mauuais Riche. THE. Puis que enfer estoit pour les reprouuez, il s'ensuit d'oc necessairement que les ames des éleuz alloÿet en purgatoire. Si ainsi est, dequoy seruoit d'oc le limbe? Car vous dites, que tous les Patriarches, les Prophetes, & les vrais fideles qui sont decedez de ce monde, auant la mort & la passion de Iesus Christ, y estoient detenez, & ne pouuoient auoir accez en paradis, iusques à ce que Iesus Christ eust satisfait pour eux. Parquoy, ie conclu, selon vostre doctrine, ou que le limbe & purgatoire estoient tout vn mesme logis, ou que l'un des deux estoit vuyde & superflu: ou qu'il n'y en auoit que l'un, ou, pour mieux parler, ne l'un ne l'autre. Car si le limbe estoit pour receuoir les fideles qui estoient mortz en la Foy de la promesse faite à Abraham, quel besoing estoit il plus de purgatoire? N'auoyent-ils pas assez de purgatoire aux limbes? N'estoyent-ils pas assez tourmentez, d'estre excluz de paradis, & priuez des ioyes d'iceluy, & de la fruition de la gloire de Dieu, comme vous l'affirmez? Car quel torment

ment pourroit auoir l'hōme fidele plus grand, que d'estre priué d'un tel bien? Ce n'est pas seulement vn purgatoire, mais vn droit enfer. Parquoy, ie ne say en quoy vostre opinion se trouuera differente à la fin à celle des Manichéens, qui disoyent, qu'aux ans anciens nul ne auoit esté sauué, mais qu'ilz auoyent cōmencé à l'estre, depuis l'an quinz'ieme de l'Empereur Tyberius, iusques au temps de Manes le heretique autheur de leur secte.

*Epipha. li.
2. Tom. 2.
harez. 66.*

E V. Ie cognoy, en t'oyant parler, que toy, qui veux enseigner les autres, es encore en grande ignorance, & que tu entens tresmal ceste matiere. Le limbe pour lors estoit pour ceux qui estoient en tel estat que ceux sont maintenant, qui ont acheué leur penitence, & ont fait entiere satisfaction pour leurs pechez en ce monde, qui s'en vont tout droit en paradis: excepté que ceux là n'y pouuoient encore entrer, à cause que l'huis estoit fermé, iusques à ce que Iesus Christ le vint ouurir, & rompre les portes d'enfer.

*Quelle opi
non les
Papistes
ont en des
limbes.*

THE. Le purgatoire pour qui estoit il? Y auoit il encore quelque autre sorte d'ames, & d'autre condition, que celles qui alloient aux limbes? E V. Ouy. Car tu peux bien entendre, que tous les fideles qui ont precedé l'aduenement de nostre Seigneur Iesus Christ, n'ont pas tous esté si sainctz & si parfaitz que

*Les raisons
sur lesquelles
les purgatoires
sont fondés.*

les Patriarches & les Prophetes . Parquoy, ce n'estoit pas raison, qu'incontinent apres leur mort, ilz receussent autât de felicité qu'iceux, sans premierement auoir accompli & paracheué leur penitence en purgatoire, & satisfait pour leurs pechez: ce qu'ilz n'auoyent pas fait en ce monde, comme les sainctz Patriarches & les Prophetes, ou autrement, Dieu ne seroit pas iuste. Car quelle raison y a il, que celuy qui aura vescu en tous vices & pechez tout le teps de sa vie, iusques à l'article de la mort, auquel il a eu repentâce de ses pechez, & en a demandé misericorde à Dieu, n'ait plus grieue punition, mais reçoie aussi grand salaire, que celuy qui toute sa vie a seruy fidelement à Dieu, & a tousiours vescu en sainteté, iustice & innocence?

*Hypocrites enuieux
de la grace de Dieu.
Luc 18.*

Matt. 21.

THE. Garde toy de blasphemer Dieu, & d'outrager sa grace & sa misericorde . Car i'ay grand peur, que tu ne sois semblable au frere de l'enfant prodigue, qui estoit enuieux contre son frere, & murmuroit contre son pere, estant marry du bon accueil & de la grace qu'il faisoit à son filz, lequel il auoit recouré, s'estant reduit en la droite voye: ou que tu ne sois des compagnons des vigneron, qui murmuroient contre le pere de famille, à cause qu'il bailloit autât de loyer à ceux qu'il auoit appelé à onze heures, & sus le soir, pour tra-
uailer

uailier en sa vigne, qu'à ceux qu'il y auoit mis depuis le poind du iour, qui auoyent porté la chaleur & le fardeau toute la iournée. Pourquoy n'accusestu nostre Seigneur Iesus Christ, qui a respondu à ce pource larron & brigand, qui estoit pendu en croix aupres de luy: Tu feras auourd'hui en paradis avec moy? Quel *Luc. 23.* bien auoit il fait parauant? Es-tu enuieux de la grace que Dieu fait aux potres pecheurs?

E V. A Dieu ne plaise. Mais il nous faut entendre, qu'ainsi que Dieu est misericordieux, aussi il est iuste. Et si le larron, qui a esté crucifié aupres de Iesus Christ, a eu ce priuilege, il ne *Priuilege* s'ensuit pas pourtant que tous l'ayent semblable, ou qu'ilz le doiuent auoir. Car comme les Legistes le disent, Les priuileges de peu, ne sont pas loix communes pour tous.

T H E. Si ce larron a receu vn si grand bien, pour vn singulier priuilege: ie te respon bien d'auantage, que nul n'est sauué que par *Salut par priuilege.* priuilege. Car nous auons tous merité damnation eternelle de nostre nature. Ce donc que nous sommes sauuez, c'est par vn singulier priuilege, qui est donné de Dieu aux éleuz par Iesus Christ, qui n'est point commun aux reprouuez. *Rom. 3.9.* **E V.** Il y a encore vne autre raison, pour laquelle ce larron est allé droit en paradis, sans passer par le feu & par les peines de *Peine pour purgatoire.* purgatoire: c'est qu'il auoit desia fait sa peni-

tence en ce monde, & auoit fatisfait pour ses pechez. THE. Quelle penitence ou satisfaction pouuoit il auoir faite? Les larrecins & les meurtres, pour lesquelz il auoit esté pendu au gibet? EV. Mais la peine qu'il a soufferte & endurée, & la mort qu'il a receue pour ses demerites. THE. Autant en a souffert son compagnon, qui estoit pendu à fenestre: mais toutesfois ses tormens ne luy ont de rien seruy, & n'a point ouy telle promesse de Iesus Christ que l'autre. EV. Pource qu'il n'a pas prins la mort & le torment en gré & patience, & n'a pas creu en Iesus Christ, & demandé pardon de ses pechez, comme son compagnon.

*La seule
mort de Ie-
sus Christ
satisfait.*

*Cypr. lib.
4. de bap-
tismo. Li.
Sent. 4.
dist. 4. Sū*

THE. Tu reuiendras tousiours à mon conte, & feras contraint de confesser qu'il n'y a rien qui ait esté cause du salut de cestuy cy, que la Foy qu'il a eue en Iesus Christ, & la misericorde de Dieu, qu'il a obtenue par icelle, sans ce que Dieu ait regardé ny à sa dignité, ny à ses œuvres, fors qu'à Iesus Christ son Filz, pour l'amour duquel il luy a pardonné, non pas pour le torment & la mort que le larron a soufferte, & la satisfaction qu'il luy a peu faire, mais pour le torment, pour la mort & la passion que Iesus Christ a soufferte, & la satisfaction qu'il a faite pour luy: ce que saint Cyprien a bien entendu, duquel le tesmoignage est allégué par le maistre des sentences. Car quand
tou-

toutes les mortz & tous les tormens que tous les hommes, les Patriarches, les Prophetes, & les Apostres, Martyrs & confesseurs endurent iamais, seroyent ensemble, ilz ne seroyent pas suffisans pour effacer le moindre peché du monde. Car Dieu ne prend pas seulement pour satisfaction le torment, mais regarde à la dignité de la personne, de laquelle il reçoit la rançon : laquelle n'a esté trouuée suffisante qu'en Iesus Christ. Ou autrement, si le torment que l'homme endure estoit approuué de Dieu pour satisfaction, & cause d'euer les peines de purgatoire, il n'y auroit hōme plus heureux que les larrons, les meurtriers, les brigandz & les autres malfaiçteurs, qui sont executez par iustice. Parquoy, il n'y a nul qui ne deust deuenir larron, ou voleur, ou brigand, ou commettre quelque autre crime digne de mort, pour estre executé par iustice, & euer les peines de purgatoire par ce moyen. Car si la doctrine de voz Theologiens est vraye, le feu de purgatoire surmonte toute peine, que l'hōme pourroit souffrir en ceste vie, & est si chaut & si ardent, que le feu visible & materiel de ce monde, n'est que du feu peint au pris d'iceluy. Il ne y a nul de vous qui n'ait souuent ouy prescher cela. H I. Ie l'ay ouy assez souuent, mais ie ne puis entendre en quel passage de la sainte Escriture ilz ont veu cecy. Plutarque a bien e-

La grandeur des peines de purgatoire.

Dist. 25. c.

Apostolus.

Tho. 4.

dist. 21. ar.

1.

Ric. 4.

Dist. 20.

arg. 2. Al-

ber. 7. lib. comp. theo. ca. 2. Bonau. 4. dist. 18. scrit que les douleurs & les peines de purgatoire sont si grandes & si cruelles, qu'il y a autant de difference entre icelles & celles que nous endurons au corps & en la chair, qu'il y a de differéce entre ce qui nous aduiét en songeant, & ce qui nous aduiet en veillant: tellement que tout ce que nous endurôs en ce monde, n'est qu'un songe aupris de cela. Il me semble que ceste theologie de Plutarque, qui a esté Platonique, n'est pas fort differente à celle de noz Papistes. Je ne say pas s'ilz l'ont prise de là, aussi bien que leur purgatoire, mais il le semble bien. Si ainsi est, & si la fable que les theologiens racontent de saint Gregoire est vraye, ie ne seroye pas ébahy, qu'il eust mieux aymé choisir, (quand l'Ange luy bailloit l'election des deux) d'estre en langueur & maladie toute sa vie, que deux iours en purgatoire: à cause qu'il auoit prié pour Traian, & que il l'auoit deliuré d'enfer. Car ia soit qu'il se soit plaing en ses Epistres, qu'il a esté tellemēt pressé de gouttes & de si grandes douleurs, que sa vie ne luy estoit que peine: toutesfois encore ena il eu grand marché, aupris d'estre un quart d'heure en purgatoire. N'es-tu pas bien de mon aduis, Thomas? *THO.* Je n'y cōtredy pas. Mais est il vray que saint Gregoire ait tiré l'ame de l'Empereur Traian d'enfer? Il me semble que tu t'en moques, quand tu ap-
pelles

Plutar. li. de sera, mi. vind.

Fable de Gregoire. Barl. ser. 4. heb. 4. quadr. 3. Ser. de pœ. ni. purg.

pelles cela vne fable. **II.** Ie le croy de ma part, tout ainsi comme la fable d'Orpheus & de sa femme Eurydice, ou de Theseus & de Pyrithous, ou d'Ercules & de Cerberus. Car les poetes tesmoignent, par leurs escritz, que tous ceux la ont esté aux enfers, & qu'ilz en ont retiré, l'un sa femme, assauoir Orpheus, apres qu'il l'eut impetrée par son doux chant: l'autre, assauoir Thesee son amy Pyrithous: l'autre, assauoir Hercules, le chien infernal Cerberus. Pour laquelle cause, Charon le pontier, fut vn an aux cepz, pource qu'il luy auoit passé le fleuve infernal, combien qu'il l'auoit fait par crainte, cōme Orpheus le tesmoigne.

*Virg.
Georg. 4.
& AEnc.
6. Hora.*

THO. Quand bien ainsi seroit, ie te demāde, à quel propos eust donné l'Ange à choisir à saint Gregoire l'une de ces deux peines? Luy deuoit-il aduenir mal de bien faire? A il tiré Traian d'enfer maugré Dieu? Si noz prestres auoyent tel payemēt, pour tirer les ames hors de purgatoire, ie croy qu'ilz ne seroyent pas fort eschauffés apres leurs messes. **II.** Il estoit bien force, puis qu'ilz auoyent commen cé la fable, de la paracheuer, pour la pouoir accorder, & faire aucunement conforme avec celle de Theseus & Pyrithous: qui selon le tesmoignage des poetes, sont puniz aux enfers, pource qu'ilz en ont voulu tirer Proserpine, maugre le dieu Pluton. Nous lisons sembla-

*Fable de
Theseus
& Pyritho
us.
Virg. AE-
ne. 6. Disse
rance entre*

*le feu de
purgatoi-
re & d'en-
fer.*

blement, que Orpheus & Hercules sont mortz
aussi fort miserablement. Car les vns disent
qu'Orpheus mourut frappé de foudre: com-
bien que la plus grand part, principalement les
poetes, ont escrit qu'il auoit esté deschiré des
femmes prestresses du dieu Bacchus. D'Hercu-
les, ilz disent qu'il mourut enragé, brulé par
le feu qui se prist à luy par la chemise que sa
paillarde luy auoit baillée. Je ne say si cela
leur seroit point aduenü, comme la punition
de S. Gregoire, à cause de leur si grande auda-
ce. Je m'en rapporte aux Theologiés de ceste
theologie. Pourfuy donc ton propos, Theo-
phile, lequel nous t'auons rompu.

*Ric. 4. dist.
20. arg. 2.
Bonan. 4.
dist. 18.
Alber. 7.
li. cöpe. tha
ca. 2. Tho.
4. dist. 21.
ar. 1. & 3
par. q. 49.
ar. 6.*

THE. Ce n'est encore rien, de ce que
i'ay dit. Ilz enflamment bien ce feu d'auanta-
ge. Car ilz afferment, que celuy de purgatoi-
re, & celuy d'enfer est tout vn: & qu'il n'y a au-
tre difference, sinon que celuy d'enfer est eter-
nel, quant à son office, mais celuy de purgatoi-
re, ne l'est que quant à sa substance, à cause que
les ames en sortent quelque fois. Parquoy ilz
concluent, non seulement que la peine de pur-
gatoire, est la plus grieue qu'il soit, mais qui
plus est Thomas d'Aquin a escrit, que ceste
peine excède & surmonte les douleurs & les
tormens que Iesus Christ a enduré en sa mort
& passion. Quel blaspheme pourroit estre
plus grand? Car quel enfer peut estre plus
cruel,

cruel, que celuy que Iesus Christ a porté pour nous, quand il a soustenu la malediction deue à noz pechez, pour nous en deliurer? N'as tu point d'horreur, Thomas, d'ouyr telz blasphemés? **THO.** Ie ne say que i'en dois dire. Ie trouue bien estrâge cecy. N'alleguēt ilz point quelque passage de la sainte escriture, pour le prouuer? **THE.** Ou le prendroyent ilz? leur probation est vn exemple, qu'ilz proposent cōmunement, prins des Chroniques des Iacopins, d'vn frere de l'ordre, qui apparut à vn sien amy aduocat: par lequel estât interrogué de la peine de purgatoire, il respondit, Que si tout le mōde, & toutes les choses visibles brusloyent, cela ne pourroit estre comparé à la peine & l'ardeur de purgatoire. Ne te semble il pas que la probation soit bien digne de telz Theologiens? Certes ie suis esbahy de ce que Eusebe est tant addonné à eux, veu les grans blasphemés qui sont en leur doctrine, & qu'il est tant affectionné apres son purgatoire.

*Barl. serm
de pan.
purg.
Exemple.
Anto. 1.
par. sum.*

E V. Quand il n'y auroit point d'escriture, & que nous n'aurions que nostre sens naturel, lequel Dieu nous a baillé: si pouuons nous bien iuger, qu'il est conuenable & necessaire, qu'il y ait vn purgatoire, auquel les hommes pecheurs soyent puniz, des pechez desquelz ilz n'ont pas paracheué leur penitence. Car il n'est pas escrit sans cause: Nullum malum im-

*Raison hu
maine fon
dement de
purgato
re.*

*Iustice &
misericor-
de de Dieu.*

Esai. 9.

Iesi. 3.

Rom. 3. 2.

Gal. 3.

Meb. 5. 7. 8.

9. 10.

*Punition
des pechez.*

Rom. 13.

1. Cor. 12. 7.

Iean 1. 3. 5.

15.

Gal. 3.

Iean 3.

punitum : Nullum bonum irremuneratum. Il n'y a mal qui demeure impuny, ne bien qui ne soit remuneré. **T H E.** Combien que ces parolles ne soyent point couchées en la sainte Escriture, en la maniere que tu les recites : neantmoins ie suis content, d'admettre ton propos, pour vray. Ie ne nie pas, que Dieu ne soit aussi bien iuste, que misericordieux. Car autrement, il ne pourroit estre Dieu. Mais nous deuons considerer, par quel moyen il exerce sa iustice & misericorde enuers nous. Il n'y a nulle doute, que noz pechez ne meritēt punition: voire bien grieue. Et pourtant, il nous a donné Iesus Christ son filz, & l'a liuré à la mort pour nous, afin que noz mesfaitz fussent puniz en luy, & qu'il satisfist pour nous à sa iustice souveraine, pour obtenir d'iceluy grace & misericorde en son Nom. Tu vois dōc, cōment il n'y a mal, qui ne soit puny, pour satisfaire à la iustice de Dieu: mais il y a differēce, en la maniere de punir. Car si celuy qui a fait le mal, croit en Iesus Christ, & a pleine confiance que par sa mort & passion, il a obtenu de Dieu pardon & remission de ses pechez: par celle foy, il est vray membre de Iesus Christ, & adopté pour Filz de Dieu. S'il est vray membre de Iesus Christ, & vray enfant de Dieu, luy & son peché sont puniz en Iesus Christ, qui pour ceste cause a porté le iugement & la malediction de Dieu,

Dieu, pour tous les eleuz. Mais si le pecheur est infidele, & qu'il n'ait point de part avec Iesus Christ, l'ire de Dieu demeure sus luy, & ne peut eschapper le iugement de Dieu, que son peché ne soit puny en luy-mesme, en la gehenne du feu. Et tout ainsi que noz meffaitz sont puniz en Iesus Christ, aussi noz bien-faitz sont recompensez en luy, & approuuez par luy du Pere celeste, qui coronne ses bonnes œuures en nous. Car rien ne luy plaist, que Iesus Christ son Filz bien-aymé, auquel il a mist tout son bō plaisir : & ne peut trouuer œuures agreables, que les siennes. Car il n'y a nul bien, qu'en luy. Parquoy, si nous voulons auoir quelque bien en nous, il le faut aller querir & emprunter vers luy. Et si nous voulons que noz œuures soyent plaisantes à Dieu, il est necessai-
 re que Iesus Christ les face en nous, par son S. Esprit: ou autrement, le Pere celeste ne les pour-
 ra approuuer ne recevoir, pour bōnes, ne leur donner loyer. *Obiection.* *Remuneration des bien-faitz.* *Matt. 3. 17.* *Iean 3.*

Je doute fort, qu'en voulāt tant magnifier la grace & la misericorde de Dieu, & l'efficace de la mort & passiō de Iesus Christ, vous ne dōniez occasion à plusieurs de mal faire, sans auoir nul soing de faire aucunes bonnes œuures. Car si les hommes ont vne fois ceste opinion, qu'ilz sont sauuez par la seule grace & misericorde de Dieu, & qu'ilz ne peuuent meriter paradis par leurs bonnes œuures,

*Purgatoi-
renourrice
de pechez.*

*Bonnes œu-
ures.*

que se foudrieront-ils de faire nul bien, s'il ne leur sert non plus que le mal? **T H E.** Je crains bien au contraire, que la doctrine que tu tiens ne les induise à ce que tu dis. Car combien en a-il esté, qui, ayans ceste opinion, de satisfaire en purgatoire, pour leurs pechez, font abandonnez à tous vices, durant leur vie, esperans qu'ilz pouruoyroient si bien à leurs affaires, que par or & par argent, ilz se feroient incôti-
nent deliurer des peines de purgatoire, apres leur mort? Et par-ainſi il leur sembloit, qu'il n'estoit ia fort besoing d'estudier à faire bon-
nes œuures. Car ilz esperoyent de trouuer en leur bourse, tout ce qui leur feroit besoing pour leur salut. Mais puis qu'il est question des bonnes œuures, qui penſes-tu qui les puisse faire meilleures, ou le seruiteur qui trauaille par contrainte, qui ne feroit rien de besongne s'il ne craignoit d'estre battu de son maistre, ou s'il n'esperoit d'en auoir bon salaire: ou le filz, qui a vne vraye amour filiale enuers son pere, & qui ne prend plaisir à autre chose, qu'à le bien seruir & honnorer, à cause de l'amour naturel qu'il luy porte, & de la cognoissance qu'il a des grans biens & benefices qu'il a receuz, & reçoit iournellement de luy, sans aucune crainte seruile, mais seulement d'une reuerence & d'une bonne affection qu'il a enuers luy?

E V. Il n'y a nulle doute, que ceux qui seruent tant seulement pour crainte qu'ilz ont d'estre puniz, ou pour esperance de salaire, ne peuuent seruir fidelement ny loyallement: mais sont comme les seruiteurs, qui seruent à Coloss. 4. l'œil, qui font du bon vallet, cependant que le maistre est present: nonobstant qu'ilz n'ayent point de bon vouloir enuers luy.

T H E. Toutesfois ceux qui suyuent la doctrine, laquelle tu tiës, sont tous semblables à ceux cy. Car, ou ilz se desdient totalement à leurs voluptez & delices, esperans qu'ilz satisf- *Oeures des hipocrites.* feront par argent, pour leurs pechez, & se racheteront: ou s'ilz s'estudient à bien faire, ilz ne le font que pour crainte, ainsi qu'un subiect seruiroit à un tyran, craignant de tomber entre ses mains: ou comme mercenaires, non pas pour amour qu'ilz ayent en Dieu, mais pour l'amour qu'ilz ont en eux-mesmes. Et par-ain- *Le dieu des hipocrites.* si, ou ilz font Dieu semblable à un cruel tyran, ou à un iuge pilleur & larron, qui absout par argent les mal-faïcteurs, & comme compa- gnons des larrons, prend sa part du butin avec eux: ou ilz se font dieux eux-mesmes, & adorent les œuvres de leurs mains, puis que par icelles ilz se sauuent eux-mesmes, & meritent paradis. Parquoy ilz n'ont nul besoin de Iesus Christ. Je demande, à toy qui n'es qu'un homme pecheur, si tu tiendrois pour vray amy, un

homme qui te feroit seruice , seulement pour crainte qu'il auroit de toy , que tu ne luy portasses dommage? ou pour esperance qu'il auroit d'en valoir mieux, sans laquelle il ne tiendrait conte de toy, & ne voudroit seulement faire vn pas?

*Amy de
cuisine.*

EV. Ie le tiendroye pour vn amy de cuisine, qui ayme plus son ventre que moy , duquel il est amy, non pas de moy. THE. Et toutesfois, si tu consideres bien la nature des hypocrites, & de ces Pharisieus, qui attribuent tant à leurs œuures, tu les trouueras d'une telle amitié enuers Dieu. Car ilz ne font pas ce que ilz font pour l'amour de luy, mais pour l'amour d'eux-mesmes: & ne seruent à Dieu, si non en la maniere que les bestes seruēt à l'homme, ou pour la crainte qu'elles ont des coups, ou pour la nourriture & la viande qu'elles en reçoient. Mais sans plus nous arrester sur ce point, retournons à nostre propos du limbe. Puis que tu metz le limbe pour les vns, & purgatoire pour les autres, quelle différence metz tu entre ceux qui estoient au limbe, & entre ceux qui estoient en purgatoire, puis que les vns & les autres selon vostre doctrine, estoient priuez de la fruition de Dieu? EV. Il y a grande difference. THO. Si grande, que ie crains fort, qu'à la fin ton limbe & ton purgatoire ne soyent Enfer. Car si les saintz peres, tant les

*Difference
entre le
limbe, pur
gatoire &
enfer.*

les Patriarches, que les Prophetes estoient priuez d'un tel bien, enquoy estoient-ilz differens aux damnés? Et ceux pareillement que tu loges en purgatoire, qu'auoyét-ilz besoing de plus grand torment, ne d'autre feu pour les tourmenter? Et quel soulas pouoyent-ilz auoir plus que les damnés, s'ilz estoient priués des ioyes de paradis, & encore avec cela, estre detenus au feu? Quant à moy ie n'y trouue pas grande difference. Ie ne say si vous autres estes de differente opinion à la mienne.

H I. Ie suis bien de ton aduis & principalement quand ie considere qu'en ce temps la, il n'y auoit point de messe ne de prestres Papistiques, pour prier & sacrifier pour les trepassez. Parquoy ilz deuoyent demourer long temps en ces peines & tormens. Et, qui plus est, puis qu'en ce temps la, nul ne pouuoit entrer en paradis, quand ilz auoyent accôply le temps de leurs peines en purgatoire, ou alloyét-ilz au sortir d'iceluy? ilz ne pouoyent que sortir d'un enfer, pour aller en vn autre, c'est assauoir, du purgatoire, au limbe: ou il leur estoit force de demourer tousiours enferrés aux prisons de purgatoire, iusques à la venue de Iesus Christ. **T H E.** Pour en dire le vray, ie ne trouue pas grande differēce, entre enfer & ces autres deux logis. **E V S.** Si y est-elle grande. Car ceux cy auoyent esperance

de paruenir, vne foys à la felicité eternelle, de laquelle les damnés font totalement priués.

L'enfer des Origenistes & Catabaptistes
 T H E. Il n'y a d'oc autre difference, sinon que les vns sont detenuz en enfer, & damnés à tout iamais : les autres ne le sont que pour vn temps. Et par ainsi, vostre limbe & vostre purgatoire, ne seront en rien differens à l'enfer des Origenistes, & des Catabaptistes, qui ont esté en ceste refuerie & fausse opinion, qu'il n'y auroit homme ne Diable damnez perpetuellement : ains que tous ceux qui estoient detenuz en enfer, apres long espace de temps, en seroyent vne foys deliurez, & finalement tous sauuez. T H O. S'en est il bien trouué qui ont eu telle opinion : Comment osoyent ilz dire cela, veu que la sainte Escriture tesmoigne tant euidemment, que les peines d'enfer sont eternelles, & que nostre Seigneur Iesus Christ appelle le feu de la gehenne, eternel & inextinguible?

Esa. 66.
 Matt. 3. 25.
 Mar. 9.
 Apo. 14.

T H E. Quelles raisons ont les autres heretiques, pour batailler cõtre verité, que leurs opinions humaines : ou quelque passage des lettres diuines, deprauiez & corrompuz par leur fausse intelligence ? Ilz n'ont pas fondement, qui ne soit facile à renuerfer. Mais nous n'auons pas maintenant à disputer contre ces vieux Origenistés, qui sont resuscitez aux Catabaptistes, lesquelz sont desia assez conuaincuz :

cuz:ains auons à besogner contre les Papistes, lesquelz nous pouuôs comparer à bon droit à ceux la, & les appeller nouueaux Origenistes, aussi bien que les Catabaptistes. Il n'y a à dire, *Difference entre les Papistes & les Catabaptistes* sinon que les Catabaptistes sont moins couuers & desguisez, & qu'ilz ressuscent trop ouuerement les vieilles erreurs & heresies, lesquelles on tiët desia pour condânées. Mais les Papistes ont trouué vne autre masque, & vne autre maniere de proceder, par laquelle Satã, a trouué en iceux le moyen de redresser cest enfer des Origenistes, en desguisant seulement vn petit l'edifice d'autre sorte. Car quand tout sera biẽ cõsideré, ie ne say en quoy ceux que vous logez au limbe & en purgatoire, sont differẽs, à ceux que les Origenistes & les Catabaptistes tenoyent pour damnez: si vous ne voulez dire, que la peine, & l'enfer des vns, dure plus que des autres.

E v. Il y a bien d'auantage. Car combien que tous fussent tormentez, neantmoins, ceux qui estoient au limbe, l'estoyent beaucoup moins, que ceux qui estoient detenez en purgatoire. Car il n'y auoit point de feu au limbe. Parquoy ceux qui y estoient, n'auoyent autre *Les peines du limbe.* peine, sinon qu'ilz ne pouuoient encore voir la face de Dieu, & auoir la iouissance de paradis, laquelle ilz attendoyent d'vn grand desir. Cela leur estoit en grand tormẽt, ainsi qu'à

*Peine de
purgatoire*

vn chacun, l'attente du bien qu'il desire, & ne le peut si tost auoir qu'il voudroit. Ceux semblablement qui estoient en purgatoire, & y sont encore de present, ne souffrent pas aussi tormens si grieuz, sans comparaison, que les damnez, detenez au feu de la gehenne: mais ilz ont toutesfois le feu d'auantage, que ceux qui estoient au limbe. **THE.** Il te sera encore force de reuenir à mon conte. Car que puis-je conclure autre chose de tes parolles, si n'est qu'il y a trois enfers, entre lesquels n'a point de difference, sinon que l'un est plus cruel que l'autre, comme sont les prisons & les tormens des tyrans? Car voz Theologiens afferment, qu'il y a deux sortes de peines en purgatoire, c'est assauoir, la peine de Dā, & la peine de Sēs. Par la peine de Dam, ilz entendent le dommage & l'interest que les ames ont, par le retardement & l'empeschement qu'il leur est mis de voir la face de Dieu, & d'estre en possession des ioyes de Paradis. Par la peine de Sens, ilz entendent les tormens sensibles que les ames sentent, du feu, par lequel elles sont punies.

*Trois en-
fers.*

*Pena dam-
ni & pa-
na sensus.*

*Leo de vi-
no ferm. in
fest. mort.*

EV. Te semble il que celle distinction & difference, est mal prise? **THE.** Je te prie que tu iuges toy-mesme, quelle difference y peut estre. Premièrement, quelle peine peuuent auoir les damnez plus grande que ceste cy? veu que voz docteurs afferment, que le feu d'en-
fer.

fer & de purgatoire est tout vn, quât à sa substance:& qu'apres le iour du dernier iugemēt, *Io. Maio. 4. Sent. dist. 44. q. 1.* purgatoire sera meslé avec enfer, & ne seront plus qu'une mesme chose. Tu ne peux icy trouuer autre difference, excepté que purgatoire n'est pas vn perpetuel enfer, ne vne gehenne eternelle, mais qu'elle a certain terme: & que le limbe est vn demy enfer. Car il n'y a que la peine de Dā, & l'interest, veu qu'il n'y a point de feu. Laquelle toutesfois voz docteurs afferment estre si grande, qu'elle surmonte toutes les peines du monde. Et pour le prouuer, ilz alleguent S. Augustin, disant estre estrangier du Royaume de Dieu, priué de la douceur de Dieu, est vne peine tant grande, que nous ne sauons tormens qui y puissent estre comparez. Et Chrysostome: Plusieurs ont horreur de la gehenne, mais i'estime vne peine beaucoup plus grande, que la gehenne, la cheute de celle gloire. Tu voys donc, si i'ay tort, d'appeller le limbe, enfer. Mais il y a encore difference, entre les peines des peres anciens, qui estoient detenuz au limbe, & les enfans mornez. Car ce demy enfer, lequel vous leur assignez, leur est eternel, selon vostre doctrine: ce qu'il n'estoit pas, aux peres anciens. *Barl. ferm. de pan. in fer.*

E V. Je le te confesse. T H E. Combien que la doctrine de Mahumet ne vaille du tout riē, & qu'elle soit totalement contraire à celle de *La doctrine de Mahumet tout chant l'e-*

*Stat des
ames.*

Iesus Christ: il me semble neantmoins, qu'elle a plus d'apparēce, & qu'elle approche plus de celle de Iesus Christ en aucuns pointz, touchant ceste matiere que nous traitons, que la vostre.

Luc 16.

E V. Je le te nie. **T H E.** Tu ne me nieras pas, que nostre Seigneur Iesus Christ ne nous ait proposē à la verité, en l'exemple du riche & de Lazare, quel estoit l'estat apres ceste vie, tant des eleuz que des reprouuez, & que nous en deuions tenir & croire.

*Estatz des
trespassez
selon Iesus
Christ.*

E V. Iet'accorde cela. **T H E.** Je ne dispute pas maintenant, si cela est alleguē ou comme parabole, ou comme vraye histoire, ou comme vn exemple tenant de l'un & de l'autre. Je m'arreste seulement à la doctrine, laquelle nostre Seigneur Iesus pretēd nous enseigner. Il ne fait point là mention, sinon de deux estatz des trepassez, & de deux lieux tant seulement, pour les nous dōner à entendre: c'est assauoir, du feu de la gehenne d'enfer, auquel le riche estoit tormētē: & du sein d'Abrahā, auquel Lazare fut porté par les Anges. Il n'en met point d'autre tiers. Pareillemēt, quād il enuoye ses Apostres pour prescher, il mōstre clairement, qu'il n'y a que deux voyes disant: Qui croira & sera baptisē, sera sauué: qui ne croira point sera condannē. La premiere, c'est la voye estroite qui meine à salut: la seconde, la voye large, qui meine à perdition: desquelles Iesus Christ a par

Mar. 16.

Matt. 7.

lé en

lé en vn autre lieu. E v. Que veux tu dire sur
 cela? T H E. Côme il n'y a que deux voyes, il n'y
 a aussi que deux issues & deux estatz, pour re-
 ceuoir ceux qui ont marché par icelles. Mahu- *Estat des*
 met non cōtent de la doctrine de Iesus Christ, *ames selon*
 a adiousté vn autre troisieme estat, à ces deux: *Mahumet.*
 & vn autre diuers logis, pour receuoir lesa- *Alcoran.*
 mes des trepassez, en sorte qu'il en met trois *Azōara.*
 en tout. Il loge les vnes en paradis, les autres en *17.*
 enfer, & les autres entre ces deux cy. Mais il
 n'assigne autres peines, à celles de ce troisiem-
 e estat, sinon qu'il dit, qu'elles demeurent
 encores incertaines de leur salut, attendant ne-
 antmoins paradis: combien qu'elles n'en soyēt
 pas fort bien assurées. Or vous avez encore
 auancé & augmenté les estatz des trepassez, de *Conformi*
 deux d'auantage. Vous accordez avec la sain- *té des Pa-*
 cte Escriture, & avec les autres, qui ont fait *pistes avec*
 mention de telles choses, en partie, quant à pa- *Mahumet.*
 radis & enfer. Vous conuenez avec Mahumet,
 en ce que vous mettez estat d'ames, qui ne sont
 ny en paradis ny en enfer. Mais vous le surmō-
 tez, en ce que vous en mettez troys differens
 l'vn à l'autre, de cestes icy, au lieu qu'il n'en
 met qu'vn. Enquoy vous ne surmontez pas seu-
 lement Mahumet, mais les Payens aussi, des-
 quelz nous auons parlé parauât: entre lesquels
 aucuns ont tellement approché, de ce qui nous
 est manifesté aux saintes Escritures, touchant

*Cice. Tus.
quest. li. I.*

ces choses, qu'ilz semblent presque auoir dit le mesme, nommément Socrates: si le tesmoignage de Ciceron est vray, qui en a ainsi escrit. Il estoit de cest aduis, & disputoit ainsi, qu'il y auoit deux voyes & deux cours des espritz departans du corps. Car il y auoit vn chemin forclos & separé de la compagnie des dieux, pour ceux qui se feroient contaminez de vices charnelz, & du tout addonnez à vilainies, desquelles estans aueuglez, se feroient souillez comme de vices & crimes domestiques: ou qui auroient entrepris & machiné des tromperies inexplicables & cauteleuses, en la chose publique. Mais ceux qui se feroient gardez entiers, chastes, purs & netz, & qui auroient eu moins de contagion & d'acointance avec les corps, & se feroient tousiours separez & retirez d'iceux, & auroient enseuely la vie des dieux aux corps humains: iceux auroient facile accès, pour retourner à ceux desquelz ilz sont venuz: c'est assauoir aux dieux. Il dit presque le mesme que nous, excepté qu'il parle des dieux, comme s'il en estoit plusieurs: & qu'il semble attribuer à la vertu humaine la purité que nous ne pouuons auoir, qu'en Iesus Christ. Les autres qui ont parlé plus auant de ceste matiere, & qui ont assigné plus de voyes & plus de logiz aux ames, assauoir les poetes, & les rheologiens lesquelz ilz ont ensuiuy, n'ont en-

co-

core mis, au plus, que quatre estages pour icelles, assavoir les champs Elysées, lesquels ilz ont pris pour paradis : & purgatoire & enfer, & le logis des ames des petis enfans : lequel ilz ont encore mis comme vne partie d'enfer & l'entrée d'iceluy. Mais outre enfer, paradis & purgatoire, vous estes contrains de forger encore deux sortes de limbes, l'un pour les Peres anciens, l'autre pour les enfans mornez : ou vostre doctrine ne se pourra bien maintenir, ains se deffera ellemesme.

E V. Tu nous fais grand tort, de nous accompagner de Mahumet & des Payens. Car pour le premier nous sommes bien differans à Mahumet, en cela qu'il laisse les ames du troisieme ordre, en doute de leur salut : ce que nous ne faisons point en quelque estat d'ames que nous mettions. Car combien que celles des Peres anciens, qui estoient aux limbes, n'auoyent pas encore la fruition des ioyes de paradis, comme elles l'ont à present, elles se tenoyent toutesfois pour asseurées de leur salut. Nous disons le semblable de celles qui sont en purgatoire, excepté qu'elles sont en plus grand torment. Quant aux autres qui ne sont à present ny en paradis ny en purgatoire, nous les mettons hors de toute esperance de salut.

T H E. Or aduise, si tu amendes guerres vostre cause, & qui est plus grand bourreau

d'ames, ou vous, ou Mahumet. Vous auez raison quant à celles qui sont en enfer : mais vous estes trop plus cruelz que Mahumet, tant enuers les ames des petis enfans mornez, qu'enuers celles de purgatoire. Car combien que Mahumet n'asseure pas celles de son moyen & troisieme logis, de paruenir iusques en paradis, il ne leur en oste pas aussi toute leur esperance. Et cependant il ne leur baille autre torment, pour leur satisfaction. Mais vous ostez tout espoir aux ames des pources petis enfans. Quant à celles de purgatoire, vous leur vendez bien cher l'esperance que vous leur laissez.

E V. Encore sont elles bien aises d'auoir vn tel soulas. Les damnez seroyent bien ioyeux, s'ilz en pouuoient seulement auoir la disme. Il y a encore vn autre poinct, auquel tu nous fais tort: c'est touchant ces deux limbes, desquelz tu as parlé. Car puis que Iesus Christ en a retiré les Peres, il n'y peut plus auoir qu'une sorte de limbe: c'est assauoir, celui des petis enfans mornez.

T H E. Nous rentrons derechef, icy en vne autre grande difficulté, en laquelle tu te trouueras bien empesché, & par laquelle tu cognoistras combien il est difficile de maintenir mensonge, sans se couper & contredire souuentefois. Et pour mieux te monstrier cecy, puis que nous auons desia separé le purgatoire du

re du limbe, il seroit maintenant requis que nous aduifissions vn petit de plus pres sur ce limbe, pour sauoir si celuy des Peres anciens, & des enfans mornez, est tout vn: ou s'il y en a deux differens, & quel est l'estat & de l'vn & de l'autre à present. Mais auant qu'entrer plus auant en ceste matiere, ie veux premier pourfuyure quelque chose, que i'ay encore à dire pour le present, sur le passage qui a esté allegué des Machabéens touchant le purgatoire, & les prieres & suffrages pour les trepassez. **E V**
 Ie desire bien cela: car tu ne m'as pas encore satisfait quant à ce point.

T H E. I'ay desia assez declairé par cy deuant, que ie sentoye du purgatoire. Quand ce liure des Machabéens, allegué par toy, seroit autant canonique que point qu'il y en ait en toute la Bible: ie ne puis encore rien voir au passage que tu en as produit, qui me semble estre de grand poids, & fort suffisant, pour le redresser & confirmer: ia soit que le liure fust authentique & digne de foy. Car combien que Iudas Machabéen auroit fait ce qui est là recité, il ne s'ensuit pas pourtant que nous soyons obligez de faire la pareille. Car les exemples particuliers d'aucuns, ne sont pas reigles generales pour tous: ainsi que desia ie l'ay touché, parlant de l'exemple de Zippora. En apres, ce tesmoignage est tout seul, & est là reci

L'insuffisance du liure des Machabéens pour prouuer purgatoire.
L'exemple de Iudas.

té, plus pour approuuer la resurrection, & pour vn publique tesmoignage de penitence, que pour induire à prier pour les trepassez, comme promettant deliurance de purgatoire à ceux pour lesquels il est offert. **E V.** Il est bien vray que le texte dit expressement, que Iudas Machabéen faisant cela, auoit vne sainte & deuote pensée de la resurrection: mais il est dit incontinent apres, que l'aduis & pensée de prier pour les trepassez, afin qu'ilz soyent deliurez des pechez, est sainte & saine.

T H E. Cela ne conclud encore rien pour le purgatoire. Car selon vostre doctrine, les ames qui sont en purgatoire, sont desia deliurées de leurs pechez. Parquoy il n'y reste plus que la peine. Et pourtant il falloit plustost dire: Vt à pœnis soluantur: c'est à dire, qu'ilz soyent deliurez des peines: que, Vt à peccatis soluantur: qu'ilz soyent deliurez des pechez. **E V.** Tu ne consideres pas, que le peché contient deux choses: c'est assauoir, la coulpe & la peine. Je confesse bien, que les vrais Chrestiens sont deliurez de la coulpe par la Foy en Iesus Christ. Mais il ne s'ensuit pas pourtant, qu'il ne leur faille encore porter la peine, & satisfaire pour icelle en purgatoire. **T H E.** Dequoy nous sert donc Iesus Christ? Et dequoy nous profite la remission de noz pechez? **E V.** Iesus Christ nous sert pour abolir le peché origi
nel

*Peine &
coulpe.*

nel & la coulpe de noz pechez, afin qu'ilz ne nous rendent coupables de damnation eternelle au iugement de Dieu : & pour mitiguer & amoindrir la peine, que nous auôs meritée.

THE. Je ne peux entendre autre chose par ton dire, sinon que Dieu est comme vn Prince, qui ayât vn malfaiteur entre les mains, à la requeste d'un sien amy, ou de l'amy du malfaiteur, feroit grace au malfaiteur, par telle condition, que s'il auoit merité d'estre bruslé, ou d'estre mis sus la roue, qu'il eut seulement la teste couppée: ou s'il auoit merité d'auoir la teste couppée, qu'on luy couppast tant seulement vne oreille, ou qu'on luy baillast tant seulement du fouet: ou qu'on l'arrançonnast de quelque somme d'argent, qu'il fust tenu de payer, encore avec sa grace. Estimerois-tu vne telle grace entiere & parfaite? Ou si tu iugerois, que le Prince eust entierement pardonné au malfaiteur? EV. N'est-ce pas bien assez, que Iesus Christ nous ait deliurez de damnation eternelle: c'est à dire, qu'il ait merité par sa mort & passion, que noz pechez ne nous puissent damner? N'est il pas bien raison, qu'apres qu'il a esteint la coulpe, nous souffrions encore quelque peine, & que nous faisons le reste, si nous voulons? ou autrement nous serions fauuez à ton bon marché. THE. As-tu peur de cela, Eusebe? Ou si tu es malcontent du bien

*Grace à
demy.*

*Demi sau-
ueur.*

que Dieu nous veut faire? Regarde quel Iesus Christ tu nous fais, & quel credit tu luy bailles enuers Dieu son Pere. S'il ne nous peut impreter grace parfaite, & pleniere remission de peine & de coulpe, il n'est point parfait Sauueur: & Dieu n'est point Dieu. Car voz docteurs mesmes tesmoignent, & nommément

Raymond

Raymond, que toutes & quantesfois que Dieu pardonne quelque chose à quelcun, il luy pardonne entierement. Car autrement Dieu n'ouureroit pas parfaitement. Surquoy ilz alleguēt ces vers:

*Gratia magna Dei, veniam non dimidiabit;
Aut nihil, aut totum propiciando dabit.*

Nous les pourrons ainsi translater:

*Dieu le pardon à demy point ne donne;
Mais tout ou rien sa grand grace pardonne.*

Cōbien que les vers sont rudes & lourdz, toutesfois la sentence en est tresbonne. E V.

Je ne le nie pas. THE. S'il n'estoit ainsi, il s'enfuyuroit à ce conte, que Iesus Christ n'auroit pas tant de puissance ne de credit, que le Pape, qui par ses bulles & pardons promet pleniere remission de peine & de coulpe. Cōcede, pour le moins, autant au pardon de Iesus Christ, que aux bulles & indulgences Papales. Garde toy aussi, Eusebe, de faire de Dieu vn tyran: qui non content de chastier & punir les rebelles & les reprouuez, ne peut pardonner à ceux qui

*Dieu com-
paré aux
tyrans.*

qui luy demandent grace, quelque requeste qu'on luy en face, qu'il ne retienne quelque racine de vengeance, sans pouuoir oublier l'injure qui luy a esté faite, qu'il n'en ait receu satisfaction & recompense, ou aux corps, ou aux biens. Le Pere celeste se contente de la rançon de son Filz Iesus Christ: pour l'amour duquel il a effacé nostre obligé, afin que noz debtes & pechez ne luy vinsent plus en memoire: ou autrement, il ne seroit pas veritable en ses promesses, qu'il nous a faites par ses Prophetes & seruiteurs. **E v.** A quel propos est il donc escrit: Que c'est chose bonne de prier pour les trepassez? **T H E.** Puis que le liure n'est point receu ny approuué pour authentique en la vraye Eglise: ce seroit grande folie de s'y arrester d'auantage, si ie ne vouloye supporter ton infirmité, & te contenter plus pleinement. Ie me deporteray d'alleguer vne coniecture vraye-semblable, que i'ay. **E v.** Mets hardiment tout enauant.

T H E. I'ay quelquefois pensé, que celle proposition de la priere pour les trepassez, qui est cōme vne cōclusion tirée de l'histoire precedente, n'y eust pas esté mise par l'auteur dudit liure: mais plustost par quelque lecteur, qui eust cela noté à la marge, & qu'il eust esté adiousté au texte: comme il est souuent aduenu en plusieurs bons auteurs. Et ne suis pas

1. Timo. 2.

1. Ican 2.

Collo. 3.

seul en ceste opinion, mais plusieurs gens fauans avec moy. Car si on examine la chose de pres, il est facile à voir, que la continuation de la narration semble estre rompue, & que celle sentence y a esté entreposée: laquelle estoit quelque annotation & consequence, qu'aucuns faisoient de ce texte: comme il aduient souuent en lisant les liures, & annotant les passages, desquelz nous nous voulons seruir. **E V.** Quelle raison as-tu pour prouuer cela? **THE.** Premièrement, ce que ie voy souuentefois les exemplaires & les copies de plusieurs liures varier: laquelle varieté est aduenue le plus souuent pour telle cause. Dauantage, ie considere qu'en ce temps la il n'estoit aucune mention de purgatoire, comme il a desia esté monstré suffisammēt. Parquoy, s'il eust fallu prier pour les trepassez, il est plus vray-semblable que la priere eust esté ordonnée à celle fin qu'ilz fussent deliurez des limbes, s'il y en eust eu quelcun, comme vous l'affirmez, que des peines de purgatoire: ou pour l'aduenement de Iesus Christ, & la resurrection de la chair.

*Prieres
pour la re
surrection.*

E V. Tu me confesses donc qu'on peut prier pour les trepassez en quelque maniere. S'il y a quelque cause raisonnable qui nous doiuent esmouuoir à prier pour les trepassez, il s'ensuit donc qu'ilz ont encore besoing de nous, & qu'ilz ne sont pas du tout à repos, & que

que noz prieres & suffrages pour eux ne sont pas vains. **THE.** Je ne t'ay pas encore accordé cela simplement : car ie ne trouue point en toute la saincte Escriture , tant du vieil que du nouueau Testament , que iamais les Patriarches, les Prophetes & les Apostres ayent institué ny ordonné qu'on fist prieres speciales ne particulieres pour les trepassez : ne pour les tirer des limbes, ne de purgatoire, ne pour la resurrection de leurs corps . Je ne veux pas nier que les saintz Peres n'ayent tous grandement desiré la venue de Iesus Christ , & que, selon leur desir, ilz n'ayent fait des affectueuses prieres & requestes à Dieu, ainsi que nous prions tous les iours, que le Royaume de Dieu aduienne : desirans en general tout ce qui appartient à l'accomplissement d'iceluy . Mais il ne s'en suit pas pourtant qu'il faille en special ordonner des prieres particulieres en l'Eglise , pour demander par le menu toutes les choses appartenantes à ce Royaume, & dependantes d'iceluy. **EV.** Pourquoi non? **THE.** Pourtant qu'en faisant telles prieres, nous ne regardons pas à nousmesmes, ny à nostre prochain, mais à la gloire de Dieu seulement : laquelle nous desirons estre exaltée & magnifiée, sans consideration de noz personnes, ne d'autres, sinon entant que nostre salut est cōioint avec la gloire & l'exaltation de son Royaume : mais non

pas en sorte qu'il soit requis d'vser d'autres manieres d'oraisōs, que celles desquelles nous auons expresse Parolle de Dieu, & les exemples des vrais seruiteurs de Dieu. Quand autrement seroit, il est impossible que Dieu l'eust omis, sans en faire expresse mention en ses saintes Escriptions: comme desia ie le t'ay suffisamment monstré par raisons tant euidentes, que nul n'y peut contredire.

E V. Tu veux donc conclurre, pour toute resolution, qu'en la Parolle de Dieu n'est point fait de mention de purgatoire, ne de prieres pour les trepassez: & que nous n'auōs besoin de prier pour eux. THE. Ie demoureray ferme en ceste sentence, iusques à ce que i'en aye trouué autorité, ou exemple en la sainte Esriture, digne d'imitation: ce que ie suis certain qu'on n'y trouuera pas: si d'auenture nous ne voulions prier pour les trepassez ainsi que Daniel, & les autres bons Prophetes, & les Princes de Iuda ont fait cōfession & prieres pour leurs pechez, & ceux de leurs peres & predecesseurs: non pas à celle fin que Dieu les pardonnast à ceux qui estoient desia trepassez: car ilz n'y pouuoient plus ny mettre, ny oster, puis qu'ilz estoient desia deuant leur iuge: mais prioyēt à celle fin que Dieu ne leur imputast à euxmesmes les pechez de leurs peres. E V. Comment les imputeroit il, veu que

*Comment
l'on peut
prier pour
les trepas-
sés.*

Dan 9.

1. Ezr. 9.

1. Neh. 7.

4. Roy. 22.

2. Par. 34.

il a dit par son Prophete, Le filz ne portera point l'iniquité du pere, mais l'ame qui aura peché, elle mourra? *THE.* Je t'accorde bien, si le pere a esté inique, & le filz se retourne de son iniquité, ne la voulant point suyure, que l'iniquité du pere ne luy pourra nuire, non plus que la iustice d'iceluy profiter, si le pere auoit esté homme de bien, & le filz meschant: mais quand le filz est imitateur de l'iniquité du pere, puis qu'il l'approuue par ses faictz, il se rend coupable, non seulement de la sienne, mais de celle de ses peres aussi, à laquelle il sou scrit, & l'augmente. Le Seigneur parle de ceux la, quand il dit, qu'il visitera & punira l'iniquité des peres sur les enfans, iusques en la tierce & quarte generation de ceux qui le haïssent. Pource, quand le Seigneur menace de punir son peuple, & qu'il rend les causes de son ire & de sa fureur: il leur reproche non seulement les pechez des viuans, mais amasse & reitere aussi tous ceux de leurs ancestres & predecesseurs. Et nostre Seigneur Iesus Christ semblablement menace les Scribes & les Pharisiens, que tout le sang innocēt, qui a esté respādu depuis celuy d'Abel, sera requis de leurs mains. Parquoy, il ne faut pas trouuer estrange, si les Prophetes & les vrais seruiteurs de Dieu ont prié pour les pechez de leurs peres & de leurs predecesseurs, en leurs confessions & oraisons;

Ezech. 18.

*Comment
l'enfant
porte l'iniquité du
pere.*

Exod. 30.

4. Roys 17

Mat. 23.
Luc. 11.

afin qu'ilz ne leur fussent pas mis en côte, pour enflammer d'auantage l'ire de Dieu sur eux.

E V. Veux-tu conclurre par cela, que Iudas Machabéen a fait le semblable? THE. L'histoire le tesmoigne assez euidemment: car il est escrit en ce mesme liure, qu'ilz trouuerent souz les robbes de ceux qui estoÿét occiz, des offrandes faites aux idoles qui estoÿét en Iamnia: desquelles la Loy defendoit prendre aux Iuifz. Parquoy, il fut fait manifeste à tous, que pour ceste cause ilz auoyent esté occiz. Ainsi, ilz benirent tous le iuste iugement de Dieu, qui auoit reuelé les choses secretes: & se tournerent à prier, & firent supplication, à ce que le peché, qui auoit esté fait, fust oublié. Car nous ne pouuons pas nier, qu'aucunefois, pour le peché d'un seul homme, Dieu ne punisse tout vn peuple: comme il appert en Acham, qui auoit maculé ses mains au pillage de Iericho. Mais Dieu, combien de fois a il puny la cruauté des peres & des predecesseurs, sur leurs succeffeurs & leurs enfans? Ne le tesmoignent pas bien claiement tant les histoires que les propheties des Amalechites, des Moabites, des Ammonites, des Madianites, des Iduméens, des Babyloniens, & des Israelites mesmes? Pour ceste cause Dauid a dit en la priere qu'il a faite contre son ennemy, qui batailloit contre Dieu, & contre sa propre conscience: L'ini-

quité

1. Mach. 12.

Acham.
Iosue 6. 7.

Psal. 109.

quité de ses peres reuienne en memoire deuant le Seigneur: le peché de sa mere ne soit point effacé. Qu'ilz soyent tousiours deuant le Seigneur, & que leur memoire perisse de la terre, pource qu'il n'a point eu memoire de faire misericorde.

EV. Ce que tu dis auroit quelque apparence, si ce passage ne faisoit notamment mention de prier, afin que les trepassez fussent deliurez de leurs pechez, comme si euxmesmes y estoient encore liez, & detenuz en iceux,

THE. Combien que les trepassez, entant qu'ilz ont desia paracheué leur cours, n'ayent plus lieu de penitence, ne de remede dequoy nous ayons certain tesmoignage en la Parolle de Dieu: neantmoins, à cause de la conionction & communication qu'ilz ont eu avec leurs familles, ou avec leurs peuples: il n'y a point de doute, que leurs pechez, qui redondent sur les autres en partie, à cause d'eux, & pour lesquels il faut que les autres souffrent, & que leurs pechez leur soyent aggrauéz, ne peussent à bon droit estre appelez leurs. Car ia soit qu'ilz en aient receu, & reçoient desia punition pour leur part: ceneâtmoins ilz ne laissent pas pour tant d'estre encore puniz en leur sang, en leur parenté & familles: comme il est aduenü à Achab & à toute sa maison.

Cōmēt les trepassés sont puniz en leurs succeurs.

EV. Les meschans ne se soucient pas

beaucoup de ce qui peut aduenir en ce monde apres leur mort. Car ilz n'en sentent rien. Parquoy, cela ne leur est point comme vne punition. THE. Si est plus que tu ne penses. Et ne la faut pas estimer petite, veu que bien souuent les peres & les parens craignent plus le deshonneur & le dommage de leurs enfans & lignage, que le leur propre : côme nous le voyons aucunesfois par experience en ceux que on mene au gibet. Ceux-cy, ia soit qu'on les face mourir sans misericorde, estiment neantmoins qu'on leur fait vne grande grace, si on leur veut ottroyer, qu'on ne laissera point leurs corps au gibet, pour crainte de deshonneur & d'infamie: laquelle toutesfois redonde plus sur leurs parens & amis, que sur eux. Mais ilz s'oublient euxmesmes : ou plustost, il leur semble qu'ilz sentent encore, & sentiront ce deshonneur, infamie & vitupere publique, qui en demourera à leurs enfans & lignage. Et ia soit qu'ilz soyent assez tormentez de leur mal, toutesfois encore sentent ilz vn grand allegemēt, s'ilz entendent que leurs enfans n'ont nul mal: & leur torment est aggraué, s'ilz entendent le contraire. Pour ceste cause les Prophetes menacent non seulement les meschans de leur propre ruine, mais leur predisent aussi celle de leurs enfans, & les malheurs qui leur aduiendront: comme il appert en la Prophetie d'E-

d'Esaie contre Babylone, & autres semblables. Esa. 13. 14.
 Mais pour obuier à tous ces maux, & pour appaiser l'ire de Dieu, enflammée sur nous, tant pour noz pechez, que pour ceux de noz peres: il n'y a suffrages, ny offrandes meilleures, que recourir à vraye penitence, & avec amendement de vie implorer sa misericorde. Voila de bons suffrages pour les trepassez, à celle fin que leurs pechez ne nous soyent contez avec les nostres. Comme qu'il en soit, en quelque maniere que tu vueilles prendre ce passage, il me suffit, pour le present, de t'auoir montré que tu ne peux prouuer ton purgatoire par iceluy, combien que le liure seroit de la sainte Escriture. Et si tu y veux adiouster quelque foy, il te peut mieux seruir pour prouuer le limbe, s'il y en auoit vn, que le purgatoire. Mais puis que Iesus Christ est venu, & que vous confessez qu'il a tiré les Peres des limbes, l'exéple de Iudas Machabéen ne peut plus auoir lieu entre vous: veu que, selon vostre doctrine, la cause est cessée.

E V. Pose le cas, qu'il n'y eust plus ne limbe ne purgatoire: ne pourrions-nous pas, pour le moins, prier pour la resurrection des mortz: & pour le second aduenement de Iesus Christ, lequel nous attendons, aussi bien que les anciens Peres ont prié pour le premier, & l'ont desiré, & soupiré apres? Priere pour la resurrection des corps & l'aduenement de Christ.

bien prier, comme i'ay desia dit, & demander à Dieu tout ce qui appartient à la perfection de son Royaume: mais de faire prieres, qui soyent appellées prieres pour les trepassez, & prier en particulier que Dieu ressuscite les corps de ceux qui sont trepassez, & que Iesus Christ vienne soudain en iugement: ie n'en ay point de commandement de Dieu, ne d'exemple en toute la sainte Escriture: mais plustost le contraire. Car quand le Seigneur respond aux ames des saintz (se plaignans de leurs persecuteurs) qu'elles attendent que le nombre de leurs freres soit accomply: il monstre assez par cela qu'il a prefix le temps, lequel ne peut estre auancé ne reculé. Et puis que la chose est toute certaine, & que nous en sommes desia tous asseurez: qu'est-il besoing d'en faire prieres particulieres?

E V. Nous sommes bien autant asseurez, que toutes choses qui doiuent aduenir, sont passées par le conseil de Dieu, & qu'il nous bail lera tout ce qui sera requis à nostre salut, & que tous les poilz de nostre teste sont contez, & qu'il n'en tombera pas vn en terre, sans sa volonté: & que son Royaume aduiendra, & sera exalté par dessus toutes creatures: mais nous ne laissons pas pourtant de prier continuellemēt, & de demander ces choses à Dieu. T H E. C'est autre chose de nous, qui sommes encore au
voya-

Apoc. 6.

Esa. 14. 40.

Matt. 10

Matt. 6.

Luc 11.

Esa. 2.

voyage, & en nostre peregrination terrestre, & de ceux qui ont desia paracheué leurs iours: auxquelz nous ne pouuons plus adiouster ne diminuer. Car cependant que nous sommes en core en la bataille, nous pouuons empirer ou amender, & auons tousiours besoing d'inuoquer l'ayde de Dieu, & pour nous & pour noz freres qui sont encore au cōbat avec nous. Et qui plus est, nous en auons commandement de Dieu, non pas qu'il ne sache mieux quē nous, Matt 6. 7.
Luc 11. ce qu'il nous faut, auant que le demandions, & qu'il n'ait bon vouloir de le nous donner: ains le fait pour noustenir en sa crainte, & nous apprendre à sanctifier son nom, & exercer nostre foy enuers luy, & nostre charité enuers le prochain, cependāt que nous luy pouuons ser uir en ceste peregrinatio mortelle. Mais apres que la victoire est gagnée, ou perdue, & que on est vne foys arriué au port, auquel il falloit venir, la cause & l'occasion n'est plus telle.

E V. Tu as dit parauant, que les espritz bien-heureux, & les Anges mesmes n'estoyent pas encore en leur gloire cōsommée. Nous ne pouuōs pas aussi nier que les corps des fideles trepassiez, ne soyēt encore detenez en la mort: veu qu'ilz sont en corruption, de laquelle ilz ne seront deliurez, iusques à leur resurrectiō, 1. Cor. 15. que la mort fera du tout abolie. Quel mal y a il donc de prier pour les trepassiez, afin que

leurs corps soyent deliurez de corruption, & qu'ilz soyent consommez en corps & en ame.
 THE. Je t'ay desia satisfait à cela, si tu fais entendre, quelle difference il y a entre les viuâs & les mortz. Et quâd il n'y auroit autre chose, sinon que l'Escripture ne nous en fait point exprés commandement, cela te doit suffire. Car s'il estoit question de subtiliser & sophistiquer en la parolle de Dieu, i'auroye bien autant de raison, de mettre en auant qu'il faut faire prieres en particulier, pour la vierge Marie, & pour tous les Prophetes, les Apostres, & les saintz & saintes de paradis: voire pour les Anges, & pour Iesus Christ mesme. N'es tu pas bien de mon aduis, Hilaire?

*Priere
pour les
saints, qui
sont en pa
radis.*

*Nouvelle
letanie.*

H I. Il n'y a point de doute. Mais il seroit requis, à ce conte, de faire quant & quant vne letanie toute nouuelle. Au lieu que les prestres chantent: Saint Michel, prie pour nous: Sainte Marie mere de Dieu, prie pour nous: Saint Pierre, prie pour nous: & ainsi consequemment des autres, il nous faudroit dire: Seigneur nous te prions pour saint Michel, pour saint Gabriel, pour sainte Marie, pour saint Pierre, pour saint Paul & pour tous les saintz & les saintes de paradis, que tu les mettes en pleine ioye, & parfaite felicité, ou que tu ressuscites leurs corps à la gloire eternelle.
 THE O. Il semble bien qu'une telle letanie seroit

roit trouuée fort nouuelle, & fort estrange, de premiere arriuée : mais toutesfois ce n'est pas chose nouuelle aux Papistes, de prier pour les saintz & pour les saintes, qui sont desia en gloire: combien qu'ilz ne s'en donnent point garde. Je ne doute point, Eusebe, que ce que ie dis, ne te semble bien loing de verité: mais toussefois il est ainsi que ie le dis, & tu ne le pourras nier, quand ie t'auray monstré de quoy.

E V. Je le voudroye bien voir. Mais ie suis certain que tu ne le me saurois monstrer. THE. Ne dist tu pas tous les iours les chapeletz, & tes Aue Maria? E V. Ouy s'il plait à Dieu. THE. Je te dis, que tu ne dis iamais Aue Maria, sans prier pour la vierge Marie. Car pour le premier, tu ne me peux nier, que cela ne soit vne salutation. E V. Il est vray. Nous l'appelons aussi la salutation angelique. THE. Tu ne peux nier, que salutation ne soit priere, par laquelle nous souhaitons le bien signifié par nostre salutation, à celuy que nous saluons: vous priez donc pour la vierge Marie. En apres, si on examine de pres la plus grand part des prieres, que les prestres font pour les trepassés, ainsi qu'elles sont escrites en leurs messels & breuiaries, on sera contrainct de confesser, que telles oraisons ne peuuent estre faites, au nom d'autres que de ceux qu'ilz inuoquent en leurs letanies, & qui sont de semblable cōdi

*Frere Chri-
stofle.
Messe de
Requiem
pour les
sainctz.*

tion. **H I.** J'ay ouy des Cordeliers, qui se moquoyent d'un frere Christofle, qui estoit de leur ordre, & de leur conuent, à cause qu'il chantoit la messe de Requiem, pour les sainctz & les saintes de paradis. Mais s'il eust feu defendre sa cause, il n'eust pas esté sans raison. Car il eust bien peu alleguer pour son guarent, le Memento des trepassez, & presque toute la messe de Requiem, & autres semblables prieres, qui ne semblent auoir esté composées à autre fin, qu'à prier pour les sainctz qui sont en repos. Ce monsieur le docteur de Sorbone, qui nous a voulu trouuer vne nouvelle maniere de prier pour les trepassez, souz l'ombre de la resurrection & de l'aduenement de Iesus Christ, luy fust venu bien à point, pour soustenir sa cause, contre les autres Cordeliers, qui se moquoyent de luy. **T H E.** Pourquoi chantoit-il la messe de Requiem, pour les sainctz? Car cōbien qu'ilz prient pour les sainctz, cōme il a esté dit, ilz le font neantmoins sans le cuider faire. Mais à ce que ie puis entēdre, cestuy cy, le faisoit tout expressement. Laquelle facon, n'est pas prinse de leur theologie.

H I. Il le faisoit, pource qu'il estoit semblable à un prestre, duquel j'ay ouy faire le conte, qui disoit, qu'il n'auoit point si grand soing de se cōfesser & de rendre conte à Dieu, des messes omises, qu'il auoit laissées à dire,
que

que de celles qu'il auoit dites. Car il n'auoit cōmis qu'une faute, en celles qui auoyent esté omises: c'est qu'il ne les auoit pas dites. Mais aux autres, il auoit commis presque autant de fautes, qu'il y auoit de motz. **T H E.** Il n'auoit pas tort. **H I.** Tu dois aussi entendre, que ce Cordelier estoit tant expert, & si bien exercité aux lettres, qu'il ne fauoit pas seulement lire entieremēt en son missel & breuiare. Parquoy il ne fauoit chāter que la messe de Requiem, encore bien mal, laquelle il auoit apprinse par cœur par grand labeur, & s'en seruoit comme d'un emplastre à toutes maladies. Car quād on luy disoit qu'il dist ou qu'il chātast vne messe de sainct François, ou de sainct Claude, ou de quelque autre sainct ou saincte, il n'auoit garde de dire, qu'il ne le fauoit faire, mais s'en alloit à sa belle messe de Requiem: & luy suffisoit qu'il eust nommé vne fois en son dernier *Fidelium defunctorum*, ou en son *Memento*, le nom du sainct, en l'honneur duquel il disoit la messe.

T H E. Il auoit meilleur droit que tous les autres. Car ainsi qu'il n'y a qu'un Baptême de Iesus Christ, & n'y a point de Baptême de sainct Pierre, de sainct Paul ne d'autre quel qu'il soit: aussi il n'y a qu'une Cene de Iesus Christ. Il n'y en a point de S. François, de S. Tibaud, de sainct Roch, & d'autres semblables.

*Vn seul
Baptême
de Iesus
Christ.*

qui sont innombrables. Or si la messe est au lieu de la Cene, il n'y en deust auoir qu'une: & ne deussions point dire, la messe de saint Paul, de saint Iaqués & des autres saintz, non plus que de la Cene, ou du Baptême. Mais pour reuenir à nostre Cordelier, sa pratique n'estoit pas du tout sans esprit. Et autant luy seruoit sa messe de Requiem toute seule, que toutes les autres seruoient à ses compagnons, veu qu'il le luy rapportoit autant de fruit.

H I. Tout vn. Qu'en dis tu Thomas? T H O. Je me ris des beaux tours que les prestres & les moynes nous ont donnez, & de leur grande asnerie. Mais dy moy qui est ce docteur, duquel tu as parlé, qui a voulu remettre au dessus, les prieres pour les trepassez? H I. C'est vn monsieur le douteux, qui est sorty de la Charboniere de Paris: i'ay cuidé dire, de la Sorbonne. T H O. Comment se nommoit-il? H I. Je le númeroye, si ie ne craignoye luy faire plaisir. T H O. Plaisir! Mais desplaisir. Car quel plaisir luy ferois-tu en le blasmat? H I. Je ne me suis pas mespris à parler. Car tu dois entendre, que le personnage, duquel ie te parle, est tant ambitieux, & conuoiteux de nom & de gloire, qu'il luy est tout-vn, moyennant qu'on parle de luy. Je croy, que s'il pouuoit obtenir cela, par quelque telle prouesse, que celle de Herostratus, qui brusta le temple de Diane Ephesien-

Caroli.

Herostratus.

sienne, pour faire parler de soy, il n'en feroit pas moins. Et pleust à Dieu, qu'il ne fust point pis que celuy la. Car Herostratus mit le feu en vn temple d'idoles, qui faisoit idolatrer toute l'Asie. Mais cestuy cy, veut faire la guerre contre le ciel comme les Geans, batailler contre Dieu, brusler son temple, & resister au saint Esprit, & à la verité qu'il a cogneue. Tu l'as bien cogneu Theophile. THEO. Je l'ay plus cogneu que ie ne voudroye. Il a tousiours bien montré en tous les lieux auxquelz il a esté, de quel esprit il estoit mené. Car il n'a iamais cherché que sa gloire. Et pourtant, Dieu l'a tousiours confondu, avec toutes ses entreprises. Dieu ait pitié de luy, s'il n'est de ceux qui pechent à la mort, pour lesquelz saint Iean a écrit, qu'il ne falloir point prier. Je ne luy pourroye bailler nom plus propre, que celuy d'Ismael, duquel la main est contre tous, & la main de tous contre luy.

*La guerre
des Geans.*

*Peché à la
mort.*

1. Iean. 5.

*Ismael. 8. 1.
Gen. 16. 21.*

1. I. P. A.

HI. Il est impossible de trouuer vne meilleure comparaïson. Car iamais il ne s'est peu accorder avec personne, entre tous ceux avec lesquelz il a vescu & conuersé, fussent comme on les nomme Euangelistes, ou Papistes: ains les a tous troublés. Parquoy ilz ont esté contrains de le chasser d'entre eux, comme vne peste, & vn turbateur d'Eglise. THEO. La vraye Eglise de Iesus Christ a esté con-

Gal. 4.

Sara &
Agar l'is-
raël.

trainte de le chasser hors de sa maison, ainsi que Sara chassa Ismael avec sa mere Agar, à cause qu'il se moquoit de son filz Isaac, en la maniere, que cestuy cy s'est tousiours moqué des vrayz enfans de Dieu. Et pourtāt, l'Eglise ne l'a peu recognoistre pour son filz legitime, mais l'a enuoyé dehors, apres sa mere Agar. Car il est plus propre à la Synagogue, qu'à l'Eglise. **II.** Que peneses-tu qui l'ait induit à proposer tant de questions curieuses, vaines & inutiles, pour troubler celle pource Eglise de Lausanne, de laquelle il s'est cuidé faire Euesque, & l'a esté par fantasie? A ce qu'il estoit desia aagé, & qu'il auoit la barbe grise, ie suis esbahy comment il ne pensoit bien, que ces subtilitez Sorboniques, ne cōuenoyēt pas à celle pource Eglise, laquelle estoit encore tant tendre, & nouvellement plantée, & encore en herbe.

3. Roy. 2.

Psalm. 139

A. 1.

THE. Ie laisse iuger du cœur à Dieu, qui le cognoit: mais à ce que i'en puis iuger par les œuvres, & par son commencement, & par sa procedure & son issue, ie ne puis entendre, qu'il l'ait fait que pour deux causes principalement. La premiere, pour complaire aux Papistes, ainsi que les Apostres de la circoncision taschoyent de plaire aux Iuifz, & les entretenir, pour euitier la croix & la persecution & pour auoir la bonne grace, & rendre les vrayz Apostres de Iesus Christ plus odieux à

Apostres de
la circoncision.

Gal. 5.

Phil. 3.

tout

tout le monde. L'autre, pour se monstrier, &
 pour acquerir le bruit, qu'il estoit vn sauât per *Vainegloi*
 sonnage, plus expert & habile, que tous les au- *re.*
 tres prescheurs: & qu'il n'y en auoit point,
 qui espluchast & entendist les saintes Escritu-
 res si profondement. Car il estoit marry, qu'il
 voyoit que les autres, qui auoyent mis leur vie
 en danger, pour la gloire de Dieu, & pour l'e-
 dification de l'Eglise, estoient en quelque
 estime, enuers les bons. Et pourtant il vouloit
 inuenter quelque nouuelle façon, propre à luy
 seul, afin qu'il ne semblast qu'il n'eust rien ap-
 porté de nouveau, ains qu'il eust apprins quel-
 que chose des autres. Pource il auoit honte de
 suyure leur chemin: & ne taschoit que d'inno-
 uer toutes choses, pour donner à entendre
 aux hommes, que tout ce que les autres auo-
 yent fait, ne valoit rien, mais qu'il estoit le
 grand reformateur des Eglises: & toute fois il
 ne se soucioit point, de reformer les mauuaises
 mœurs, qui est vne des principales parties de
 penitence, & de la predication de l'Euangile.
 Car cela estoit de trop mauuaise grace.

H I. I'ay entendu qu'il appelloit escar- *Escarmon*
 moucheurs, les bons ministres, qui pour auan- *cheurs.*
 cer l'Euangile, auoyent rompu les premieres
 glaces, & auoyent mis la teste, là ou il n'eust
 osé mettre le petit doigt. T H E. Aussi disoit-il
 bien luy-mesme, par mespris des autres, qu'il

n'estoit point de ces petiz escarmoucheurs.

7 H I. S'il m'eust dit cela, ie luy eusse respondu qu'il ne valoit donc rien en guerre, & qu'il n'estoit pas digne d'estre tenu pour bon gendarme: car il faut qu'un bon champion sache tout faire, & qu'il se trouue aux coups, & aux escarmouches & alarmes, non seulement à la retraite, & à recevoir les gages. THE. Cela aussi luy a bien esté respondu. Il auoit encore ce mal, qui estoit bien grand, c'est qu'il mesprisait la simplicité de la sainte Escriture, & l'appelloit la theologie inferieure & basse, & nous vouloit forger vne theologie metaphysique.

*Theologie
inferieure
& meta-
physique.*

H I. Il vouloit parauenture par icelle, aussi bien extraire la quinte essence des saintes Escritures, que les alchymistes des metaux. Pour le moins ie ne doute point, qu'il ne fust aduenu de sa theologie metaphysique, cōme de l'alchymie, qui a belle apparence, & promet grand cas de foy, mais elle s'en va neantmoins tousiours en fumée. Il parloit toutefois contre le purgatoire des prestres. Parquoy ie suis esbahy, de ce que i'ay ouy dire, qu'il a tasché de le redresser & reprendre par apres, là ou il a esté depuis, & nommément, en la ville de Metz, laquelle il est allé troubler, quand il a entendu, que Iesus Christ y vouloit regner. Mais ie ne fais doute, que la cuyfine ne le contraigne à cela: car autrement, le fouyer y seroit trop froid.

froid. Mais il peut aussi bien faire cela, comme il s'est marié & démarié, & a tant souuent changé & rechangé sa robbe.

THE. Nous en pourrons bien faire vntel *Euse. de*
mōstre, que Eusebe Cefarien fait du Philoso- *pra. euā. li.*
phe Archefilaus, & le cōparer à luy: duquel il *14. cap. 2.*
escrit en telles parolles: On disoit de luy, que *Archefila-*
quant aux parties de deuant, il estoit Platon: *us.*
quant aux derrieres, Pyrrhon: du milieu, Diodorus. Car il a brouillé & souillé l'eloquence Platonique, par les subtilitez & sophisteries du Philosophe Diodorus, & par les ratiocinations de Pyrrhō: & disant maintenāt cecy, maintenāt cela, il estoit facilement rollé & demené, d'icy là, de là icy, comme vn hōme ne sachant rié, & n'ayāt point d'arrest: & routeffois il sembloit, par vne ombre d'eloquence qu'il fauoit beau coup: & ne fut iamais en ce propos, qu'il dist deux foys vne mesme chose, & qu'il demourast ferme en vne opinion. Car il n'estimoit pas, qu'un homme deust estre tenu pour ingenieux, & de bon esprit, qui perseueroit en vn mesme propos & en vne mesme doctrine. Et pourrant il estoit appellé vn cauillateur, sophiste & brouillon, qui ne fauoit rien, & ne vouloit point que les autres seussent rien. Il trou- bloit chacun par ses sophisteries, & estoit comme le serpent nommé Hydra, qui auoit sept *Hydra.*
testes: mais luy les se couppoit de son propre

glaiue, contredisant à sa doctrine, niant ce qu'il auoit affermé, & ruynant ce qu'il auoit edifié parauant. **II.** Il est impossible de mieux paindre cestuy cy: s'il y a de la difference, ie pense qu'elle n'est, sinon en ce que i'estime que cest Archefilaus, estoit plus sauât aux sciences desquelles il se mesloit, que cestuy icy, qui n'eut iamais seulement vne teinture de bonnes lettres, mais tant seulement quelque apparence de sophisterie, pour deceuoir les pouures ignorans & se faire valoir entre eux. Au reste, il est comme vn Gerion, à troys corps. Il est Papisste, Euangeliste, & Lutherien. Il est sophiste, Sorbonique, & si veut estre tenu pour fidele & Chrestie, & ne se peut tenir ny aux vns ny aux autres. Hydra n'eut iamais tant de testes, qu'il a d'opinions contraires les vnes aux autres. Il n'a besoing d'autre Hercules, pour les luy copper, que de soy mesme. Car la verité que Dieu luy a cōtrainct dire, cōme aux malins espritz, est vn Hercules assez suffisant, pour conuaincre la fausse doctrine, qu'il veut maintenant soustenir.

Matt. 8.
Mar. 1.

1. Cor. 11.
Signe pour
iuger des
faux &
vrais Pro
phetes.

THE. Tu peux cognoistre par cela, l'estude de Satan, & en combien de sortes il se transfigure en Ange de lumiere: & quelle est la nature des faux Prophetes. Dieu nous recommande la foy en luy, & la charité enuers les viuans, par tous ses Prophetes & ses Apostres,

stres, sans faire mention aucune, que nous ayõs
 soing des trepassez. Le Diable au contraire,
 s'efforce de tout son pouuoir, de nous retirer
 par ses faux prophetes & apostres, de la foy,
 aux ceremonies vaines: & du soing que nous
 deuons auoir des viuans & des pources mem-
 bres de Iesus Christ, qui souffrent indigence
 aupres de nous, pour nous arrester apres les
 mortz. Ilz leur font porter à boire & à man-
 ger, & laissent mourir de faim leurs pources
 freres Chrestiens, qui sont au milieu d'eux. Ce
 miserable docteur, voyant qu'il ne pouuoit
 maintenir là ou il estoit le purgatoire des pre-
 stres, & leur rostisserie d'ames, il a voulu dres-
 ser vn purgatoire tout nouveau, pour les
 corps. Mais quand il a veu qu'il n'en pouuoit
 venir à bout, il est retourné porter du char-
 bon à celuy des prestres, pour le rechauffer.
 Enquoy il declare manifestement, quelle foy
 & conscience il a, & combien on se doit fier à
 sa doctrine.

*Nouvelle
 transfigu-
 ration de
 Satan.
 Purgatoi-
 re pour les
 corps.*

HI. Il me semble qu'il n'auoit pas moins
 d'apparence, de bastir vn purgatoire pour les
 corps, que les prestres d'en auoir edifié vn,
 pour les ames. Car s'il a quelque raison, pour
 laquelle les ames doyuent souffrir pour leurs
 pechez, apres le trepas de l'homme: il m'est
 aduis, que le corps n'en deuroit pas estre qui-
 te, ains qu'il en a meritè d'auantage, ou pour le

moins autant, à cause qu'il a esté l'occasion par sa chair, & l'instrument pour pecher, à l'ame. Parquoy, s'il semble à noz aduersaires, que Dieu feroit iniuste, comme il a esté allegué, s'il ne punissoit les ames des pecheurs en purgatoire: il ne le feroit pas moins, selon leur doctrine, s'il ne punissoit les corps pareillement, qui ont tousiours esté compagnons & instrumentz aux ames, en la plus part de tous les pechez qu'elles ont commis. Et pourtant Dieu ne punira pas seulement les ames des reprouuez en la gehenne, mais les corps aussi: ainsi qu'il glorifiera les eleuz en corps & en ame, en la resurrection des iustes.

THE. Aussi vouloit donner à entendre ce bon docteur, depuis qu'il entra en ceste resuerie, que toutes les prieres que l'Eglise faisoit au nom des trepassez, estoient pour les corps, & pour leur resurrection, non pas pour les ames. Parquoy il condamnoit les prestres & leur purgatoire: & ne trouuoit point estrange de dire qu'il falloit prier pour les saintz: pour saint Pierre, saint Paul & les autres, au sens qui a esté touché, & auquel luy le vouloit prendre. HI. Je voudroye bien entendre, dont il a pris ceste doctrine, & s'il en a esté le premier auteur, ou s'il l'a receue d'ailleurs.

THE. Ie t'en diray ce que i'en puis iuger. Quant à moy, ie ne me souuiens point que ie
aye

aye leu auteur exposant que les prieres qui se font en l'eglise Papale, pour les trepassez, eussent esté faites pour les corps, & non pour les ames: mais tout le contraire, comme la forme de ces prieres mesme le tesmoigne euidement. Car combien de foys y est faite mention expresse des ames des fideles trepassez, sans aucune mention des corps? On peut rendre beaucoup de raisons, des causes qui ont esmeu les anciens, à faire quelque commemoration des fideles trepassez: mais ie n'entreray pas maintenant en ce propos. Car cecy se pourra traiter plus proprement, en quelque autre endroit. Je parleray seulement pour le present, de l'auteur duquel il me semble, que ce venerable docteur a emprunté vne partie de ce qu'il a mis en auant, & deguisé l'autre, afin que il ne semblast rien auoir de commun avec personne, de tous ceux qui ont escrit ou parlé deuant luy, de ces matieres, mais qu'il fust estimé le plus subtil & le plus habile de tous les autres. **II.** Qui est donc cest auteur, lequel il te semble auoir suiuy de plus pres? **THE.** C'est vn Phrisien, nommé Vuesseus, autrement Basile, de la ville de Grouinge, qui a escrit contre beaucoup d'abuz & d'erreurs, qui sont en la doctrine & en l'Eglise Papale, auant qu'il fust encore mention quelcunque ny de Luther, ny d'aucun autre de ceux qui de nostre

Vuesseus.

temps ont seruy à la reformation de l'Eglise, par leurs escritz & predications. Cestuy est

*Du temps
de Vressel*

decedé de ce monde, l'an mille quatre cens octanteneuf. Il a esté pour son temps, hōme de bon fauoir, à comparaisō des sophistes & des docteurs theologastres & questionnaires: & de telle reputation, qu'on l'appelloit communement La lumiere du mōde. Aucuns de ses au-

*Ostendor-
pius.*

diteurs, nommément maistre Iean Ostendorpius, chanoine d'Auentrie, ont tesmoigné que ilz luy ont ouy dire, comme s'il eust propheti-

*Prophetie
de Vressel*

scé du tēps qui deuoit tantost suyure apres luy, que le iour viendroit en brief, que la doctrine des nouueaux & contentieux theologiens, de Thomas & de Bonaventure & autres semblables, seroit reiettée de tous vrays theologiens Chrestiens.

*Prophetie
de Iean
Hus.*

II. Sa prophetie n'a pas esté fausse, non plus que celle de Iean Hus, lequel on dit auoir predict au concile de Constance, par lequel il a esté condamné iniquement, qu'auant qu'il fust cent ou six vingtz ans passez, Dieu fusciteroit des hommes contre la Papauté, pour maintenir la verité, qui auoit esté là condamnée, en si grand nombre, que l'Antechrist ne tous les siens n'y pourroyent resister, avec tous leurs feux & fagotz. Mais ce Vresselus, en quoy a il esté semblable ou different à nostre docteur Sorbonique?

THE. Premièrement en cela qu'il a esté fort modeste, & qu'il a tousiours soumis à la Parolle de Dieu & à meilleurs iugemens, avec signe d'une grâde crainte de Dieu, ce que il a mis enauant, qui sembloit estre ou quelque peu douteux, ou different à l'opinion des autres. En apres, ce qu'il dit de la priere pour les trepassez, semble auoir trop plus de raison, que l'opinion de nostre nouveau docteur. Parquoy, il eust eu plus d'apparence de la suyure telle qu'elle estoit, que la déguiser, comme il l'a déguisée. HI. A il nié le purgatoire du tout, ou non? THE. Il ne l'a pas du tout nié: mais il l'a tellement receu & approuué, qu'il a du tout renuersé celuy des Papistes.

HI. Nous aurons donc icy derechef vn autre purgatoire tout nouveau. En faisant ainsi, Eusebe n'aura pas seulement son conte, mais trop plus qu'il ne demande. Car il se contenteroit bien, s'il pouuoit seulement defendre & retenir vn purgatoire: & nous l'en fournirons de trois, ou de quatre. THE. Il est vray: mais le purgatoire de Vvesel ne sera pas tel qu'il le demande. Car pour le premier, il ne le met point aux enfers, ny aupres d'iceux, mais en paradis. HI. Quel purgatoire sera donc cecy?

THE. La sainte Escriture met trois estatz pour toutes creatures participantes de raison: vn pour les viuans, deux pour les mortz. La ter

*Modestiede
Vvesel.*

*Nouveau
purgatoire.*

*Purgatoire
de V-
vesel.*

*Les estatz
des crea-
tures.*

re est ordonnée pour les viuans: en laquelle les bons & les mauuais sont meslez ensemble. Le ciel est assigné aux Anges, & aux éleuz de Dieu, apres ceste vie: & enfer, aux Diables & aux reprouuez: par lesquelz la separation des vns & des autres sera faite. La diuision que Vvessel fait des estatx des fideles, ne repugne pas beaucoup à ceste icy. Il met trois estatx pour les fideles: l'un en ce monde, deux en l'autre. Quant à l'estat, auquel ilz sont en ce monde, il est notoire. Car c'est l'estat commun à tous les fideles, cependant qu'ilz sont enveloppez de ce corps de peché, iusqu'à ce que Dieu les en deliure: & puis quand il les en deliure, il entend que leurs ames sont receues en paradis: lequel il fait different à celle habitation qui nous est preparée au ciel, & à celle gloire consommée, qui sera reuelée au iour de la restauration de toutes choses, & de la parfaite consommation du Regne de Christ.

Paradis de Vvessel. H I. Il entend donc par Paradis, vn estat moyen pour les fideles, entre celuy auquel nous sommes en ceste vie, & la derniere consommation de gloire & de felicité, que nous attendons. T H E. Il est vray. Et suyuant ceste opinion, il entend que les ames qui sont en ce paradis, y sont non seulement en tel estat que Adam & Eue ont esté en paradis terrestre, auant leur cheute, mais en vn estat beaucoup plus

plus parfait, principalement pour deux causes.

La premiere, pource qu'elles sont deschargées de ce corps terrien. Parquoy, l'ame ne peut estre aucunement empêchée par iceluy, ny tant aisée à corrompre. L'autre, pource qu'elle est en vn estat, auquel elle ne peut point choir, ny estre maculée par peché, ny reculer de la vertu & felicité, en laquelle elle est, mais tousiours auancer de plus en plus, iusques à sa consumatiō parfaite, en laquelle elle ne pourra plus croistre ny en cognoissance, ny en vertu, ny en beatitude. Car elle est hors du combat, & est desia en la voye, en laquelle elle commence à receuoir la couronne de victoire & de gloire, que le iuste Iuge luy a preparée, pour la victoire qu'elle a obtenue par la Foy en Iesus Christ.

*Difference
entre la fe-
licite de
Paradister
restre &
l'estat des
fideles tro-
passés.*

HI. Ce purgatoire, estant pris en ceste sorte, est donc vn purgatoire, auquel il n'y a point de peine ny de tormens, ny de feu. THE. Quant à la peine & au feu qui y est, ie t'en diray son aduis. Il n'entend point qu'il y ait autre peine, sinon d'un desir incomprehensible, qui est aux ames, de la perfection qui est en ce souuerain bien, qui est Dieu: lequel desir procede de l'amour ardent qu'elles ont enuers luy. Il entend donc, que tout le torment qu'elles ont, c'est la vehemence & violence de ce desir & amour: lequel torment est d'autant

*Purgatoi-
re sans
peine.
Feu de pur-
gatoire.*

Deut. 4.
Heb. 12.

plus grand en elles, que ce desir & cest amour sont moins parfaitz & moins ardens:& duquel elles sont d'autant mieux deliurées, que ce desir & cest amour est plus grand & plus ardent en elles. Car il entend que d'autant que ce desir & cest amour croissent d'avantage, d'autant elles sont plus coniointes avec ce souverain bien, qui est Dieu, & en ont plus grande fruition, & sont tousiours plus parfaitement purgées par la vertu d'iceluy, qui est le feu consumant, qui les purge de toutes les imperfections qui y peuvent estre, iusques à leur pleine perfection. Et parainssi il met plusieurs sortes de feu en ce purgatoire. L'un, c'est Dieu, ce feu consumant, qui les purge & parfait tousiours de plus en plus, sans aucune douleur ne torment, mais avec grand plaisir, ioye, & consolation, par son saint Esprit, & le Baptisme de feu, duquel il est autheur & ministre. L'autre, les ames fideles l'apportent avec elles. Car il entend par ce feu, ce desir & cest amour ardent, qui les brusle sans dommage, comme le feu & l'ardeur de parfait amour: qui est vn torment plaisant & delectable, sans aucun regret, sinon de ce que l'aymant ne se peut satisfaire en l'amour qu'il a enuers l'aymé, & au deuoir qu'il voudroit rendre enuers iceluy, de l'amour duquel il est englouty.

II. A ce conte, paradis terrestre a donc esté

esté à Adam & à Eue vn tel purgatoire, auant *Purgatoi-*
 qu'ilz pechassent, & l'eussent tousiours eu tel, *re de Adā*
 s'ilz n'eussent point peché, iusques à ce qu'ilz *& Eue.*
 eussent obtenu pleine victoire, & le loyer qui
 estoit proposé à leur vertu, de la felicité eter-
 nelle, qui auoit esté proposée à icelle, s'ilz euf-
 sent perseuerez en cest estat d'innocence, au-
 quel ilz auoyent esté creez. Car toute la peine
 qu'ilz eussent eu en ce paradis terrestre, n'eust
 esté qu'un passe-temps, & vn plaisir perpetuel
 pour eux; si iamais ilz n'eussent presté l'oreille
 à Satan. Dauantage, combien que les Anges
 celestes, & les ames des sainctz & des saintes,
 soyent maintenant en vn estat different à ce-
 luy d'Adam & d'Eue, en ces pointz que tu as
 touchez: touteffois il faudroit, selon ceste do-
 ctine, que ce purgatoire fust aussi bien pour
 eux tous, que pour les autres fideles, iusques a-
 pres le iour du dernier iugement.

THE. Il l'a ainsi entendu: combien qu'il
 met difference en la perfection des vns & des
 autres, & en l'accroissement de gloire & de fe-
 licité. Et pourtant il a trouué estrange beau-
 coup de pointz, en la doctrine Papale, tou-
 chant le purgatoire qu'elle propose. Le pre-
 mier c'est, que les Papistes en font vne prison,
 non pas pour purger les ames, mais pour les
 tourmenter & punir de leurs meffaitz. Car ilz
 afferment, qu'elles sont desia purgées de leurs

*La peine
ne purge
pas.*

*1. Plc. 1.
Heb. 1.*

*Rom. 3. 5.
Gal. 2. 3.
Act. 15.
Nostre pur
gation.*

Philip. 1

pechez, entant que la coulpe leur est pardon-
née, & qu'il n'y reste plus que la peine. Or il
dit, que la peine ne purge point, sinon par acci-
dent, & non pas de sa nature: mais que c'est ius-
tice & vertu, qui chassent le vice & le peché.
Il prouue cecy principalement par deux argu-
mens. Le premier est pris de la passion de Ie-
sus Christ. L'autre des tormens de Satan & des
Diables. Car iamais homme n'a tant souffert
que Iesus Christ: toutesfois il n'a pas souffert
les peines qu'il a souffertes, pour se purger soy
mesme: car il n'a point eu besoing de purgati-
on, luy qui est l'Agneau sans macule, & la pur-
gation des autres: mais il a souffert temporel-
lement, pour satisfaire à la iustice de Dieu son
Pere, pour l'offense faite par le genre humain,
qui estoit digne de punition éternelle, & pour
nous purger par sa iustice & innocence: laquel-
le nous est communiquée par la Foy en luy,
qui purifie noz cœurs. Ceste icy est propre-
ment nostre purgation, entant que nous som-
mes purifiez, non pas en souffrant ce qu'il a
souffert pour nous, mais en communiquant à
son obeissance, qu'il a declairée par sa souffre-
te, s'humiliant iusques à la mort, voire iusques
à la mort de la croix, tant honteuse, cruelle &
infame: par laquelle obeissance il a aboly no-
stre desobeissance. Car sans icelle, ce qu'il a
souffert nous eust peu profité. Car puis que la
maie-

maiesté de Dieu, qui a esté offensée, est eternalle, aussi la peine du peché commis contre icelle, doit par iuste raison estre eternelle : ou autrement elle ne seroit pas digne de la maiesté du Prince qui a esté offensé, ny correspondante à la grandeur du peché. Et pourtant elle ne peut estre moindre, sans la grace de Dieu, que de damnation eternelle. Parquoy, iamais nul n'y peut satisfaire, nō pas mesme quand il souffriroit eternellement, sinon Iesus Christ, qui par son obeissance y a pourueu. Et d'autant que ceste obeissance est plus parfaite en nous, & que nous auons plus grande communication avec Iesus Christ par icelle, & qu'elle a plus de vertu pour abolir les reliefz de ceste desobeissance & rebellion, qui est enracinée en nostre nature : d'autant nostre purgation se fait plus parfaitement. Et pourtant, Vessel dit *l'Euangile* aussi, que l'Euangile de Iesus Christ est nostre *le purgatoire.* purgatoire : veu que par le moyen d'iceluy nous paruenons à ceste purgation : & le prouue par l'autorité de Gregoire Nanzianzene, disant, que ce feu, duquel Iesus Christ a dit, *Luc 12.* Je suis venu pour mettre le feu en terre : & qu'est-ce que ie demande, sinon qu'il brusle ? cestuy est le feu de purgatoire, qui purge les ames. Il adioint à cecy ce que Iesus Christ a dit du *Mat. 3.* Baptisme du saint Esprit & du feu. Toutesfois on peut respondre à cest argument, que com-

LE TROISIEME DIALO-

*gue des enfers, appelé Le Limbe.*Theophile, Eusebe,
Hilaire, Thomas.

Theophile.

D V I S qu'en parlant du Purgatoire & du Limbe, nous auons desia fait quelque mention du sein d'Abraham, & que nous auons maintenant à disputer de la conuenance ou difference, qui peut estre entre le Limbe des peres anciens, & des enfans mornez: ie voudroye bien que tu me declairasses pour le premier, Eusebe, que tu entens proprement, par le sein d'Abraham. Car tu ne le peux entendre d'enfer, ne de lieu qui soit prochain d'iceluy, veu que Abraham a respondu au riche, qu'il y auoit si Le sein d'Abraham. Luc 16. grande distance, & vn tel gouffre, entre ceux qui estoient au sein d'Abraham, & ceux qui estoient en enfer avec le riche, qu'il estoit impossible d'aller & de passer des vns aux autres. Semblablement, si Purgatoire est pres d'enfer, il ne peut estre pres de ce sein d'Abraham. Il reste donc maintenant sauoir, si nous mettrons là mesme le limbe des enfans, ou plus arriere. Qu'en dis tu

E V. I'entens en fomme, par le sein d'Abraham, le lieu & l'estat auquel les Patriarches & les Prophetes & les autres sainctz personages estoient receuz, qui auoyent precedé l'aduenement de Iesus Christ, & qui estoient mortz en la foy d'Abraham, le pere des croyans, & en l'esperance du salut & de la benediction qu'ilz deuoyent receuoir par Iesus Christ nostre Seigneur, la vraye semence de benedictio, promise à Abraham. T H E. Tu le prens donc pour le Limbe. Mais pourquoy a il esté appellé Seind'Abrahā? E V. Je pense qu'il a esté ainsi appellé par similitude, pour ce qu'Abrahā est appellé le pere des croyans, & que les fideles qui estoient mortz en la foy d'iceluy, estoient receuz en pareil estat que luy, comme les enfans au sein de leur pere. T H E. Je ne trouue pas mauuaise ta responce. Mais puis que ainsi est, pourquoy ne vous estes vous contétez du nom que la sainte Escriture luy baille, & de ce que elle en dit? Pourquoy l'appellez vous Limbe? & ou auez vous trouué ce que vous en dites? Je voudroye bien sauoir la raison de ce nom. Je say bien que limbe signifie, selon l'usage auquel Varro & Pline l'ont quelque foys prins, ce cercle celeste que les Grecz appellent Zodiaque. Il est aussi prins communement par les Latins, pour le bord, & pour la bordure & l'orlet ou la brodure d'une robe. Je ne l'ay point

Gen. 13. 19

21.

Rom. 4.

Gal. 3.

Varro in
menipæ.Saty. prob.
in comm.
in Virg.

point leu en autre signification. Parquoy ie ne *Crinit. de*
 fay à quelle fin vous auez baillé vn tel nom à *hon. disci.*
 ce fein d'Abraham. Ie voudroye bien qu'Hi- *li. 4. c. 11.*
 laire nous dit, s'il en a leu quelque chose d'a-
 uantage. *h. i.* Ie n'en sauroye dire d'auanta-
 ge. Tu as declairé sa vraye signification, si
 nous nous en voulons rapporter au tesmoigna-
 ge de tous bōs auteurs Latins: cōme de Vir- *A Ene. 2. 4*
 gile, d'Ouide, & autres semblables, qui en v-
 sent souuent, & non pas en autre signification.
 Mais paraenture les theologiens Papistes, *Licence*
 voudroyent icy vser de leur licence accoustu- *theologale*
 mée, qui est de peruertir & corrompre toutes
 les langues, & leur bailler autre sens & signifi-
 cation: & en cōposer vne toute nouuelle, com-
 me le iargon des belistres & Ostieries, que nul
 n'entend qu'eux.

T H E. Il est bien force qu'ainsi soit: ou
 qu'ilz prennent le mot de Limbe, par meta-
 phore & similitude, pour extremité: ainsi com-
 me i'en puis iuger, tant par tes propos cy de-
 uāt tenuz, Eusebe, que par ceux de voz theolo-
 giens. Car en disputant de ces habitatiōs infer-
 nales, ilz confessent par leurs liures, qu'il est *Io. Maio.*
 incertain, lequel est plus prochain d'enfer, ou *4. sct. dist.*
 le limbe, ou purgatoire. Quant au limbe des *44. q. 1.*
 peres, ilz afferment assurement, que du temps
 qu'il estoit, il estoit situé en lieu plus haut. Tou-
 chant celuy des enfans, ilz disent, qu'apres le

iugement dernier, il fera enterre pres du des-
 sus d'icelle: & enfer sera au centre: & purga-
 toire sera alors tout vn avec enfer. **HI.** Puis
 que ces Geographes infernaux ont si bien me-
 suré & compassé ces pais bas, ie voudroye bien
 fauoir, de quelles dimensîons & mesures on vse
 en ces bas territoires, & si on y mesure les ter-
 res & les pais par coudées, aunes, toises, lieues,
 stades, côpas, degrez, ou autres semblables me-
 sures, telles que les Geometriés & les Astrono-
 miens les ont. Pour le moins, ilz sont plus habi-
 les en tel art, que onques il en fut point. Car ilz
 mesurent les pays & les regions, qui ne sont
 point, & qui ne furent iamais. Mais pour toute
 resolution, nous ne pouuons conclurre autre
 chose par leur geometrie & description, sinon
 que purgatoire & le Limbe, sont les confins ou
 la bordure, & les faux-bourgz d'enfer, ou de
 paradis. **THE.** Si le limbe des peres estoit l'un
 des faux-bourgz d'enfer, il faudroit que la vil-
 le fust bien loing du faux-bourg. Car Abra-
 ham tesmoigne clairement, comme il a desia
 esté dit, qu'il y a telle distance depuis son sein,
 lequel Eusebe prent pour le Limbe, iusques
 en enfer auquel estoit le Riche, qu'il est im-
 possible, de passer de l'un à l'autre, à cause
 de l'horrible gouffre & abyssme qui est entre
 deux. **HI.** Parauenture que nous nous pour-
 rions bien tromper, Car que fais-tu, s'ilz pro-
 non-

Fauxbourgs
 d'enfer &
 de paradis.

nōcent Limbe pour Lēbe. Car Lembe en Grec & en Latin, signifie vne petite nauire, & fort legiere: ou vn gallion. Parquoy il peut estre qu'ilz veulent entendre, que les peres anciens estoient detenuz & gardez en ce lembe, comme en vne nauire, ainsi que Noé estoit en son arche, afin qu'ilz ne tombassent aux abysses d'enfer, & ne fussent noyez aux gouffres de ces profondes riuieres, desquelles les poetes ont tant parlé. Car tout leur cas va par fictions poetiques.

Lembus.
Lembe.
Plant.in
Merca &
Bacch.
Lini. l. 3.
lcl. puni
& .1. ab.
vrb.
Gen. 7. 8.
1. pier. 3.

THE. S'ilz le prenoient en celle sorte, combien que leur erreur seroit fort different à celuy des Manichéens, toutesfois il y auroit quelque chose de semblable, touchant les nauires. Car les Manichéens mettoient principalement de deux sortes d'ames, & aussi de deux sortes de Purgatoire. Leur opinion estoit, que les ames de ceux qui n'auoyent pas vescu vertueusement en ce monde, & principalement de ceux qui n'auoyent pas bien gardé la discipline de leur secte, icelles apres auoir esté vn petit purgées, retournoient en des autres corps, non seulement d'hommes & de bestes, mais aussi des plantes, des herbes & des arbres & des choses insensibles, vne chacune selon ses demerites: & passoyēt ainsi de corps en corps, faisans en iceux leur penitēce, comme en leur Purgatoire, iusques à ce qu'elles fussent bien

Epiph. li. 2
Tom. 2.
Heref. 66.

nettes, & en l'estat auquel elles deuoyēt estre. D'autre part ilz disoyent, que quand le Filz de Dieu fut venu au monde, transformé en forme humaine, il feit vn instrument pour le salut des ames, ayant douze seaux, & vne roue pour le tourner & puiser en tournant les ames de ceux qui meurent, cōme l'eau de vn puits: lesquelles par apres le grand luminaire reçoit & les purge de ses rays; & les baille à la Lune. Et par ainsi, le plat d'icelle est remply. Ilz entēdoient par le grand luminaire, le soleil: & par le plat de la Lune, la rondeur d'icelle, laquelle croissoit & descroissoit, selō qu'elle receuoit les ames, ou qu'elle s'en deschargeoit comme vn nauire. Car ilz disoyēt, que le Soleil & la Lune estoient deux nacelles, pour passer les ames. Par quoy quād la Lune estoit pleine, elle entroyoit les ames en la region du Soleil, & se deschargeoit & allegoit en ce point de sa charge, replissant derechef sa nauire, par les seaux de cest instrument qui tousiours tournoit, & puis se vuidoit derechef, iusques à ce que les ames fussent paruenues à la colonne de gloire, par laquelle ilz entroyent en l'air parfait, lequel ilz appelloyēt aussi la colōne de lumiere. Voilà les refuterias, auxquelles les hommes tombent, quand ilz abandonent la parolle de Dieu.

¶ I. Parauenture que les Manichéens auoyent prins celle doctrine, de la philosophie de Xeno-
pha-

phanes, qui estoit d'opinion, comme Lactance *Lactan. de*
 le resmoigne, qu'il y auoit vne autre terre, au *sal. sapi-*
 creux de la Lune, & des hommes semblable- *en.li.3.ca.*
 ment, qui viuoyent là, comme nous viuōs icy. *23.*
 Dont il conclud, qu'il faut que les hommes lu-
 natiques, ayēt vne autre lune pour eux, & que
 parauenture la terre, en laquelle nous habi-
 tōs, est aussi la Lune de quelque autre peuple,
 & de quelque autre terre, qui peut estre souz
 nous. Si ainsi estoit, ce ne seroit pas de meruei-
 le s'il y a beaucoup de lunatiques par tout, &
 de gens qui tiennent de la Lune. Il dit simila-
 blement, que Seneque fait mention, qu'il s'est
 trouué quelque philosophe, entre les Stoici-
 ens, qui a esté en doute, & qui a mis en disputa-
 tion, assauoir-mon, s'il n'y auoit point aussi
 quelque peuple, & quelque autre terre, au So-
 leil. Car s'il y en a en la Lune, qui est moindre
 beaucoup, selon l'opinion des Astronomes, il
 semble bien, qu'il n'y a pas moins de raison
 d'en loger aussi des autres, au Soleil. Il n'y a
 qu'une difficulté, qui a peu donner iuste occa-
 sion à ce Stoicien, d'en douter: c'est assauoir, la
 chaleur. Car si les Astronomes & les Geogra-
 phes ont estimé inhabitable celle contrée, &
 celle partie de la terre, qu'ilz appellent la cein-
 ture rostie, ou ardente, à cause de la grande
 chaleur du Soleil, qui l'eschauffe & la bruste
 continuellement: cestuy auoit iuste occasion

de craindre, s'il assignoit l'habitation à des peuples en celle region du Soleil, qu'il ne les logeast trop chaudement. Or si ces philosophes n'ont pas trouué estrange, de loger là des peuples, viuans comme nous viuons icy : nous ne deuõs pas estre trop esbahys, si les Manichéens y ont assigné logis aux ames. Car quand tout sera bien aduisé, parauenture nous trouuerõs, que les Manichéens n'auront pas moins de raison, que les Papistes. Car autant ont de fondement en la parolle de Dieu, les vns que les autres. Parquoy ie ne say, si les Papistes auroient point plus de raison de mettre leurs Limbes au

Plutar. li. de fac. qua. r. in luna. pays de la Lune, auquel Plutarque a mis son Purgatoire, pour l'approcher plus de paradis : & leur Purgatoire, au pais du Soleil. Car il y doit faire assez chaut, pour y purger les ames, & y doit auoir du large assez, pour les esuëter, avec ce que ce feu celeste doit estre plus propre à la purgation des ames que nul autre. Et quand il leur eust pleu de leur assigner là leur logis, puis qu'ilz ne les vouloyët toutes loger ou en enfer, ou en paradis, qui sont les lieux assignez aux ames des bons & des mauuais, par la parolle de Dieu : il leur eust esté autant facile de prouuer & faire accroire l'un comme l'autre. Car s'il est question de trouuer preuues en la parolle de Dieu, ilz n'en trouuerõt pas moins pour l'une des opinions, que pour l'autre. S'il est

est question des resueries des philosophes, ilz ont des auteurs de toutes parts. Et puis que ilz n'ont point de meilleure preuue que le feu, & qu'ilz contraignent à croire à leur doctrine à force de fagotz, ilz peuuent facilement feindre tout ce qu'il leur plaira, & en attendre bõne issue. **T H E.** Tu n'as pas la plus mauuaise raison du monde.

H I. Or ie suis content qu'ilz disposent leurs logis infernaux comme il leur plaira, & qu'ilz prennent le nom de Limbe comme ilz voudront: mais quât à moy, ie m'oseroye bien faire fort de prouuer par les vieilles de nostre pays, qu'il est plus vray-semblable que le limbe, pour le moins celuy des petis enfans, doit plustost estre aux faux-bourgz de paradis, que d'enfer. Car elles tiennent pour certain, que les petis enfans, qui par faute de baptesme exterieur sont enuoyez au limbe, oyent bien de là ou ilz sont les ioyes de paradis, mais ilz ne les peuuent voir: qui leur est vn merueilleux torment. Toutesfois les bonnes vieilles ne le diroyent pas, s'il n'estoit vray: & n'en parleroyent pastant asseurément, si elles ne l'auoyent ainsi ouy prescher aux grans theologiens & docteurs. Or si depuis le limbe, les petis enfans oyent les ioyes de paradis, raison nous demontre que le limbe ne doit pas estre loing de paradis, mais qu'il y peut auoir seulement

*Limbe des
enfans.*

quelque muraille, ou quelque voile entre-deux, qui leur empesche la vëue : ou que l'on mene grand bruit en paradis : ou que les oreilles des ames sont merueilleusement aigües.

A Ene. 6. E V. Puis que les Docteurs disent qu'il est situé en lieu plus haut : ie ne doute point, qu'il n'approche de paradis. THE. Au lieu donc que Virgile met le limbe des petis enfans à l'entrée d'enfer, tu en feras l'entrée de paradis. E V. Ie ne dy pas cela : mais qu'il est aupres. THE. Puis que nous nous éloignons desia tant d'enfer, j'ay grand crainte, qu'à la fin ton limbe & ton purgatoire ne se trouuent en paradis. Et pourtant ie te demande derechef, assauoir-mon si le Sein d'Abraham estoit lieu de volupté & plaifance, ou de tristesse & d'horreur ? & si les petis enfans des Hebrieux & des Iuifz, qui mouroyent avant le huitiesme iour, qui leur estoit déterminé pour les circoncir, alloient en ce Sein d'Abraham avec les Patriarches : ou en purgatoire, ou en enfer, ou s'ilz auoyent vn autre limbe à part ? E V. Tu me proposes beaucoup de questions en vn coup, auxquelles ie ne respondray pas selon l'ordre que tu as tenu en les proposant : car ie commenceray par la dernière, puis descendray aux autres. Quant à ce que tu demâdes du salut des petis enfans Hebrieux, i'en respon comme le maistre des sentences,

tout

*Question
des enfans
Hebrieux
mortz s'as
circo'ssion.
Gene. 17.*

tout ainsi que des enfans des Chrestiens qui meurent sans baptême.

THE. Tu veux donc dire qu'ilz perissent, & les vns & les autres? Car le maistre des sentences vse de ce propre mot, disant qu'il est certain qu'ilz perissent. S'ilz perissent, ilz sont donc damnez: ce que toutesfois vous ne voulez pas confesser. Car vous mettez difference entre les damnez & eux: toutesfois vous ne les tenez pas pour enfans de Dieu. Et pourtant vous leur refusez sepulture au cimittiere. Pour ce a semblé ceste opinion du maistre des sentences trop rigoureuse aux autres Docteurs, voire aux Scholastiques mesmes, qui tesmoignent, qu'on ne le tient pas communement en ce passage, ains le prennent pour vn erreur, lequel ilz ont adioint avec les autres, qu'ilz ont amassé de ses liures.

EV. S'il entendoit qu'ilz allassent en enfer avec les damnez, ie ne voudroye pas suyure sa sentence. Mais ie croy qu'il n'entend pas qu'ilz aillent autrepars qu'au limbe. THE. Mais ce limbe ou ilz alloient, estoit-ce le mesme auquel les Patriarches estoient reclus, ou s'ilz auoyent vne autre chambre separée du logis d'iceux? EV. Je croy qu'ilz auoyent leur limbe separé de celui des autres: ou autrement ilz n'eussent point eu de peine d'auantage que les autres, qui auoyent esté circonconciz: veu qu'il

*l'Opinion
de Lôbard
maistredes
sentences.
Li. Sen.
4. dist.
1. Si vero.
dist. 4. ca.
Necessario
et ca. Fi-
lius. Chan-
de sacra.*

*In Ratio.
diui.
offr.
li. 8. R.
bri. de In-
nocent.*

n'en pouuoit encore point entrer en paradis, mais demouroyent tous arrestez au limbe: voire les enfans mesmes qui furent occiz par Herodes, qui pour le moins, pour la pluspart non seulement ont esté circonciz, mais sont aussi tenus pour martyrs, pour autant que leur sang a esté respandu pour nostre Seigneur Iesus Christ. Pour ceste cause, apres que nostre maistre Durand a proposé, en son liure, auquel il rend raison du seruice diuin, qui se fait en l'Eglise, la question pourquoy on ne chante point en la messe de la feste des Innocens, ny le Gloria in excelsis Deo, ny le Alleluia, ny les autres chantz de ioye & de liesse: il respõd que noz maistres disent, que c'est pour raison qu'ilz sont mortz deuant la passion de nostre Seigneur: & que pour ceste cause ilz sont descenduz aux enfers. Or ie ne doute point qu'ilz n'entendent par ces enfers le limbe des saintz Peres. Car quand ces enfans fussent mesmes mortz sans circoncision, encore ne pouuoient ilz estre du rang des autres morts incirconciz: veu que leur sang, qui auoit esté respandu en leur martyre, leur pouuoit seruir de circoncision: comme il sert de baptesme aux Chrestiens, selon l'opinion des docteurs. Ces raisons ne te semblent elles point bien apparentes, Thomas?

THO. Il m'est aduis que vous ne tenez point

point la promesse que vous auez faite d'un co-
 sté & d'autre, & que vous ne demourez pas
 dedans les lices, lesquelles vous auez determi-
 nées pour voz ioustes. Car vous vous estes obli-
 gez de combattre par la seule authorité de la
 Parolle de Dieu. Et toutesfois il y a desia bon-
 ne piece que ie n'ay ouy de vous sinon voz o-
 pinions & les opinions des Docteurs. Parquoy
 ie voudroye bien que vous suyussiez ce pro-
 pos: & desireroye, Eusebe, que tu prouuasses
 par les saintes Escriptions ce que tu affirmes
 des petis enfans, mort: sans circoncision & sans
 baptesme. **EV.** Penses-tu que ie parle sans e-
 scriture? Ie le te vay maintenant monstrier, &
 feray encore plus que tu ne demandes. Car ie
 les allegueray, non pas avec mes gloses & ex-
 positions: mais pour bailler plus de poids à mes
 probations, ie veux que tu oyas le tesmoigna-
 ge d'icelles par la bouche des anciens Do-
 ctours, afin que tu oyas tout en vn coup & la
 sentence des saintes Escriptions, & l'accord
 que les anciens Docteurs ont avec icelles. Et
 pour le premier ie mettray enauant Beda le *Beda.*
 venerable, parlant en ceste maniere: Celuy qui *Sent. 4.*
 maintenant crie terriblement & salutairement *dist. 1.*
 par son Euangile, Qui ne fera nay derechef de *Si vero.*
 l'eau & du saint Esprit, il n'entrera point au *Iean 3.*
 Royaume de Dieu: iceluy mesme iadis crioit
 par sa Loy, L'ame de laquelle la chair du pre- *Gen. 17.*

puce ne fera circoncise, perira de son peuple: car elle a violé mon alliance. Voila claire probation, tant pour les enfans des Iuifz, que pour ceux des Chrestiens.

T H E. Comment entens-tu celle menace contre ceux qui n'estoyent pas circonciz? Car Dieu auoit prefix huit iours de terme, pour circoncir les petis enfans. Or s'ilz mouroyent auant le huitieme iour, & le terme prescrit de Dieu: penfes-tu que le salut de ces petis enfans fust en dangier? **E V.** La Parolle de Dieu n'excepte ne petit ne grand, ains parle generalement à toute personne. **T H E.** Mais

Rom. 4.

il n'y peut auoir faute, qu'en la transgression du commandement de Dieu. Puis donc que Dieu leur auoit déterminé le huitieme iour: pourquoy deuoyent perir les petis enfans, qui mouroyent deuant ce terme? Quand Pharaon

Exo. 1. 2.

faisoit tuer les petis enfans en Egypte: penfes-tu que ceux qui estoyent surpris auant le huitieme iour, perissent par faute de circoncision? ou s'il te semble que les parens deuoyent preuenir le temps, pour euitier ce dangier? **E V.**

Nous pouuons dire de ceux-la ce qui a esté dit des enfans innocens, occiz par Herodes: car ilz ont aussi esté occiz pource qu'ilz estoyent du peuple de Dieu, lequel les infidelles persecutoyent: parquoy leur mort leur a esté pour circoncision. Et quand icelle n'eust suffi,

fit, il me semble qu'ilz eussent eu iuste occasion de se haster, & qu'il eust trop mieux valu, que mettre leurs enfans en dangier de perdre leurs ames avec leurs corps, par faute d'estre circoncz.

T H E. Ces exceptions que tu mets enauant, ne sont point en la Loy que Dieu a baillé de la circoncision, ains sont de voz inuentions. Quant à moy, quelque chose qu'il peust aduenir aux enfans deuant ce terme, puis que Dieu auoit limité le iour: ie ne doute point que ceux qui les eussent circoncz auant le iour prefix, ne fussent contreuenuz au commandement de Dieu. **E V.** Ie t'accorderoye bien cela en ceux qui eussent fait cela sans necessité, & hors le dangier de mort pour le petit enfant. Mais ie croy, que quand il y auoit dangier, ilz les circonczoyent deuant ce terme. **T H E.** Et ie croy le contraire. Car ie puis prouuer par l'Escripture ma raison, ce que tu ne peux de la tiéne. Si ainsi estoit que tu dis: il s'ensuyuroit que Dieu eust esté mal aduisé, quand il fit celle ordonnance, & que les Israelites auroient esté plus sages en cest endroit: & qu'il leur auroit fait grand tort: veu qu'il ne les auoit point aduertiz de ce faire, & qu'il n'auoit point baillé d'exception. Il s'ensuyuroit pareillement, si la circoncision eust esté tant nécessaire à salut que tu dis, que toutes les filles & femmes fussent pe

*Sent. 4.
dist. 1.
Si vero.*

ries:veu qu'elles mouroyent toutes sans circoncision: ce que toutesfois nul n'oseroit affermer, veu qu'il y a tant eu de saintes femmes, desquelles la sainte Escriture nous rend témoignage. **EV.** Il est facile de reprouuer ta consequence, principalement quant à ce que tu dis des femmes. Car en l'institution de la circoncision, il est parlé expressement des masles, non pas des femelles.

THE. Ie te confesse ce que tu dis. Mais toutesfois cest argument que ie fay des femmes me peut seruir en deux endroitz. Le premier c'est, que par cela que Dieu n'a point commandé que les femmes fussent circoncises: il a declairé manifestement, que le salut des hommes n'estoit pas aux ceremonies exterieures. Car il n'y a pas vne autre voye de salut pour les homes, & vne autre pour les femmes, mais vne mesme. Enapres, il n'y a point de doute, que Dieu n'eust ordonné vn sacrement, qui eust esté autant propre aux femmes qu'aux hommes, s'il eust fallu aller chercher son salut aux signes exterieurs. L'autre point, auquel cest argument me sert, c'est que si les femmes ont esté exemptées de la circoncision, pourtant que la Loy ne les y oblige point: aussi sont les enfans qui meurent auant le huitieme iour. Car ilz n'y sont point obligez par la Loy, auant ce terme: ou autrement, Dieu ne l'eust pasteu, plus.

plustost que des autres choses, qui n'estoyent pas de si grande importance. Mais quand le huitieme iour estoit venu, ie ne doute point, que si par contemnement, negligence & mespris, la circoncision eust esté omise, que le Seigneur n'en eust esté grandement offensé: non pas tant pour raison du signe, que pour la rebellion & le mespris de sa Parolle, lequel il prend à grand déplaisir: comme il en a monstté l'exemple en celuy qui auoit cueilly du bois au iour du repos. Il sembloit bien que cel le faute n'estoit pas grãde, ne telle que s'il eust commis vn meurtre. Et toutesfois Dieu l'a fait punir de mort cruelle, ne plus ne moins que s'il eust commis le plus grand crime du monde. **E V.** Tu veux donc conclurre, à ce que ie puis comprendre par tes parolles, que c'est autre chose d'auoir omis quelque ceremonie commandée de Dieu, par negligence, mespris & rebellion, que l'auoir laissée par necessité, & pource qu'il n'estoit possible à l'homme d'y satisfaire? **T H E.** La raison y est bien euidente. Car quand il y a empeschement, tel que l'homme ne le peut euitter, & qu'il a eu le vouloir bon, & a trauaillé tant qu'il a peu, pour le executer, ie ne croy point que Dieu impute la coulpe de la faute, à celuy auquel il n'a point tenu de rendre son deuoir, principalement en ces choses exterieures. Car le salut des homes

*Rebellion
& mespris
du commandement de
Dieu.
Nomb. 15.*

Necessité.

Rom. 4.

Gen. 15. 17.

1. Cor. 7.

giſt en l'alliance que le Seigneur a faite avec nous, par laquelle & les petis & les grans ſont receuz & coniointz en la compagnie & communion du peuple de Dieu, non pas aux ſignes exterieurs d'icelle. Nous ne nions pas cependant, que ceſte alliance ne ſoit ſignée & ſeëllée par les Sacremens, & que le Baptesme n'en ſoit le ſigne & le ſeau entre les Chreſtiens, comme la Circoncifion l'a eſté entre les Iuiſz. Mais il ne ſ'enſuit pas pourtāt, qu'elle ne ſoit aſſez ferme & certaine, ſans ce ſigne & ſeau. Parquoy, il n'y a point de doute, que ceux qui ferment le Royaume des cieux aux petis enfans, par faute du ſigne, ne leur facent grand tort, & qu'ilz ne dementent les promeſſes des Dieu, par leſquelles il les a prononcez eſtre ſiens, auant que ilz fuſſent naiz, diſant, qu'il eſt noſtre Dieu, & le Dieu de noz enfans. Ceſte promeſſe cōtient vne alliance des fideles & de leur lignée, avec Dieu, qui eſt de telle vertu, qu'à cauſe d'icelle les enfans ſont ſanctifiez, & auouez de Dieu pour ſiens, quand meſme l'un des parens, fuſt-ce pere ou mere, ſeroit infidele, pourueu que l'une des parties fuſt fidele: quand ce ne ſeroit meſme que la femme, qui n'eſt pas la principale partie. Parquoy, ce n'eſt pas vne petite benediction & grace de Dieu, d'eſtre ſeulement nay en l'Egliſe, & de parens fideles. Et pourtant ceux qui ſont ce Baptesme exterieur tant

ne-

nécessaire à salut, que sans iceluy nul ne peut estre sauué: que font-ils autre chose d'iceluy, Rom. 4.
Gen. 2. sinon vne magie, & des enchantemens magiques, attribuant aux parolles & aux elemens materielz & corruptibles, ce qui appartient à la seule vertu de Dieu, & à quoy elle suffit? Parquoy, nous pouuons bien cognoistre l'erreur & l'ignorance des docteurs Scolastiques, qui ont miste necessité à ce baptisme. Pour laquelle cause ilz ont aussi permis & estably, In lib. 4.
Sent. que les femmes pouoyent & deuoyent baptizer en temps de necessité.

E V. Cecy te semble-il digne de reprehension? THE. Je considere, que les anciens Patriarches & les saintz Prophetes, n'ont pas esté en telle superstition, touchant la Circoncision, & qu'ilz n'ont pas ignoré la vertu & l'efficace de l'alliance du Seigneur, ne les raisons par moy alleguées: ou autrement les Israelites eussent grandement failly, & principalement Moyse, qui estoit le Prophete & le conducteur du peuple de Dieu, d'auoir demouré, pour le moins, l'espace de quarante ans, depuis la sortie d'Egypte, iusques à l'entrée de la terre de Canaan, sans circoncir les enfans. Si est-il pourtant bien à croire, que ce temps-pendant il en est peu mourir plusieurs sans estre circonciz: & quand il n'en fust point mort, ne semble-il pas à bon droit, que Moyse & tous les autres Is

*Circōcisio
differēe.*

raelites, contreuenoyent à l'ordonnance de
 Dieu: veu qu'ilz ne l'executoyent pas au iour
 déterminé? **THO.** Est-il vray, qu'ilz ayent de-
 mouré tant long temps sans circoncir les en-
 fans? **THE.** S'ilz eussent esté circonciz, il ne
 feroit pas escrit, que Iosué les eust faitz circon-
 cir, apres qu'ilz furent entrez en la terre de Ca-
 naan. Ces saintz personnages nous monstrent
 bien par cest exemple comment nous deuons
 entendre la matiere des Sacremens exterieurs.
 Car combien qu'il soit escrit de la Circoncisi-
 on: Ceste est mon alliance avec voz generati-
 ons, par ordonnance perpetuelle: & que le iour
 de la bailler & receuoir ait esté limité: toutef-
 fois ilz ont bien entendu, que ce Sacrement e-
 stoit vne ceremonie publique, pour tesmoi-
 gner l'alliance de Dieu entre ce peuple, & en
 l'Eglise Iudaique, comme l'agneau paschal, &
 leurs autres Sacremens. Parquoy, quand ilz
 ont eu iuste empeschement, & qu'ilz n'ont pas
 eu le temps, le lieu, & les autres choses requi-
 ses à leurs ceremonies: ilz n'ont point fait grā-
 de conscience de les omettre, & n'ont pas esti-
 mé que leur salut en feroit en dangier pour ce-
 la, quand ilz cognoissoyent que la chose ne ve-
 noit point par leur nonchalance, & par mespris
 de Dieu. Ainsi donc qu'ilz iugeoyent les fe-
 melles sauuées par la Foy, & la Circoncision
 spirituelle & interieure, sans Circócision char-
 nelle

Iosué 7.

Gen. 17.

Rom. 4.

Exod. 13.

Salut sans
 sacremens
 exterieurs.

nelle & exterieure: aussi faisoient-ilz les masles, sachans qu'ilz estoient comprins en l'alliance de Dieu, par laquelle, de sa pure grace & misericorde, il ottroye salut à ses éleuz: lequel il baille par son saint Esprit, cōme il luy plaist, aussi bien sans Sacremens, qu'avec Sacremens.

THO. Il me semble que tu dises de bonnes raisons, mais ie n'oy point de tesmoignage des saintes Escritures de cecy.

THE. Il appert tout euidemment en *Corneille.*
 Corneille, & ceux qui estoient en sa maison, *Act. 10.*
 qui ont receu le saint Esprit, auant qu'estre baptizez de saint Pierre. Mais si n'ont-ilz pas toutesfois mesprisé le Baptisme exterieur, ia soit qu'ilz fussent desia baptizez par le saint Esprit. Car l'homme seroit bien arrogant, qui mespriseroit le Baptisme, ordonné par Iesus Christ, veu que luy mesme, qui est le Saint des saintz, qui seul peut sanctifier les pecheurs, & baptizer au saint Esprit & au feu, n'a pas voulu mespriser celuy de saint Iean Baptiste. Et Iean Baptiste, n'a il pas esté sanctifié non seulement auant sa circoncision, mais auant qu'il fust nay? Nous pouuons dire le semblable de Iacob, de Hieremie, de saint Paul, & autres semblables: lesquels Dieu dit qu'il les a consacrez à foy dés le ventre de leur mere. Et si les éleuz, tant petis que grans, qui ont esté entre les Gentilz & les Payens, ont esté sauuez sans

*Honneur
aux sacre
mens.
Daniel 9.*

Matt. 3.

Luc 1.

*Gentilz
sauués sans
circonsion.*

4. Roy. 5.
Iob 42.

Circoncision extérieure, comme il appert aux Niniuites, en Nahaman, en Iob, & autres semblables, qui ont eu cognoissance de Dieu, & ont eu leur recours à sa miséricorde : pourquoy sera nié ce mesme priuilege à ceux que il a non seulement éleuz par son election éternelle, appartenante à tous ses seruiteurs, mais aussi leur en a baillé le tesmoignage par Sacremens extérieurs, s'ilz ont telz empeschemens & excuses, & autant raisonnables que les Gentilz & les Payens pouuoient auoir ? Car les éleuz qui ont esté entre les Payens : pourquoy ne sont ilz point accusez de n'auoir pas esté circonciz, sinon pource qu'ilz n'estoyent pas en la terre, n'en l'Eglise d'Israel extérieure, & entre le peuple élu de Dieu, auquel il auoit cōmandé telles choses, & entre lequel on les pouoit obtenir ? S'ilz eussent esté entre les Israelites, & qu'ilz eussent voulu communiquer avec eux, il eust esté requis d'estre circoncis, & d'vser des mesmes Sacremens. Mais quand ilz estoyent en lieu, auquel ilz n'auoyent point ce ministère extérieur, & ne le pouoyent auoir, le Seigneur se contentoit des autres moyens, qu'il luy plaisoit leur donner. Or si telle nécessité est aduenue aux Israelites : ie ne doute point, que l'obligation de celle loy n'ait cessé, quand les causes, pour lesquelles elle auoit esté donnée, sont cessées : & que la Circoncision

spi.

spirituelle du cœur, n'ait suffit pour soy & pour l'exterieure : & les sacrifices spirituelz, pour les materielz.

THO. Il me semble que tu es d'opinion bien contraire à Eusebe. Car il met telle nécessité aux Sacremens exterieurs, qu'il iuge, que toute autre nécessité doit donner lieu à celle la. Toy au contraire, nous donnes à entendre, que souuentefois l'administration des Sacremens exterieurs a esté delayée, ou omise, à cause des necessitez humaines, & des empeschemens qui sont suruenuz aux hommes. THE. Cest exemple de la Circoncision, delayée entre les Israelites, duquel il a desia esté parlé, le nous dōne assez à entendre, si nous voulons considérer les circonstances qui y sont. Car quand ilz estoient au desert, & qu'il leur falloit tousiours estre prests de remuer leur ost, & leur mesnage, d'heure en heure, quād Dieu le leur commandoit: ilz ont bien feu iuger, que Dieu ne vouloit pas qu'ilz fussent meurtriers de leurs petis enfans: lesquelz ilz ne pouuoient circoncir, qu'ilz n'en fussent bien malades, & en dangier de mort, s'ilz n'auoyent le temps & le lieu, pour les bien penser. Nous le pouuons presumer par ce qui aduint aux Sichemites, qui furent tant malades, apres leur circoncision, qu'ilz ne se peurent defendre tous ensemble contre deux des filz de Iacob. Et pourtant

*Sichemites
Gen. 34.*

Matt. 12.
Mar. 2.
Luc 6.
Iean 7.

Moïse a bien seu considerer, que la Circoncision est faite pour l'homme, non pas l'homme pour la Circoncision, comme il escrit du Sabbat : & que le peuple aussi n'estoit pas au lieu ou il peust auoir son Eglise policée comme il appartenoit.

THO. Vous auez desia parlé longuement des enfans des Iuifz, desquelz nous n'auons plus que faire. Je voudroye que vous parlissiez de ceux des Chrestiens, qui nous atouchent de plus pres. THE. Ce que nous disons des enfans des Iuifz, nous seruira beaucoup pour cognoistre que nous deuons iuger de ceux des Chrestiens. Car si les Iuifz qui auoyent commandement tant expres de la Circoncision, ont bien eu telle dispensation & exception: mettrons-nous les Chrestiens & leurs petis enfans en pire condition que les Iuifz? Je ne me puis assez esmerueiller de la question que les Theologiens font : assauoir-mon, si on deuroit tenir vn enfant pour baptizé, qui par faute d'eau, auroit esté ietté en vn puis, en prononçant les parolles sacramentales, qui appartiennent à la substance & forme du Sacremēt? Surquoy plusieurs Canonistes & Theologiens respondent, que ouy: & disent, que cela a quelquefois esté fait. Il y en a des autres de diuerse opinion, qui ne tiennent pas vn tel enfant pour baptizé. Laquelle vous semble la meilleure?

Question
theologale
Gers. in
Flo. de Bap
tis. ca. de
trina. de
con. dist.
4. c. ad li-
mina. 30
q. 1.

H I. Si i'estoye iuge de la cause, ie condamneroye à mort, comme homicide, celuy qui auroit ainsi ietté, & tué l'enfant. Car quel fondement a vn tel homicide, en la parolle de Dieu?

T H E. Nous pouuons bien cognoistre, par telles questions, & resolutions theologales, de quel esprit proced la doctrine que tu maintiens, Eusebe, laquelle met telle necessité au baptesme exterieur, que ceux qui la soustiennent & suyuent, sont pressez iusques à meurtrir les enfans: ou pour le moins, ilz sont en doute & perplexité, ou de les tuer en ceste maniere, & les noyer, ou les laisser mourir, doutās qu'ilz ne soyent perduz & reiettez de Dieu.

Ie suis fort esbahy, comment Dieu est deuenu plus cruel, en ce temps de pleine grace & misericorde, enuers les enfans des Chrestiens, apres la manifestation de Iesus Christ son filz, qu'il n'a esté enuers les enfans des Iuifz, auant l'aduenement d'iceluy. E v. Qui est celuy, qui dit que Dieu soit plus cruel enuers les enfans des Chrestiens, qu'enuers les enfans des Iuifz?

*La cōditiō
des enfans
des Chre-
stiens.*

T H E. Toy, & ceux qui suyuent la doctrine que tu soustiens. Il est bien vray, que vous ne le dites pas ouuertement, mais vostre doctrine n'en emporte pas moins. Car quelle rigueur tiendrois Dieu, contre les petiz enfans des Chrestiens, si par faute d'auoir esté mouillez d'vn petit d'eaue, ilz estoient priuez eternal-

Epiph.
lib.2.

Tom.2.

Haref.67

lement des ioyes de paradis: Combien te semble il que ceste doctrine soit differente, à celle de l'heretique Herax, autrement nommé Hieracas, qui condamnoit à damnation eternelle; tous les petis enfans qui mouroyent deuât l'aage de discretiõ, & auât qu'ilz eussent cognoissance, & qu'ilz eussent combatu & gagné le pris, du combat qui est proposé à tous les fideles?

E V. Nous sommes bien loing de ceste heresie. Car celuy la, condamnoit generalement tous les enfans, sans en excepter aucuns. Mais nous ne cõdamnons, sinon ceux qui meurent sans baptesme. T H E. Vous estes differens à luy, en ce que vous ne tenez pas si grande rigueur à tous. Mais de l'autre costé, il semble qu'il auoit trop plus iuste raison que vous, en ce qu'il mettoit le salut des petis enfans, en la cognoissance de Dieu, & en la foy & aux œuvres: & vous la mettez en vn petit d'eau tant seulement. Car combien que ceux qui sont baptisez, sont du tout esgaux aux autres, quant au reste, excepté le baptesme: vous leur ottroyez salut, lequel vous niez aux autres, seulement pour la faute de ce peu d'eau, que les autres ont receu plus qu'eux. Or i'ay desia suffisamment prouué, que les enfans des Iuifz, n'ont point esté obligez à telle necessité: ia soit que le commandement de la circoncision, baille

ter-

terme expres: ce qui n'est point au baptesme. Enquoy donc doyuent estre plus coupables les enfans des Chrestiens, que ceux des Iuifz? S'il a pleu à Dieu, d'enuoyer à la mere, quelque aduersité ou maladie, qui ait esté cause qu'elle ait mis bas son enfant, auant le terme legitime: quelle coulpe en peut estre à l'enfant: & quelle consolation apporte vostre doctrine, à la pource mere, desia assez affligée de la main de Dieu, de luy faire accroire, que son enfant est condamné à exil perpetuel, & banny de paradis à tout iamais? & qu'il est detenu au limbe, auquel sans cesser, il maudit pere & mere? Pour le moins les caphardz l'ont presché & persuadé en ceste sorte. Je pense qu'il n'y a nul de vous, qui ne l'ait souuent ouy.

THO. Je leur ay bien ouy encore prescher d'auantage: c'est assauoir, qu'il vaudroit mieux, qu'une ville, ou vn pays, ou vn Royaume fussent abyfmez, qu'un enfant mourust sans baptesme. THE. Si l'enfant venoit en aage de discretion, & qu'il mesprisast le baptesme, ie ne voudroye point excuser son infidelité & rebellion. Ou si le pere & la mere, par leur nonchalance, mespris & infidelité ne auoyent tenu conte de faire baptiser leur enfant, ie ne les voudroye pas aussi excuser, qu'ilz ne se rendissent grandement coupables deuant Dieu, & dignes de grieve punition. Mais tou-

2. Tim. 1.

Matt. 21.

Mar. 11.

Luc 19.

tesfois ie ne voudroye pas pourtant iuger temerairement, du salut du petit enfant. Car Dieu cognoit ceux qui sont siens. Et l'homme n'a pas puissance de damner, celuy que Dieu voudra sauuer. Et s'il n'a pleu à Dieu, de faire ceste grace au pere & la mere, qu'ilz ayent peu voir leur enfant en vie, pour l'offrir & presenter à luy & à son Eglise, par le Baptesme: pour quoy vsa-t-il de telle fureur enuers ce pource enfant & les parens, qui sont desia assez desolés? Quelle iniure faites vous à Iesus Christ? Ces petiz enfans mornez, n'auroyent pas grande occasion de benir sa venue, ne de chanter avec ceux qui l'ont receu, quand il a fait son entrée en Ierusalem: Benit soit le Filz de Dauid, qui viét au nom du Seigneur. Ilz auroyent plus iuste occasion de le maudire & detester, veu qu'au lieu d'amender leur estat, il l'auroit empiré: & les auroit réduits plus miserables que n'estoyent ceux des Iuifz deuant son aduenement. Vous ne pouuez nier ceste absurdité & inconuenient, si vous voulez maintenir vostre doctrine vraye, laquelle se declaire toute contraire, à la doctrine Euangelique, qui est vne doctrine pleine de toute consolation, au lieu de laquelle, la vostre n'apporte que desolatio & desespoir, comme l'experience l'a monsté par plusieurs fois, & vous tous m'en pouuez rendre tesmoignage.

H I. J'en puis parler par experience. Car i'ay cogneu des femmes qui cheminoyent en vraye simplicité de cœur, & en grâde crainte de Dieu, qui estoÿēt tellemēt troublées en leur conscience, à cause que telz inconueniens leur estoÿēt aduenuz, & qu'elles estoÿent ainsi persuadées, qu'à peine pouuoit on trouuer moyen, pour les cōsoler, & mettre leur cōscience à repos : quelque chose qu'on leur peust dire. Cōbien qu'on leur affermoit, que nostre Dame de Lausanne, à laquelle on auoit accoustumé de porter les enfans mornez, auoit fait grace à l'enfant, & que ceux qui auoyent esté presens, leur rēdoÿent tesmoignage, du beau miracle qu'elle auoit fait, c'est assauoir d'auoir ressusci té l'enfant, pour le baptiser tout mort, puis le mettre en la fosse, tout cela neantmoins ne les pouuoit biē asseurer: & n'ont peu estre à repos en leur conscience, iusques à ce, que par la predicatiō de l'Euāgile, elles ont esté deliurées de ces fausses & caphardes opiniōs, & doctrines diaboliques. T H E. C'est cela que Satan & les faux Prophetes desirerent, que les consciences troublées & desolées. Car alors ilz font mieux leur profit. Ilz ont des hommes, ce qu'ilz veulent: & leur pesche est meilleure en eaue trouble. E V. Tu as conclud, que selon nostre doctrine, il s'ensuyuoit que Iesus Christ eust empiré l'estat des Chrestiens. Mais en quoy? Car ceux

des Iuifz n'entroyent non plus en paradis, que ceux cy.

*Cōfolatio
au sein
d'Abrahā.*

LUC 16.

THE. S'ilz alloient au Sein d'Abraham, par lequel tu entens le Limbe, il n'y auoit pas plus grande punition pour eux, que pour les autres, qui auoyent esté circonciiz: veu que tous y alloient indifferemment: comme ie t'ay suffisamment monstré. En apres ceux qui pour lors estoient au Limbe, auoyent esperance d'en estre deliurez, ce qui est denié aux pources enfans des Chrestiens. Parquoy il s'ensuyuroit que Iesus Christ seroit plus venu, pour leur annoncer & apporter l'ire & le iugement de Dieu, que sa grace & misericorde. D'auantage, ceux qui estoient au Sein d'Abraham, n'estoyent pas sans auoir quelque goust & participation des ioyes de paradis: comme il appert manifestement, par les parolles d'Abraham, respondant au Riche, en ceste maniere: Tu as eues tes voluptés & tes plaisirs au monde: parquoy il faut que tu souffres maintenant, & que la chance soit tournée. Au contraire, ce pource Lazare, a souffert & enduré de grandes tribulations & miseres. Parquoy il est maintenant conuenable, qu'il soit en repos & ioye. Tu ne peux nier, que ces parolles ne soyent vrayes. Si elles sont vrayes, il t'est force de confesser qu'il y a consolation, repos & ioye, au
Sein

Sein d'Abraham. Et comment peuuent estre ces choses hors du Royaume de Dieu, qui est, *Rom. 14.* iustice, paix & ioye au saint Esprit?

E V. Ie net'ay pas aussi accordé, que les enfans des Iuifz, mortz sans circoncision, allas sent au Limbe des peres, mais en vn autre.

T H E. Il faudra donc bien forger des Limbes. Mais ou est le tesmoignage de l'Escripture, pour prouuer cela? Et les enfans des Chrestiens vont-ilz maintenant au Limbe des peres anciens? E V. Non. H I. Il y a donc à present, chambre à loer.

T H E. Ne cognois tu pas, en quelles refueries ceste doctrine vous mene? Certes i'en ay hôte. Parquoy ie te prie, que tu te tiennes content, de ce que ie t'ay respondu: & que maintenant tu descendes à la question que ie t'ay proposée, assauoir-mon quelle difference tu metz entre le sein d'Abraham & paradis?

E V S. Ie n'ay pas deliberé de passer ta question sans y respondre. Mais tu laisses couler la principale obiection que ie t'ay faite, sans y auoir satisfait. Parquoy i'en veux auoir la resolution auant que tu m'eschappes. Cōment pouuōs nous dōc entēdre ce qu'a dit Iesus Christ: Qui ne sera derechef né de l'eau & de l'esprit, ne *Obiection.*
Iean 3. peut entrer au Royaume de Dieu. Ne monstre il pas ouuertemēt, par ces parolles, que le Bap-

*Baptisme
d'eau s'il
est necessai-
re à salut.*

Mar. 16.

tesme de l'eau est necessaire à salut: & que ce-
luy qui ne sera baptisé d'eau, ne peut entrer
au Royaume des cieux: Car il n'a pas seulemēt
dit: Qui sera rené de l'esprit, mais il y a aussi
adiousté, l'eau: pour monstrier que l'un & l'au-
tre est requis. Je cōfesse bien que l'eau ne suf-
fit pas sans l'esprit, & que le Baptisme visible,
sans foy, ne peut sauuer. Car il est dit premie-
rement: Qui croyra: puis apres il y a adiousté:
& sera baptisé, sera sauué. Mais aussi ie ne puis
entēdre, que le Baptisme de l'eau, ne soit sem-
blablement necessaire à salut. Ou ie ne say à
quoy Iesus Christ pretend par ces parolles,
qu'il a respondues à Nicodeme.

Mar. 16.

THE. Deuant que passer plus outre, note
diligemment, que nonobstant que Iesus Christ
ait dit: Qui croira & sera baptisé, sera sauué:
neantmoins, en la proposition contraire qui
sensuit, il n'a point reiteré le baptisme. Il
n'a pas dit: Qui ne croyra & ne sera baptisé
sera condamné: mais a seulement fait men-
tion de la foy & de la croyance, demon-
strant, que sans icelle, nul ne peut estre deliuré
de condamnation: ce qu'il n'a pas affirmé du
baptisme: & toutesfois il parle là du baptisme
exterieur & visible: & non pas encore de celuy
des petiz enfans, mais des grans, ausquelz les
Apostres estoient enuoyés pour prescher l'E-
uangile. Or iuge maintenant, si Iesus Christ
n'a

n'a pas requis des grans mesmes, le baptesme visible comme necessaire à salut, comment le requerroit-il des petis enfans? E V. Il me semble que tu mesprises fort les Sacremens. T H E. Ce n'est pas toutesfois mon intention ny de donner occasion à personne, par mes parolles, de les mespriser. Car tu fais desia, quelle sentence i'ay baillée, contre ceux qui les mesprisent. Mais ie veux dire, que si quelque bon personnage estoit, ou entre les Turcz, ou entre les idolatres & infideles, qui eust cognoissance del'Euangile, & vraye foy en Iesus Christ, & toutesfois il ne luy fust possible d'estre baptisé, ie ne peux croire qu'il fust damné, par faute d'un petit d'eau: puis qu'il a le principal, c'est assauoir la foy: ou autrement, l'eau auroit plus de vertu & d'efficace, que le sang de Iesus Christ: ou, pour le moins, autant. Et le prestre qui administre le Baptesme, auroit autant de puissance, que Iesus Christ mesme. Car il s'ensuyuroit, qu'ainsi que l'eau ne le ministre pareillement, ne peuuent rien sans l'esprit & le sang de Iesus Christ, que Iesus Christ aussi, son Esprit, ne son sang ne pourroyent rien, sans l'eau & le ministre. Et par ainsi, Iesus Christ & son Esprit seroyent autant subietz au ministre & à l'eau, que l'eau & le ministre à iceux: & par consequent, sa grace & sa misericorde *salut lié* seroyent liées aux elemens corruptibles, & su- *aux ele-*

mens.

iettes aux hommes. En ceste maniere, Iesus Christ ne seroit plus ne vray Dieu, ne vray Sauueur. Et par ainsi, il est bien aisé à iuger, que telle doctrine ne procede point de Dieu, veu qu'elle repugne euidentement à la grace de Dieu, à la iustification de la foy, & à l'analogie d'icelle, & renuerse totalement, le mystere de la redemption faite par Iesus Christ.

Sen. 4. dist

4. Sum.

Salut sans

baptisme

visible.

De ciuit.

d. li. 13. c. 7

De conf.

dist. 4.

Baptismi.

De vnit.

bap. li. 4.

Li. 4. de

bap. Glo.

de cōf. dist.

4 §. Bap

tismo. &

Cypria.

Baptisme

de deuotio.

Luc. 23.

E V. Vous faites les conclusions comme il vous plait, & exposez les Escritures, à vostre fantasie. T H E. Si tu crains cela, escoute sur cecy, la sentence, non seulement des anciens Docteurs, mais aussi des Scolastiques & Questionnaires, nommément du maistre des sentences, qui prouue par bonnes raisons, & par le tesmoignage des anciens Docteurs de l'Eglise, qu'aucuns sont iustifiez & sauuez sans baptisme: entre lesquelz saint Augustin comprend, tous ceux qui sont mortz, & ont souffert martyre, pour la confession de Iesus Christ. Semblablement l'autorité de Cyprien est mise en auant, par le maistre des sentences, par laquelle il tesmoigne, que la foy, la penitence & la conuersion du cœur, recompense & suffit pour baptisme, à ceux qui n'ont le temps, ne le lieu pour le receuoir, & l'appellent Baptisme de deuotion. Et pour confirmation de cecy, il y adioint l'exemple du larron & brigand, qui fut crucifié aupres de Iesus Christ: lequel, dit il,

il, n'a pas esté crucifié, pour le Nom de Christ, mais pour ses demerites & meffaitz : & n'a pas souffert pource qu'il a creu, mais en souffrant il croit. Il est d'oc declairé, en ce brigand, combien la foy vaut sans le sacrement du Baptisme visible: ce que l'Apostre dit : De cœur on croit à iustice: & de bouche on fait confession à salut. Mais adonc il s'accomplit inuisiblement, quand la necessité forcloist le Sacrement du baptisme, non pas le mespris de la religion. Il y peut auoir quelque baptisme, là ou il n'y aura point de conuersion de cœur. Et conuersion de cœur peut estre en aucuns, sans auoir receu le baptisme : mais elle ne peut estre, là ou le baptisme est mesprisé: & ne faut nullement appeller cōuersion de cœur à Dieu, quand le Sacremēt de Dieu est mesprisé. Voila le tesmoignage, lequel Gratien allegue sur ce propos au liure des Decretz, & le maistre des sentences, prins de Cyprien : & y adiouste celui de saint Ambroise, touchant l'Empereur Valentinien, qui estoit mort sans baptisme, duquel il dit : I'ay perdu celui que ie deuoye regenerer. Mais toutesfois luy n'a pas perdu la grace, laquelle il a requise. Semblablement Chanefius, qui a escrit des Sacremens en vers, combien qu'il ait esté du temps que l'ignorance & la theologie sophistique & questionnaire a esté en plus grand regne, comme il

Rom. 10.

De conf.
dist. 4. ca.
Baptismi
Sen. 4.
dist. 4.
Valētiniē.
Ambro. de
obit. Valēt

appert euidẽment par ses escritz, qui sont fort barbares, il a toutesfois estẽ de ceste mesme opinion. Car il propose pour exemple, vn Iuif, qui sera conuertý à nostre Seigneur, & courra au temple pour estre baptisẽ, mais par faute d'eauẽ & de prestre il mourra sans baptẽsme. Il cõclud qu'il sera neantmoins sauuẽ, s'il croit fermement en Iesus Christ. Or si nous deuons auoir telle confiance du salut des grans, qui ne ont peu auoir le baptẽsme: à plus forte raison nous la deuõs auoir des petiz enfans. Car s'ilz sont des eleuz de Dieu, il est bien en sa puissan ce, de les baptiser au ventre de leur mere, par son saint Esprit, & de les sanctifier, ainsi qu'il est escrit de Iacob, de Hieremie, de saint Iean Baptiste, & de saint Paul.

Gen. 25.
Mal. 1.
Rom. 10.
Hiere. 1.
Luc. 1.
Gal. 1.

E V. Cõment pourrons-nous donc sou- dre la proposition de Iesus Christ? Car elle est generale, & exclusiue, sans excepter personne. T H E. Autant en peux-ie dire, de ce qu'il a dit de sa chair & de son sang, parlant en ceste ma- niere: Vrayement ie vous dy, si vous ne man- gez la chair du Filz de l'homme, & ne beuuez son sang, vous n'aurez point la vie en vous. Ne vaut pas autant celle proposition, que s'il di- soit: Quiconque ne mangera ma chair, & ne beuura mon sang, n'aura point la vie eternelle? Nul ne peut nier cela. Il s'ensuit donc, que tous les petiz enfans sont damnez, & tous ceux qui
ne

ne communiquent pas au Sacrement de la Cene: si la doctrine Papale est vraye, c'est assavoir, que Iesus Christ soit reallement en l'hostie, & qu'il falle là manger sa chair, & boire son sang, en la maniere qu'on le nous a enseigné. Il ne sera donc pas moins necessaire, de garder des hosties consacrées, & des dieux en la boîte, pour cōmunier les petiz enfans, & de leur bailler le sacrement de l'Eucharistie; que celui du baptesme. Car les parolles de Iesus Christ ne pressent pas moins en l'vn des passages, qu'en l'autre. E v. Ce n'est pas le semblable, du baptesme & de la Cene. T H E. S'il te semble, qu'il y ait grande difference en cecy, ie te monstreray facilement, que plusieurs entre les anciens en ont iugé ainsi que ie dy: ou autrement, du temps de Charlemagne, on n'eust pas gardé l'Eucharistie, pour la donner aux petiz enfans, quand ilz estoient malades, s'ilz ne eussent estimé la chose fort necessaire. Il est toutesfois escrit au liure de Ansegisus, Abbé du Liege, que cela se faisoit en ce temps là, & recite le canon qui en fut fait. Mais encore aujourdhuy, les Iacobites appelez autrement Iacobins, & les Grecz aussi, cōme aucuns l'ont escrit, communiquent la Cene souz toutes les deux especes du pain & du vin, aux petiz enfans qui pendent encore des mammelles de leur mere. Nous lisons le semblable presques

Cene donnée aux petiz enfans.

Ansegisus

Iacobites

Grecz.

Catalo.

heret. li. 2.

Pet. Luc.

des Bohemiens & Moraniens. Toutefois, les Papistes n'approuent pas cecy, non plus que ce que saint Cyprien & Origene faisoient, qui distribuoyent la Cene aux petiz enfans, quand les peres & les meres les apportoyent en leurs bras, en venant communiquer à icelle. Et leur bailloyent non seulement le pain, mais aussi le calice. Ne trouueriez vous pas cela maintenant bien estrange entre vous, Eusebe? Car si vous ne permettez pas aux grans mesmes ny à personne quelconque, selon voz canons, de cōmuniquer à la Cene, souz les deux especes du pain & du vin, sinon aux prestres tant seulement, quand ilz disent leur messe: comment le permettriez vous aux petiz enfans? D'autre part, puis que vous avez ceste opiniō, que le pain & le vin ne sont plus ne pain ne vin, mais le corps & le sang de Iesus Christ, ie croy que ce vous seroit vn horrible scandale, de les voir toucher aux petiz enfans, qui ne sont ny confessez ny absouz, selon vostre doctrine.

E V. Il est vray. Car l'Eglise n'est pas à present de telle opinion, que ceux la estoient: & ne l'a iamais approuée, non plus qu'aucuns autres erreurs, auxquelz ces deux personnages ont quelque foys esté, principalement Origene. THE. Je ne pourroye pas aussi approuer, ceux qui bailleroient la Cene aux petiz enfans, auant le temps, auquel ilz se peuuent esprou

esprouuer eux-mesmes, comme il est requis en icelle: ce qui n'est pas dit du baptisme. Mais il apert bien, pour le moins, que ces anciens Docteurs estoient d'autre opinion, touchant la Cene, que vous n'estes: ou autremēt, ilz n'en neussent pas fait ainsi. Or si vous n'approuuez pas leur fait, pourtant qu'il ne vous semble pas conforme à la parolle de Dieu, pourquoy voulez vous que nous approuuions vostre opiniō, touchant les enfans mornez, qui a beaucoup moins d'apparence, que cela qui a esté fait par ceux là? S'il est toutesfois question de l'ancienneté, ceux la ont esté des plus anciens docteurs de l'Eglise. Car Cyprien a regné à l'enuirō de l'an deux cens cinquante, apres la mort & passion de Iesus Christ. Ces grans personnages n'eussent pas tant attribué aux sacremens, s'ilz n'eussent tant prins à la rigueur & à la lettre, les parolles de Iesus Christ. D'une semblable source est sorty l'erreur de ceux qui estimoient, que celuy qui apres auoir esté baptisé, auoit vne fois receu la Cene, ne pouoit iamais estre damné, ou, pour le moins, seroit vne fois deliuré de damnation, pource que Iesus Christ a dit: *Je suis le pain vif, qui suis descendu du ciel: Qui mangera de ce pain, viura eternellement.* Ilz pressoyent la lettre, & disoyent, que Iesus Christ ne pouoit mentir, qui auoit promis cela. Toutesfois saint Augustin reprend

Ican. 6.

Aug. lib.

21. de ciuit.

dei. c. 25.

& confute leur erreur. Voila les absurditez, auxquelles on tombe par faute de bien examiner les Escritures, & quand on les veut prendre à la rigueur de la lettre. Car qui voudra prendre à la lettre, selon l'opinion que les Papistes ont du Sacremēt de l'autel, ce que Iesus Christ dit de manger sa chair & boire son sang: il n'y a point de doute, que nous ne soyons cōtrains de confesser, que tous ceux qui ont vne foys prins la Cene, sont tous sauuez: & que tous ceux qui ne l'aurōt quelque foys receue, sont tous damnez. Et par ainsi, il ne sera pas moins requis de bailler la Cene aux petiz enfans, & donner puissance aux femmes de la leur communiquer, que le baptisme: qui voudra prendre les parolles & ces matieres à la rigueur. Et pourtant, pour reuenir au passage par toy allegué, tu peux bien cognoistre, par les absurditez qui s'ensuyuent de ton exposition, lesquelles repugnent à la grace de Iesus Christ, comme ie t'ay, monstté, qu'il ne faut par entendre ce passage, en la maniere que tu l'exposes. Car Iesus Christ ne parle point en ce lieu là du baptisme visible, ne de son institution. E v. De quoy parle-il donc? T H E. Il parle de la regeneration de l'homme: & monstre quelle chose il luy faut, pour estre Chrestien: c'est assauoir, qu'il est necessaire, qu'il renonce à sa premiere generation & natiuité qui est toute corrompue

*Regenera
tion.
Expositio
du passage
1 can 3.*

pue & maudite, & qu'il soit regeneré par l'Esprit de Dieu, & la semence incorruptible de sa Parolle: tellement qu'il soit fait nouvelle creature, portant l'image de Iesus Christ, le vray Adam celeste, ainsi qu'il a porté celle du vieil & terrestre Adam. Et pource il a dit: *Qui ne sera né d'enhaut, ou derechef, ne peut voir le Royaume de Dieu.* Et puis il s'expose par l'autre proposition suyuant, qui ne signifie autre chose que ce qu'il auoit desia dit parauant. Car naistre d'enhaut, ou naistre derechef, & naistre de l'eau & de l'Esprit, sont manieres de parler equiuales: & les deux propositions de Iesus Christ, sont equipolentes l'une à l'autre: & n'y a autre difference, sinon que la derniere est plus ample, & expose la premiere. Car puis que nostre premiere natiuité est charnelle, il faut que la seconde soit spirituelle. Puis que le premier homme de la terre est terrien: il est requis que le second, qui est du ciel, soit celeste & spirituel. Or ceste regeneration & transformation ne se peut faire que par l'Esprit de Dieu. Car comme il est escrit en ce mesme lieu: *Ce qui est né de la chair, est chair. Ce qui est né de l'Esprit, est Esprit.* Et pourtant, Iesus Christ voulant exposer à Nicodeme ce qu'il auoit dit parauant: *Qui ne sera né d'enhaut, & derechef, ne peut voir le Royaume de Dieu:* dit parapres, *Qui ne sera né de l'eau &*

1. Pier. 1.
2. Cor. 3. 5.
1. Cor. 15.

Iean 3.

*Renaistre
d'eau.*

1. Cor. 15.

Iean 3.

de l'Esprit: à cause que l'Esprit, autheur de ceste regeneration, est donné d'en haut: qui ouure vne seconde natiuité en nous, qui est celeste & spirituelle.

E V. Mais qu'estoit-il besoing d'y adiouster l'eau? Ne suffisoit-il pas de nommer l'Esprit? T H E. Pourquoy a dit saint Iean Baptiste, parlant du ministration de Iesus Christ, qu'il baptizeroit au S. Esprit & au feu? Quel besoin estoit-il; puis qu'il auoit nommé l'Esprit, d'y adiouster le feu? Sera-il pourtant necessaire de constituer vn Baptisme de feu, ainsi que l'on dit qu'aucuns l'ont fait, & le font encore aujourdhuy? Saint Augustin tesmoigne, que Seleucus & Hermias heretiques, qui estoient Galatiens, ne baptizoyent point d'eau. Il ne dit point de quoy ilz baptizoyent: mais les autres disent qu'ilz baptizoyent de feu. Nous lisons pareillement, que les Iacobites & Iacobins vsent de feu en la circoncision de leurs enfans, les marquans d'iceluy ou au front, ou en la ioue. On dit aussi que les Indiens & les Ethiopiens & les Persiens, qui se tiennent pour Chrestiens, vsent encore aujourdhuy de feu, au lieu d'eau, en leur baptisme. Il n'y a point de doute, que cest erreur ne soit nay de la faulse intelligence des parolles de Iesus Christ. Toutesfois il semble qu'ilz ayent grand couleur: car si Iean Baptiste baptize d'eau, com-
me

Baptiser
au saint
Esprit &
au feu.
Matth. 3.

Augu. lib.
de heres.
ca. 59.
Alfons. de
her. li. 2.
Bernard. Lu
ceb. catal.
bare. li. 2.

me luymesme le tesmoigne: & Iesus Christ du sainct Esprit & du feu: ne semble-il pas bien qu'ilz ayēt bien iuste occasion d'aymer mieux estre baptizez du Baptisme de Iesus Christ Filz de Dieu immortel, que de celuy de Iean qui est homme mortel? *EV.* Ilz auroyent bien raison, s'il falloit prendre ces parolles au sens qu'ilz les prennent. Mais on voit bien là, que sainct Iean prend le feu par metaphore: & qu'il n'entend autre chose par le feu, que le sainct Esprit, duquel il auoit desia parlé: & que il fait cela pour mieux exposer la nature d'ice-luy. Car comme le feu est pur & net, & ne peut *Le S. Es-* souffrir aucune macule ne fouilleure: aussi le *prit feu.* sainct Esprit purge, nettoye & illumine les consciences, & les enflamme à l'amour de Dieu. Pour laquelle cause il a esté enuoyé aux Apostres en espee de lāgues de feu. Ce que sainct Iean preuoyoit & predisoit, vſant de telles parolles.

THE. Ton exposition me plaist bien. Parquoy, si tu ne fais pas difficulté de prendre en ce passage le feu, pour l'Esprit de Dieu, & pour plus ample exposition de sa nature & de ses proprietéz: pourquoy dois-tu faire difficulté, de prendre l'eau en cest endroit, pour celle mesme signification: veu la conuenance que l'eau a avec la nature du sainct Esprit? Car il n'y a pas moins de raison: mais beaucoup plus

Le S. Es-
prit eue.

Psal. 50.

Heb. 6.

d'apparence . Car saint Iean met l'Esprit premier:& puis le feu apres. Parquoy, il semble, ou qu'il entend deux choses separees : ou qu'il expose la chose plus claire, par vne plus obscure. Combien que ta responce satisfait suffisamment à ceste obiection . Mais en ce passage, Iesus Christ met l'eue premiere:& puis, comme s'il vouloit exposer sa metaphore & comparer son, & luy donner plus grande clarté, il declaire ce qu'il veut signifier par celle eue : c'est assauoir le S. Esprit : auquel il baille ce nom, pour beaucoup de causes . La premiere, pour ce qu'ainsi que le feu est vn element merueilleusement pur & net, & tant necessaire à la vie humaine, qu'il est impossible aux hommes de s'en pouuoir passer: ainsi est il de l'eue, laquelle est aussi de nature claire, pure & nette, & bien propre pour représenter celle du saint Esprit. Car il laue, purifie, arrose & rafraischit les cœurs & les consciences, pour les consoler, & leur faire porter fruit plaisant à Dieu : en la mesme sorte que l'eue fait fructifier la terre, & la renouelle, & rend fertile, & laue les ordures du corps. Il esteint semblablement le feu & l'ardeur des mauuaises cōcupiscences charnelles, comme l'eue esteint le feu, & esteint la soif & l'alteration des pures ames angoissées, & les rassasie à tout iamais. La seconde cause est, qu'il nous a voulu ouurir l'intelligence
des

des ceremonies, Baptesmes, & purifications
 contenues en la Loy de Moyse, & des prophe-
 ties semblablement, par lesquelles le saint E-
 sprit a esté promis, principalement par Esaie & ^{Esa. 44.}
 Ezechiel: auxquelles il a fait allusion, & a eu le ^{Ezech. 36.}
 regard. Pourtant il les nous a voulu exposer,
 & nous donner à entendre, que ces eaues pro-
 mises de Dieu, ne signifioient autre chose,
 que l'abondance du saint Esprit, qui deuoit e-
 stre espandu sur toute chair, ainsi qu'une riuie-
 re & un deluge d'eau, qui découle & débor-
 de sur toute la terre. Ce que saint Pierre tes-
 moigne auoir esté accompli & en luy & aux ^{Act. 2.}
 autres disciples de Iesus Christ, le iour de la
 Pentecoste, selon la prophetie de Ioel. Et pour ^{Ioel 2.}
 ce Iesus Christ a voulu tant en ce passage, que
 en parlant à la Samaritaine, & conuiant ceux ^{Ican 4. 7.}
 qui estoient au Temple, de venir boire ces
 eaues viuifiantes, vser de ces manieres de par-
 ler: & pour nous declarer pareillement à quel-
 le fin il a institué le signe de l'eau au Baptes-
 me. Et qu'il soit vray, i'en pren saint Ican en ^{Ican 7.}
 tesmoing: qui exposant les parolles de son Mai-
 stre, dit, qu'il entendoit par ces eaues le saint
 Esprit, lequel les croyans deuoyent receuoir.
 Tiercemēt, par ceste forme de parler figurée,
 il nous enseigne semblablement quel doit e-
 stre l'homme Chrestien, regeneré par le saint
 Esprit: opposant l'eau & le vêt, qui sont corps

plus subtilz, plus minces, deliez, clairs, & purs, à la terre, qui est vn element plus pesant, impur, gros & materiel. Ces parolles donc signifient autant que s'il disoit, qu'au lieu de cest homme pesant, terrestre, charnel & corruptible, il faut estre regeneré en vn homme nouveau, celeste, spirituel & parfait: autant different à cestuy, qui est terrestre & caduque, que l'eau & le vent sont differens à la terre: & qu'il faut que cecy soit fait par le saint Esprit, qui est la vraye eau, qui fait ceste purgation en nous.

E V. Ton exposition n'est pas sans belle apparence. Mais la doy-ie plustost receuoir, que celle des Docteurs anciens, qui en ce passage ont entendu par l'eau, le Baptême qui est donné par l'eau: & singulierement saint

*In 1o. cap.
1. Hô. 24.*

IEAN Chrysostome? THE. Je suis trop content de magnifier avec les Anciens les Sacremens, tant qu'il sera possible: pourueu que tu les vueilles entendre, ainsi qu'euxmesmes ont voulu estre entenduz. Car combien que ie receuray l'expositiō de Chrysostome: il ne s'enfuit pas pourtant, qu'on puisse conclurre par icelle, l'element de l'eau estre tellement neces-

*Le stile de
l'Ecriture
& des an-
ciens do-
cteurs tou-
chant les
Sacremens.*

saire à salut, que sans icelle, l'homme ne le puisse obtenir. Car il faut considerer, que quand l'Ecriture & les anciens Docteurs parlent des Sacremens, ilz ne regardent pas seulement au signe exterieur, ains s'arrestent principalemēt à la

à la chose signifiée par iceux, laquelle ilz entendent proprement. Et pourtant, fuyuant leur intelligence, nous pourrions exposer ces parolles en tel sens, comme si Iesus Christ disoit: Celuy qui ne lauera ses pechez, qui ne receura vrayement le saint Esprit, & ne sera receu en mon Eglise, & en mon troupeau, en la maniere que i'ay ordonné qu'il se fist par le Baptisme, n'entrera point au Royaume de Dieu. Il ne s'ensuit pas pourtant, que celuy qui aura icy toutes les choses comprises & signifiées par le Baptisme, doieue estre reietté de Dieu, s'il ne luy a fallu que l'eau.

E V. Qui voudra receuoir voz gloses, vous ne perdrez iamais point de cause. THE. Tu ne fais dire que cela. Parquoy, pour te mieux contenter, ie te veux encore monstrier euidentement, que non seulement les Docteurs anciens, mais aussi les Scolastiques & Questionnaires conferment ma sentence. Car le maistre des sentences, ayant esmeu la mesme question, que tu as proposée, touchant ces parolles de Iesus Christ: respond, que ce passage se doit entendre de ceux qui peuuent estre baptizez, & n'en tiennent conte: ou qu'on le peut ainsi exposer: Celuy qui ne sera regeneré de l'eau & du saint Esprit, c'est à dire de celle regeneration qui se fait par l'eau & le saint Esprit, ne sera point sauué. Or celle regeneration ne se

*Sent. 4.
dist. 4.*

*His autē.
Expositiō
des scola-
stiques sur
le passage
du 3. c. de
S. Iean.*

fait point seulement par le Baptême, mais aussi par penitence, & par le sang. Voyla les propres parolles du maistre des sentences, qui entend par le sang, celuy qui est respendu des Martyrs, pour le tesmoignage de verité. Car voz Docteurs mesmes, sentans les absurditez & inconueniens qui s'ensuyroyent, si on vouloit entendre ce passage de Iesus Christ du Baptême exterieur, & le prendre à la rigueur, ont esté contrains de dire, qu'il y auoit trois sortes de Baptême: c'est assauoir, de l'eau: du saint Esprit: & du sang: par laquelle diuision, ilz confessent ouuertement, qu'il y a quelque autre Baptême, que celuy de l'eau, par lequel l'homme peut estre sauué. Il y a le Baptême de l'Esprit & de Foy, qui peut estre sans celuy de l'eau. Surquoy le maistre des sentences allegue Augustin, disant: Tu demandes quel est plus grand, ou la Foy, ou l'eau? Je ne doute point, que tu ne respondes, La Foy. Si donc ce qui est moindre peut sanctifier, ne le fera pas mieux ce qui est plus grand, c'est assauoir la Foy? de laquelle Christ a dit, Qui croira en moy, encore qu'il sera mort, il viura.

E v. Saint Augustin toutesfois conclud des parolles de Iesus Christ, que nul ne peut paruenir à la vie eternelle sans le Sacrement du Baptême: sinõ ceux qui respādent leur sang pour verité en l'Eglise. Mais, qui plus est, il dit: Nous

Trois sortes de baptême.

De cons. dist. 4. ca

Baptisf.

Glos. ff.

Bap.

Sect. 4. dist

4. His autem.

Aug. de vni. bapt.

Iean ii.

Obiection de la nécessité du baptême.

Aug. ad Fortuna.

ne

ne croyons point, que nul Catechumene ait la vie eternelle, combien qu'il sera mort en bonnes œuures, s'il n'a esté baptizé ou martyrisé. Vous sauez bien qu'en l'Eglise ancienne, ceux qui auoyent receu l'Euangile, & n'estoyent pas encore baptizez, estoyent appelez Catechumenes, à cause qu'on les instruisoit en la Foy. Et suyuant ce propos mesme, il dit encore; Nous croyons, qu'il n'y a chemin de salut, que pour les baptizez.

De cons. dist. 4. ca. Catechumenum. Catechumenes.

T H E. Je croy que tu n'ignores pas comment voz Docteurs mesmes respondent à ce passage: entre lesquels Holtcot repugne à S. Augustin, disant, que son exception n'est pas suffisante, & que l'homme qui cognoit Iesus Christ, peut estre sauué sans Baptisme, par autre moyen, que par martyre. Mais, qui plus est, il afferme, que l'homme qui se croiroit parfaitement estre baptizé, & ne le seroit toutesfois pas, seroit hors de tout dangier de damnation: & dit, que celle Foy luy seruiroit à salut, combien qu'elle seroit fondée sur fausseté. Mais qui est-ce de nous, qui soit parfaitement assuré s'il est baptizé, ou non? Qu'en pouuons nous sauoir que par le tesmoignage d'autrui? Pourtant, le maistre des sentences respond sur les obiections faites par toy, qu'il faut entendre les parolles de saint Augustin selon la declaration qu'il en a baillée en des autres lieux,

Holtcot. Sent. 4. dist. 4. q. 1. cas. 10. Lud. vi. ual. in aur. ope. de veri. contr. in 1. prece.

Sect. 4. dist. 4. H. hautem. Solution.

auxquelz il traite ceste matiere plus ample-
 ment. Et pource qu'il faut entendre ces
 choses de ceux qui ont eu le temps pour se fai-
 re baptizer, & ne l'ont point fait. Car si aucun
 ayant Foy & charité, veut estre baptizé, & ne
 peut, estant surprins de necessité: la benignité
 de Dieu tout puissant, recompense ce qui a def-
 failly au Sacrement. Car quand il peut payer,
 s'il ne paye, il demeure obligé: mais quand des-
 ia il ne peut, & toutesfois il a bon vouloir de
 le faire, Dieu qui n'a point lié sa puissance aux
 Sacremens, ne luy impute pas. Iet'ay allegué
 les propres parolles, ainsi qu'elles sont escrites
 au liure du maistre des sentences: qui prouue
 encore par sainct Augustin, que la sanctificati-
 on inuisible a esté en aucuns, & leur a profité
 sans les Sacremens visibles, disant en ceste ma-
 niere: La sanctification visible, laquelle se fait
 par le Sacrement visible, peut estre sans l'inui-
 sible: mais elle ne peut profiter. Si ne faut il pas
 toutesfois contemner & dépriser le Sacrement
 visible: Car le contempteur d'iceluy ne peut es-
 tre sanctifié inuisiblement. Et nonobstant que
 Holteot approuue ce que les autres ont escrit
 du Baptisme de sang: il declare neantmoins
 assez suffisamment, que celuy qui sans estre ba-
 ptizé, respand son sang pour le Nom de Iesus,
 n'est pas baptizé par ce sang qui a esté respan-
 du: mais que l'Eglise le tient pour baptizé, à
 cause

*Salut sans
 baptisme.
 Aug. li. de
 fid. ad Pet.
 & in ec-
 cle. dogm.
 ca. 44.*

*Aug. in Le-
 uit. q. 88.*

*Sent. 4.
 dist. 4. q.
 1. cas. 10.
 Baptisme
 de sang.*

cause que par iceluy il a suffisamment tesmoigné, qu'il n'a point mesprisé le Baptisme, ains qu'il l'eust volontiers receu, s'il luy eust esté possible: veu qu'il a monstre vne telle Foy en l'Euangile de Iesus Christ. Gerson, qui a esté au Concile de Constance, & des plus raisonnables Docteurs, que la Sorbonne ait eu de long temps, n'a pas aussi iugé, que ceux eussent mauuaise opinion, qui estimoyent qu'un enfant, qui mourroit sans baptesme, sans la coulpe de ses parens, seroit exempté des peines eternelles: ains que nous deuions esperer cela de la misericorde de Dieu.

É V. Je t'accorde bien ce que tu dis, quant aux hommes d'age, auxquels la Foy & la penitence recompensent la faute du Baptisme. Mais c'est autre chose des petis enfans. Car puis qu'il n'y a point de Foy ne de penitence en eux, ilz ne peuuent estre sauuez sans le Baptisme. Pource le maistre des sentences dit, que ceux qui meurent sans Baptisme, voire quand on les porte baptizer, seront damnez: & le prouue par saint Augustin, disant: Tien ce-cy fermement, & ne doute aucunement, que non seulement les hommes vsans desia de raison, mais aussi les petis enfans, qui commencēt à viure au ventre de leurs meres, & meurent là sans le Sacrement du saint Baptisme, qui est donné au Nom du Pere, & du Filz, & du

*La senten-
ce de S. Au-
gustin tou-
chant les
enfans
morts s'as-
baptisme.
Li. de fid.
ad Petr.
dia.*

De cons,
dist. 4. ca.
Firmist-
me,

sainct Esprit: ou ceux qui sans iceluy passent de ce monde, apres qu'ilz sont naiz, seront puniz du feu eternel. Car combien qu'ilz n'ayent point eu de peché par leur propre acte & œuure, si ont ilz toutesfois tiré par leur conception & natiuité, la damnation du peché originel. Puis donc que sainct Augustin est de telle opinion avec le maistre des sentences, ie m'ayme mieux arrester à eux, qu'à Gerson & à point d'autre; si d'auenture Gerson n'entendoit les peines d'enfer, par les peines eternelles: comme ie pense qu'il l'entend. Et parainisi il ne fera pas different aux autres Docteurs.

*Le limbe
des enfans
ruiné,*

THE. Tourne-toy de tel costé que tu voudras: car en cuidant maintenir le limbe des petis enfans, tu l'as abbatu, sans t'en prendre garde. Car quiconque soit autheur de ce liure, duquel tu as allegué, souz le tître de S. Augustin, ce que tu as maintenant dit: si ces parolles sont vrayes, selon le sens que tu leur donnes, les petis enfans, mourans sans baptesme, sont tous damnez, & puniz au feu eternel. Ilz sont donc en enfer. Parquoy, il n'est ia besoin de leur forger vn limbe. Et parainsi, non seulement la sentence de Gerson, mais aussi celle de tous voz Docteurs, touchant ceste matiere, sera renuersée: qui s'accordent tellement les vns avec les autres, qu'il est impossible de rien conclure de certain de leur doctrine. Tu as allegué

gué la sentence de saint Augustin & du maître des sentences. Les autres Docteurs, considerans la rigueur qu'elle tenoit aux petis enfans, ont esté d'autre aduis: pourtant qu'elle leur sembloit trop rigoureuse & cruelle: en sorte qu'autuns, pour ceste cause, ont appelé S. Augustin, le borreau des petis enfans: combien qu'il soit bien digne qu'on parle de luy plus reueremment. Car pour le premier, il n'est pas bien certain, que ce liure, duquel celle sentence a esté prise, soit de saint Augustin. Borreau
d'enfans.

Quelle occasion as-tu d'en douter? E V. THE.
Tresiuſte: car le ſtile de ce liure. ne reſſemble point à celuy duquel ſaint Augustin a vſé aux liures, deſquelz on le tient vrayement pour au-
theur: Car ce ſaint Docteur eſcrit touſiours en grande modeſtie des choſes appartenantes à l'Egliſe: & n'a point de couſtume d'aſſermer temerairement choſe quelconque, de laquelle il n'ait certain & euident teſmoignage: ce qui n'eſt point bien gardé en ce liure icy. Car quel paſſage allegue-il des ſainctes Eſcritures, pour prouuer celle ſentence qu'il baille contre les petis enfans? Toutesfois il dit, Tien cecy fermement: & non ſeulement en ce paſſage, mais auſſi en tant d'autres, en tout ce liure, auquel il a touſiours cela en la bouche: Tien fermement: Croy ſans doute. Je laiſſe les autres raiſons, qui ont eſmeu non ſeulement moy, mais

aussi des autres plus grans personnages que moy, à douter de l'auteur de ce liure.

E V. N'as-tu point d'autre raison que celle là, pour diminuer l'autorité d'un tel auteur, & pour reietter les Docteurs anciens?

T H E. Quelle raison veux-tu meilleure, que iuger des auteurs par leur stile? D'autre part, cō bien a on attribué de liures & à saint Augustin & aux autres anciens docteurs, lesquelz on cognoit euidentement par le stile, estre d'autre que d'eux? Mais mettons le cas qu'il soit de S. Augustin, & en parlons comme si cela estoit resolu entre nous. Tu as desia entendu comment il accoustre vostre limbe. En apres, ie ne pense point, qu'il ait voulu luy mesme, que ces paroles fussent prises en telle rigueur & extrémité. Et pourtant, il est besoing de considerer les occasions qui le peuuent auoir esmeu d'escrire en telle sorte. Car si la necessité & l'impossibilité excuse les grans: pourquoy seront moins excusables les petis, qui ont encore plus d'excuse, que les grans ne pourroyent auoir? Car quand ilz meurent petis, ou au ventre de leur mere, ou dehors: en quoy a il tenu à eux, qu'ilz n'ayent esté baptizez? Dieu a il conceu plus grande haine contre iceux, que contre les grans? Quand le Baptisme de l'eau seroit autant necessaire à salut, que vous le faites: s'il y a quelque exception pour les vns: par quel droit

droit & raison peut elle estre deniée aux autres, quand la cause & les excuses sont pareilles? Mais nous deuons considerer, que du temps de saint Augustin il y pouuoit auoir beaucoup de sortes de gens, qui n'auoyent pas les Sacremens en telle estime & reuerence qu'ilz deuoyent (comme nous l'experimentons de nostre temps) auquel les vns y ont tant attribué, qu'ilz ont fait des signes visibles, vn Iesus Christ & vne idole. Les autres, au contraire, les tiennent comme signes, sans vertu ny efficace: & ne les estiment non plus, que les signes que les gendarmes portent, pour monstrier à quel prince ilz seruent. Desquelles choses il est venu de grans scandales de nostre temps: comme vous le sauez tous. H I. Nous ne le sauons que trop. Mais sur tout, les Anabaptistes ont passé mesure au Baptisme, tant en ce qu'ilz se sont voulu faire rebaptizer, qu'en ce qu'ilz ont condamné le Baptisme des petis enfans, le voulant differer iusques à ce qu'ilz fussent venuz en l'aage de discretion.

*Erreurs au
tour des sa
cremens.*

*Anabapti
stes.*

T H E. Ne doutons pas, que du temps de saint Augustin, il ne s'en soit trouué plusieurs, plus nonchalans qu'ilz ne deuoyent, touchant les Sacremens: laquelle chose a contrainct les Anciens de les tant magnifier. Et pourtant, ceux qui sont venuz après eux, ne considerans pas les causes, pour lesquelles ilz faisoient ce-

la, ilz ont prins les parolles crument, sans com-
mode interpretation, & sans aduifer à leur ma-
niere de parler rhetorique & figurée. Laquel-
le chose a esté cause qu'ilz en ont fait des ido-
les, comme si la vertu de Iesus Christ, & de la
religion Chrestienne, estoit en ces signes visi-
bles. Or nous ne pouuons nier, qu'ancienne-
ment le Baptesme n'ait esté quelquefois dela-
yé bien long temps. Nous lisons en l'histoire
Ecclesiastique, que le temps a esté, qu'on ne ba-
ptizoit point en Thessalie, sinon le iour de Pas-
ques. Parquoy, plusieurs mouroyent sans Ba-
ptesme. Il s'en est mesme trouué plusieurs en-
tre ceux qui auoyent receu l'Euangile, qui at-
tendoyent souuentefois de se faire baptizer
iusques à l'article de la mort. **THO.** Pour-
quoy faisoient-ilz cela? **THE.** Les vns le fai-
soient par negligence & nonchalance: les au-
tres, à cause de l'opinion qu'ilz auoyent que
par le Baptesme tous les pechez qui pouuoient
estre en l'homme, estoient effacez. Pour ceste
raison ilz attendoyent le plus tard qu'ilz pou-
uoient, pour departir de ce monde plus purs
& netz de leurs pechez. Mais, qui pis estoit,
aucuns, souz ceste esperance, prenoient plus
grande hardiesse de pecher. **THO.** Cela n'e-
stoit pas louable, **THE.** Aussi Chrysostome
les reprend, leur remonstrant, que parauentu-
re Dieu ne leur fera pas la grace d'auoir espa-
ce,

Hist. Tri-
par.

Chryso. in
epist. ad
Hebr.
De conf.
dist. 4. ca.
Quando.

ce pour estre baptizés, s'ilz attendent iusques à l'heure de la mort, & s'ilz abusent ainsi du baptisme: cōme il a veu qu'il est adueni à plusieurs, qui par ceste vaine esperance, ont esté deceuz. Aussi pareillement Basile le grand a fait vn sermon exprés de ceste matiere, & reprend fort aigremēt ceux qui font ainsi. Comme dōc les grans delayoyent leur baptisme, il n'est pas à douter, que pour ces mesmes raisons, ilz n'ayent peu faire le semblable, enuers leurs enfans. Et pourtant il ne nous faut pas estre esbahiz, si saint Augustin ou vn autre en son nom, quel qu'il soit, a escrit & parlé en telle sorte du baptisme, pour corriger telles fautes, nonchalances, & opinions: & pour mieux inciter les Chrestiens, à rendre leur deuoir en cest endroit, tant pour eux, que pour leurs petiz enfans. Pour ceste cause il a esté anciennement estably en l'Eglise, qu'on baptizeroit deux fois l'année: c'est assauoir, à Pasques & à Pentecoste: ia soit que le baptisme fust permis en tout temps, en cas de necessité. THO. Le baptisme n'estoit donc pas tant commun alors qu'il est à present.

*Baptiser
deux fois
l'année.
De cons.
dist. 4.*

THE. Il y auoit encore vne autre raison, qui a peu donner occasion à l'auteur de ce liure d'ainsi parler. Il voyoit que plusieurs estoient infectez de l'heresie des Pelagiens, qui n'attribuoyent pas beaucoup à la grace de

Pelagiens

Peché originel.

Psalm. 50.

Rom. 5.

Jean 3.

Dieu, & n'estimoient rien le peché originel: ains magnifioient grandement les vertuz & puissances humaines. Pour laquelle cause, ilz n'auoyent pas le baptesme en grande estime. Et pourtant il a bien voulu monstrier la nature du peché originel, & induire les hōmes à porter plus grand honneur aux Sacremens. Donc pour mieux manifester cela, il declaire comme les petiz enfans, qui n'ont point encore commis de peché actuel par œuvre, ne sont pas neantmoins sans peché, digne de mort & de damnation eternelle: à cause de leur nature corrompue, qu'ilz ont tirée, cōme d'un droit hereditaire & propre heritage, de leurs peres & meres, en leur conception & natiuité. Car ilz ont esté conceuz & nez en peché & iniquité: & ne peuuent estre autres, que telz que la source pecheresse, de laquelle ilz sont issuz. Parquoy, cōme S. Paul le dit, ilz sont aussi subietz à la mort, qui est du fruit de la maledictiō du peché. Car ce qui est né de chair est chair: & vn loup ne peut engēdrer qu'un louveteau: vn serpent, vn serpenteau. Et tout ainsi que nous ne laissons point de hair vn louveteau, ia soit qu'il n'ait encore point mangé de brebis, ou vn serpenteau, nonobstant qu'il n'ait point encore ietté son venin, mais les iugeons dignes de mort, à cause de la peruerse nature qui est en eux: aussi nous deuons estimer, que Dieu n'a

n'a pas moins d'occasiõ de nous hair & condãner, desia de puis le ventre de nostre mere, à cause de nostre peruersité & malice naturelle, engendrée avec nous. Et quand il nous damneroit éternellement, il ne nous feroit point de tort, mais seulement cela que nostre nature merite. Т Н О. Cela semble bien dur & bien rigoureux.

Т Н Е. Il est vray . Mais combien que le petit enfant n'a encore point fait d'œuure, que nous puissions iuger mauuaise, veu qu'il n'a point encore le sens, la discretion, ne la puissance de ce faire: il ne s'ensuit pas pourtant, que la peruersité & malice, qui est naturelle en l'homme, n'ait desia sa racine en luy, cõme vne partie de son heritagé paternel, laquelle ne peut plaire à Dieu . Car ia soit qu'elle ne produise pas encore ses fruitz, ilz ne laissent pas pourtant d'y estre, cõme en leur racine, qui les produira en son tẽps: ainsi que le venin est desia en vn serpẽteau, ia soit qu'il ne morde point: & la nature d'un loup en vn louueteau, quelque innocent qu'il semble estre. Mais dont procedẽt les fruitz de la chair, & les pechez que l'homme commet, quand il est en aage, que de celle racine vicieuse de ce peché originel, & nature corrompue? Quiconque donc soit autheur de ce liure, il n'a pas tort, de bien aggrauer ceste corruption naturelle, & de dire, que l'en-

fant, desia depuis le ventre de la mere, est coul-
 pable du feu eternel, non seulement les hom-
 mes aagez, s'il meurt sans baptisme: s'il entend
 par le baptisme, la grace & misericorde de
 Dieu, qui par iceluy est representée & commu-
 niquée aux eleuz: comme ie pense à la verité,
 qu'il entendoit principalement. Car s'il le vou-
 loit prendre à la rigueur, pour le baptisme ex-
 terieur, & la ceremonie materielle, ie ne me
 pourroye accorder avec luy: veu qu'il n'alle-
 gue point suffisans tesmoignages des lettres di-
 uines, pour prouuer ceste proposition tant ri-
 goureuse, & tant repugnante à la bonté & gra-
 ce de Dieu: comme nous l'auons desia assez
 montré. Mais i'estime plustost, qu'il entend
 par le baptisme, fait au Nom du Pere, du Filz
 & du saint Esprit, la vertu & l'efficace, &
 la chose figurée par le baptisme exterieur, qui
 est vray signe & tesmoignage de celuy qui
 est spirituel & interieur, que le signe & la cere-
 monie exterieure: par laquelle neantmoins, il
 signifie & comprend toute la vertu du baptes-
 me de Iesus Christ, en la maniere que l'escritu-
 re sainte a accoustumé d'en vser. Car en icel-
 le, le signe & la figure sont souuentefois prins
 pour la chose signée & figurée, comprenant le
 tout, par la partie: à cause que l'Escriture s'a-
 dresse aux fideles, qui ne reçoquent pas les Sa-
 cremens en vain, & sans la chose spirituelle: pour
 ce

*Signes &
 figures
 pour les
 choses si-
 gnées &
 figurées.*

ca

ce l'Apostre dit: Vous tous, qui estes baptisez, ^{Gal. 3.}
 auez vestu Christ. Et toutesfois, Simon le Ma- ^{La Foy de}
 gicien auoit esté baptizé exterieurement par ^{Simon.}
 Philippe; & si ne croy point, que iamais il ve- ^{Act. 8.}
 stist Christ, veu qu'il n'auoit point vrayement
 creu. E v. Il est toutesfois escrit aux Actes,
 qu'il a creu.

THE. Il est certain. Mais il a bien mon-
 stré par apres, que ce qu'il auoit fait, n'estoit
 que feintise, & qu'il n'auoit iamais eu vraye
 foy. Mais saint Luc qui a escrit l'histoire, par-
 le selon la commune maniere de parler, ainsi
 que nous disons, qu'un homme a receu l'Euan-
 gile: où qu'un Iuif s'est fait Chrestien, & a creu
 en Iesus, qui toutesfois le pourra auoir fait par
 hypocrisie, non pas en verité. Mais nous par-
 lons ainsi que les choses nous sont montrées,
 laissant le iugement du cœur à Dieu. Laquelle
 maniere de parler, est aussi assez accoustumée
 aux saintes Escritures. Pour ceste cause saint
 Augustin expose ce passage de saint Luc, com-
 me nous l'auons exposé. Toutefois s'il y a quel-
 cun d'entre vous, qui en ait quelque autre meil-
 leur intelligence, ie suis bien cōtent de l'ouyr.
 H. Il m'est aduis, Eusebe, que tu te dois bien
 contenter de la responce, laquelle t'a esté faite
 par Theophile, Car elle est tant claire & tant
 facile, & tant conforme à l'analogie de la foy,
 que nul n'y peut cōtre dire, s'il n'ayme mieux

batailler par obstination, que se contenter de raison. Et si tu fais diligemment considérer, & bien poiser ce qui t'a esté respondu, tu en peux faire ton profit en maintes sortes. **T H E.** Il est tout certain, que si tu notes biẽ tous les poinctz qui ont esté deduitz, sur toute ceste matiere, tu pourras cognoistre par iceux, quel doit estre l'usage des Sacremens: quel doit estre le vray baptisme, & la vraye regeneration du Chrestien. Si tu entens cela, tu ne seras plus en doute, ny en perplexité des petiz enfans qui meurent sans baptisme: mais les laisseras en la main de Dieu, & remettras le tout à sa misericorde. Et si tu es vne foys iusques à ce poinct, tu cognoistras aussi l'erreur de ceux qui portent les enfans mornez aux idoles, comme on faisoit en ce pays, à celle de nostre dame de grace de Geneue, ou à nostre dame de Lausanne, ou à la sainte croix, & à nostre dame de Beurre. Dauantage, tu peux par ces mesmes raisons iuger de la superstition, de ceux qui donnent autorité aux sages femmes, de baptiser les petiz enfans, quand elles craignent, que ilz ne soyent en dangier de mort. **E V.** Trouues tu cela si mauuais? Quel mal y a-il? **T H E.** Il y a premierement ce mal, que ceux qui requierẽt tel baptisme, sont d'opinion, qu'il soit tellement necessaire à salut, que leur enfant ne puisse estre sauué, sans iceluy. En quoy ilz font
iniu-

*Baptisme
des fẽmes.*

iniure à la grace de Iesus Christ, & presumēt mal de la vertu de son sainct Esprit, & rēdent publique tesmoignage de leur superstition & infidelité. En apres, ilz pechent, en ce qu'ilz deshonnorent les Sacremens, quād ilz les com mettent à autres qu'à ceux auxquelz Dieu a donné la charge de les administrer. Parquoy ilz ne peuuent faillir, ou d'un costé, ou d'autre, qu'ilz ne soyent grandement reprehensibles: Car s'ilz y adioustent necessité, il appert desia, en quel erreur ilz sont. S'ilz disent qu'ilz n'y mettent point de necessité, & qu'ilz ne liēt point la grace de Dieu aux elemens corruptibles, & au ministere exterieur: pourquoy bail lent-ilz donc ceste autorité aux femmes, sans parole de Dieu? Pourquoy prennent-ilz autre moyen, que celuy qui leur est donné de Iesus Christ? Pourquoy separēt-ilz ce que Dieu a conioint? Car le baptesme & l'administra- Matth. 18. tion des Sacremens, sont coniointz avec le ministere, & ne peuuent estre separez, sans ren uerser l'ordre que Iesus Christ a mis en son Eglise. Car il a commandé de baptizer, à ceux la mesmes, auxquelz il a commandé de pres cher, & non à autres. Parquoy, ainsi que l'insti tution des Sacremens est vne cérémonie pu- Ministres
des sacre-
mens. blique, & coniointe avec le ministere de l'E uangile, aussi ilz doyuent estre administrez pu bliquement, en l'Eglise, par ceux la mesmes,

auxquelz le ministère de l'Euangile est com-
 mis, & qui sont eleuz de Dieu & d'icelle pa-
 1. Cor. 14. steurs & ministres. Or il est défendu expresse-
 1. Tim. 2. ment aux femmes, de parler en l'Eglise, & d'v-
 surper aucun office ecclesiastique: laquelle cho-
 se n'est permise qu'aux hommes: & non pas en-
 core à tous indifféremment, mais à ceux qui sont
 à cela eleuz & ordónez legitimemét: ce qu'il
 1. Cor. 14. declare assez, quand il cõmande par son Apo-
 stre, que toutes choses soyent faites en l'Eglise
 par ordre & sans confusion. Car si ordre est re-
 quis en l'administration ciuile, & n'est loisible
 d'exercer les offices d'icelle, qu'aux officiers
 legitimemét eleuz & ordonnez: pensons-nous
 que Iesus Christ en requiere moins, en la poli-
 ce ecclesiastique: & qu'il vueille permettre
 que l'ordre qu'il y a mis, soit renuersé?

E V. Te semble il qu'il soit renuersé,
 si les femmes baptizent en cas de necessité?

T H E. Il n'y a point de doute, si ceux qui veu-
 lent approuuertel baptisme ne monstrent pre-
 mierement, en quel lieu Dieu l'a ordonné:
 & quel tesmoignage ou exemple de l'Escri-
 ture ilz en ont. Si cela leur defaut, comme i'en
 suis bien asseuré, ilz seront contrainctz de con-
 fesser, que ce baptisme est donné sans foy, &
 qu'il n'est fondé, que sus opinion humaine. Car
 1. Rom. 10. la foy vient par l'ouye de la parolle de Dieu.
 Si donc il n'y a point de parolle de Dieu, il n'y
 peut

peut auoir foy. S'il n'y a foy, c'est donc peché. Car tout ce qui est fait hors de la foy, est peché. Nous les pourrös donc interroguer, ainsi que Iesus Christ a interrogué les Pharisiens, touchant le baptesme de Iean Baptiste : assauoir-mon, s'il estoit du ciel, ou des hommes? Aussi pareillement, ce baptesme des femmes, est-il de Dieu, ou des hommes? S'ilz respondēt qu'il est de Dieu: ou sont les tesmoignages de l'Escripture? S'ilz respondent qu'il est des hommes, comme il leur fera force, ilz seront contrainctz de confesser, qu'il est donc procedé d'un autre auteur, contraire à Dieu, veu que Iesus Christ oppose les hommes au ciel & à Dieu: declairant par cela, que ce qui n'est de l'un, est de son contraire. Je ne puis donc conclurre, que ce baptesme soit procedé d'autre, que de l'aduersaire de Dieu, qui pour se montrer contraire à Dieu, en toutes choses, a voulu auancer les femmes aux ministeres & aux offices ecclesiastiques, desquelz Dieu les a voulu retirer. Il a tasché à reduire le ministere de l'Eglise Chrestienne, à la forme de celuy, qui iadis a esté mis par son moyen, aux Eglises des Payens & des heretiques anciens. Nul ne peut nyer, que les Payens n'ayent aussi bien vsc de prestresses, comme de prestres, en l'administration de leurs sacremens & de leurs seruices diuins. Plusieurs heretiques n'en ont pas

Rom. 14.

Matth. 21.

Marc 11.

Luc 21.

1. Cor. 14.

1. Tim. 2.

Ministère

des femmes.

Bernhar
Luceburg.
in catalo
hereti c.
Thom. A.
qui. in 1.
Tim. 3.
Epipha.
Tom. 3. li.
1. li. re. 42.

moins fait, nommément les Montanistes, les Pe-
pustes, les Quintiliens, les Pricillianistes & les
Cataphryges, qui ont presque esté tous d'une
mesme secte, & les Martionistes semblablement.
Ceux cy n'ont pas seulement permis aux fem-
mes de baptizer, mais les ont aussi iugées idoï-
nes à tout le ministere de l'Eglise, & les ont
eleues à cela ne plus ne moins que les hommes.
Voyla des exemples & destesmoignages assez,
pour approuver le baptesme & le ministere
des femmes, si vous le voulez approuver par
l'autorité des Payens & des heretiques.

E V. Nous auons assez d'autres exem-
ples & d'autres tesmoignages, pour approu-
uer nostre doctrine, sans nous seruir de ceux
la. THE. Je ne say pas où vous les auez. J'ay
desia monstré assez euidentement, que vous
n'en auez point aux saintes Escritures. D'au-
tre part, ie ne voy point que vous ayez aucun
des anciens docteurs de l'Eglise en vostre fa-
ueur: mais tout au contraire. Car ilz ont tous

La sentée
de Epipha
nius, tou-
chant le
ministere
des fēmes.
Epipha in
Tom. . li.
3. hares. 79

condamné d'un commun consentement, les he-
retiques dessus mentionnés, qui ont approuvé
le ministere des femmes en l'Eglise. Entre les-
quelz Epiphanius a traité ceste matiere bien au
long. Car il montre tout par le menu, & de
point à point, comment depuis le commen-
cement du monde, les fēmes n'ont iamais esté
ordonnées prestresses, entre le peuple de Dieu,

ny

ny pour sacrifier, ny pour administrer les sacremens. Et parlant de l'ordre du ministère assigné au nouveau Testament, il dit: S'il estoit commandé aux femmes de sacrifier à Dieu, ou faire quelque chose ordinaire en l'Eglise, il estoit plus cōuenable, que la vierge Marie feist sacrifice au nouveau testament, qui a esté faite digne de receuoir en son propre sein, Dieu, le Roy de tous, le celeste filz de Dieu, duquel le vêtre, préparé par la benignité de Dieu & le secret admirable, a esté fait temple & habitation, pour la dispensatiō du Seigneur en chair. Mais il n'a pas pleu à Dieu. Il n'a pas mesmes esté commis de bailler le baptesme, ou autrement Christ pouuoit plustost estre baptisé d'elle, que de Iean. Il confesse bien que Anne, & les filles de Philippe, ont esté prophetesses: mais en telle sorte, qu'elles n'ont point sacrifié, ny ministré les Sacremens. Et parlant des Euefques & des prestres, ordonnez par les Apostres, il dit: Et iamais femme n'a esté ordonnée entre ceux cy. Et tantost apres, parlant de la dignité de la vierge Marie, & de l'hōneur que Dieu luy a fait, il dit: qu'il n'a pas fait cecy, afin que la vierge fust adorée, n'afin qu'elle fut faite Dieu, n'afin que nous offrissions en son nom, ny afin qu'il monstrest apres tant de aages, que les femmes deuoyent estre prestresses. Il n'a pas pleu à Dieu, que cecy ait esté

*La vierge
Marie.*

*Prophetes
ses.*

*Luc 1.
A. 21.*

fait en Salomé & en Marie. Il ne luy a pas permis de bailler le baptême, &c. Il dit le semblable des autres saintes femmes, desquelles il est fait mention aux histoires Euangeliques. Tu peux iuger par cecy, quelle a esté l'opinion de toute l'Eglise ancienne, touchant ceste matiere. Car ne pense pas que les autres anciens docteurs de l'Eglise, ayent esté d'autre opinion, touchant ce point, que Epiphanius. E v. Tout ce que tū as allegué, ne bataille rien contre moy, comme tu l'orras tantost: mais poursuis, si tu as encore à dire quelque chose.

De cōsecr.
dist. 5. ca.

Manus.

Le sacre-
ment de cō-
firmation.

ARTHE. D'auantage, vous dites en voz decretz, que le sacrement de confirmation ne peut estre donné par autres, que par les Euesques. La raison que vous alleguez, c'est, qu'on ne lit point, que ce Sacrement ait iamais esté donné par autre, que par les Apostres, & par ceux qui tiennēt leur lieu. Parquoy, s'il est donné par autres, il ne doit estre aucunemēt reputé pour Sacrement, ains doit estre aneanty. Quā à ce que voz decretz disent, que ce Sacrement de confirmation a esté administré par les Apostres, ilz parlent manifestemēt contre la verité des saintes Escritures, s'ilz entendent cela, de vne telle maniere de confirmation, que celle que vous mettez au nombre de voz sacremēs. Car ce qui est escrit au nouueau Testament, de l'impositiō des mains des Apostres, est toute

autre

autre chose, qu'un tel sacrement de confirmatiō, inuēté par l'Eglise Papale. Mais pource que nous ne sommes pas maintenant sur ce point, *Impositiō des mains.* i'ay seulement voulu dire cecy en passant, pour seruir à l'argument que ie veux prendre de voz decretz mesmes : par lesquelz ie conclus, qu'il n'est loisible d'administrer ce sacrement de confirmation, à autres qu'aux Euesques, ou à leurs suffragans, pour la raison qui a esté alleguée, pourquoy fera il plus loisible de baptizer à autres qu'aux ministres, & sur tout aux femmes, attendu que nous ne lisons point, qu'il ait esté commandé de Dieu, à autre qu'aux ministres de l'Euangile, & fait par autres, en l'Eglise ancienne, que par iceux ? Car si vostre argument doit auoir lieu, pour vostre sacrement de confirmatiō, pourquoy en aura moins celui que ie fay, veu qu'il est du tout semblable au vostre : excepté que le mien est mieux fondé en la parolle de Dieu, attendu que le sacrement de baptesme, duquel ie parle, est ordonné de Dieu, & vostre sacrement de confirmation, n'est ordonné sinon des hommes ? Je ne say pas quelle raison tu pourras alleguer au contraire, si d'auenture tu ne te voulois fonder sur cest horrible blaspheme qui est en vostre doctrine, qui afferme que la confirmation est plus que le baptesme : dont s'ensuit, qu'elle ne doit estre administrée, sinon par les Eues-

ques. E V. Je te puis respondre, quant à la confirmation, qu'il y a difference, en cela qu'elle n'est point tant necessaire à salut, que le baptesme. Quant au reste ie suis content de t'accorder ce que tu as dit du ministere, quant à l'office publique, & à l'election & ordonnance d'iceluy, & hors la necessité. Car les conciles, les Canons & les Docteurs anciens, ne sont pas fort differens à toy, quant à ce point, ains tesmoignent clairement, qu'il n'est loisible à personne de baptizer, sinon aux ministres de l'Eglise, qui sont les Euesques & les prestres. Mais ilz entendent cela, quand il n'y a point de necessité extra-ordinaire, & de dāger de mort. Car en tel cas, ilz dispensent & permettent de ce faire, non seulement aux hommes laicz & mechaniques, mais aux femmes semblablement.

De conf.
dist. 4. ca.
Baptiz. adi.
& cōstat:
& Mulier.
Ex conc.
Carth. 9.
30. q. 3. Su
per quis.
Chanf. de
Sakra.
Mortis in
periculo
sufficit om
nis homo.

THE. Nous ne disputons pas de ce que les hommes permettent, mais de ce que Dieu a commandé. Je ne trouue point de necessité aux sacremens, qui nous presse grandement, sinon quand nos les mesprisons, & les moyens que Dieu nous baille pour y communiquer, & qu'il y peut auoir de nostre coulpe & faute. Toutefois s'il est de besoing de s'armer de l'autorité des hommes, en ceste matiere, encore prouuerōs-nous, que l'Eglise anciēne fait pour nous. Car premierement, ou est-il escrit, que iamais Iesus Christ ait dit aux femmes: Al

lez

les baptisez. Parquoy saint Augustin a esmeu la question, non pas encore de la femme, mais de l'homme priué & particulier, assavoir-mon, s'il peche, s'il baptize en cas de necessité? A laquelle il respond avec doute, & mieux pour l'excuser, que pour l'approuver. Pour le moins, c'est chose certaine, qu'il n'affirme point qu'il soit licite, mais confesse plustost qu'il y a quelque faute: combien qu'il la fait legiere. Mais il luy en a prins, comme il aduient bien aucune fois à des bons nautóniers, qui sont cōtrainctz par la violence des tempestes de se destourner de leur droit chemin, & de suyure là ou la tēpeste & les vens les transportent. Il n'y a point de doute, que desia du temps de saint Augustin, cest erreur, & ceste coustume ne fust aucunement receue. Parquoy saint Augustin ne l'ose du tout condamner. Mais si ne l'ose-il aussi approuver, ne du tout excuser de peché. Toutefois, si nous suyrons la reigle de Iesus Christ, elle nous mettra hors de toute doute. Combien que nous auons encore à nostre faueur, le quatr'iesme concile d'Affrique, qui a defendu cecy, sans aucune exception. Bien est-il vray, qu'aux Decretz de Gratien, ce canon est allegué, mais nō pas à la verité, comme il est escrit au liure des conciles. Car il y a adiousté l'exception, qui n'est point au vray original. Pareillement Epiphanius, parlant du ministration des

*De conf.
dist. 4. in
necessi-
tate.
Aug. cont.
Parme. li.
2. c. 13.*

*Concil.
Cartha.
4. Cano.
100.*

femmes, n'excepte iamais la necessité: ce qu'il deuoit bien faire, s'il estoit de vostre opinion, pour declaration de son intention.

H I. Quand il n'y auroit que le tesmoignage des prestres, ilz declairent assez qu'il y a du mal, en telz baptêmes. Car quand on leur apporte baptizer des enfans, ilz demandent pour le moins en nostre pais & en nostre ville: Y a-il que bien? Ilz demandent cela, pour sauoir si l'enfant a point encore esté baptizé, par les femmes. S'il n'a point esté baptizé, elles respondent: qu'il n'y a que bien. Il s'ensuit donc qu'il y a du mal, quand l'enfant a esté baptizé par elles. E V. Ilz ne l'entédent pas ainsi que tu le prens. H I. Je t'en croy bien: mais ie ne doute pas, que Dieu ne les face parler, comme il a fait prophetizer Caiphe, sans s'entendre eux-mesmes. E V. Laissons cela à part. Mais puis que tu asseurestant, Theophile, que nous n'auons nul tesmoignage de l'Escripture: comment excuseras tu donc Zippora, la femme de Moysse, qui a circoncis son enfant Eleasar, en presence de Moysse mesme? Comment l'a permis Moysse?

Jean II.

*L'exemple
de Zippora
Exo. 4.*

THE. L'exemple n'est pas semblable, ains plustost contre toy, que pour toy. Car premierement, tu voys que Moysse n'estimoit pas la circoncision tant necessaire à salut, que vous estimez le baptême: veu qu'il auoit esté si tardif

dis à circoncir son filz , ia soit qu'il en eust le commandement plus expres , que nous ne l'auons du baptesme . Outreplus , ia soit que ce passage soit assez obscur , à cause que Moyse raconte l'histoire tant succinctement & briue-ment : toutesfois si on l'examine de pres , on ne trouuera point que cest exemple puisse mieux estre appliqué qu'au mespris de la Circoncision & des Sacremens. Car ce qui est escrit , que le Seigneur , ou son Ange , est venu au deuant de Moïse , & l'a assailly , le voulant tuer : monstre que le Seigneur estoit courroucé , pource que Moïse n'auoit pas fait telle diligence à circoncir son enfant , qu'il deuoit , cōbien qu'il eust eu le temps & l'occasion de le faire. Parquoy , le Seigneur l'en a puny . Mais incontinent que l'enfant a esté circoncis , il a esté deliuré de ce dangier : & le Seigneur ne l'a pas pouruiuy d'auantage. Mais il y a bien autre raison quand les enfans meurent , & qu'il n'y a point eu de nonchalance , ne de faute aux parens. Quant à ce que Zippora a fait l'office de circoncir , non pas Moïse : il faut considerer , qu'alors Moïse ne pouoit faire cela , à cause qu'il estoit pressé de la main de Dieu , qui le vouloit occir. Parquoy , pour luy sauuer la vie , Zippora y mit la main soudainement. Car autre ne le pouoit faire qu'elle.

E V. Tu es maintenant contraint de con-

feſſer ce que ie demande. Car tu veux excuſer Zippora, à cauſe de la neceſſité qui la contrain-
gnoit - Nous n'approuuons point auſſi le Ba-
ptefme, adminiſtré par les femmes, & par au-
tres que les miniſtres de l'Eglife, fors qu'en
cas de neceſſité. T H E. I'ay bien des autres
raiſons contre toy. La premiere, c'eſt que nous
ne liſons point que Dieu ait donné expreſ com-
mandement aux hommes ſeulement de circon-
cir, comme il a fait de baptizer. La ſeconde,
c'eſt qu'il n'y auoit point pour lors de forme
d'Eglife, ne de police & de miniſtere publi-
que entre les Madianites, & là ou Moïſe eſtoit,
tel que Dieu l'a dreſſé parapres par le moyen
de Moïſe, entre le peuple d'Iſrael. La troiſie-
me, c'eſt qu'il eſt vray-ſemblable que Zippo-
ra a fait cela par le commandement de Moïſe
ſon mary, qui ſe ſentant frappé de Dieu, l'a peu
admonester de ce faire, pour luy ſauuer la vie.
Car autrement, comment euſt elle peu enten-
dre que ſon mary eſtoit en dangier de mort
pour telle cauſe, s'il ne l'en euſt aduertie? Com-
bien que Moïſe, eſtudiant à briueſté, n'a pas ra-
conté toutes ces choſes au long. Mais il les don-
ne aſſez à entendre. Or ſi Moïſe luy a comman-
dé, elle ne l'a pas fait ſans Parolle de Dieu: veu
que Moïſe eſtoit Prophete: voire celuy par le-
quel Dieu a dreſſé ſa police en l'Eglife d'Iſra-
el. Dauantage, comment qu'il en ſoit, ceſt exé-
ple

ple n'est pas suffisant pour fonder le baptême des femmes cōtre l'ordonnance de Iesus Christ: car nous ne deuons pastirer en consequence generale les exemples particuliers des saintz, & ce qui leur a esté quelquefois permis par singulier priuilege & dispensation, si nous n'en auons expres commandement, comme ilz ont eu: ou les mesmes occasions & circonstances. Auec ce qu'il y a bien aucuns exemples des saintz personages, lesquelz l'Escripture n'approuue pas tousiours, combien qu'elle les raconte: ou si elle les approuue en ceux-la, il ne s'ensuit pas pourtant qu'elle face la pareille en nous, si nous n'en auons certaine vocation de Dieu. Car Dieu ne veut pas que nous entreprenions rien temerairement en son Eglise, sans sa Parolle & son commandement. Il nous en a donné les exemples bien euidens en Saul & Ozias. Quand Saul se hesta de sacrifier, voyant que Samuel demouroit si long temps à venir, & que les Philistins estoient si pres, & qu'il y auoit dangier qu'ilz ne liurassent la bataille auant que le sacrifice fust fait: il semble bien qu'il y auoit grande necessité, & que Saul faisoit vne œuvre fort bonne & fort necessaire. Semblablement, quand Ozias appuya l'arche qui chancelloit, & qu'il voyoit tomber: ne sembloit il pas auoir vrgente necessité? Toutefois Dieu a grieuement puny & l'un & l'autre.

1. Sam. 13.

2. Sam. 6.

tre, pourtant qu'ilz ont fait cela sans son commandement. Que dirons nous donc de la presumption des femmes, qui entreprendront de administrer les Sacremens sans aucune ordonnance de Dieu, & de ceux qui leur bailleront telle autorité? Car puis que tu confesses toy-mesme, qu'il n'est licite de les élire aux ministres de l'Eglise: qu'est-ce qu'elles peuvent faire en telles choses, qui soit agreable à Dieu, sans iuste election & vocation?

E V. Il me semble que tu combas contre la doctrine que tu soustiens, par les argumens par lesquelz tu me cuides combattre. Tu dis, que nous lions la grace de Dieu aux choses exterieures, par la necessité que nous mettons au baptisme: laquelle nous induit à permettre aux femmes de baptizer en cas de necessité. Et quand vous niez qu'il soit loisible aux femmes de baptizer, en quelque cas & en quelque maniere que ce soit: & voulez tellement lier l'administration des Sacremens au ministère des ministres publics de l'Eglise, ordonnez legitimement, qu'il ne soit licite à autre quelconque de iamais les administrer, sans estre éleuz à cela: ne liez-vous pas la grace de Dieu à certains hommes? Ne tombez-vous pas en vn autre extreme, beaucoup plus dangereux que celui que vous condamnez en nous? Car si Dieu besogne par ses Sacremens au salut des hom-

Lier la grace de Dieu aux instrumens.

hommes, comme nous en auons les tesmoigna-
ge: n'est il pas plus dangereux de lier l'admini-
stration d'iceux en telle rigueur que vous la
liez, que la dispenser, comme nous la dispen-
sons, quand vrgente neceſſité le requiert?

THE. Nous lierions la grace de Dieu
aux hommes & aux instrumens d'icelle, si nous
estiōs d'opinion que la grace de Dieu ne peut
estre baillée aux hommes en maniere quelcon-
que, sinon par le moyen de ces instrumens. Mais
tu fais que nous sommes d'autre sentence, la-
quelle a certain fondement aux saintes Eſcri-
tures. Tu fais quelle neceſſité nous y mettons,
& quel moyen nous tenons en cecy: comme
nous condamnons ceux qui mesprisent ces in-
strumens & ces moyens, quand Dieu leur bail-
le l'occasion d'en auoir l'vsage: nous affermōs
aussi que la grace de Dieu n'est pas tellement
bridée par iceux, qu'il ne soit en la puissance
d'iceluy de la communiquer à tous ceux qu'il
luy plaira, sans iceux: si cas aduenoit que l'vsage
en fust totalement dénié, & qu'il ne fust pos-
sible de le pouuoir obtenir. Tu peux donc iu-
ger par cecy, comment nous n'imposons point
de telle neceſſité ny à Dieu ny à sa grace, que
vous, qui damnez ceux auxquelz ces instru-
mens defaillent, cōbien que la coulpe ne vien-
ne pas de leur mespris & nonchalance: comme
il a esté dit des petis enfans mornez. Or ayant

*Vsage des
moyens or
donnés de
Dieu.*

mis ce fondement, nous ne le destruisons pas, quand nous ne voulons point vsfer d'autres moyens, que de ceux lesquelz Dieu a ordonné par sa Parolle. Car comme ce seroit tenter Dieu, qui ne voudroit vsfer de ceux-cy, quand l'opportunité en est baillée: aussi i'estimeroye que nous le tenterions, & que nous nous desferions de sa grace & de sa prouidence, si nous en prenions des autres hors l'ordonnance & la vocation d'iceluy. Car s'il plait à Dieu de communiquer son salut à noz enfans par le moyen des instrumens qu'il a ordonnez à cela: il est bien en sa puissance de nous en bailler l'vsage & la iouyssance, quand il le iugera estre necessaire. S'il ne luy plait point le nous communiquer par ce moyen: il en a assez d'autres pour ce faire, & pour paruenir à la fin, à laquelle il pretend, quand il luy plaira en vsfer. Mais il ne appartient pas à nous de les élire à nostre plaisir, mais à luy: ny de nous ingerer de nostre propre authorité à vn office, auquel il ne nous a pas appelez: ou d'y appeller, sans legitime vocation, ceux qu'il nous plaira, & tous ceux lesquelz nous rencontrerons d'auenture, soyent hommes ou femmes. Parquoy, ie conclu, que soit homme ou femme, qui se mesle de baptizer les petis enfans, sans auoir certain tefmoignage de Dieu & de son Eglise, qu'il est ordonné à cela: iceluy peche grandement, & sur

sur tout les femmes, auxquelles l'Eglise mesme ne peut donner ceste charge : veu que Dieu a declairé assez euidentement, par les tefmoignages qui ont esté alleguez à ce propos, qu'il ne approuuoit point le ministere des femmes en tel affaire.

E V. Je suis ébahy de vous, & de vostre doctrine. Vous n'estimez les Sacremens, sinon comme des dependances du ministere de la parole de Dieu: pourtant que la parole de Dieu peut bien estre parole de Dieu, & profiter aux hommes, sans les signes visibles des Sacremens : mais les Sacremens & leurs signes, ne peuuent estre Sacremens, ny profiter aux hommes, sans ceste parole & la promesse de Dieu, de laquelle ilz sont le seél. Il s'ensuit donc, que l'administration de la parole, est le principal. Il m'est bien aussi aduis, que S. Paul a plus estimé l'administration de la parole, que du baptisme: ou autrement, pourquoy eust il dit: Je ne suis pas venu pour baptiser, mais pour annoncer l'Euangile? Enquoy il apert bien, qu'il estoit plus adonné à la predication de l'Euangile, qu'à l'administration des Sacremens: & qu'il estimoit cela mieux appartenir à son office, comme la principale partie d'iceluy. Si ainsi est, pourquoy permettez vous plustost aux femmes ce qui est le plus grand & le principal du ministere, & vous ne permettez pas ce que

*Admini-
stration de
la parole
& des sa-
cramens.*

1. Cor. 1.

vous estimez le moindre? Car vous leur permettez bien l'administration de la Parolle, voire mesme sans necessité vrgente, & leur déniez l'administration du baptisme, mesme en cas de necessité.

T H E. Tu conclus deux pointz, lesquels ie ne t'accorde pas totalement. Car pour le premier, nous ne confessons pas que l'administration des Sacremens soit la moindre partie du ministere de l'Euangile, si nous prenons le nom de Sacrement, non seulement pour l'administration du signe visible; mais pour tout ce qu'il comprend: car il comprend la predication de l'Euangile & l'administration de la parolle de Dieu, de laquelle il est Sacrement, & à laquelle il est appliqué, comme le seau du prince à vnes lettres & à vn instrumēt publique. D'autre part, ou as-tu entendu de moy, que nous permissions le ministere de la predication aux femmes? E V. N'as-tu pas confessé, que plusieurs femmes & filles auoyent esté Prophetesses? N'as-tu pas allegué toymesme le tesmoignage d'Epiphanius sur cecy, prins des saintes Escritures? T H E. Ie ne t'ay pas pourtant confessé, que les femmes ayēt tenu le lieu des Prophetes & des ministres de l'Eglise, au ministere publique d'icelle, en la maniere que ceux-là l'ont tenu par l'ordonnance de Dieu.

E V. Mettons le cas, que ie t'accorde cela.

la. Tu ne peux, pour le moins, nier, qu'il ne soit *Ministere* loisible aux femmes d'enseigner en particu- *particu-*
 lier. THE. Mais dy d'auantage, qu'il est re- *lier.*
 quis de tous, que nous soyons comme Prophe-
 tes les vns aux autres, & que nous sommes tous
 tenuz d'enseigner les vns les autres en particu-
 lier, selon la grace que Dieu nous a donnée: &
 singulierement ceux qui ont plus receus de
 dons de Dieu, & qui ont plus grande charge
 des hommes. EV. Pourquoi ne sera il aus-
 si bien permis d'administrer les Sacremens en
 particulier, en cas de necessité? THE. Pour-
 quoy ne permettez vous aussi bien aux fem-
 mes d'administrer la Cene en particulier, com-
 me le Baptisme? EV. Pource qu'on se peut
 mieux passer de la Cene, que du Baptisme: car
 le Baptisme supplée pour la Cene, quand on
 ne peut communiquer à icelle.

THE. Ie t'ay monstté parauant que vo-
 stre raison n'auoit guere plus de lieu en vn Sa-
 crement, qu'en l'autre. Mais mets le cas, que ie
 te passe cecy: ie te puis combattre par le mes-
 me argument, duquel tu me veux payer. Ie te
 dy donc, qu'il y a plus de raison à l'administra-
 tion de la Parolle, qu'à celle des Sacremens.
 Car puis que la Foy vient par l'ouye de la pa-
 rolle de Dieu, il est plus necessaire de commu-
 niquer à icelle, qu'aux Sacremens. Car depuis
 que nous auons obtenu la Foy par l'ouye d'i-

Rom. 10.

Ordre ec-
clesiasti-
que.

AA. 8.

celle : si nous ne pouuons passer plus outre , & venir iusques à la communication des Sacremens , estans empeschez par vne necessité inuincible, ceste Foy nous suffit à salut. Si nous y pouuons paruenir , ce ministratione particulier, que nous deuõs vn chacun les vns aux autres, nous est vne preparation à ce ministratione publique , auquel l'administration des Sacremens est commise : ce qui n'est pas à l'autre . Car il faut qu'il y ait quelque ordre , & quelque distinction en l'Eglise , pour maintenir la police d'icelle . D'autre part, puis que les Sacremens sont ordonnez, en partie pour faire profession de sa Foy & de sa religion, & hõmage à Dieu: il est requis que cela se face en l'Eglise, assemblée legitimement, & selon l'ordre d'icelle, & par ceux qui sont ordonnez à cela , là ou il y a forme d'Eglise dressée. Je dy cecy, afin que tu ne m'allegues point le thresorier de la Roynie Candace, qui a esté baptizé en la voye par Philippe , ou autres semblables : qui toutesfois ne ont pas receu les Sacremens tellement en cachette, que cela n'ait esté fait en presence pour le moins de quelque petite Eglise, ou de quelque compagnie, comme la circonstance des histoires le monstre . Et quand cela n'y seroit point : toutesfois nous ne lisons point , que les Sacremens ayent esté administrez, mesme alors que l'Eglise estoit encore esparse , sinon par les

les ministres ordonnez à cela. Puis qu'ainſi eſt, nous nous deuons donc abſtenir de ces miniſteres particuliers des Sacremens: veu que la ceremonie viſible n'eſt pas tant neceſſaire à ſalut, qu'on ne s'en puiſſe paſſer, quand la neceſſité en forcloſt, voire quand il n'y auroit autre raiſon, que pour le dangier des ſuperſtitions & abus qui en peuuent ſuruenir: comme nous le voyons en voſtre Papifterie. Car ceſte maniere de faire, conſerme touſiours de plus en plus celle fauſſe opinion que vous auez de la neceſſité des ſignes viſibles, & de la vertu, la quelle vous leur attribuez: en ſorte qu'on eſt quelquefois venu, quand on craignoit dangier de mort, iuſques à baptizer les petis enfans, auant qu'ilz fuſſent naiz, en la ſortie du ventre de la mere. Il a ſuffiſt, pourueu qu'on en veift ou la teſte, ou vn bras, ou vne iambe, ou vn pied. Cecy n'emporte-il pas vne grande moquerie des Sacremens? Ne declaire-il pas bien la deſiance que telz pource ſuperſtitieux ont de la miſericorde de Dieu, & la fiance qu'ilz ont en vn petit d'eau, & en trois ou quatre parcelles? & comment ilz lient la grace de Dieu aux elemens corruptibles & aux miniſteres des hommes? Car ſi l'enfant, qui eſt en ce dangier, a receu ce peu d'eau, avec ces parolles, combien qu'il mourra tout à l'heure, le ciel & paradis luy eſt ouuert: mais ſi cela luy a defailluy,

*Baptiſer
en l'enfantement.*

1. Cor. 7.

*L'office des
sages fem-
mes.*

il luy est clos : Iesus Christ ne luy profite rien : le sang qu'il a espandu pour ce pource enfant, qui est compris en l'alliance d'iceluy, & sanctifié par icelle, entant qu'il a esté engendré de parens fideles, auxquelz elle appartient : iceluy n'a point la puissance, selon vostre doctrine, de luy ouvrir le Royaume des cieux, si ceste eue n'y est adiointe. N'as-tu point de honte, Eusebe, de telles moqueries, & de telles superstitions, & de telz blasphemes ? Puis donc que les femmes ne peuvent en rien profiter aux petis enfans par leur doctrine & ministration particulier, & qu'ilz peuvent auoir salut par autre moyen, que par leurs baptêmes, s'ilz sont des éleuz de Dieu & de son alliance : & qu'elles ne ont nul commandement de Dieu de baptizer : qu'elles se meslent tant seulement de recevoir les enfans, & de bien traiter & les meres & eux, & de bien faire l'office, auquel elles sont appellées : afin que les vns & les autres ne perissent par leur coulpe. Et faisans cela, elles seront dignes d'estre tenues pour sages femmes, comme elles en portent le nom. Si elles font autrement, il ne les faudra plus appeller Sages femmes, mais Folles, & Vieilles forcieres : qui ont plus de fiance en leur superstition, qu'en la promesse de Dieu, & qui entreprennent ce qui ne leur appartient nullement. Car il vaut mieux que l'enfant meure sans baptême exterieur, qu'en

qu'en receuoir vn tel, qui n'est point baptesme: veu qu'il n'a nul fondement en la parolle de Dieu: & que violer l'ordonnance d'iceluy par telle temerité & arrogance, & souiller les saintz Sacremens par telles superstitions.

THO. Je crain fort, Eusebe, qu'en disputant en ceste maniere, le limbe & le purgatoire que tu soustiens, ne s'en aillent tantost du tout abbatuz. Car à ce que i'en puis iuger, celuy des petis enfans est du tout par terre, si tu ne le releues. Le purgatoire ne se tient plus guere: il y reste encore le limbe des Peres, duquel ie desire fort sauoir la resolution, & entendre s'il fera tout vn avec paradis: car Theophile l'a desia presque prouué, parlât de l'estat de ceux qui estoient au sein d'Abraham. Mais puis que nous auons desia depesché le limbe des enfans, parauenture que ce sera assez besogné pour ce coup, & qu'il vaudra mieux remettre l'autre à vn autre iour: afin qu'Eusebe ait vn petit plus d'espace, pour le fortifier contre les assautz qu'il receura en brief. Car s'il ne le fortifie mieux, que celuy des petis enfans, & s'il ne le defend plus vaillamment: ie crain fort, qu'il ne reçoie aussi grande breche comme l'autre, & qu'il ne soit aussi du tout mis par terre.

EV. Quand bien ainsi seroit, tu ne t'en deuerois pas beaucoup esmerueiller: car vous estes tous trois contre moy. Ce n'est donc pas

de merueille, si i'ay de la difficulté à soustenir ce combat. Car s'il est dit en commun prouerbe, que Hercules mesme ne peut contre deux: comment pourray ie tenir contre troys?

T H O. Tu ne tiens pas contre troys? Car ie suis pour toy & avec toy. Et par ainsi, nous sommes deux contre deux. Encore as tu cest auantage enuers Hilaire, qu'il ne te fait pas grande guerre. Car il ne se fait que iouer avec nous. Tu n'as que Theophile, qui te presse vn petit bien de pres. **E V S.** Hilaire se ioue, en la sorte qu'il a dit luy mesme, tellement qu'il mord en riant, voire quelque fois plus aigrement, que s'il faisoit semblant de parler à bon escient. Quant à toy, tu es des aides qui empeschent plus qu'elles n'aident. Tu es des compagnons qui trahissent & vendent leurs compagnons, & des gendarmes qui s'enfuyent quand ilz voyent venir les coups: ou qui se rendent soudainement à leurs ennemis, sans combattre, pour les euitter. Car quel deuoir est-ce que tu fais à defendre nostre cause? Tu ne te contentes pas de consentir à noz aduersaires en toutes choses: mais, qui pis est, tu te bendes avec eux contre moy, & me piques comme eux. Ce n'est pas l'office d'un bon & loyal compagnon, & d'un vaillant gendarme, de laisser son compagnon au besoin, & au plus fort, & luy faire la guerre.

T H O. Ie le confesse: mais ie ne te ioue point de
de

de telz tours. Il te semble que ie te soye traistre, pource que ie ne suis pas tant obstiné comme toy. Soye asseuré que ie n'ay pas moins de cœur à soustenir la verité, que toy. Mais que veux-tu que ie dise, quand ie voy que raison nous défaut, & que nostre cause n'a nul bon fondement en la parolle de Dieu? Ie ne desire point, quant à moy, de batailler contre verité: mais de la cognoistre & de la suyure & defendre, si ie puis. Parquoy, ie me tourneray tousiours du costé, duquel ie la verray plus claire. Si tu estimes cela inconstance & trahison: ie ne y fauroye que faire. Quant à moy, ie n'estime pas l'homme sage & constant, mais fol & opiniastre, celuy qui veut defendre sa cause, contre toute raison, seulement par obstination: & demeurer là obstiné, seulement afin qu'il ne soit contraint, de recognoistre qu'il a esté vaincu. De ma part, ie ne me soucie lequel de vous veinque, pourueu que la victoire demeure à verité. **EV.** Ie ne desire aussi autre chose. **THO.** Bataille donc vaillément, non pas pour resister à verité, mais pour la defendre: & tu verras comme ie demeureray conioint avec toy, pourueu que ie voye verité estre de ton costé. **EV.** I'en feray mon deuoir: & puis ie verray que tu feras. Nous demourerons donc sur ce point: & cependant nous prendrons tous vn petit de respit, pour retourner plus frais au combat. **THE.** Ce sera bien fait.

LE SOMMAIRE DV QVATRIEME Dialogue des enfers, appellé le Sein d'Abraham.

La cause pour laquelle ce Dialogue est appellé, le Sein d'Abraham, peut estre facilement entendue, par les choses qui ont delia esté deduites par cy deuant, appartenantes à ceste matiere. Il y aura aucunes matieres traitées, qui paraenture pourront sembler à aucuns plus curieuses que profitables: mais i'ay esperance, que celuy qui les considerera de pres, trouuera par experience, qu'elles ne sont pas vaines & sans profit, & qu'il cognoistra que ie n'ay pas entrepris de les traiter sans cause. Car pource qu'il y a aucuns poinctz, desquelz plusieurs s'enquierent curieusement, & autour desquelz plusieurs tombent en des grans erreurs: il m'a semblé que ce ne seroit pas chose impertinante, de monstrier iusques où on se pouuoit raisonnablement enquerir de ces choses, & remonstrier les erreurs qui s'y commettent, principalement par les Papistes, touchant le Limbe des peres, & la difference de la Loy & de l'Euangile, & touchant le merite de Iesus Christ: & par les dormeurs, qui estiment que les ames dorment, sans sentir ne mal ne bien, depuis que la separation en est faite d'avec le corps, au trespas de l'homme, iusques au iour du grand & dernier iugement. Il y aura aussi vn autre profit, en plusieurs passages des saintes Escritures, concernans ces matieres, qui seront exposez clairement. Il fera donc parlé, de l'estat, non seulement des ames des peres anciens, qui sont mortz deuant le premier aduenement de Iesus Christ, mais aussi de tous les autres, qui ont esté, sont & seront, depuis le commencement du monde, iusques à la consummation d'iceluy, tant eleuz que reprouuez: & semblablement de celuy des Anges, tant bons que

que mauuais, autant qu'il me semble qu'on en peut cognoître & iuger, par ce qui nous en est reuelé aux sainctes Escritures & non d'auantage. Or en la deduction de ceste matiere, il sera parlé ausi de paradis, & de la difference & conuenance d'iceluy, & du sein d'Abraham, & de celuy d'Adam, de Noé & de Iesus Christ, & de la difference de paradis terrestre & celeste, & de l'opinion des anciens docteurs de l'Eglise, touchant le sein d'Abraham & le limbe des peres. Item de l'ancienneté de l'Eglise, & de l'Eglise du vieux & du nouveau Testament, & de la difference de l'une & de l'autre, & des viuans & des trepassés, qui ont esté soubz icelles, & des figures anciennes, & de la verité Euangelique: du sacrifice perpetuel de Christ, & de la vertu & efficace d'iceluy. De l'agneau occis dès le commencement. De l'ancienneté & eternité de la doctrine de Iesus Christ & de son efficace. De la nature & vertu des Sacremens & de la foy. Du desir que les peres anciens ont eu de voir Iesus Christ, & de la cognoissance charnelle & spirituelle d'iceluy, & de la cognoissance de Dieu deuant & apres l'aduenement de Iesus Christ: De monter au ciel; des demeurances & logis en la maison de Dieu. De la mort, resurrection, ascension & triomphe de Iesus Christ: De la captiuité deliurée: De la prestrie Leuitique, & celle de Christ: des sentences des anciens docteurs touchant la descēte de Iesus Christ aux enfers: du commencement, de l'accroissement & de la consommation du regne de Iesus Christ & de paradis & d'enfer, en vn chacun: de l'accroissement de la science & de la gloire & de la felicité des anges, & de leur communication avec l'Eglise, & de leur ioye & tristesse, & de leur perfection & imperfection, & de leur restauration par Iesus Christ: & de l'excellence de la doctrine chrestienne: de l'accroissement des tormens des diables: de l'excellence & abondance de la science de Dieu, & des dons d'iceluy, par la venue de Iesus Christ: de la nature &

de la vertu & violence de la cōscience: de la fiction des poëtes, touchât les furies infernales: du iugement d'un chacun, apres le decez de ce monde, & en quoy il est desia fait, & en quoy il reste encore à faire.

LE QVATRIEME DIALOGUE,
appellé Le Sein d'Abraham.

Eusebe, Theophile,
Thomas, Hilaire.

Eusebe.



Vand nous auons disputé du Limbe des peres anciens, i'ay mis difference manifeste entre iceux, & les autres qui estoient detenuz ou en purgatoire, ou en enfer. Parquoy tu peux bien entendre, Theophile, que ie ne veux pas du tout nyer, que les peres, qui estoient detenuz aux Limbes, n'eussent desia quelque participation des ioyes celestes: mais nō pas si grandes, pour beaucoup, qu'ilz les ont eues, apres la passion & la mort de Iesus Christ. Toutefois, combien qu'ilz fussent en vn estat fort meilleur que les autres, qui estoient en torment: si est-ce neantmoins, que cest estat la, a chāgé de beaucoup, apres la venue de Iesus Christ, & qu'ilz ont esté transpor-

portez d'un lieu plus triste, en un lieu trop plus ioyeux & glorieux.

THE. J'espere, si nous nous entendons bien les uns les autres, que nous ne ferons pas loing d'accorder, & que nous ne trouuerons pas à la fin guere autre differēce, entre les saintz qui sont trepassez souz le vieil & le nouveau Testament, tant pour tant, qu'entre les viuans, qui ont vescu souz l'un & souz l'autre: comme ie le te mōstreray tantost plus à plein. Mais il me semble que tu te trompes un petit, en ce transport des ames: duquel tu as tantost parlé, & que tu imagines le changement des lieux d'icelles, comme ceux des corps. Or quand nous parlōs de la gloire de Dieu, & de la beatitude des bien-heureux, il ne la faut pas tāt mesurer selon les lieux, que selon la maniere, en laquelle Dieu se rend present à eux, & leur manifeste sa gloire. Car en quelque lieu que Dieu se monstre benin & fauorable aux siens & leur manifeste & communique sa gloire, il apporte aussi tousiours quelque communication de son paradis avec soy, correspondante à la proportion, de la communication de sa gloire.

*Considera
tion de l'e-
stat des
ames.*

EV. J'enten bien qu'il ne nous faut pas imaginer, que les ames soyent cōme les corps: mais toutesfois, les anciens Docteurs de l'Eglise, ont mis grande difference, entre le lieu au-

*Chryso.
Tom. 7.
Hom. 15.
in euang.
Luc.
La sctence
de Chry-
sostome
touchant
le limbe
des peres*

quel les peres anciens estoient, auant le premier aduenement de Iesus Christ, & celuy auquel ilz sont à present: comme il appert clairement, par ce que Chrysofome en a escrit, parlant du Riche & de Lazare. Il faut considerer (dit-il) qu' Abraham estoit vers les enfers. Car Christ n'estoit pas encore ressuscité, pour le mener en paradis. Auant que Christ mourust, nul n'estoit monté en paradis, sinó le brigand. Ce glaive flamboyant & tournoyant, cloisoit paradis. Nul ne pouuoit entrer en paradis, lequel Christ auoit clos. Le brigand y est entré le premier, avec Christ, & tantost apres: Abraham n'estoit point encore en paradis. Car Christ n'y estoit pas encore entré, avec le brigand. Tu vois icy clairement, que Chrysofome met difference toute manifeste, entre paradis & le sein d' Abraham, & qu'il loge le sein d' Abraham, vers les enfers. Il ne faut pas toutesfois douter, que Chrysofome en ait escrit autrement que toute l'Eglise catholique, & tous les autres Docteurs de l'Eglise le croioient de son temps, & l'auoyent creu parauant.

THE. S'il y auoit quelque passage en la sainte Escriture, qui parlait de ceste matiere, en la maniere que Chrysofome & aucuns des anciens en ont escrit, ce tesmoignage auroit plus de poids. EV. Ce passage de saint Luc, sur lequel Chrysofome a escrit cecy, n'est il

il pas assez clair & assez expres? THE. Il est là dit bien expressement, qu'il y a grande distance, depuis le sein d'Abraham, iusques en enfer, auquel le riche estoit: mais il n'est point dit, que le sein d'Abraham, auquel Lazare estoit, fust aux enfers, ny en leurs fauxbourgs. E v. Pourquoy est-ce donc; que ce sein d'Abraham, auquel Lazare a esté porté par les Anges, n'a aussi bien esté appelé paradis, comme le lieu auquel ce pource brigand a esté receu, qui a ouy de Iesus Christ: Tu seras aujourdhuy en paradis avec moy? D'autre part, pourquoy est-ce qu'il n'est faite aucune mention de Dieu, en ce passage, & qu'il n'a point parlé luy mesme au riche, mais Abraham tant seulement? Ne nous est il pas montré bien clairement par cela, que la presence de Dieu n'estoit point là, telle qu'elle est en paradis, ne la fruition de sa vision?

Sein d'Abraham & paradis.

Luc 23.

THEO. La diuersité des noms, ne change pas les choses. Car le lieu & l'estat des bienheureux, est nommé en maintes sortes, aux saintes Escritures. Il est appelé Sein d'Abraham en ce passage de S. Luc, pour les causes qui ont desia esté dictes: pour monstrier clairement que l'estat de ceux qui reposent en la foy d'Abraham, est bien differant à celuy des infideles qui n'ont point fuiuy celle foy. Doncques, ce sein d'Abraham se doit proprement chercher

en la promesse & en la parolle de Dieu, qui est si capable, qu'elle comprend tous ceux qui la reçoivent par foy, & leur baille logis & place, en celle vie bien-heureuse, qui est préparée à telz personnages. Comme donc l'estat des ames de tous les fideles qui sont trepassez depuis Abraham, iusques à la venue de Iesus Christ, a esté appellé le sein d'Abraham, à cause de la promesse qui luy a esté faite, & de la Foy excellēte, par laquelle il en a esté fait participant: aussi pour semblable raison, auāt qu'il fust aucune memoire d'Abraham, les Patriarches & les fideles, qui ont esté deuant luy ont eu leur sein, c'est à dire leur estat, semblable à celui d'Abraham & de ses enfans, selon la portion de leur foy, & la manifestation de la grace & misericorde qui leur a esté faite. Parquoy Adā a eu son sein, pour luy & pour tous ses enfans, qui sont mortz en la foy de la promesse qui luy a esté faite, iusques au temps du deluge, auquel la promesse a esté renouellée à Noé: depuis lequel Noé, & les siens ont eu le leur, iusques au temps d'Abraham, auquel la promesse a encore esté renouellée & manifestée plus clairement & plus specialement. Car alors Dieu a élu vne certaine famille, & vn certain peuple, pour manifester plus richement les richesses de sa grace & de sa misericorde. Parquoy à cause qu'Abrahā a esté le premier
de

de ceste famille, & de ce peuple, auquel la promesse faite au parauant à ses peres, & l'alliance que Dieu auoit desia avec eux, a esté renouvellee & esclarcie d'auantage, & qu'Abraham a esté comme vn singulier exemple & miroir de la Foy, par laquelle les hommes reçoient leur salut de Iesus Christ: l'estat de ceux qui sont mortz en icelle, a esté appelé du nom d'Abraham & de son sein. Car auant qu'Abraham fust, ce nom & tiltre n'estoit point si conuenable: mais depuis qu'il est venu, comme la promesse faite aux peres, & Dieu qui l'a faite, a esté plus renommé, par le nom d'Abraham, à cause de ceste manifestation, que par le nom de point des autres Patriarches, qui auoyent esté deuant luy: aussi le semblable a esté fait du sein & de l'estat de tous les fideles, qui sont mortz en la Foy de celle promesse. Mais depuis que Iesus Christ a esté manifesté en chair, ce sein d'Abraham a esté fait le sein de Iesus Christ: qui est maintenant appelé paradis. Car depuis que Iesus Christ, promis à Abraham, nous a esté donné du pere, & nous est nay, crucifié, mort, enseuely, resuscité & monté au ciel, regnant à la dextre de Dieu son Pere: il reçoit tous les fideles, lesquels il tient pour ses freres, en son sein, qui est ce paradis, auquel il a dit, que ce pource brigand, crucifié aupres de luy, exauçant la requeste qu'il luy auoit faite, d'a-

*Le sein de
Christ.*

voir souuenance de luy, quand il seroit en son regne. Donc quand Iesus Christ a esté mis, quant à son humanité, en corps & en ame avec ses peres, selon la chair, & que son ame a esté coniointe avec les leurs, comme son corps a esté mis en leur sepulchre: alors le sein d'Abraham a commencé d'estre conuertý au sein de Iesus Christ, & d'estre appellé d'un autre nom. Car puis que Iesus Christ est maintenant pleinement manifesté, & que les ames fideles en ont plus grande iouissance, que iamais elles n'enaoyent eu parauant: il est bien raison que leur estat soit nommé d'un nom, qui nous rende tesmoignage de l'excellence qui est en la pleine verité des choses, au pris des ombres & des figures d'icelles. Car si les ames des fideles, qui sont mortz en la Foy de la promesse faite de Iesus Christ, ont eu de la ioye & de la consolation par luy, auant ceste pleine reuelation: combien pensons nous qu'elle soit grande & augmentée d'auantage à present, qu'elles se voyent vnies & coniointes avec l'humanité de Iesus Christ, leur chef, & qu'elles voyent la parfaite image de la resurrectiõ de leur corps en luy, & de celle pleine & consommée felicité, qui sera parfaite au dernier iour? Tout ainsi dõc, comme nous ne disons plus auiourdhuy: Le Dieu d'Abraham, d'Isaac & de Iacob, & le Dieu qui a tiré le peuple de la terre d'Egypte, quand

quand nous luy voulons bailler le tiltre , qui sont à present les plus conuenables à son Eglise, mais l'appellons Dieu , pere de nostre Seigneur Iesus Christ , qui nous a rassemblés de toutes les terres auxquelles nous estions espars comme Ieremie l'a predict, & qui nous a esleu en son Filz dès le commencement du monde: aussi nous n'appellons plus l'estat des fideles trepassez, Le sein d'Abraham, & n'en cognoissons plus aucun autre , sinon celuy de Iesus Christ, qui est paradis, pour receuoir tous les croyans. Et quant à ce que tu as dit de la vision & de la presence de Dieu, ne pense pas qu'elle ait esté cachée , ny à Abraham , ny à ceux qui estoient en son sein avec luy . Car Dieu n'eust pas dit: Je suis le Dieu d'Abraham, d'Isaac & de Iacob , s'il n'eust esté avec eux, & si eux n'eussent esté viuans avec luy . Car il est proprement appelé le Dieu de ceux ausquelz il manifeste sa presence paternelle & fauorable . Et si Iesus Christ a introduit Abraham, parlant côme en la personne de Dieu, tu n'en dois pas estre ébahi. Car comme Abraham est appelé le pere des croyans, d'un tiltre qui toutesfois appartient proprement à Dieu: aussi il est introduit parlant au riche, pour plus grande condamnation d'iceluy . Car si les saintz doiuent estre iuges du monde & des anges, selon le tesmoignage de l'Apostre , il estoit bien

Eph. 1. 7.
Hier.

Exo. 3.
Matt. 23.

Rom. 8.

1. Cor. 6.

Matt. 1.

conuenable, que Abraham pere de nostre Seigneur Iesus Christ selon la chair, estant là proposé comme la figure de Iesus Christ, & vne image de son iugement, annonçast la sentence du iugement de Dieu, à ce malheureux, qui s'estoit vanté d'estre des enfans d'Abraham, duquel il n'auoit point fuiuy ny la foy, ny la doctrine, ny les mœurs comme Lazare.

E V S. Si ainsi est cōme tu dis, pourquoy est ce donc, que l'estat des fideles (trepassés, n'est plus tost appelé, le sein de Christ suiuant celle premiere maniere de parler, que paradis?

R E O. Il est appelé paradis, par vne maniere de parler figurée. Car paradis est vn nom pris des Grecz, qui signifie en leur langue, proprement vn vergier. Combien que plusieurs estimēt que les Grecz l'ayēt pris des Persiens.

Gen. 2. 3.

Et pource qu'Adam a esté mis en ce beau vergier, auquel Dieu l'auoit créé, & que le lieu estoit fort delectable: nostre Seigneur Iesus Christ a prins ce nom, pour signifier par iceluy, l'estat des bien-heureux, pour donner mieux à entendre, par la similitude des choses corporelles, la grāde felicité, la ioye, & le plaisir qui est en l'estat des bien-heureux: & qu'il estoit le moyen, par lequel l'homme estoit remis, nō seulement en l'estat auquel il auoit esté premierement créé de Dieu, mais en vn estat encore trop plus excellent, sans nulle comparai-

Paradis
terrestre

⁊ celeste.

son.

son. Et combien qu'il n'y ait point de comparaison, quant à l'excellence, entre le plaisir qui pouuoit estre en ce premier paradis, auquel Adam a esté logé au commencement, & celuy qui est en la vie eternelle : si est-ce toutefois, que pourtât que ce vergier de plaifance, a esté figure de cest estat des bien-heureux, Iesus Christ a bien voulu vser de ce nom de Paradis, pour declairer comment la verité de celle figure, estoit pleinement accomplie, par son moyen. Car c'est luy, qui desia dès le commencement, a osté ce glaive flamboyant del'huis, qui empeschoit les hommes d'entrer en ces beaux champs Elysées, non pas terriens & materielz, comme le paradis de Mahumet ou des poetes, mais spirituelz & celestes. Car depuis que la promesse a esté faite à Adā, de la semence de la femme, qui deuoit briser la teste du serpent, laquelle a esté derechef confermée & éclaircie d'auantage aux autres Patriarches, principalement à Abraham & à Dauid : tous ceux qui ont adiousté vraye Foy à icelle, iceux ont trouué acces à celle ioye celeste, qui nous a esté acquise, par Iesus Christ. Ceux cy donc ne ont point esté empeschés, par ce glaive flamboyant, qui figuroit que nul, estant en l'estat auquel Adam estoit cheu, ne pouuoit paruenir à la vie, sinon par le moyen de Iesus Christ, qui est la voye, la verité & la vie, qui a esté fi-

Gen. 3.

Le glaive
à l'huis de
paradis.

Gen. 3.

Gene. 15. 22

Psal. 132.

2. Sam. 7.

1. Cor. 15.

Artre de
vie.

Iean 14.

Gen. 3.

Gen. 3. 12.

15.

Gal. 3.

Chryso.

Tom. 6.

Hom. 15.

in Luc.

guré par l'arbre de vie . Mais depuis que celle
vie s'est communiquée aux hommes , tous ceux
qui en ont esté faitz participās, iceux ont eu ac
ces facile, à ce beau vergier celeste de delices.
Les autres qui n'y ont point cōmuniqé, iceux
sont tousiours empeschez d'y entrer par ce
glaiue flamboyāt, qui figure l'ire de Dieu, qui
forclost l'hōme de tout acces à luy. Or quand
Dieu a fait la promesse de celle semence be
neiste, qui est Iesus Christ, il a apporté à Adam
& à tous ses eleuz, le fruit de cest arbre de vie,
qui a apporté la vie, à tous ceux qui ont gousté
celle promesse par Foy, laissant en la mort,
ceux qui ont fait du contraire: comme le riche
duquel nous auons parlé. Et pourtant Chryso
stome n'a point fait de difficulté de dire, en
ce mesme sermon, allegué par toy: Le sein d'A
braham, estoit le Paradis du pouure, de loing.
Aucun me dira: Paradis est-il en enfer? Je dy
cecy, que le sein d'Abraham est la verité de pa
radis: mais ie confesse aussi, le saint paradis.

E V. Cela ne contreuient point, à ce qu'il
a dit par apres, que i'ay allegué, qui est comme
la declaration de cecy, qu'il auoit dit parauāt,
THE. Mais il a voulu donner à entendre, par
cecy, qu'il a dit en premier lieu, ce qu'il vou
loit dire par-apres. Je confesse bien qu'il met
quelque difference, entre le sein d'Abraham,
& paradis, c'est à dire, entre l'estat des ames,
qui

qui a esté deuât l'aduenement de Iesus Christ, & celuy qui est venu par-apres : mais non pas tel que vous le mettez. Il dōne bien à entēdre, que le sein d'Abraham estoit vn paradis, mais non pas encore si parfait, qu'il a esté par-apres. Et pourtant il dit, que c'estoit le paradis de Lazare, mais de loing: pour raison que la fruition de Iesus Christ, n'estoit point encore si parfaite, souz les ombres & figures de la Loy, comme elle l'a esté, souz la verité d'icelles, apres la pleine manifestation de Iesus Christ. S. Augustin a parlé beaucoup plus clairement de ce sein d'Abraham, affermant ouuertement, qu'il n'a point esté aux enfers. Car il confesse pour le premier, qu'il n'a point peu trouuer en toutes les saintes Escritures, que les enfers soyent iamais prins en bonne partie. Surquoy il dit: Si ainsi est, qu'il ne se lit en aucun lieu aux authoritez diuines, certes il ne faut pas croire, que ce sein d'Abrahā, c'est à dire, celle habitatiō de vn repos secret, soit quelque partie des enfers: combien qu'il apparaisse assez, comme il me semble, par ces parolles mesmes d'un si grand maistre, qui dit qu'Abraham a dit: Il y a grand gouffre estably, entre vous & nous, que le sein de celle si grāde felicité, n'est pas vne partie ny comme vn membre des enfers. Et puis incontinent apres, il conclud ainsi: Et pourtant, si la sainte Escriture eust dit, que Christ estant

*Aug. Tom
2. Epi. 99.*

mort, fust venu en ce sein d'Abraham, n'ayant point nommé enfer, ny ses douleurs: ie suis émerveillé, s'il y a nul qui osast affermer, qu'il fust descendu aux enfers. Saint Augustin parle icy bien clairement, & monstre qu'il trouue bien estrange de faire mention du sein d'Abraham, entre les enfers. Mais pour mieux entendre ce que i'ay desia commencé à toucher, de la différence ce qui peut auoir esté, entre l'estat des trepassez, deuant & apres l'aduenement de Iesus Christ: considerons premierement quelle difference l'Escripture met, entre les viuans, qui ont esté tant souz le vieil que le nouveau Testament: & puis il nous sera facile à iuger, par la cognoissance de ces choses, de la difference des estatz des trepassez, adioinctz les autres passages de l'Escripture, qui nous peuuent seruir à cest affaire. E V. I'en suis content.

THE. Tu ne me peux nier, que l'Eglise de Iesus Christ, n'ait commencé depuis la creation du monde, & le premier iuste qui fut iamais, & qu'elle cōtinuera iusques au dernier, & à la consommation du monde, & durera eternellement. E V. Ie le te confesse. THE. Ils'en suit par celle mesme raison, que l'Eglise des Patriarches & des Prophetes, qui ont precedé l'aduenement de nostre Seigneur Iesus Christ n'est autre, que celle mesme de ses Apostres, Euangelistes & disciples: & que les fideles
du

du peuple d'Israel, & ceux du peuple Chrestien, ne sont qu'un peuple & une Eglise. Car ilz ont eu un mesme Dieu, un mesme Christ, *Heb. 11.* & des mesmes promesses. Ilz ont eu un mesme esprit de Foy: & ont mangé d'une mesme viande spirituelle, & beu d'un mesme bruuage *2. Cor. 4. 1. Cor. 10.* avec nous, comme l'Apostre le tesmoigne.

E V. Il n'y aura donc point de difference, entre les anciens Peres & nous. Dequoy a donc feruy la venue de Iesus Christ? T H E. Je n'ay pas encore dit cela. Car ie y trouue grande difference. E V. Quelle? T H E. Aussi grande que d'une estoille au soleil: du point du iour & de l'aube, au plein midy: de l'ombre, au corps: de l'image, à la verité: de la chose promise, à la chose donnée. E V. Tu reuiendras encore à mon propos. Car il semble, par ces parolles, que tu ne laisses aux anciens, que les ombres & les figures, & que tu nous donnes le corps & la chose figurée. Il y a donc grande difference.

*Difference
entre le vi
eil & le
nouveau
testament.*

T H E. Encore ne m'entens tu pas bien. Je ne nie point, qu'ilz n'ayent eu tout ce que nous auons: mais non pas si claiement, si excellemment & si magnifiquement, ny en telle abondance de gloire & de maiesté, & en telle efficace. Car la cognoissance de Dieu, & l'intelligence des saintes Escritures, a bien esté donnée plus

*2. Cor. 3.
Heb. 12.*

Esa. li.
A&A. i. 2.
Ican 7.

gneur Iesus Christ, qu'elle n'auoit esté parauant, non seulement en la terre de Canaan, & au peuple d'Israel, mais en toutes terres, pays & nations : & l'Esprit de Dieu pareillement avec tous ses dons, & ses graces & richesses, a bien esté distribué en plus grande abondance, efficace, vertu & magnificence, que iamais n'auoit esté.

*Difference
entre les
mortz souz
le vieil &
le nouveau
testament.*

E V. Ce que tu dis n'attouche encore qu'aux viuâs, qui ont vescu tant souz le vieil que souz le nouveau Testament. Mais quelle difference mets-tu entre les vifz & les mortz, souz l'un & l'autre? T H E. Ce seroit temerité trop grande à nous, de définir de l'estat des mortz, & d'en affermer autre chose, que ce qui nous en est reuelé manifestement par les saintes Escritures. Toutesfois, à cause qu'il y a en icelle quelques passages qui nous donnent lumiere à cecy : ie ne voudroye pas faire grande repugnance de mettre en cest endroit quelque telle difference entre iceux, que nous auons mis entre les viuans. E V. Il semble donc que tu vueilles dire que les portes de paradis n'estoyent pas moins ouuertes deuant la mort & la passion de Iesus Christ, qu'apres : & qu'il n'y a eu autre difference entre la ioye & fruition diuine des Peres anciens & des Chrestiens trepassez, excepté que maintenant tous l'ont plus ample & plus excellente.

T H E.

THE. Quant à moy, là ou ie n'ay pas l'Eſcriture bien expreſſe, ie laiſſe à chacun ſon iugement libre, pourueu qu'il ſoit reiglé par la parolle de Dieu. Touchant ma part, ie t'en expoſeray ce que i'en puist tirer & comprendre des ſainctes Eſcritures: par leſquelles il nous eſt fait aſſez notoire, que combien que Ieſus Chriſt ait eſté offert & immolé en la croix, *Leſacrifice de Chriſt, eternal.* pour ſatisfaire à la iuſtice de Dieu pour nous, au temps qui luy auoit eſté ordonné du Pere: *1. Cor. 5. Rom. 3. 8. Gal. 4.* ſi a il neātmoins eſté occis & immolé en la preſence de Dieu, depuis le commencement du monde. Car il eſt eſcrit: L'Agneau a eſté occis dès le commencement du mode. Et derechef, *Apo. 19. Heb. 13.* Ieſus Chriſt eſt depuis hier, d'auioirdhuy, & à tout-iamais. Par ces parolles l'Apoſtre comprend tout le temps paſſé, preſent, & auenir. Ieſus Chriſt luymeſme a regardé à cecy, quād il a dit, Abraham a veu mon iour, & s'en eſt reſioury. Car combien, qu'au regard de nous, il ait eſté crucifié en la plenitude du temps, en ces derniers iours: toutesfois en la preſence de Dieu il l'a touſiours eſté: & ſon ſacrifice luy a eſté eternallement preſenté. Car en Dieu n'a point de difference de temps, comme en nous, à cauſe que toutes choſes luy ſont preſentes, & qu'il eſt par deſſus le temps, & hors d'ice-luy. Car mille ans deuant luy, ne luy ſont que *Pſal. 90. 2. Pierre 3.* vn iour. Parquoy, en la meſme ſorte que la

mort & passion de Iesus Christ sert maintenât à nous, qui croyons qu'il a esté crucifié pour nous, combien qu'il ne pende plus en croix: aussi tien-ie pour certain, qu'elle a profité à ceux qui ont vescu auant qu'il ait esté crucifié, qui ont creu qu'il deuoit venir, & mourir pour eux, ainsi que nous croyons qu'il est venu, & qu'il est mort pour nous.

E V. Il me semble que ces passages, que tu as alleguez, pour prouuer ton intention, ne sont guere propres. Car pour le premier, saint Pierre nous declare comment nous deuons entendre celuy de l'Apocalypse, de l'Agneau qui a esté occis dès le commencement du monde: autrement que tu ne le prens: Il dit, parlât de cest Agneau sans macule, qui est Christ, qu'il auoit desia esté ordonné deuant la fondation du monde: mais manifesté aux derniers tēps, &c. Il faut donc rapporter celle occision, non pas à l'effect d'icelle, mais à l'ordonnance que Dieu en a faite par son conseil eternal. Car ia soit que l'ordonnance en ait esté eternelle, toutesfois l'effect n'en a pas esté manifesté iusques au temps qu'elle a esté accomplie: comme S. Pierre le monstre bien clairement en ce passage. Car l'effect ne precede pas sa cause. Puis donc que ceste felicité, de laquelle nous parlons, est le principal effect de la passion & de la mort de nostre Seigneur Iesus Christ: il s'en fuit

*Le passage
de l'Apoc-
calypse.
Apo. 13.
1. Pier. 1.*

fuit bien, que nul n'y est peu paruenir auant icelle. Ie me deporté d'alleguer l'exposition de ceux qui disent, qu'il ne faut pas conioindre & rapporter ces parolles: Depuis le commencement du monde: à ce qui est là dit de l'Agneau occis: mais qu'il les faut conioindre avec ce qui precede, De ceux desquelz les nōs sont escritz au liure de vie. Car tu pourras parauenture dire, que la distinction & la punctuation de ceux-cy, est trop violente: à cause que ilz prennent ces parolles, comme si elles estoient ainsi couchées: Desquelz les noms sont escritz dès le commencement du monde, au liure de vie de l'Agneau, qui a esté occis. Combien que ie me pourroye seruir de ceste exposition contre toy: ie suis toutesfois content de prendre ce passage au sens que tu le prens: veu que ie te puis monstrier par autre moyen, comme tu l'as maintenant ouy, non seulement qu'il ne sert rien à ton propos, mais ne celuy aussi que tu as allegué de l'Epistre aux Hebreux. *Le passage de l'epistre aux Hebreux.* Car l'Apostre ne parle pas en ce lieu de l'effect & de l'efficace de la mort de Iesus Christ: mais il dit cela pour la doctrine, afin qu'elle ne semble nouvelle aux Hebreux: *Heb. 13.* comme il appert bien euidentement par ce que il les admoneste incontinent apres, de se garder d'estre demenez deça & delà par doctrines diuerses & estranges: veu que celle de

psal. 90.
2. Pier. 3.
Temps or-
donnés de
Dieu.

Iesus Christ est eternelle, & qu'il n'en a point esté d'autre vraye & certaine dès le commencement, & n'est encore à present, & ne sera iufques à la fin. Parquoy, ce que tu as aussi mis en auant, tant des Pseauxmes, que de la seconde Epistre de saint Pierre, touchant le temps qui est tousiours present à Dieu, ne te relieue aussi de rien. Car il est icy question, non pas de ce qui est present à Dieu, mais de ce qu'il en manifeste enuers nous, & que nous en sentons. Car combien que tout luy est present, quant à luy, toutesfois il a ses temps ordonnez, au regard de nous, pour nous manifester son conseil eternel, selon l'ordonnance qu'il en a faite en iceluy. **THE.** Si tu auois esté bien instruit en la doctrine de l'Euāgile, ie seroye ébahy d'ouyr

Erreur des
papistes
touchant
le vieil &
le nouveau
testament.

de toy les propos lesquelz tu tiens: mais considerant la doctrine en laquelle tu as esté nourry: ie n'en suis point fort esmerueillé. Car ceux qui en sont les Docteurs, n'entendirent iamais bien la difference qui peut estre entre le vieil & le nouveau Testament, & entre la Loy & l'Euangile. Et pourtant ilz ont estimé, qu'il n'y auoit presque rien au vieil Testament, sinon des ombres & des figures, sans vraye communication des choses spirituelles, figurées par icelles. Et pource ilz ont dit, que les Sacremens du nouveau Testament conferent grace, mais non pas ceux du vieil: non pas le Baptesme de

Iean

Iean Baptiste mesme . Toutesfois sainct Paul n'y met pas si grande difference , quand il fait la viande spirituelle , que les Peres ont mangée, & la nostre, toute vne mesme viande: & le
 1. Cor. 10.
 bruuage spirituel semblablement, tout vn mesme bruuage . En quoy il monstre bien clairement, que combien que les Sacremens & les signes extérieurs ayent esté differens: toutesfois la substance d'iceux n'a pas esté differente , ny la vertu & la communication spirituelle d'icelle, sinon en la maniere qui a deüa esté dite. Par quoy, comme nous ne tenons pas les Sacremens du Baptesme & de la Cene , seulement pour des ombres & des figures vaines, des choses representées par iceux, à cause des signes visibles qui y sont: mais nous tenons pour asseurez, que ces choses sont communiquées à la verité à ceux qui les reçoient par Foy : aussi nous deuons estimer que les ombres & les figures du vieil Testament n'ont pas esté sans la substance & les effectz , & les fruitz des choses figurées par icelles , selon le temps, enuers ceux qui en ont esté renduz capables par la Foy: ou autrement, de quoy eussent elles seruy: pour amuser son Eglise, comme en des ieux de petis enfans?
 E V. Elles ont seruy pour figurer Iesus Christ, qui deuoit venir en chair. N'est-ce pas bien assez?
 T H E. Tu veux donc bailler des figures à Iesus Christ, qui ne seruent que de fantos

Sacremens
 du vieil &
 nouveau
 testament.

De la ver-
tu de la
doctrine e-
uangelique.

mes, & comme des simples peintures, qui n'ont rien en elles de ce qu'elles representent, sinon l'apparence & la forme extérieure. Mais la nature des Sacremens est autre. Combien que la grace de Dieu n'est pas liée ny enclose aux signes extérieurs: toutesfois le Seigneur ne fraude pas les fideles de la promesse qui leur est faite en iceux, non plus souz le vieil Testament, que souz le nouveau, selon la dispensation & la portée des temps & des personnes, & la portion de la Foy. Nous pouuons dire le semblable de la doctrine, de laquelle les Sacremens sont comme dependâces & seaux. Car comme les Sacremens ne sont iamais administrez en l'Eglise, que la vertu de Dieu, qui les a ordonnez, ne besogne par iceux enuers les fideles: aussi n'est la doctrine qu'ilz ont pour fondement. Parquoy, ce que tu as repliqué contre le passage de l'Epistre aux Hebrieux, ne greue point ma cause. Car si la doctrine de Christ est éternelle, aussi l'est la vertu d'icelle. Si donc elle n'est pas auiourdhuy seulement vn son qui resonne en l'air par la predication de l'Euangile, ou vne lettre morte, mais a sa vertu & son efficace par l'Esprit de Christ: aussi elle n'a pas esté oiseuse le temps passé, & sans Christ, & sans l'Esprit d'iceluy: ou autrement elle n'eust pas esté doctrine de Christ, & n'eust de rien seruy. Surquoy tu dois encore noter vn point, qui fait

fait pour moy . Quand l'Apostre afferme que la doctrine de Iesus Christ, laquelle il presche, a esté dès le commencement du monde : il declare euidemment, que ia soit que le ministère & la doctrine de la Loy ait eu plus grand regne souz le vieil Testament, que le ministère & la doctrine de l'Euangile : ceneantmoins l'une n'a pas esté sans l'autre. Je dy encore d'auantage, que la doctrine de l'Euangile, & le ministère d'icelle a precedé le ministère de la Loy: & que le ministère de la Loy n'a esté dresfé, sinon pour seruir à celuy de l'Euangile. Car auant que la Loy ait esté baillée par Moïse, Abraham a obtenu tesmoignage de Dieu, qu'il a esté iustificié par la Foy : & que ce qu'il a creu à sa promesse, luy a esté réputé pour iustice: comme saint Paul le deduit tresbien, escriuât aux Romains & aux Galatiens. Tu ne me nieras pas cela? E V. Non.

*L'ancien-
neté de la
doctrine E
uangeli-
que.*

Gen. 15.

*Rom. 4.
Gal. 2. 3.*

T H E. Puis qu'ainsi est, penes-tu que la Foy ait esté en ce temps là du tout oïseuse, sans vraye communication de Iesus Christ? Penes-tu que celle ioye qu'Abraham a receue, quand il a veu par Foy le iour de Christ, n'ait esté sinon vne esperance pendue en l'air, sans vraye presence & possession de celuy que il attendoit? Nenny certes: car cela seroit trop contraire à la nature de Dieu, & à la nature de la Foy. Car puis que la Foy regarde Dieu en

*La vertu
de la foy.*

Iean 8.

*Comence-
ment de la
cōmunica-
tion de
Christ.*

ses promesses: elle se rēd present ce qui luy est promis, en sorte qu'elle en prend desia possession. Car puis que l'homme est vny avec Dieu par icelle, il a Dieu & tous ses biens pour heritage. Tu ne dois pas donc trouuer estrange, si ie dy que les fideles sont entrez en la possession de Christ, & de tous ses benefices, depuis qu'il a commencé à leur estre manifesté par sa Parolle, comme il a esté decreté au conseil eternal de Dieu, & quand ilz l'ont commencé à le receuoir par Foy. Car ce qui a esté present à Dieu de toute eternité, leur a aussi esté fait present par leur Foy, toutes & quantesfois qu'il leur a esté reuelé par sa Parolle, & qu'ilz y ont adiousté foy. Parquoy, l'effect de la mort & passion de Iesus Christ ne precede pas sa cause: car elle est eternelle deuant Dieu, & tousiours presente à la Foy. Pour semblable raison, ce que i'ay dit du temps, n'est point impertinent à mon propos: mais aucontraire, si ce que ie dy n'estoit vray, quelle difference pourrions-nous mettre entre les fideles & les infideles, & entre les éleuz & les reprouuez, qui ont esté deuant l'aduenement de Iesus Christ en chair? D'ou vient la difference qui y a esté, sinon de la communication reale & vraye, & non seulement figurée & imaginatiue, que les fideles ont eue avec Iesus Christ & ses benefices, de laquelle les infideles ont esté priuez

uez & forclos? Parquoy, si les fideles sont des-
 ia entrez en vraye possession de Iesus Christ
 & de ses benefices, viuans souz les ombres de
 la Loy: penſes-tu qu'apres leur decez de ce
 monde, eſtās coniointz de plus pres auec Dieu
 par leurs espritz, qu'ilz n'en ayent point eu
 d'auantage? Et s'ilz ont encore attendu plus
 grande perfection de leur felicité à l'aduenir:
 il ne s'ensuit pas pourtant, qu'ilz n'en ayent
 eu desia grande participation pour lors. Car
 nous pouuons dire de ceux-la, en leur endroit,
 le meſme que des fideles, que Dieu appelle
 iournellement de ce monde. Car combien que
 ilz ne ſont pas en beatitude ſi parfaite, qu'ilz y
 ſeront aux derniers temps, au iour de la finale 1. Pier. 1.
Act. 3.
 reſtauration de toutes choſes, auquel il nous re-
 ſerue le reſte des biens qu'il nous a preparez:
 toutesſois il ne s'ensuit pas qu'ilz ne ſoyent a-
 uec Dieu en grande ioye & lieſſe.

EV. Je t'ay desia dit, que ie ne nioye
 pas que les ames des Peres anciens n'euffent
 quelque participation des ioyes de la vie eter-
 nelle: mais ie veux ſeulement dire qu'elles n'e-
 ſtoient pas encore montées au ciel, & qu'elles
 ne voyoyent pas la face de Dieu, comme main-
 tenant elles & celles de tous les autres fideles
 la voyent. Et pource Iesus Christ a dit: Nul ne Iean 3.
 monte au ciel, ſinon le Filz de l'homme, qui
 eſt deſcendu du ciel, qui eſt au ciel. C'eſt auſſi

Matt. 13.

Luc 10.

Desir de
voir le
tour de Ie
sus.

la cause, pour laquelle Iesus Christ a dit à ses disciples: Beaucoup de Roys & de Prophetes, & de iustes, ont desiré de voir ce que vous voyez, & ne l'ont point veu: & d'ouyr ce que vous oyez, & ne l'ont point ouy. D'ou procedoit ce grand desir? Et qu'est-ce qu'ilz desiroient tant de voir & d'ouyr? Estoit-ce de voir des yeux corporelz Iesus Christ conuerfant en chair humaine avec les hommes, & de luy voir faire les miracles qu'il a faitz, & le ouyr de leurs propres oreilles prescher de sa propre bouche? Quant à moy, ie ne le pense pas: car leur felicité & beatitude n'estoit pas en celle veue & ouye corporelle, mais au fruit qu'ilz attendoyent de la mort de Iesus Christ: comme nous le pouuons iuger, par ce que Iesus Christ a dit à saint Thomas: Pource que tu m'as veu Thomas, dit il, tu as creu: bienheureux sont ceux qui ne m'ont point veu, & si ont creu. Pour ceste cause, saint Paul a declaré, qu'il n'estimoit pas beaucoup la presence & la cognoissance charnelle de Iesus Christ, quand il a dit: Donques nous ne cognoissons plus personne, par cy apres, selon la chair: & ia soit que nous ayons cogneu Christ selon la chair, toutesfois nous ne le cognoissons plus maintenant. Quant aux miracles, Iesus Christ luy mesme n'a il pas admonesté ses disciples, qu'ilz ne se reioyssent & ne se glorifiassent point, non seu

le

Iean 20.

Presence
charnelle
de Iesus
Christ.
1. Cor. 5.

Luc 10.

lement de ce qu'ilz les voyoyent faire à leur Maistre, mais aussi de ce que la puissance leur auoit esté donnée de les faire euxmesmes: ains qu'ilz se reiouyssent & se glorifiasent de ce que leurs noms estoient escritz au ciel? Tu peux donc iuger par ces tesmoignages de l'Escripture, que ces bons Prophetes & Roys desiroient autre chose, que celle presence charnelle de Iesus Christ.

T H E. Si tu ne te donnes garde, tu diras encore quelque chose, qui ne conuiendra guere bien avec vostre doctrine de la transsubstantiation du pain & du vin, au corps & au sang de Iesus Christ, en vostre Messe. Car si tu estimes si peu vne telle presence corporelle de Iesus Christ, comme celle que les Apostres & disciples de Iesus Christ en ont eue en leur vivant: pourquoy la requerez vous donc comme necessaire à salut, en vostre sacrement de l'autel, & non pas encore si excellente que celle la, mais vne presence, qui n'est sinon vne pure magie & sorcellerie, qui n'a fondemēt quelconque ny en la parole de Dieu, ny en la raison naturelle? Au reste, il te fait beau voir amasser les tesmoignages des saintes Escriptures, & ouyr les expositions que tu en bailles. Si tu veux presser à la rigueur de la lettre ce premier passage que tu as allegué de l'Euangile selon saint Iean: il s'ensuiura, non seulement

*Expositio
du lien de
S. Iean.
Iean 3.*

*Monter &
estre au
ciel.*

Iean 3.

1. Timo. 6.

que nul n'est monté au ciel auant l'aduenemēt de Iesus Christ : mais aussi que nul n'y monte, & n'y est encore à present, sinon Iesus Christ. Car il ne dit pas: Nul n'est monté, & n'a esté au ciel: mais, Nul n'y mōte, sinon le Filz de l'hōme qui en est descendu, & qui y est. D'autre part, si tu prens le ciel en ce passage en ce mesme sens, auquel nous le prenōs en l'histoire de l'ascension de Iesus Christ, & en l'article de nostre Foy, par lequel nous cōfessons qu'il est mōté au ciel, & qu'il est assis à la dextre de Dieu son Pere: nous pourriōs dire, non seulement que les ames des fideles qui meurent à present, n'y mōtent nō plus que celles des Peres anciēns, pour la raison qui a maintenant esté alleguée: mais aussi que Iesus Christ luymesme n'est point descendu du ciel, entant qu'il est homme, & qu'il n'y estoit point pour lors qu'il disoit ces choses: car il conuersoit visiblement & corporellement en terre: & n'auoit pas deux corps, desquelz l'un fust en la terre, & l'autre au ciel. Parquoy pour auoir la vraye intelligence de ce passage, il nous faut regarder à ce que Iesus Christ a dit parauant: Si ie vous ay dit les choses terriennes, & vous ne les croyez pas: comment croirez-vous les celestes, si ie les vous dy? Il entend donc icy par le ciel, celle lumiere de Dieu, à laquelle nul ne peut auoir accez de sa nature: & la reuelation de la gloire d'iceluy, &

& la cognoissance des choses celestes, laquelle ne vient point de la chair & du sang. Car l'homme animal, c'est à dire demeurant en son naturel, n'entend point les choses de Dieu, & ne les peut entendre. Et le sens & la prudence de la chair est inimitié contre Dieu. Il n'y a que Iesus Christ, le seul Filz de Dieu, qui est venu du sein du Pere, qui le nous a reuelé & manifesté. Et pourtant, rendant la raison de ceste rudesse & ignorance qui est aux hommes, il dit, que nul ne monte au ciel, c'est à dire, que nul ne peut auoir de soy mesme la cognoissance des choses celestes, sinon luy, & par luy, auquel elle est donnée. C'est cela qu'il appelle Monter & Estre au ciel. En quoy il nous apprend de nous humilier, sans rien presumer de nous en telle science, & à qui nous deuons auoir recours, pour y paruenir. Il nous console aussi par ce mesme moyen, entant qu'il nous declaire, que combien que nous n'y puissions paruenir de nostre nature: il ne nous en faut pas toutesfois desesperer, si nous le prenons pour nostre Maistre, & si comme disciples nous voulons apprendre de luy.

Matt. 16.
1. Cor. 2.

Rom. 8.

Iean 1.

EV. Veut il donc dire par cela, que nul n'a point eu de ceste cognoissance, ny du fruit qu'elle apporte aux hommes, auant sa manifestation en chair humaine? THE. Non: car cela seroit faux: mais que nul n'en a iamais rien

Cognoissance de
Christ auant son
aduene-
ment.

eu, & n'en peut rien auoir, sinon par luy. Car combien qu'en general, ceste cognoissance soit plus grande maintenant entre le peuple Chrestien, qu'elle n'a esté iadis entre l'ancien peuple d'Israel: toutesfois nous ne pouuons nier, qu'en particulier, plusieurs n'ayent eu trop plus de dons de l'Esprit de Dieu en iceluy, que plusieurs n'en ont à present entre le peuple Chrestien. Car ia soit qu'en cest endroit les Apostres soyent à preferer aux Patriarches & aux Prophetes: combien toutesfois en trouuerons nous aujourdhuy entre les Chrestiens, dignes d'estre comparez aux Patriarches & aux Prophetes en telles choses? Et sans faire l'og recit d'exemples, en qui trouuerons-nous vne telle Foy, qu'en Abraham?

Matt. 13.
Luc 10.

E V. Ie te confesse bien cela: mais toutesfois ces Prophetes, ces iustes, & ces Roys, desquelz Iesus Christ parle, n'ont pas eu si grand desir de le voir & de l'ouyr, sans grande cause. Car il n'est pas seulement question de la cognoissance de Iesus Christ, mais de la iouyssance. Parquoy, ce que tu dis, est plus cōtre toy, que pour toy: veu que nonobstant la grande cognoissance qu'ilz ont eu de Iesus Christ, ilz n'ont pas laissé pourtant de desirer sa venue d'une grande affection. Nous voyons mesme quelle ioye Simeon a receue, d'auoir peu tenir Iesus Christ petit enfant entre ses bras.

Luc 2.

bras. **T H E.** Cest exemple de Simeon, que tu as maintenant allegué, contreuient à ce que tu veux soustenir. Car apres auoir veu & tenu Iesus Christ, il a dit: Seigneur, tu laisses maintenant ton seruiteur en paix, selon ta Parolle. Car mes yeux ont veu ton salut, lequel tu as preparé deuât la face de tous peuples: Lumiere pour la reuelation des Gentilz, & pour la gloire de Israel ton peuple. Tu vois icy clairement, que Simeon dit, qu'il s'en va en paix & à repos, puis qu'il a veu Iesus Christ de ses yeux corporelz. Car il ne faut point douter, qu'il ne l'eust desia veu parauant des yeux spirituelz. Car comme l'Euangeliste le tesmoigne, il estoit homme iuste & craignant Dieu, attendant la consolation d'Israel: & le saint Esprit estoit sur luy: & auoit eu reuelation du saint Eprit, qu'il ne verroit pas la mort, que premier il ne veist le Christ du Seigneur. Parquoy, il vint au Temple, estant admonesté par le saint Esprit. Il n'alloit pas au Temple, apres ceste reuelation, qu'il n'y creust, & qu'il n'eust veu Iesus Christ par l'Esprit de Dieu & la Foy qui estoit en luy, auant qu'il allast au Temple. Mais il estimoit encore beaucoup de le voir petit enfant, comme il l'a veu. Combien donc se fust il reputé plus heureux, s'il l'eust veu preschant & faisant les miracles, lesquels il a fait: & s'il le eust veu mourir & ressiusciter, & monter au

*L'exemple
de Simeon.
Luc 2.*

Luc 2.

*Mat. 27. 18
Luc 23. 24.*

Act. 1. 2.

Mal. 3.

Act. 1.

Accroissement de
cognoissance
de Christ.

Mat. 11.

Luc 2.

ciel, & enuoyer le saint Esprit, comme il l'a enuoyé le iour de la Pentecoste, baptizant ses Apostres & disciples du saint Esprit & du feu, comme il l'auoit promis? & s'il eust veu prescher l'Euangile à tous peuples & toutes nations, & les Gétिल्ز venir embrasser Iesus Christ crucifié, par Foy, comme luy l'a embrassé de ses bras, & comme il l'a prophetizé luy mesme? Penſes-tu que cela n'eust pas bien augmenté sa ioye: & qu'il n'eust pas appris & cogneu beaucoup de choses plus parfaitement & plus excellentement, qu'il ne les auoit encore apprinses & cogneues? Car combien que les Patriarches & les Prophetes ont eu grande cognoissance de Iesus Christ & des secretz de son Royaume: toutesfois Simeon & Iean Baptiste, & les autres iustes, qui ont esté de leur temps, en ont encore veu & cogneu d'auantage par la presence de Iesus Christ: & ceux qui ont conuersé plus long temps avec luy, & qui ont vescu iusques apres son ascension, comme ses Apostres & disciples: iceux ont encore cogneu plus pleinement & plus richement les secretz du Royaume de Dieu. Et pourtant, il a esté dit de Iean Baptiste, qu'il estoit plus que Prophete. Il a aussi esté dit, tant de Ioseph que de la vierge Marie, qu'ilz gardoyent en leur cœur les choses qu'ilz ont veues & ouyes, tant des Anges que des pasteurs qui sont allez visiter Iesus Christ

Christ en la creche , & de Symeon & des autres , par lesquelz Dieu manifestoit de plus, en plus, le mystere de son filz Iesus Christ. En quoy l'Euangeliste monstre euidentement, que la vierge Marie mesme mere de Iesus Christ, apprenoit & profitoit en ceste cognoissance, de iour en iour. Ne voyons nous pas mesmes, en quelle ignorance , les Apostres , & les plus excellētz disciples de Iesus Christ, sont demeurē vn long temps, voire iusques apres la resurrection d'iceluy: ia soit qu'ilz eussent ouy si long temps Iesus Christ, & qu'ilz eussent des ia receu son saint Esprit , en grande abondance, & de grans dons d'iceluy? Car combien de foyz ont ilz esté repris de leur rudesse & ignorance par Iesus Christ? Et les Euangelistes combien de foyz racontent ilz, qu'ilz n'ont pas entendu ce qu'il leur a dit? Mais combien ont ilz esté differentz à eux-mesmes, en toutes richesses spirituelles, si nous comparōs les estatz aux quelz ilz ont esté deuant l'ascension de Iesus Christ & apres? **E v.** Ce que tu dis, conferme en partie ce que i'ay proposē. Car il s'ensuit, de ce que tu cōfesses toymesmes, que ce desir que ces bons personnages ont eu de voir Iesus Christ, ne procedoit pas seulement d'une affection, qu'ilz auoyent à la presence corporelle d'iceluy: mais de la ioye & consolation qu'ilz en attendoyent.

Matt. 14.

15. 16.

Iean 2. 14.

A ct. 1.

Mat. 10.

Luc 10.

Iean 20.

*Desir des
saints de
voir
Christ.*

THE. Je t'accorde cecy : & te confesse bien qu'ilz n'ont pas desiré de le voir & l'ouir tant seulement, comme les Scribes & les Phari siens, ou comme Iudas qui a esté de ses Apostres mesme de nom, & qui a eu le don de miracle, ou cōme les autres incredules: mais cōme ceux la l'ont veu & ouy, auxquelz il a esté dit: Il vous a esté ottroyé, de cognoistre le secret du royaume des cieux : & pour lesquelz Iesus Christ a rendu graces à son Pere, de ce que ses secretz ont esté cachez aux grans, & reuelez aux petis. Car dequoy leur eust profité la veue & l'oye de Iesus Christ, sans cecy, sinon à plus grande condemnation ? Parquoy saint Paul voulant abbatre l'arrogance & l'ambition des Corinthiēs & de leurs faux Apostres, & corriger la folle opinion & affection de ceux qui ne s'arrestoyēt qu'aux apparēces exterieures : n'a pas donné à entēdre, sans cause, qui n'estimoit pas beaucoup ces apparēces exterieures, nō pas la cognoissance charnelle de Iesus Christ mesme, si la spirituelle n'y estoit adiointe. Cela vaut autant comme s'il disoit, qu'il n'estime rien, tout ce de quoy les hommes se peuuent vanter, & en quoy ilz se peuuent plaire, selon la chair: c'est à dire, selon le monde & l'apparence mondaine, non pas quand mesmes ilz se pourroyent iustement glorifier, d'auoir veu Iesus Christ de leurs propres yeux, & de l'a-
 uoir

Mat. 13.
 Luc 10.
 Mat. 11.

*Cognois-
 sance char-
 nelle de
 Christ.
 2. Cor. 5.*

uoir ouy de leurs propres oreilles: d'auoir
 mangé, beu & conuersé corporellement avec
 luy, voire mesme d'auoir esté de ses Apostres:
 d'auoir prophetizé & fait miracles en son nom,
 & d'estre de son sang & de son parétage, selon
 la chair, cōme les Iuifz, s'ilz ne le cognoissent Rom. 10.
Ican 4. 7.
2. Cor. 5.
 par Foy, & s'ilz ne sont regenez & faitz nou
 uelles creatures en luy, par son S. Esprit. Car il
 est dit, à ceux qui l'ont cogueu en celle premie
 re sorte tāt seulemēt: Je ne vous cognois point.
 Aucōtraire, il est escrit, de ceux qui l'ont seule Matt. 7.
Ican 20.
 mēt cogueu en l'autre maniere: Bien-heureux
 sont ceux qui ne m'ont point veu & ont creu:
 & de ceux qui l'ont cogueu en toutes les deux
 sortes: Voz yeux sont biē-heureux, pource que
 ilz voyēt: & voz oreilles, pource qu'elles oyēt.
 Car ilz sont bien differens, à ceux desquelz il a Matt. 13.
 esté dit: qu'ilz ont yeux, & ne voyent point, &
 oreilles, & n'oyent point, & le cœur endurcy,
 afin qu'ilz n'entendent, & qu'ilz ne se conuer
 tissent, & soyent guaris. Si donc les Patriar
 ches & les Prophetes ont esté bien-heureux,
 d'auoir veu Iesus Christ des yeux de la Foy,
 long temps auant qu'il ait prins chair huma
 ine, & d'en auoir eu la cognoissance qu'ilz en
 ont eue: ilz se fussent encore reputez plus heu
 reux, s'ilz eussent eu celle cognoissance si clai
 re & si parfaite, qu'elle a esté en la pleine mani
 festation de Iesus Christ, & s'ilz eussent veu

accomplir si manifestement, ce qui auoit desia esté commencé en eux, comme les Apostres l'ont veu, ou comme il nous est aujourdhuy annoncé, par la predication de l'Euangile. Mais ia soit que non seulement les Apostres, mais nous aussi ayons en cest endroit receu plus grande abondance de grace qu'eux: il ne s'en suit pas pourtant, qu'ilz n'ayēt desia esté bien-heureux, & encore plus apres leur mort, que durant leur vie. Parquoy il ne nous faut point icy songer de prison ne de Limbe, auxquelz ilz ayent esté priuez & forclos de la vision de Dieu: voire ceux la mesme, qui estans encores enuoloppez de ce corps mortel, comme Abraham, Isaac, Iacob, Moyse, & autres semblables, & detenuz en iceluy, comme en vne prison, ont souuent veu la gloire d'iceluy, & l'ont veu & parlé à luy face à face, selon la dispensation de ses dons & graces. Que dirons nous aussi d'Enoch, & de tous les Prophetes, & sur tous d'Helie, desquelz les vns ont tant de fois veu les visions de Dieu, les autres ont esté rauis & transportez de ce monde en corps & ame, en meilleur estat, en tesmoignage de la resurrection & de la vie eternelle? Logeras-tu aussi au Limbe, ceux cy? **E V.** Quant à Enoch & Helie, c'est vne autre question.

T H E. Venons donc à Simeon. S'il eust fait son conte, d'estre detenu au Limbe, sans voir

Gen. 35. 18.

Exo. 33. 34.

Gen. 5.

1. Roys 2.

Hcb. 11.

voir la face de Dieu, iusques apres l'espace de trente deux ou trente trois ans, ou à l'environ, auxquelz Iesus Christ a conuersé en terre, Luc. 2. 3.
 auant sa mort & sa resurrection : ie pense qu'il ne fust pas departy de ce monde si ioyeusement, & qu'il n'eust pas dit: Seigneur, tu laisses Luc. 2.
 ton seruiteur en paix, dès maintenāt. Car estre priué de la face & de la visio de Dieu, cest sentir Dieu courroucé contre soy : qui vaut autant, comme estre en enfer, cōme il a desia esté monstre. La ioye & paix de Simeon.
 E v. Il a ainsi parlé, pour ce qu'il estoit asseuré, ayant veu Iesus Christ en chair, qu'il ne demeureroit guere long temps au Limbe. τ η ε. Il eust donc parlé plus proprement, s'il eust dit : l'ay esperance dès maintenant, que ton seruiteur sera en brief en paix & en repos. Il n'y a point de doute, qu'il ne s'en fust aussi allé en paix & en repos, s'il fust party de ce monde, comme ses peres, sans auoir veu Iesus Christ corporellement. Mais ce qu'il l'a veu, luy a confirmé ceste paix, & augmenté Desirs de la venue de Iesus,
 sa ioye d'auantage. Or ce que nous auons dit du desir de Simeon & des autres semblables, se doit aussi entendre, de tous les autres souhaitz & desirs, que non seulement tous les seruiteurs de Dieu, qui ont esté deuant l'aduene-
 ment de Iesus, mais que tous les autres aussi qui sont venuz apres ont eu, & que nous auons encore aujourd'hui, de l'accomplissement du

regne de Christ, & de la parfaite deliurance & restauration de son peuple & de son Eglise.

E v. Quoy que tu dises, ie ne puis encore entendre que les ames des peres anciens, n'ayent esté changées en vn autre logis, que le leur premier, depuis la redemption faite par la mort de Iesus Christ. Car si ainsi n'estoit, à quel propos eust dit Iesus Christ: Il y a plusieurs demourances en la maison de mon Pere? Si autrement estoit, ie vous eusse dit: Ie vous vay apprestre lieu, & si ie m'en vay vous preparer lieu, ie retourneray derechef, & vous receuray avec moy-mesmes, afin que vous soyiez là ou ie suis. Aussi vous sauez là ou ie vay, & sauez la voye. Tu voys icy pour le premier, que Iesus Christ dit, qu'il n'y a pas seulement vn logis & vne demourance, en la maison de Dieu, mais plusieurs. En apres il donne bien à entendre à ses disciples, qu'ilz n'y peuuent paruenir, s'il ne leur ouure la voye & l'huis, & si luy-mesme ne les y mene. Dont il s'ensuit bien que nul n'est entré en ces lieux, auant son aduenement, auxquelz il dit, qu'il receura ses disciples.

T H E. Ce passage est plus contre toy, que pour toy. Car premierement, Iesus Christ ne dit pas: Il n'y a point eu de logis prest, en la maison de mon pere, par cy deuant, pour recevoir personne: mais, Ie le vous vay preparer
tout

*Logis en la
maison de
Dieu.
Ican 14.*

tout de nouveau : ains a dit le contraire , assa- Iean 14.
 uoir, non-seulemēt qu'il estoit desia tout prest,
 mais qu'aussi eux fauoyent la voye , pour y
 paruenir: cōbien qu'ilz ne la cuidassent point
 fauoir. Et pour ce il dira aux bien-heureux, au
 iour du iugement: Venez les beneitz de mon
 Pere, possédez le royaume, qui vous est appre Matt. 25.
 sté dés la fondation du monde. Donques ce lo
 gis & ce regne, est appresté aux éleuz de Dieu,
 depuis qu'ilz ont esté éleuz en Iesus Christ, Mat. 25.
 comme le feu eternel a esté préparé au Diable
 & à ses Anges, & à tous les reprouuez , dés le
 commencement . Or comme l'election des
 éleuz est dés la fondation du mōde, tesmoing Eph. 1.
 sainct Paul, aussi elle leur a esté tousiours mani
 festée , quand Dieu s'est reuelé à eux , & les a Rom. 8.
 appelez par sa parolle, & qu'ilz sont entrez en
 la possession d'icelle , & de la felicité qu'elle
 apporte auec soy, par le moyē de Iesus Christ,
 toutes & quantes foys qu'ilz ont receu ceste
 parolle en Foy: qui n'est autre, que la doctrine
 de Iesus Christ: laquelle, comme il a desia esté Heb. 13.
 mōstré, est eternelle. Puis dōc que Iesus Christ Esa. 40.
 est la voye, pour paruenir à ceste felicité , son Iean 14.
 esprit la guide, pour y conduire les éleuz , par
 la Foy à laquelle ilz sont appelez par ceste pa
 rolle: il n'y a point de doute, que depuis que Rom. 10.
 ceste foy a commēcé d'estre cōmuniquée aux Possession
 éleuz qu'ilz n'ayent eu acces à la felicité eter- de la foy.

nelle, par Iesus Christ, & qu'ilz n'y ayent esté receuz, apres leur depart de ceste vie, sans aucun delay. Et ia soit que ceste Foy n'est iamais si parfaite en ce monde, qu'elle ne puisse tousiours receuoir accroissement: ce neantmoins, elle est de telle vertu & efficace, pourtant que

Eph. 2. elle est vn don de Dieu, par lequel il se communiqué tousiours à nous, en son filz Iesus Christ, par la vertu de son S. Esprit, qui besongne en nous par icelle, qu'elle estant en nous, nous baille tousiours accez à la vie immortelle,

Iean 1. 14. nous. Car puis qu'elle a Dieu en Iesus, qui est luy-mesme ceste vie, elle ne peut estre sans icelle: de laquelle elle est entrée en possession, quand elle est entrée en la possession de Dieu,

Gén. 15. qui est son heritage. Et pourtant que les Apostres & les disciples de Iesus Christ, auoyent désia ceste Foy cōmençee en eux, Iesus Christ leur dit, qu'ilz sauēnt la voye, pour aller à son pere: nonobstāt que ceste Foy fust encore bien debile & enueloppée de grande ignorance: comme ilz le declairent bien eux-mesmes, di-

Iean. 14. sans, qu'ilz ne sauēnt point ceste voye, & qu'ilz n'ont point veu le Pere, combien que Iesus Christ leur afferme le cōtraire. Or ce que Iesus Christ a icy dit à ses disciples, est commun à tous ceux, qui dés le commencement ont eu cognoissance de luy par Foy, attendu que, tes-

moing

moing saint Paul, ilz ont tous eu vn mesme esprit de Foy, & ont tous eu communication d'vn mesme Baptisme spirituel, & d'vne mesme viande, & d'vn mesme bruuage, comme il a desia esté dit. Parquoy saint Pierre conclud à bon droit, au concile des Apostres, que leurs peres, qui n'ont peu porter le ioug de la Loy, ont esté sauuez par la grace du Seigneur Iesus Christ, & que tous les croyans le feront, par ce mesme moyen. 1. Cor. 10.

E V. Je ne nie pas cecy. Nostre differant est principalement du logis, & de la iouyssance de ceste grace. T H E. Si tu auois bien entendu, ce qui a desia esté dit, des logis des bienheureux, apres ceste vie, tu serois hors de ta resuerie. Car ie t'ay desia montré, qu'il ne falloit pas imaginer les logis des ames, semblables à ceux des corps: & que leur ioye & felicité, ne dependoit pas des lieux, mais de la presence & iouyssance de la faueur & benignité de Dieu. Logis des ames. Toutefois il semble que tu imagines tousiours Dieu cōme assis en paradis, en son throne, cōme vn prince mondain en son palais: & les ames le regardent en face, comme les seruiteurs d'vn roy regardent leur roy: & comme si celles des peres, qui sont trepassez deuant l'aduenement de Iesus Christ, eussent esté encloses en quelque prison, qui les eust empeschées de voir Dieu en face: & comme s'il y auoit diuersetés

chambres en ce grand palais de Dieu,auxquel
les les ames fussent logées , & que les vnes fus-
sent plus pres,ou plus reculées de Dieu. Com-
bien que Iesus Christ a vſé de manieres de
parler,prinſes des choses humaines, pour con-
descendre à la rudesse de ses diſciples , quand
il a dit,qu'il y auoit plusieurs logis , en la mai-
son de son Pere,il n'a pastoutesſois ainſi par-
lé,pour engendrer par son langage, telles ima-
ginations charnelles en noz cerueaux. Car
quand il eſt queſtiō de ces choses, il nous faut
touſiours ſouuenir,de ce qui eſt eſcrit: Iamais
œil d'homme ne veit,iamais oreille n'ouit , ia-
mais cœur ne penſa, les grans biens que Dieu
a preparé , à ceux qui vrayement l'ayment.
Parquoy il eſt requis , que l'Eſcriture vſe de
manieres de parler cōuenables à noſtre rudes-
ſe & capacité,pour nous en donner à entendre
quelque choſe.Donques,ces parolles de Iesus
Christ emportent autant, comme s'il euſt dit à
ſes diſciples: Ne ſoyez point troublez , de ce
que ie parle de me departir de vous , pour al-
ler à mō Pere:& ne craignez point, que ſoyez
ſeparez de moy,& qu'il n'y ait point de logis
ne de place aſſez pour vous. Car il y en a
aſſez : & le temps viendra , que vous y ſerez
receuz avec moy , puis que vous croyez en
moy.Or quand il dit: Ie viendray derechef,
& vous prendray avec moy, afin que vous ſo-
yez

1. Cor. 2.


yez aussi là ou ie suis : il n'y a point de doute, *Le second aduenemēt de Iesus Christ. Mat. 25. 26. Act. 1. 1. Theff. 4.*
 que ce retour, duquel il parle, ne soit ce secōd aduenement d'iceluy, lequel nous attendons encore, auquel il apparoitra en sa gloire, & conioindra ses eleuz avec soy en corps & en ame, en la vie & en la gloire immortelle. Cependā que les ames des fideles, qui sont mortz depuis le premier aduenemēt de Iesus Christ, attendent celle perfection de gloire, dirons nous qu'elles ne sont pas encore en gloire, pource qu'elles ne sont pas encores paruenues à celle consommation, en laquelle elles seront avec leurs corps, au dernier iour? Leur faudra il derechef icy bastir vn autre logis, auxquelles ames des Peres anciens ayent esté trāsportées, depuis le sein d'Abraham, & duquel derechef, elles ensemble toutes les autres ames fideles, soyent transportées au ciel, avec leurs corps, en celle gloire consommée, au dernier iour? Ainsi faisant, il y aura bien des logis pour les ames, selon vostre doctrine. Il y aura pour le premier, l'enfer de la gehenne : lequel nous confessons avec vous. Pour le second, le Limbe pour les enfans mortz sans baptesme : lequel nous ne cognoissons point, pourtant que l'Escripture n'en fait aucune mention. Le troisieme sera le Limbe des peres, qui aura esté le logis des ames fideles, depuis le commencement du monde, iusques au premier aduenement de

Cinq logis pour les ames.

Iesus Christ . Le quatr'ieme sera paradis, auquel elles feront entrées, apres la mort & passion de Iesus Christ, & auquel elles demeureront, iusques à son second aduenement. Et puis le cinquieme & le dernier , sera le ciel. Vous n'en mettez pas moins, par vostre doctrine. Si tu veux entendre , par le Sein d'Abraham , la gloire en laquelle les ames fideles ont esté, deuant le premier aduenement de Iesus Christ: & par Paradis, celle en laquelle elles ont esté & sont & seront, depuis cest aduenement, iusques au second: & le Ciel, pour celle en laquelle elles seront eternellement, apres la consommation du monde: ie n'estriueray pas beaucoup pour les motz & pour les noms. Mais ces remuemens & transportz d'ames d'estage en estage, de logis en logis, & de lieu en lieu, que tu imagines, me semblent vn petit bien lourdz, & proceder d'vne imaginatiõ fort charnelle, & d'vne grande ignorance des sainctes Escritures, & des choses qui nous sont reuelées de la vie eternelle, par icelles. Car à ce conte, nul ne seroit encore entré au ciel, sinõ Iesus Christ. Car il n'y a nul, qui soit encore en celle gloire consommée, en laquelle il est, sinon luy.

*Ouuerirre
de la voye
au ciel.* E V. Ie te confesse bien cela, quant aux ames des fideles, qui ont precedé l'aduenement de Iesus Christ. Car selon le tesmoignage de l'Apostre, la voye des sainctz n'estoit pas enco

re



re manifestée, cepédant que le premier tabernacle, figure du second, qui est le ciel, estoit encore en son estre. Mais depuis que Iesus Christ est entré, non pas en vn sanctuaire fait de main humaine, qui n'a esté sinon figure du vray sanctuaire, mais au ciel mesme, afin qu'il apparust deuant la face de Dieu, pour nous: il y a autre raison. Car nous auons maintenant la hardiesse, d'entrer en ce sanctuaire, par le sang de Iesus, par la voye qu'il nous a desdiée, fraische & viue, par le voile, c'est à dire, par sa chair, & par le grand Sacrificateur sur la maison de Dieu. Tu voys icy que l'Apostre dit expressement, que la voye des sainctz n'estoit pas encore manifestée, c'est à dire, l'entrée en paradis & au ciel, iusques à ce que Iesus Christ y est monté. Et pourtant il appelle ceste voye, fraische & viue, desdiée par le sang de Iesus. Laquelle chose me semble bien conuenir, avec le passage que saint Paul allegue des Pseaumes, touchant la captiuité, c'est à dire, les ames captiues, que Iesus Christ, montant au ciel, a emmenées avec soy: & semblablement avec ces parolles, lesquelles Eusebe recite, souz le nom d'un Tathée, disciple de Iesus Christ en ceste maniere: Je te prescheray aussi comment il est humilié, & cōment ayāt despouillé sa maiesté, il a peu estimé sa deité, en sorte qu'il a esté mis en croix, & qu'il est descēdu en enfer, & a romi

Heb. 9.

Heb. 9.

Heb. 10.

Psal. 68.

Eph. 4.

Les ames

captiues

deliurées.

Euseb.

Histo. E-

uang. li. I.

cap. 15.

pu la haye, laquelle nul n'auoit rompue dès le commencement, & qu'il a ressuscité les mortz: lequel est descendu seul: mais il est monté avec grande multitude, à son Pere. Donques Iesus Christ a rompu ceste haye, quand il a rompu les portes d'enfer, & ouuert le ciel, devant lequel, le voyle de noz pechez estoit tendu parauant, qui empeschoit d'y entrer. Laquelle chose a esté figurée, par la rompure du voyle, qui estoit au tēple de Ierusalem, a l'heure que Iesus Christ dit, que tout estoit consommé, & qu'il rendit l'Esprit. Car comme l'Apostre le dit: La Loy n'amene rien à perfection.

*Le voile
rompu.*

Mat. 27.

Heb. 7.

*L'intentiō
de l'Apo-
stre en l'e-
pistre aux
Hebrien^x.* **T H E.** Il me semble que tu allegues fort mal à propos, ces parolles de l'Apostre, pour prouuer ce que tu veux prouuer touchant l'estat des trepassez, & que tu les gloses d'une façon biē estrāge. Car l'Apostre n'a point regardé à cela, en tous ces passages que tu as maintenant allegué: mais sa principale intention est, de monstrier quelle vertu la Loy a sans l'Euangile, c'est à dire, toutes les ombres & les figures & le ministere d'icelle, sans Iesus Christ, & sans son Esprit. Il ne veut pas dire, que ceux qui ont esté souz le ministere de la Loy, croyans aux promesses de Dieu, desquelles tous les sacrifices & toutes les figures & ceremonies estoient Sacremens, n'ayent rien eu, de tout ce qui a esté figuré par ces Sacremens, &

com-

communiqué aux hommes, en plus grande abondance & en plus grande vertu & efficace par la venue de Iesus Christ, & par le ministère de son Euangile. Mais pource qu'il dispute contre ceux, qui cerchoyent leur salut en la Loy & aux ceremonies d'icelle sans Iesus Christ, ou qui les iugeoyent encores nécessaires à salut avec luy, il tasche à monstrier principalement deux choses. La premiere, c'est, que le salut mesme, duquel ceux qui ont vescu souz le ministère de la Loy, ont esté faitz participans, leur a esté communiqué, non pas par la vertu de la Loy & de ses ceremonies, mais de Iesus Christ, lequel les fideles queroient, souz les Sacremens d'icelle: par lesquels il leur estoit representé, cōme nous le cerchōs aujourdhuy, par le ministère de l'Euāgile, souz l'ombre des Sacremens d'icelle, par lesquels, luy & ce que il a fait pour nous & qu'il fait en nous & enuers nous, par son saint Esprit, nous est figuré. Il ne dit donc pas, que ces Sacremens anciens, ayent esté vains, comme il a desia esté dit, mais il remonstre, que Iesus Christ, qui est presché par l'Euāgile, est le vray autheur de tous les biens spirituelz, qui ont esté iadis eslargis & distribuez en l'Eglise ancienne d'Israel: comme ilz ont esté figurez, par les ceremonies d'icelle. Parquoy ceux se trompoyent grādement, qui ne voulans point recognoistre Iesus Christ,

l'auteur de tous ces biens, aymoyent mieux tousiours demeurer arrestez en ces vieilles ceremonies, que le recognoistre pour leur Sauueur & Redempteur, & pour celuy le quel les anciēns Patriarches & les Prophetes & tout l'ancien peuple de Dieu, auoyēt tousiours cherché, viuans souz ces ombres & figures & recognoissans tenir leur salut de luy : & par lequel ceux qui sont souz la reuelation du nouveau Testament, ont toutes les choses plus richement, plus clairement & plus excellemment, lesquelles estoient communiquées plus obscurément à l'Eglise ancienne, souz le ministere de la Loy. Derechef, il conclud de cecy, l'autre point que ie n'ay pas encore touché, c'est assauoir, que puis que Iesus Christ, le souverain Sacrificateur, & le grand Euesque, le maistre & le prince de tous les autres, figuré par la prestise de la Loy & des Leuites, est venu en propre personne, pour accomplir en verité, par foy-mesme, & pour communiquer en plus grande vertu, puissance, clarté & magnificence, par son propre ministere, & la predication de l'Euāgile, ce qu'il a annocé & cōmuni-qué desia par autā, par le ministere de celle prestise ancienne. Parquoy, puis que luy-mesme est venu faire l'office, & qu'il presente les choses necessaires au salut des hommes, toutes decouuertes par le ministere de son Euāgile, qui par;

Heb. 7. 10.

*l'Efficace
du sang
de Iesus.*

parauant estoient couuertes, & qu'il les cōmu-
 nique en plus grande abōdance & en plus gran-
 de vertu, qu'elles ne le furent iamais: ne seroit
 ce pas grāde simplicité, mais grande ingratitu-
 de & mesconnoissance, de reietter ce grād Pre-
 stre & souuerain Euesque, avec son sacrifice, fait
 par l'immolation de son propre corps, & l'effu-
 sion de son propre sang: pour recourir à ceux
 des hommes mortelz & pecheurs, faitz de be-
 stes mortes? Ne seroit-ce pas aussi bien peu pri-
 ser la vertu de ce diuin sacrifice tant excellent,
 en l'estimant de si petite valeur & efficace,
 qu'il ne peult sanctifier, si les ceremonies & les
 sacrifices de la Loy ne luy estoient coniointz?
 Car si Dieu a pris plaisir aux sacrifices faitz de
 bestes brutes, & à l'effusion du sang d'icelles,
 & a esté appaisé enuers les pources pecheurs,
 qui les ont offertz en Foy, par le moyen d'i-
 ceux, pourtant qu'il regardoit en iceux celuy
 de Iesus Christ son Filz, duquel ilz portoyent
 l'image: combien deuons-nous estimer qu'il
 prent maintenant plus de plaisir en celuy de
 son propre Filz, qui s'est offert par l'Esprit e-
 ternel, & est penetré iusques au throne de sa
 maiesté? lequel il voit tous les iours deuant ses
 yeux, se representant à luy, pour intercesseur,
 aduocat & mediateur des pources pecheurs,
 comme arrosant & purifiant continuellement
 le ciel & la terre de son sang precieux. Ce n'est

Gen. 9.

Leui. 1.

Heb. 8. 9.

10.

Heb. 9. 10.

Rom. 8.

1. Ican 2.

1. Tim. 2.

donc pas de merueilles, si l'Apostre, comparât Iesus Christ avec les Prestres Leuitiques, & son sacrifice avec les leurs, & sa vertu eternelle & le ministere de l'Euangile avec celuy de la Loy: il appelle la voye qu'il nous a preparée & dédiée par son sang, Fraiche & viue, aupris de la vieille, qui estoit comme morte, à comparaison de ceste icy: & s'il requiert que nous laissons les lauemens, & les purifications & sanctifications, qui se faisoient par eux & sangs materielz, puis que nous les auons plus clairs & plus parfaites, sans telles couuertures, par la manifestation de Iesus Christ, & le ministere de son Euangile. Car elles ont esté ouuertes & rompues, quand le voile de la chair de Iesus Christ a esté rompu par sa mort: par lequel l'Apostre n'entend pas proprement la rompure des portes d'enfer, ou l'ouuerture du ciel: cōbien que l'un & l'autre s'en ensuyuent: mais l'ouuerture du Sanctuaire materiel, & de toutes les ombres, figures & ceremonies de la Loy, souz lesquelles Iesus Christ estoit present à son Eglise, & luy declairoit sa presence & sa uueur, mais non pas si clairement ny si puissamment, comme à present, ains comme couuerte & cachée. Mais depuis qu'il est venu en chair, & qu'il a mis en lumiere les choses cachées & enueloppées souz l'obscurité de ces ombres, tout nous a esté ouuert & manifesté. Parquoy,

à bon

Heb. 10.
Le voile
de la chair
de Iesus
Christ.

à bon droit l'Apostre requiert, que nous ne cerchions plus Iesus Christ couuert, à la maniere ancienne, puis qu'il s'est descouuert à nous, comme s'il ne s'estoit point encore manifesté. Tu vois donc icy comment l'Apostre ne nie point, si tu l'entens bien, que les anciens n'ayēt eu part à ce sacrifice de Iesus Christ. Car il ne s'ensuit pas, s'ilz ont eu quelque chose plus couuertement que nous, qu'ilz n'en ayent du tout rien eu: ou qu'ilz n'en ayent eu que la mōstre, comme si on leur eust tant seulement montré l'arbre de loing, ou les fleurs & fueilles d'iceluy, sans leur bailler rien à goustier, pour le moins, des premiers fruitz. Car si ceux qui se leuent au poinct du iour, ne voyent pas le propre corps du soleil, si propremēt comme ceux qui le regardent apres qu'il est leué plus haut & plus ouuertement, & s'ilz ne recoiuent pas la lumiere d'iceluy si grande & si claire, & ne sentent sa chaleur si vehemente & si ardente, comme ceux qui le regardent à plein midy: il ne s'ensuit pas toutesfois, que tous ne la sentent & que tous ne soyēt illuminez en leur endroit d'un mesme soleil, & qu'il ne soit commun à tous. Qu'il soit vray, l'Apostre le montre bien euidentement en ce mesme lieu, qui a esté allegué, en l'exposition qu'il fait des parolles de Hieremie. Car les fideles, qui ont esté deuant la venue de Iesus Christ, n'ont ilz point eu de

*Vn seul
Christ cō-
mun à tous
les fideles
comme vn
soleil au
monde.*

*Heb. 8. 9.
10.*

remission de leurs pechez auant que departir de ce mode? N'ont ilz point esté enseignez de Dieu? Dieu ne leur a il point donné des cœurs nouueaux? N'a il point escrit & imprimé de son doigt sa Loy en iceux? E V. Je ne le nie pas. THE. Tu dois donc bien entendre, que

L'intentio l'autheur de celle Epistre aux Hebrieux, n'a
des Apo- pas esté de vostre opinion touchant la differen
stres en ce des Sacremens du vieil & du nouueau Te
parlant de stament, & qu'il n'a pas tenu les ceremonies de
l'abolition la Loy pour des figures vaines, sans communi
de la Loy. cation quelconque des choses figurées par icel
 les : mais que tout ce qu'il en a dit, comme en
 les deprisant, est dit par comparaison : comme
 les autres Apostres le font souuét fois en leurs
 escritz : non pas pour oster au ministere de la
 Loy ce qui luy appartient, mais pour magnifi
 er celuy de l'Euangile, aupris de cestuy cy. Or
 s'il y a eu remissiō des pechez par Iesus Christ
 souz le vieil Testament, par le moyen qui a e
 sté dit: il s'ensuit aussi necessairement qu'il y a
 eu vray salut à ceux qui ont obtenu ceste re
 mission des pechez, & par consequent qu'ilz
 ont eu accez à Dieu, & qu'ilz ont esté receuz
 en ioye eternelle, apres leur decez de ce mon
 de. Car puis que l'empeschement a esté osté, af
 fauoir le peché, qui empesche, comme vne nu
 ée, estendue icy deuant noz yeux, que Dieu ne
 nous regarde, & que nous ne le voyons, & qui
met

*L'intentio
des Apo-
stres en
parlant de
l'abolition
de la Loy.*

*Remission
des pechés
& salut
souz le vi-
eil testa-
ment.*

met separation entre luy & nous: il n'y a point ^{Esa. 59.} de doute, que cest effect de peché ne cesse, quand sa cause cesse. Si tu me nies cecy: il te faut aussi nier necessairement, qu'il n'y a point eu de remission de pechez auant la mort & passion de Iesus Christ. Si ainsi est, aduise quel Iesus Christ tu nous feras. Aduise si nous ne magnifions pas plus sa grace, en l'estendant depuis le commencement du monde, iusques à la fin, tant enuers les viuans, qu'enuers les mortz: qu'en la restraignant, comme vous, au temps auquel vous la restraignez.

E V. Je suis presque confus parmy tant de propos & de raisons, que tu as mis enauant. Mais cependant, tu ne m'as encore rien respondu touchant la captiuité deliurée par Iesus Christ, & la multitude qu'il a emmenée avec soy. THE. Saint Paul applique ce tesmoignage de Dauid, duquel il a esté parlé, à l'ascension de Iesus Christ. Or selon vostre doctrine, les ames des Peres anciens, ont esté deliurées du limbe auant celle ascension de Iesus Christ, par laquelle il est monté corporellemēt & visiblement au ciel. Car vous estes d'opinion, que son ame est descendue aux enfers, cependant que le corps reposoit au sepulchre, & qu'il a fait ceste deliurance des Peres anciens, & qu'il les a changez de logis en autre. Si ainsi est, ou il les a emmenez au ciel auant son ascen

*La capti-
uité deli-
urée.*

Eph. 4.

Psal. 68.

A&I.

sion corporelle, ou il les a logez en quelque autre lieu, pour l'espace de ces quarante iours, qu'il a derechef conuersé visiblement avec ses Apostres & disciples, depuis sa resurrection, iusques à son ascension, pour l'attendre là, iusques à ce qu'il montast au ciel, pour y monter avec luy. Mais la sainte Escriture n'en parle point ainsi.

*Triomphe
de Dieu.
Psal. 68.*

E V. Que veulent donc dire Dauid & saint Paul? THE. L'intention de Dauid est, en ce Pseaume qui a esté allegué, de chanter les louâges des victoires que Dieu a eues pour son peuple contre ses ennemis, & les triomphes qu'il a faitz d'iceux. Car c'est vn chant triomphal. Et pourtant, il semble aux hommes, & principalement aux infideles, que Dieu soit veincu & du tout abbatu, quâd ilz voyent son peuple défait, & son Eglise dissipée & ruinée. Dauid donc parle de Dieu comme d'un Roy & d'un Prince, qui reprennt vertu & force, & qui se releue, & monte sus le col des meschans, & met le pied sus la gorge de tous ses ennemis, & s'en va à teste leuée en grande gloire & triomphe, chargé de leurs despouilles, les menâs en triomphe, captifz & enchainez. Et pour ce que iamais Dieu n'a mieux declairé sa ver-

*L'ascensio
de Iesus
Christ.*

tu & sa force contre ses ennemis, ny triomphé d'iceux en plus grande magnificence, que par la mort & la resurrection & l'ascension de son

Filz

Filz Iesus Christ : saint Paul à bon droit a approprié ce passage à ceste ascension glorieuse, qui a esté comme le chef du triomphe d'iceluy. Car ce que Dauid a là tant loué & magnifié, a esté alors accomply plus excellemment & plus glorieusement, qu'il ne l'auoit iamais esté auparauant.

E V. Quelle est celle captiuité & ces captifz & prisonniers, desquelz saint Paul parle?

T H E. Ce sont la chair, le monde, le peché, la mort, Satan & enfer, lesquelz Iesus Christ a veincu & despouillez, & desquelz saint Paul dit qu'il a triomphé, non pas au limbe, mais en la croix, en laquelle il a transpercé Satan des cloups desquelz il a esté cloué luy mesme, & l'a fiché & attaché en icelle avec tous ses ennemis, desquelz il a esté victorieux & triomphât, tellement qu'ilz ne peuuent plus nuire à nul des eleuz & des enfans de Dieu.

Coll. 2.

Le lieu du triomphe de Iesus.

E V. Cecy vient le mieux du monde à mon propos. Car Iesus Christ n'a pas emprisonné ses ennemis, qu'il n'ait deliuré les prisonniers qu'ilz detenoyét: & ne les a pas despouillez, sans leur oster leurs despouilles, qui estoient les ames des Peres anciens. T H E. Si la consequence & conclusion que tu fais, est veritable: il faudra aussi conclurre necessairement de l'autre costé, que ces bons Peres anciens, & tous les Patriarches & les Prophetes, n'ont

point eu de victoire de la chair & du monde, ne de peché, ne de la mort, ne de Satan, ne de enfer, auant la mort de Iesus Christ, ne corporellement ne spirituellement.

E V. Trouues-tu cela tant estrange?

T H E. Mais toy, ne vois-tu pas les absurditez qui s'en ensuyuent? Car il s'ensuyura de là, que ces bons Peres n'ont point eu de remission de leurs pechez, ains qu'ilz ont esté en la puissance de Satan, comme les reprouuez: & que Iesus Christ ne son sacrifice n'a point eu de vertu à les sauuer, iusques apres sa mort. Laquelle chose est trop contraire au tesmoignage des saintes Escritures, alleguez cy deuant, & trop outrageuse & pleine de blasphemie contre la grace, la vertu & le merite de Iesus Christ. Il s'ensuyura aussi, pour semblable raison, qu'ilz n'ont point eu de Foy, ou que leur Foy n'a point eu de vertu ne d'efficace, ou qu'elle a esté bien petite, iusqu'à la venue de Iesus Christ en chair. Toutesfois l'Apostre monstre bien le contraire en l'Epistre aux Hebreux, en celle grande deduction qu'il fait des exemples des anciens Patriarches & Prophetes, par lesquelz il declaire comment ilz ont tous obtenu salut par la Foy, & les grâdes merueilles qu'ilz ont faites, & les victoires qu'ilz ont obtenues par icelle: concluant qu'ilz ont veincu les royaumes par icelle, & que rien ne leur a esté impossible.

*La foy des
peres an-
ciens.
Heb. 11.*

sible. Car comme saint Iean le dit: Ceste est ^{1. Iean 5.} nostre victoire qui veinc le monde, assauoir nostre Foy. Parquoy, il nous faut conclurre, que comme la chair, le monde, la mort, Satan & enfer, noz mortelz ennemis, ne nous peuuent toutesfois plus nuire, veu qu'ilz sont veincus ^{Iean 16.} par Iesus Christ, & que sa victoire est nostre, par le moyen de nostre Foy en luy, quelques assautz & allarmes qu'ilz nous baillent encore: aussi par le semblable, ilz ont esté veincus de tous temps, pour les éleuz & les enfans de Dieu, par ce mesme moyen: combien que ceste victoire n'a pas esté parauant manifestée si clairement & si puissamment, cōme en la mort & en la resurrection de Iesus Christ, & cōme elle le fera encore dauantage, quand elle sera paruenue en sa perfection finale, au dernier iour. C'est le contraire des infideles & des reprouvés. Car ilz demeurent tousiours en leur estat captifz du Diable & deuant & apres l'aduenement de Iesus Christ.

E V. Je ne te say alleguer passage ny des saintes Escritures, ny des Docteurs anciens, desquelz tu ne tasches de me depouiller par tes gloses & interpretations: mais ie suis ébahy, si elles sont vrayes, comment les anciens Docteurs n'ont ainsi entenduz & exposez les passages alleguez par moy, comme tu les exposes. Car il me semble, que non seulement les pa-

rolles, que i'ay alleguées de l'histoire Ecclesiastique d'Eusebe, mais aussi cestes d'Epiphanius, de saint Ambroise, de Lactance & de Vigilius martyr & Euesque de Trente, lesquelles ie te vay maintenant reciter à ce mesme propos, conuiennent mieux avec mon intelligence & exposition, qu'avec la tienne. Escoute donc premierement les parolles d'Epiphanius: Il est descé du, dit il, parlant de Iesus Christ, en deité, avec l'ame, en enfer, déliant, en force & puissance, les liez, retournant Dieu, Verbe diuin, avec la sainte ame, avec laquelle il a deliuré la captiuité. Ce tesmoignage conuient fort bien avec l'autre desia allegué. Saint Ambroise a semblablement dit, que Christ a ouuert enfer & le ciel. Et Lactance, parlant de la difference qui est entre Iesus Christ vray Dieu & vray homme, & les dieux des Payens, qui ne ont esté sinon hommes mortz, ou Diables, aux quelz le nom de Dieu a esté faussement baillé: il dit, que pour faire l'espreuue entre ceux cy, qu'on assemble les Necromantiës, qui font mestier d'appeller les ames des enfers, pour se en seruir en deuination, & qu'ilz appellent & interroguent ces dieux, & ilz leur respondrôt: mais qu'ilz appellent Christ, dit il, apres cecy, il ne viendra point, il n'apparoistra point: car il n'a pas esté plus de deux iours aux enfers. Le tesmoignage de Vigilius est bien conforme à cestuy

*Les senten-
ces des an-
ciens de la
descente de
Iesus
Christ aux
enfes.*

*Epi. li. 3.
Tom. 2.
baref. 77.*

*Lactan.
diui. inst.
li. 4. c. 27.*

ceſtuy cy, qui eſt tel : Il eſt tout certain, dit il, que noſtre Seigneur Ieſus a eſté crucifié le fix-
 ieme iour, & qu'il eſt deſcendu ce meſme iour en enfer, & qu'il a repoſé ce meſme iour au ſepulchre : & qu'il a dit ce meſme iour au brigand, Tu ſeras aujourdhuy en paradis avec moy. La chair donc n'a pas eſté ce meſme iour en paradis, ny en enfer : mais a eſté couchée ſans ame au ſepulchre. L'ame a eſté, durant ces trois iours, en enfer, non pas au ſepulchre. Voila les parolles de ces bons Peres anciens. Que veux-tu plus clair que cela?

*Vigil. contra Eutyc.
li. 2.*

THE. Tu dois noter, pour le premier, que les Anciens, ſuyuans les manieres de parler de l'Eſcriture, ont ſouuent vſé de langage figuré, pour mieux amplifier & exprimer la grace, la vertu, la victoire & le triomphe de Ieſus Chriſt. D'autrepart, quand ilz font mention d'enfer, ou des enfers: il ne te faut pas penſer, qu'ilz n'ayent pris ces motz ſinon ou pour la gehenne, ou pour le limbe, ou pour le purgatoire: mais les ont pris ſouuentefois comme les Latins, & les Grecz, & les Hebrieux, ou ces meſmes motz, ou leurs equiualeus, ou pour la mort & les angoiſſes d'icelle, ou pour le ſepulchre & la ſepulture, ou pour l'eſtat des trepaſſez en general, apres ceſte vie : & principalement pour celuy des reprouuez, & pour l'ire & le iugement de Dieu contre le peché. D'oc,

Signification d'enfer.

*Enf. hysto.
eccl. lib. 1.
64. 15.*

quant à ce passage, que tu as allegué souz le nom de Tathée, ie me deporté de ce qu'on pourroit dire de celle hystoire, qu'Eusebe recite en ce lieu la, du Roy Abgarus, touchant les lettres enuoyées par luy & par Iesus Christ, de l'un à l'autre, & des autres choses contenues en ladite hystoire, qui ont plus de semblable aux legendes fabuleuses, qui ont esté feintes à plaisir, qu'aux hystoires Euangeliques, & à la gravité & simplicité d'icelles. Car tu me pourrois repliquer sur cela, qu'il te suffist, qu'Eusebe declare, en recitant ces parolles, qu'il a esté de telle opinion, & que tu te contentes de son autorité. Parquoy, ie te demande seulement, que tu aduises aux parolles, commēt elles sont couchées. Apres qu'il a fait mention de l'humilité & de l'abiection de Iesus Christ, en laquelle il a esté abbattu par la mort de la croix, sans faire aucune mention de la sepulture d'iceluy il dit, qu'il est descendu en enfer. En quoy il semble, qu'il ait pris enfer, pour la sepulture du corps, & pour l'estat, auquel l'ame a esté, apres la separation d'iceluy: comme s'il vouloit dire, que comme le corps a esté mis avec ceux des autres trepassez, aussi l'ame a esté receue en l'estat des autres ames des fideles trepassez deuant luy, pour declarer qu'il est vrayement mort: & que comme il a esté fait semblable à ses freres en toutes choses, quant à son hu-

*Expositio
des parol-
les de Tat-
hée.*

Heb. 2. 4.

HN

HN

HN

HN

humanité, excepté peché, en ceste vie mortelle, il l'a aussi esté en sa mort, tant du costé du corps, que du costé de l'ame. Laquelle chose est vrayement descendre aux enfers, selon le langage de l'Escripture, & la vraye consommation d'un vray trepas. Car ce qu'Eusebe recite souz le nom de ce Tathée, est comme vn petit Symbole, & vn petit sommaire de la Foy, qu'il deuoit prescher le lendemain, deuant Abgarus & ses citoyens. Et pourtant, il a voulu comprendre beaucoup de choses en peu de paroles, comme il a esté souuentefois fait aux Symboles anciens. Car tesmoing saint Cyprien, l'article que nous auons aujourd'hui au Symbole des Apostres, touchant la descente aux enfers, n'y estoit point anciennement, pource qu'expresse mention y estoit faite de la sepulture, par laquelle le reste estoit compris. C'est le semblable du Symbole du Concile de Constantinoble. Au contraire, pource qu'Athanasie a fait mention au sien de la descente aux enfers, il n'a point fait mention de la sepulture: declarant par cela, qu'il la comprenoit souz ceste descente aux enfers. Les autres, qui ont voulu exprimer la chose d'auantage, & tout ce qui ensuit le trepas, & qui appartient à l'estat des mortz, ont mis l'un & l'autre. Si tu me fais difficulté d'approuuer ces raisons, & de receuoir ceste mienne exposition, tu te trou-

*Simboles
anciens.*

ueras bien empesché à maintenir ce que tu as allegué de Lactance & de Vigilius, au sens que tu le prens.

*Lactan li.
4. diui.
inst. c. 27.
Vigil. li.
2. contra
Eutych.
Luc 23.*

E V. Pourquoi donc? THE. Pourtant que l'un dit, que Iesus Christ n'a esté que deux iours aux enfers: l'autre dit, que son ame y a esté ces trois iours durant que son corps a reposé au sepulchre: & Iesus Christ a dit au brigad, tesmoing saint Luc, qu'il seroit ce mesme iour auquel il rendit l'Esprit en la croix, avec luy en paradis. Parquoy, ou l'ame de Iesus Christ n'a point esté aux enfers: ou elle n'y a pas esté si long temps: ou cest enfer, duquel ces Docteurs parlent, est tout vn avec le paradis duquel Iesus Christ a parlé: ou leurs parolles ne accordent pas bien avec celles de Iesus Christ. Parquoy, aduise bien à ce que ie dy. L'argument que Vigilius traite, conuient aussi fort bien à ce que ie dy: car il dit ce que tu as allegué, pour monstrier expressement la diuersité des natures, assauoir de l'humaine & de la diuine, en vne personne de nostre Seigneur Iesus Christ, lesquelles Eutyches l'heretique & les Eutychiens confondoyent & mesloyent ensemble, n'en attribuant à Iesus Christ sinon vne. Et pourtant il monstre en ce passage, que Iesus Christ a eu vraye nature humaine, composé de corps & d'ame, comme les autres hommes: laquelle a esté differente à la nature diuine,

*La mati-
ere trai-
tée par
Vigilius.*

Eutichiës.

*Natures de
Christ.*

ne,

ne, à laquelle elle a esté coniointe. Or pour
monstrer bien euidentement toutes ces choses:
il monstre pour le premier, que la diuinité n'a
point souffert, mais seulement l'humanité. En-
apres, il monstre comment ceste humanité a eu
vn vray corps, & vne vraye ame, d'autre natu-
re que le corps, comme il appert par la separa-
tion qui a esté faite entre l'vn & l'autre. La-
quelle chose est demonstrée bien clairement
par ce que le corps & la chair a esté au sepul-
chre à part, & l'ame aussi à part hors du sepul-
chre, en l'estat ordonné aux ames apres leur de-
cez: duquel elle a derechef esté r'appellée, *Resurre-*
pour estre revnie avec son corps par la resur- *ction de*
rection: en laquelle a esté accomply ce que le *Christ.*
Prophete auoit predict, selon l'exposition de *Psal. 16.*
sainct Pierre: Tu ne lairras point mon ame en *Act. 3.*
enfer, & ne permettras point que ton sainct vo-
ye corruption. C'est à dire, Tu ne permettras
point que mon corps pourrisse au sepulchre,
& que mon ame demeure en l'estat des autres
trepassez, & ma vie en la mort: mais me ressus-
citeras en gloire eternelle. Laquelle resurrec-
tion, est vn priuilege propre & singulier à Je-
sus Christ, le premier nay des mortz & de tou- *Col. 1.*
te creature, & le chef de son Eglise: lequel ne
fera communiqué à ses membres, iusques au
iour de la resurrection generale de la chair, la
quelle nous croyons. Cela pareillement que tu

*Le passage
d'Epiphanius.
li. 3.
to. 2. har.
77.
Dimarites*

as allegué d'Epiphanius, a esté mis enauant par luy presque pour semblable cause. Car il dispute en ce passage contre les heretiques nomméz Dimœrites : lesquelz nioyent la parfaite incarnation de Iesus Christ : affermans les vns, que le corps d'iceluy estoit d'une mesme esſeſce avec la deité : les autres, qu'il n'auoit point receu d'ame, les autres qu'il n'auoit point de chair créée, mais que le Verbe diuin auoit seulement esté cōuert en chair. Pour laquelle cause, il monstre bien au lōg ce qui est propre à la deité & à l'humanité, & au corps, & à l'ame & à l'esprit de Iesus Christ, afin qu'on puisse recognoistre bien clairement les deux natures, qui sont coniointes en la personne d'iceluy, & toutes les parties & proprietiez qui leur appartiennēt. Et pourtāt, il monstre cōme l'ame a vrayement esté séparée du corps d'iceluy, & comme la deité n'a toutes fois iamais esté séparée de son humanité. Et pource il dit, que cependant que le corps demouroit sans ame, par l'espace de trois iours, sans souffle & sans mouuement, & enuêloppé de linceux, mis au sepulchre, clos d'une pierre, & scellé de seaux, la deité n'y estant point neantmoins enclose ny enseuelie, il est descendu en enfer en deité avec l'ame.

*Epiph. in
Ancor.*

*Epiph. li.
3. Tom. 2.*

E V. Je t'accorde bien tout ce que tu dis : mais cependant, que signifient ces motz, Délivrant en force & puissance les liez, Retournant Dieu,

Dieu, Verbe, avec la sainte ame, avec laquelle il a deliuré la captiuité? Ce qu'il dit encore en *In Ancora* vn autre lieu plus amplement en telles parolles: La deité n'estant point enseuelie, mais descendant aux enfers avec la sainte ame, & ostant de là la captiuité des ames, & rompant le aiguillon de la mort, froissant les clostures & verroux de diamant, relaschant les douleurs de la mort, par sa propre puissance: en sorte qu'il est retourné avec l'ame, n'ayant point laissé l'ame en enfer, veu que la chair mesme n'a point veu de corruption, attendu que la deité luy estant tousiours presente, l'a ressuscitée. Cecy conuient bien avec ce que Tatthée a dit de la haye, qui n'auoit point esté rompue dès le commencement. D'autre part, tu vois icy comment Epiphanius declare manifestement, qu'il entend par la captiuité, les ames captiues. Que veux-tu maintenant dire sur cela?

*La haye
& les bar-
res d'enfer
rompues.*

T H E. Je veux dire, que ie ne veux autre tesmoignage, que ceux cy, par lesquels tu me veux presser, pour renuerser ton opinion. Car & Tatthée & Epiphanius declairent bien manifestement, par leurs parolles, ce de quoy ie t'ay desia admonesté, touchant les manieres de parler figurées des saintes Escritures & des anciens Docteurs. Saint Paul nous declare bien vne maniere, par laquelle Iesus *Ephé. 2.* Christ a rompu vne paroy, vne haye, & vne

closture, par la chair, quand il a osté l'inimitié qui estoit entre les Iuifz & les Gentilz, & les empeschemens de la Loy, qui les separoyent & les gardoyent d'estre conioinctz ensemble, les rallians tous deux en vn mesme peuple. Mais ie say bien que tu ne le voudras pas ainsi prendre icy. Aussi ie cuide bien, que ces Docteurs net'ont pas dit ce qui a esté allegué, à ce propos. Toutefois tu dois entendre, qu'il n'y a nul, s'il n'est bien lourd, qui n'entende facilement, que les ames des bons peres anciens, n'estoyent pas enferrées & encloses dedås des barrieres & des hayes, & detenues en des prisons, avec des clostures & des chaines, & des verroux & des'portes de fer ou de diamant, comme des corps. On voit bien que ceste maniere de parler, est vn langage figuré, & plein de couleurs rhetoriques, comme celuy des orateurs & des poetes : duquel ilz ont vsé, pour mettre plus clairemét deuât les yeux, la puissance & la violence du peché, & de l'ire de Dieu contre luy, & de la mort & de l'enfer, auquel il nous a abyfmez, & de la tyrannie de Satan, inuincible à toute nature humaine. Les poetes mesmes, ont presque vsé de ces mesmes motz & figures, parlans de la victoire inuitable & de la puissance inuincible de necessité, de la mort & des enfers, leur attribüans des cloux, des liens, des chaines, des cloisons, des char-

chartres, des portes, & des verroux de fer, d'errain & de diamant, qui sont matieres fort difficiles à rompre.

E V. Je suis content de tout cela, mais cependant, ie conclu tousiours, par le tesmoignage de ces bons docteurs, que ceste violence, puissance & tyrannie, desquelles tu as tantost parlé, n'ont pas esté rompues, ny les ames deliurées d'icelles, iusques apres la descente de l'ame de Iesus Christ aux enfers.

T H E. Je t'ay desia monstté parauant, les absurditez & les choses estranges qui s'en ensuyuoient de ceste opinion: & comment ces choses estoient dites, comme si elles auoyent seulement esté faites au premier aduenement de Iesus Christ en chair, pour mieux magnifier l'excellence de la grace de Dieu, qui a esté pour lors manifestée plus abondante que iamais: & pour demonstter plus manifestemét, combien il estoit impossible à creature quelconque, de vaincre telz ennemiz, par sa vertu, & qu'ilz n'auoyent iamais esté veincus de personne quelconque depuis le commencement du monde, sinon par Iesus Christ, & par la vertu d'iceluy. Tu peux bié iuger, qu'Epiphanius l'a ainsi entendu, par ce qu'il dit de l'aiguillon de la mort rompu. Car si tu prens icy la mort, pour celle de l'ame, cest aiguillon estoit desia rompu, quant à ces bons Patriarches. Car leurs

ames n'estoyent pas en la mort . Si tu la prens pour celle du corps, les nostres n'en sont encore non plus deliures, que les leurs . Si tu prens l'aiguillon de la mort , pour le pêché, il a esté rompu aux fideles, depuis qu'ilz ont commencé à auoir Foy, comme il est auiourdhuy rompu en nous, par icelle. E v. Si ainsi est, dequoy a donc seruy sa venue en chair, & sa mort & sa passion, veu que les fideles estoyent aussi bien sauuez parauant, que par apres?

THE. Il est bien aisé à entendre . Si vn homme estoit detenu en prison pour quelque debte, ou pour quelque crime, & il auoit quelque bon amy, qui veinst respondre pour luy & le fiancer & pleiger corps pour corps & biens pour biens: & que le creditur, ou le prince, qui le feroit detenir, se fiasst biē à vn tel pleige, & le receust & approuuast, & deliurast l'autre pour l'amour de luy: le debteur & le criminel ne feroit-il pas deliuré & quitte par tel moyen, par condition toutesfois que luy ou son pleige seroit tenu de payer & satisfaire pour luy, au temps qui luy seroit ordonné? Dieu a fait en ceste maniere, avec ces bons Peres anciens. Car depuis qu'il a fait la promesse à Adam de laquelle nous auons desia parlé, de la semence de la femme , qui deuoit briser la teste du serpent, laquelle par apres il a reiterée & confirmée plus amplement & plus clairement,

*Christno-
stre plaige.
Gen. 3.*

ment, à Abraham, Iacob, Dauid & à tous les autres Patriarches, & celebrée par tous ses Prophetes, & par tous les sacrifices, oblations, figures & ceremonies commandées en sa loy: Iesus Christ s'est offert à Dieu son Pere, pour estre pleige pour nous: & s'est baillé à luy, comme en hostage, pour tous ceux qui ont creu en ces promesses, faites de luy: mais par telle condition que luy estant vray Dieu, selon le bon plaisir du Pere, pour satisfaire à sa volonté & à sa iustice, vestiroit nostre chair, & se representeroit deuant son iugement, au temps qui luy auoit esté ordonné par sa prouidence, pour satisfaire en nostre lieu. Or puis que Iesus Christ a vne fois respondu pour ses freres, croyans en luy, le Pere celeste l'a accepté, aussi bien comme si desia il eust satisfait, ainsi qu'il l'a fait par apres, en son temps. *e v.* Puis que tu es de telle opinion, penfes-tu aussi qu'il y ait quelque augmentation & accroissement de ioye & de gloire, en l'autre vie, comme tu la metz en la grace & reuelatiō de Iesus Christ en ceste cy?

THE. Afin que tu ne me peusses reprendre, de definir trop temerairement de telles choses, ie te proposeray les tesmoignages de l'Ecriture, par lesquels tu pourras comprendre, ce que nous en pouuons iuger. Escoute donc premierement le tesmoignage de l'Apo-

Gen. 12. 15.
20. 48.

2. Sam. 7.

Psal. 131.

Psal. 40.

Heb. 23. 33.
Iean 1.

Accroissement de gloire en l'autre vie

2. 709a

Heb. 11.

des seruiteurs de Dieu, qui ont precedé l'aduenement de Christ : Tous ceux la, ayant acquis tesmoignage par Foy, ne receurent point la promesse, Dieu ayant proueu quelque chose meilleure pour nous, afin qu'ilz ne fussent confommez, & vinssent à perfection sans nous. Il ne veut pas dire, qu'ilz n'ayent point du tout receu la promesse: car elle a esté faite premiere ment à eux. Mais il entend, l'accomplissement & le fruit d'icelle: duquel ilz n'ont pas esté totalement priuez: mais ilz ne l'ont pas aussi eu si parfaitement, que nous l'auons maintenât. Car puis qu'il parle de consommer, il signifie qu'il y auoit desia grand commencement de felicité: mais la derniere & totale perfection n'y estoit pas encore, & n'y fera iusques à la consommation & restauration de toutes choses. Car les termes de consommation & de perfection, sont relatifs. Parquoy il les faut necessairement referer à quelque commencement. A quoy la responce que Dieu fit aux ames des Martyrs, qui demandent vengeance contre les persecuteurs de l'Eglise, s'accorde tresbien: ausquelles le Seigneur respond, qu'elles attendent iusques à ce que le nombre de leurs freres soit accomply. **EV.** Donne moy à entendre cecy plus clairement. Car ie ne le puis encore bien entendre, ains me semble que tu contredises à toy-mesme, & que tu confirmes
mon

mon opinion. Car tu as dit souuentefois parauant, que les Peres anciens, auoyēt desia receu deuant la venue de Iesus Christ, par leur Foy en luy, ce qui leur auoit esté promis: & ie voy icy l'Apostre, qui dit le contraire. Car il dit notamment, qu'ilz n'ont pas receu la promesse, c'est à dire les choses promises, par la promesse à eux faite: ou autrement, la promesse ne dureroit plus, ains prendroit fin, quand elle seroit accomplie.

T H E. Tu te trompes, en ce que tu ne metz point de distinction, en cest accomplissement. Combien qu'ilz n'ont pas receu le tout en vn coup, il ne s'ensuit pas pourtant, qu'ilz n'en ayent rien receu. Parquoy nous pouuons dire, qu'ilz l'ont receue, & qu'ilz ne l'ont pas receue, selon le sens auquel nous le prendrons. Si nous l'entendons du tout & de la finale conuommation, nous dirons qu'ilz ne l'ont pas receue, au sens que l'Apostre l'a dit icy. Si nous l'entendons de quelque partie & portiō, selon la dispensation de Dieu, nous pourrons dire en verité qu'ilz l'ont receue. Si tu le me nies, ie te diray aussi, que nous n'en auons encore rien receu, ne ceux aussi qui sont trepassez, depuis le premier aduenement de Iesus Christ. Car il y a grande difference, entre ce qu'eux & nous auons desia receu, & ce que nous attēdons encores. **E V S.** Tu me pourrois bien rendre

cecy encore vn petit plus clair. **T H E.** Incontinant que nous commençons à cognoistre Dieu en ce monde, & à croire en Iesus Christ, nous commençons aussi à gouster les biens de la vie celeste, & du siecle aduenir : mais nous n'en auons pas encore parfaite iouyssance. Toutesfois, de-puis que nous auons vne foy gousté ce bien celeste, nous croissons de iour en iour, de cognoissance en cognoissance, de foy en foy, de bien en mieux, iusques à ce que nous soyons paruenuz à l'aage d'homme parfait à la plenitude de Christ, à la felicité eternelle, & consommée beatitude. Or si desia en ceste vallée de misere, nostre ame, estant chargée de ce corps terrestre, enfermée & detenue en iceluy, cōme en vne prison obscure, toute enueloppée de miseres, de pechés & de maledictions, reçoit telle consolation & ioye: il n'y a point de doute, que, apres qu'elle est deliurée de ceste prison & captiuité, & qu'elle a despouillé toute corruption terrestre, elle ne croisse d'auantage en tout bien, & en toute perfection: ou en vain S. Paul eust dit: Je desire d'estre separé du corps, & estre avec Christ: ce qui m'est beaucoup meilleur. Et toutesfois, elle n'a pas encore sa felicité & sa gloire consommée, iusques à la resurrection de son corps glorieux, & qu'elle soit de-rechef vnie avec luy, & voye Dieu face à face, & le cognoisse,

com-

*Cōparai-
son de la
vie presen
te & futu
re.*

Heb. 6.

Iean 5. 6.

1. Cor. 3.

Rom. 1.

Eph. 4.

Phil. 1.

1. Cor. 13.

15.

• 11 •

• 11 •

• 11 •

• 11 •

• 11 •

• 11 •

• 11 •

• 11 •

• 11 •

• 11 •

• 11 •

• 11 •

comme nous auons esté cogneuz de luy: alors qu'il aura tout vaincu, & fera tout en toutes choses. Car il n'est pas encore apparu, ce que nous ferons: mais nostre vie est cachée en Iesus Christ. Tout ainsi donc, que ceux qui départant maintenant de ceste vie, n'ont point encore telle ioye, qu'ilz auront, apres que Iesus Christ sera apparu en gloire, pour iuger toute chair, quand tous ressusciterons: aussi pour semblable raison nous pouuons estimer, que les Peres anciës, qui ont precedé l'aduene-
ment de Iesus Christ, n'ont pas eu du tout telle ioye & felicité, auant sa resurrection, qu'apres. Car si les Anges mesmes, qui voyent tous les iours la face du Pere celeste, ont receu accroissement de la science & cognoissance de Dieu, & de leur felicité, par la venue de Iesus Christ, & la doyuent encore receuoir plus ample, en la resurrection des iustes: il ne nous faut pas aussi douter, qu'il n'en aduienne autant aux espritz bien-heureux & aux ames iustes. Par quoy nous pouuons aisément cognoistre par cela, combien le secret de la redemption du gère humain est grād & merueilleux: & quelle est l'excellence de l'Eglise de Iesus Christ: veu que les Anges mesmes en reçouyēt si grād accroissement en tout bien. *EV.* Par quel passage de la sainte Escriture, peux-tu prouuer ce que tu dis?

1. Iean 1.
Col. 3.

*Augmen-
tation de
felicité
aux anges.
Matt. 18.
Esa. 6.*

Dan. 8.

Col. 1. 2.
1. Cor. 2.

T H E. Ilz sont assez exprés tât aux liures des Prophetes, qu'à ceux des Apostres & des Euan gelistes. Daniel prophetizant des persecutions de l'Eglise, introduit les Anges, demandans à celuy qu'il appelle Palmoni, en son langage, (par lequel il a voulu représenter Iesus Christ) iusques à quand dureroit la desolation, qui deuoit aduenir par Antiochus. En quoy il appert euidentement, qu'ilz apprennent encore de Iesus Christ, & qu'ilz profitent en cognoissance, voyans les œuures de Dieu en son Eglise, & accomplir ce qui a esté predict d'icelle. Car combi'en qu'ilz soyét fort sauans, ceneâtmoins ilz ne sauent pas tout, & ne sont pas si parfaitz en science, que Dieu, & Iesus Christ nostre Seigneur, duquel seul il est dit que tous les thresors de la science & de la sagesse de Dieu sont cachez en luy, & est appelé la sagesse de Dieu: ce qui n'a iamais esté dit des Anges. Puis donc que les Anges mesmes n'ont pas honte d'apprendre, & de cognoistre leur ignorance & imperfection: te semble, il Eusebe, que nous soyons plus sauans & plus excellens qu'eux, & que nous nous deuons estimer si sauans, que nous ne puissions plus rien apprendre? E v. Je ne suis pas de cest aduis. Mais n'as tu point de autres passages plus clairs, touchant le propos sur lequel nous sommes, & principalement au nouueau Testament?

T H E.

THE. Il y en a assez. Sainct Pierre, parlant de ceste matiere, dit des Prophetes & des Peres anciens, qu'il leur a esté reuelé, qu'ilz ad ministroyent, non point à eux-mesmes, mais à nous, les choses: lesquelles, dit-il, vous sont annoncées maintenant par ceux qui vous ont annoncé l'Euangile, par le sainct Esprit, enuoyé du ciel: lesquelles les Anges desirerent regarder. Les Anges n'ont pas ce desir, qu'ilz n'y sentét vn grād bien. Mais sainct Paul nous mōstre cecy encore plus expressement, & nous declare assez, que puis que les Anges sont ministres de Dieu, deputez au salut des hommes: ilz ne peuvent estre en pleine & parfaite beatitude, que nous, qui sommes leurs compagnons, & bourgeois & citoyens du Royaume des cieux avec eux, n'y soyōs aussi paruenuz. Car ainsi qu'ilz se resiouyssent, dessus le pecheur faisant penitence, & se retournant à Dieu, aussi sans nulle faute, puis qu'ilz procurent nostre salut sur toutes choses, il ne peut estre, qu'ilz ne soyent fort marriz, & dolens, quand ilz nous voyent encore pressez de peché & de la mort, & batailler contre eux, en grande angoisse.

1. Pier. 1.

Psal. 91.

Hebr. 1.

Mat. 18.

Luc 19.

E V. Tu tiens maintenant vn propos, qui me semble vn petit estrange, & mal conuenable aux Anges. Car il est certain, qu'ilz n'ont pas telles affectiōs que nous & que nulle douleur ne peut conuenir à leur nature, veu qu'ilz

font espritz celestes, qui n'ont ne chair ne sang,
& qu'ilz font en la gloire celeste, hors de toute misere.

THE. Tu vois toutesfois que nostre Seigneur Iesus Christ a dit clairement, qu'ilz se resiouissent de la conuersion des pecheurs.

E V. C'est autre chose de la ioye, que de la tristesse & douleur. Car la ioye cōuient à la gloire celeste, mais non pas la tristesse & la douleur. THE. Si nous parlons humainement, c'est chose certaine, que les Anges n'ont ny ioye ny tristesse, en la maniere qu'elles font aux hommes. Mais la sainte Escriture vse de telles manieres de parler, attribuant non seulement aux Anges, mais aussi à Dieu, les affectiōs & pāsions des hommes, pour condescendre à nostre capacité & rudesse. Parquoy si l'Escriture parle bien de Dieu mesme en ceste maniere, tu ne dois pas trouuer estrange, ce que i'ay dit des Anges. Car quand nous parlons de ceste ioye & tristesse, nous l'entendons selon la nature de ceux desquelz nous parlons, & selon le sens de l'Escriture. Pour ceste cause Chrysostome parlant des Anges, n'a point fait de difficulté de dire: Ilz se monstrent ioyeux, des biens qui nous font aduenuz. Car ilz estoient aussi doulans de noz maux & tormens. Et quand nous estions punis, ilz estoient aussi en grande tristesse. Et combien que les Cherubins se

gar.

Tom. 6.
serm. 25.
de Ascens.

gardoyent paradis, toutesfois ilz estoient tristes de noz peines & tormés. Et à celle fin que tu saches que les Anges ont esté marriz, & ont eu douleur de noz maux, apprens le, par cela qu'ilz se sont monstrez ioyeux de la resurrection du Seigneur. Car ilz estiment noz biens leurs profitz. Voila les propres parolles de Chrysostome. Tu peux donc maintenant cognoistre, que ceste maniere de parler n'est point estrange, ny aux saintes Escritures, ny aux anciens docteurs. **EV.** Je me contente quant à ce poinct.

THE. Puis donc que ainsi est, que la felicité des Anges est coniointe avec la nostre, il est certain, que la leur ne peut estre parfaite sans la nostre. Car il est escrit expressement **1. Cor. 6.** que les saintz iugeront les Anges & le monde. Et l'Apostre afferme, que la sagesse de **Ephc. 3.** Dieu, qui est en moult de diuerses manieres, est manifestée aux principautez celestes, & es lieux celestes, par l'Eglise, selon la determination de tout temps, laquelle il a fait en Iesus Christ. Si les Anges donc apprennent encore, & profitent en la cognoissance de la bonté de Dieu, laquelle ilz voyent iournellement manifester par nouueaux miracles, enuers l'Eglise: si pareilemēt il faut qu'ilz nous recognoissent leurs iuges & leurs princes en Christ, & à cause de Christ: il est aisé à cognoistre, qu'il y a en

*Christ re-
staurateur
de toutes
choses.
Ephes. i.
Col. i.*

core quelque chose en eux, qui attend sa perfection de Iesus Christ. Pource il est escrit, que toutes choses sont reparées & restaurées par luy, & au ciel & en la terre. En quoy l'Escripture nous enseigne, que sa venue n'a point seulement esté salutaire aux hommes, mais aussi à toutes creatures: voire aux Anges mesmes, qui n'auoyent pas peché. Car ainsi que la cheute de l'homme, a tiré apres soy la ruine de toutes les autres creatures, & les a rendues fuiettes à malediction avec soy: aussi toute creature gemit & souspire avec luy, attendant sa redemption & deliurance: laquelle est coniointe avec la sienne. Et quant aux Anges celestes, combien qu'ilz ne soyent pas cheuz comme l'homme, toutesfois il leur reuient des biens infinis, par la reuelation de Iesus Christ en chair, & par la restauration de son Eglise. Car pour le premier, combien qu'ilz soyent demeurez fermes, toutesfois ce qu'ilz sont debout, ne vient point de leur nature: ne ce qu'ilz perseuerent en la grace, en laquelle ilz ont esté créés de Dieu. Il appert par leurs compagnons, qui sont trébuschez. Car puis qu'ilz auoyent tous vn mesme createur, & qu'ilz auoyent esté créés en vn mesme estat, & en vne mesme grace, les vns pouuoient aussi bien tomber, ou demeurer debout, comme les autres. Ce donc que les vns sont cheuz, & les autres soyent demeurez fer-

fermes, ne procede pas de leur nature, mais de la grace de celuy qui les a creés, & appuiez & soustenuz, afin qu'ilz ne trebuschassent avec les autres. Ceste grace leur procede de Iesus Christ, par lequel toutes choses sont creées, cō Eph. i. Col. i. seruées & restaurées, tant au ciel comme en la terre. Car comme rien n'a esté créé sinon en luy & par luy, aussi rien ne peut estre conserué sinon en luy & par luy. Pource Eliphaz a dit disputât contre Iob: Il ne iuge point verité Iob 4. estre en ses seruiteurs, & iuge folie estre en ses Anges. Car la lumiere & la verité & la vertu qui est aux Anges, est autant differente à celle qui est en Dieu & en Iesus Christ nostre Seigneur, que la clarté d'une chandele, qui est bien petite & qui ne peut guere durer, si elle n'a tousiours matiere pour s'entretenir, & si elle n'est allumée d'ailleurs, comparée à celle du soleil, qui est perpetuelle, & qu'il a de soy-mesme. Donc Iesus Christ leur est necessaire, premierement pour les conseruer en cest estat, au quel ilz sont, & les garder de tomber. En apres pour les confermer tousiours dauantage, & les cōioindre tousiours de plus pres à Dieu, & les enflammer d'auantage en l'amour d'iceluy. Car d'autant qu'ilz voyent de iour en iour plus clairement, l'infinité bonté de Dieu, qui se manifeste tant excellemment, enuers les pecheurs, en l'Eglise de Iesus: cela les ra-

uist tousiours de plus en plus, en l'admiration de la bonté & de la gloire de Dieu. D'autre part, il en prend aux Anges, comme aux murailles & aux colonnes, qui sont demeurées debout, apres la ruine d'un edifice. Combien qu'il demeure quelque muraille entiere, en un tel edifice: toutesfois l'edifice n'est pas parfait, si toutes les parties d'iceluy ne s'ont redressées & coniointes les vnes avec les autres. Iesus Christ donc qui est le fondement de tout cest edifice, est aussi le restaurateur d'iceluy, qui ramasse toutes les pieces de ceste grande ruine, qui sont appartenantes à cest edifice, & les reduit toutes en un monceau, & à un mesme chef. Le mot aussi duquel saint Paul vse, emporte cela. Tu vois donc comment les Anges prennent encore iournellement accroissement de gloire & de ioye. E. V. Je le t'accorde.

THE. Or si cela leur aduient à present, que l'accomplissement du regne de Dieu n'est pas encore du tout manifeste (duquel ce que nous en apperceuons n'est encore que comme vne ombre, au pris de ce qui en sera reuelé au dernier iour, quand Iesus Christ nostre Seigneur aura mis tous ses ennemiz le marche-pied de ses piedz) pensons quelle sera leur ioye & leur gloire, quand il sera pleinement manifesté. En apres, tu peux iuger par cecy, quelle est l'excellence de l'Eglise de Iesus Christ,

Christ, & de son Euangile, & en quelle estime nous deuons auoir le thresor qui nous est reuelé par icelle, veu que les Anges l'ont en si grande admiration: & de quel pris est la sciéce des vrays Chrestiens, qui traite de si hautes matieres: & combien ceux sont miserables, qui la mesprisent & persecutent. Parquoy aduise bien, Eusebe, que tu ne sois du nombre de ceux la. E v. A Dieu ne plaise. Mais il vous semble, quand on ne veut accorder incontinent avec vous, qu'on reiette la verité & la parole de Dieu.

T H E. Il est fort à craindre, qu'en cuidant reietter la parole des hommes, nous ne reiettions celle de Dieu: comme il est aussi à craindre, qu'en cuidât receuoir celle de Dieu, nous ne receuions celle des hommes. Car voilà le point, auquel presque tout le monde est trompé. Car nous nous faisons tous accroire, que la doctrine que nous approuuons, est la doctrine de Dieu, & que celle que nous reprouuons, est des hommes & du Diable. Parquoy il est icy besoing de grande prudence. Mais reuenons à nostre propos touchant les Anges. Ce que Iesus Christ a dit du iour du dernier desinement du monde, & du dernier iugement, conferme encore d'auantage ce que i'en ay desia dit: Nul ne fait, dit il, ce iour la & celle heure, non pas mesme les Anges du

Mat. 24.

Marc 13.

ciel, ny le Filz, sinon le Pere. E v̄. Si ainſi eſt, il faudra donc que tu mettes, quant à ce poinct, Ieſus Chriſt meſme, au meſme rang des Anges. Car il dit, qu'il n'y a ſinon le Pere, qui ſache ce iour, & que le Filz meſme ne le fait pas, non plus que les Anges.

*Epiph. in
Ancorato.*

THE. Je laiſſe icy à part la raiſon de ceux qui reſpondent, que Ieſus Chriſt a dit cecy, non pas touchant ſa nature diuine, mais touchant ſa nature humaine, la regardant en ce qu'elle pourroit auoir de ſa nature, ſans la cōiunction & la communication qu'elle a avec la diuine. Car entant qu'il eſt Dieu, & que ſa deité ne peut eſtre ſeparée de ſon humanité, il ne peut rien ignorer. J'ayme mieux prendre la diſtinction, de laquelle Epiphanius vſe, pour reſpondre à ce paſſage, pource qu'elle conuient mieux à mon propos, & que ie la tien auſſi pour conuenable à ce paſſage icy. Il dit que l'Eſcriture fait mention de deux ſortes de cognoiſſance. Il appelle l'vne, Cognoiſſance de ſcience: l'autre, d'Action. Cela vaut preſques autant comme ſi nous appellions l'vne, Cognoiſſance actiue: l'autre, Contemplatiue: ou Cognoiſſance de theorique, & Cognoiſſance de pratique. Entre les autres exemples de l'Eſcriture, qu'il produit, pour prouuer ceſte diſtinction, il met enauant ce que ſainct Paul dit:

1. Timo. 2. Le Seigneur cognoit les ſiens: & ce que le Sei-

gneur

gneur dit aux Israélites : Je vous ay cogneu de Exo. 19.
entre toutes les gens : & par le contraire, à ses
ennemis : Allez, ie ne vous cognoy point. Ce ne Mat. 7.
est pas à dire, qu'il y ait quelcun que Dieu ne
cognoisse point : mais pource qu'il traite les
vns comme ses domestiques, & les autres com-
me estrangers, l'Ecriture vse de ce langage :
comme nous disons, que nous ne cognoissons
pas vn homme, pour l'auoir veu seulemēt des
yeux, ou l'auoir seulement cognu à la legiere,
sans auoir eu conuersation familiere avec luy.
Suyuant donc ceste distinction, Epiphanius dit
que le Pere cognoit ce iour la en toutes ces
deux manieres de cognoissance. Car il fait
quand il doit venir, par sa prescience : & si le
fait aussi par action & pratique, entant qu'il a
decreté luy mesme de l'executer par son Filz Ican 9.
Iesus Christ, & que tout luy est present. Le Fils
le fait semblablement, par sa science & sagesse
diuine, qui ne peut rien ignorer : mais non pas
encore de cognoissance actiue, entant qu'il ne
l'a pas encore executé, comme homme & Dieu
ensemble, comme il l'executera en son temps.
Mais les Anges, combien qu'au reste Dieu les
ait ornez de grande science & vertu, toutef-
fois ilz ne sauent ce iour ne celle heure, ny en
l'une de ces sortes, ny en l'autre. Car ilz ne sa-
uent point quand s'executera ce que le Pere
en a ordonné, comme le Filz le fait : & si n'ont

point receu de commandement, pour s'y employer, qui leur fera alors fait, d'amasser l'yuroye en fagotz, pour les mettre au feu, & sonner la trompette, & oster les scandales de la terre, comme Iesus Christ a dit qu'il seroit fait. *Mat. 13. 24.* Penſes-tu que les Anges n'ayent rien plus alors, qu'à present? *E v.* Je ne le nie pas.

Tormens des reprobés aggraués. *T H E.* Si donc les Anges ne peuuent estre parfaitement conſommez en toute beatitude, ſans nous, qui ſommes leurs confreres, comment le ſeront noz autres freres, qui nous ſont conioinctz de plus pres, & qui attendent encore la redemption de leur corps, & la conſommation de leur ioye? laquelle ilz ne peuuent auoir, ſans nous, & beaucoup moins que les anges. *E v s.* Nous pourrions auſſi conclurre par le contraire, que les tormens des Diabſes, & des reprouués, vont en croiſſant: & qu'ilz ſeront plus grans & plus griefz, apres le dernier iugement, qu'ilz n'ont à present.

1. Pierre 2. *T H E.* Saint Pierre nous en rend teſmoignage aſſés clair & euident, eſcriuant des mechans & des reprouués, en ceſte maniere: Comment les eſpargneroit Dieu, ſ'il n'a point eſpagné les anges qui ont peché? Mais par chaines d'obſcurité, eſtans iettez en enfer, il les alieue, pour estre reſeruez au iugement. Et tantost apres il dit encore: Le Seigneur fait deliurer de tentation les fideles: & reſeruer les

les iniustes, pour estre tormentez au iour du iugement. Semblablement, ce qui a desia esté touché du iugement, que les saintz deuoyent auoir sur le monde & sur les anges, peut seruir à la confirmation de cecy, si nous voulons suyure l'exposition de ceux qui prennent en ce passage les anges pour les Diables, qui seront iugez par les enfans de Dieu, entant qu'ilz seront conueincus de leur malice & peruersité, par la vertu & la sainteté d'iceux, qui ont esté poures hommes mortelz. Laquelle exposition ne conuient pas mal à ce passage: combien que il n'est pas aussi mal conuenable de l'entendre des bons Anges, entant que Iuger est pris aussi pour Regner, & que nature humaine est éléuée par dessus l'angelique, par l'incarnation de Iesus Christ, & nostre redemption par luy. Nous ne pouuons pas nier, que les Diables & les reprouuez ne soyent desia en torment, & qu'ilz ne soyent desia abyfmez aux enfers, puis que ilz sont reiettez de Dieu, & qu'ilz sont en son indignation. Mais toutesfois nous pouuons facilement entendre par les parolles de S. Pierre, qu'ilz attendent encore quelque plus grief iugement, & vne fureur de Dieu plus espouuantable qu'ilz n'ont point senty.

E V. Expose moy cecy vn petit plus clairement. T H E. Pour le te donner à entendre plus clairement, ie te le veux exposer par vne

*Chrysoft.**Tom. 6.**Hom. 15.**in Luc.**Le cōmen
cement du
iugement
de Dieu.**Cōscience.*

similitude & comparaison, prinse des parolles mesmes de saint Pierre, & de laquelle Chrysofome, parlant de ceste mesme matiere, a aussi vscé: Quand vn malfaiteur a commis quelque grand crime digne de mort, & de grieue punitiō: il n'y a point de doute, qu'il ne sente desia sa condamnation en sa cōscience, incontinct qu'il a commis le meffait. Il a sa conscience qui luy est pour accusateur, pour tesmoin, pour iuge & pour bourreau: & ne peut estre autrement. Sa conscience le remort & l'accuse: puis elle le vient conueindre de ses mesfaitz, par son propre tesmoignage, qui vaut plus que mille tesmoins. Et apres l'auoir cōueincu, elle mesme le condamne. Et ainsi qu'elle le contrainct de tesmognier contre soy mesme: aussi elle le contrainct de se condamner, tellement que quand tous les anges, & tous les hommes du monde l'absoudroyent & le prononceroient iuste, neantmoins il ne se peut absoudre soy mesme ny eiter son propre iugement. Or apres que la sentence est donnée, il faut qu'elle soit mise en execution, & que le malfaiteur soit remis en la main du bourreau: lequel il ne faut point aller chercher plus loing, ne hors de luy mesme. Sa conscience fait encore cest office avec le reste: elle le fouette & tormente tant cruellement, qu'il ne peut auoir repos ne iour ne nuit. S'il voit parler quelcun, il pense qu'on parle

parle de luy. S'il voit trembler vne fueille d'arbre, il luy semble que ce soit des sergens ap-
postez, pour le prendre & mener en prison.
Enquoy il experimente, ce qui est escrit en la Deut. 28.
Loy: assauoir que les meschans trembleront, à
la cheute d'une fueille d'arbre, & qu'ilz seront
comme si leur vie estoit pandue en vn filet.
S'il cuide dormir & reposer, il songe qu'il est
entre les mains du iuge, qui l'a remis au bour-
reau, & qu'on le mene au gibet. En veillant &
en dormant, il ne cessera de penser & imaginer
bourreaux, tortures & gibetz. Parquoy le pro-
phete n'a pas dit sans cause: Les meschans sont Esai. 57.
cōme la mer bouillante, quand elle ne se peut
appaïser, & que les eaues, l'ordure & la fange
s'esgarent. Il n'ya point de paix aux meschans, Esai. 48.
dit le Seigneur. Parquoy Seneque n'a pas dit
sans cause: la consciēce coupable, est tousiours
en peine. E v s. Cela est tout vray, nous en
auons les exemples bien euidens, principale-
ment en Cain & en Iudas.

Gen. 4.
Matt. 26.
Act. 1.
THE. Or aduifons d'ou procede ceste
violence de la conscience humaine. Il n'y a
point de doute que ce ne soit de Dieu, qui fait
sentir son iugement & sa fureur à ses ennemis,
en telle sorte qu'ilz ne se peuuent porter eux-
mesmes: mais sont contrains de se condamner
& deffaire: qui est vn certain tesmoignage que
il y a vn iugement & vn Dieu, auquel il faut

*Tesmoi-
gnage de
conscience
qu'il est
vn Dieu.*

1. Ican 3.

*Comence-
ment d'en
fer & de
paradis.
1. Ican 3. 5. 6.*

rendre conte. Ce que nous deurions bien tous entendre & cognoistre, quand nous n'aurions iamais ouy parler de Dieu ne de ses saintes Escritures: & que nous n'en aurions nul autre tesmoignage que cestuy cy, lequel Dieu a imprimé naturellement au cœur d'un chacun: qui nous deuroit bien suffire. Car comme dit S.

Ican: Si nostre cœur nous condamne, Dieu est plus grand que nostre cœur, & cognoit toutes choses. Cela vaut autant que s'il disoit, Si nous-mesmes nous condamnons, Dieu ne nous pourra il pas bien condamner? Puis que nous auons vne telle crainte, vne telle horreur & frayeur, nostre cœur ne nous admoneste-il pas assez, que nous auons vn superieur, qui n'endurera point telles choses: veu qu'il n'y a si grãd prince, ne si grand tyran, qui ne sente cest enfer en sa conscience: combien qu'il n'y auroit homme sur la terre par dessus luy, duquel il peust auoir crainte. Vois-tu maintenant comment

l'enfer de l'inique commence desia en luy en ce monde icy? Ce que nostre Seigneur Iesus Christ ne nous a pas voulu laisser ignorer, disant: Qui croit au Filz de Dieu, a la vie eternele, & ne gouftera point la mort. Car il est desia passé de la mort à la vie. Mais qui ne croit point au Filz de Dieu, il est desia iugé & condamné. Ne nous monstre-il pas icy au doigt, comment le fidele commence desia son paradis

dis en ce monde, & l'infidele son enfer? E V.
 Il n'est rien plus certain, que ce que tu dis.

T H E. Quand nous n'en aurions point
 de tefmoignage des Efcritures, nous en auons
 le tefmoignage de nature, imprimé au cœur
 de tous, qui a contrainst les poetes de controu-
 uer celle fiction des Furies, lesquelles nous Les furies
& Diables
ses
 pourrions appeller Diablesses. Ilz leur assig-
 nent leur habitation aux enfers, & disent que Inue. Saty
13. Virg.
A Ene. 6.
 elles tormentent les hommes meschans & re-
 prouuez horriblement, tant en ce monde, que
 en l'autre. Par lesquelles ilz n'ont voulu enten-
 dre autre chose, que les tormens & les assautz
 de la male conscience, & ce ver qui ne meurt Le ver de
conscience.
Esa. 66.
Mar. 9.
Cic. in pis.
 point, ains la ronge & deuore incessamment.
 Nous auons Ciceron pour commentateur de
 ces fictions poetiques, qui en parle en ceste ma-
 niere: Ne pensez pas, dit il, que les hommes mes-
 chans soyent espouuantez, estans pressez &
 poussez des dieux, par les torches ardentes &
 flambeaux des furies, comme vous le voyez
 sur l'eschaffaud: c'est la tromperie & fraude
 d'un chacun, son crime, sa meschanceté, son au-
 dace, qui trouble l'entendement d'un chacun,
 & les conuertit en rage & en fureur. Cestes
 sont les furies des meschans, les flambeaux &
 les torches. Et derechef, en vn autre lieu: La
 fraude d'un chacun & l'erreur le travaille & Cicero pro
Ros. A-
meri.
 torméte grandement, & sa meschanceté le de-

meine en maintes sortes, & sa folie l'esmeut & le trouble, ses mauuaises pensées, & les sottises & rages de son cœur l'espouätent. Cestes sont furies perpetuelles & domestiques aux meschäs, & qui les tiennent tousiours de pres. Voila le sens des parolles de Ciceron. E V. Combien qu'on appelle Fictions, ces fictions des poetes: toutesfois l'experience monstre bien à vn chacun, que ce ne sont point. fictions vaines. Car combien que les poetes feignent beaucoup de choses, pour mieux esmouuoir les affections des hommes, & mieux enrichir ce que ilz traitent: toutesfois ce qu'ilz ont feint touchant ces furies, ne va pas fort loing de ce que les saintes Escritures nous proposent des Diab-
Les diables. les, les bourreaux des meschans.

THE. Je ne doute point aussi, que la cognoissance qu'ilz ont eu de ces choses, ne leur soit venue de là, & du tesmoignage que Dieu en a imprimé au cœur d'vn chacun, comme la cognoissance de toutes les autres choses bonnes, que les Payens ont cogneues. Et combien que Ciceron n'ait pas bien entendu comment Dieu se seruoit du ministère des Diab-
Iune. Saty. 13. les, pour tourmenter les consciences des meschans: toutesfois il recognoit bien le torment qu'elles ont, & qu'il procede de la violence du iugement de Dieu, qui presse les mauuaises consciences. Lequel torment le poete Iuuenal de-
 scrit

scrit si bien, qu'il n'est possible de mieux. Mais que diras-tu, si ie te produy le tesmoignage d'Epicurus mesme, le patriarche des Epicuriens, desquelz la terre est toute remplie: qui ne croient point qu'il y ait ny Dieu, ny Diable, ne paradis, ny enfer, pour les conueindre & condamner par leur propre prophete? Le tesmoignage d'Epicurus qui chante la conscience. E V. Ie le voudroye bien ouyr. Car ie pense qu'il aura plus de poids enuers ces malheureux, que tous ceux des saintes Escritures.

THE. Escoute-le de la bouche de Senèque: La premiere, dit il, & la plus grande peine de ceux qui pechent, c'est d'auoir peché: & n'y a point de meschanceté, combien que fortune l'orne & attinte grandement de ses dons & de ses biens, & le soustienne & le defende, qui demeure impunie. Car la peine de la meschanceté, est en la meschanceté: mais neantmoins les secondes peines pressent & ces choses, & celle la, & craindre tousiours estre espouuanté, & se desier de la seureté, l'ensuyuent. Consentons icy avec Epicurus, qui dit, que les mauuais crimes sont fouetez par la conscience, & qu'il y a beaucoup de tormens en ce que elle presse le meschant, en le sollicitant perpetuellement: & le bat, & ne se peut fier aux pleiges de sa seureté. Car cecy est l'argument d'Epicurus, que nous auons de nature en horreur la meschanceté: pourtant qu'il n'y a nul qui ne

ait encore crainte entre les choses feures. Fortune deliure plusieurs de peine, mais elle ne deliure personne de crainte. Voila les parolles de Seneque, par lesquelles il conclud, que cōbien que plusieurs eschappent les peines temporelles par leur force & richesses, ou cauteles: toutesfois nul ne peut eschapper ce tormēt de conscience.

*Hiere, in
Esa. c. 66.*

E V. Cecy conuient bien avec ce que saint Hierome dit à ce propos: Ce ver, dit il, est vne trefgrieue peine des meschancetez, de laquelle les meschans sont punis par leur conscience. Mais puis qu'ainſi eſt, reuenons à noſtre propos, del'enfer des meschans, & voyons comment il croiſt de iour en iour. T H E. Si le malfaiteur eſt deſia tant tormenté, auant que le iuge luy ait mis la main fus, & auant qu'il ſoit mis en priſon, & qu'il ait eſté torturé, conueincu, iugé & condamné: penſons quel horreur & quel torment il doit auoir, eſtant en priſon, apres que ſon proces eſt fait & conclud, attēdant ſa ſentēce & la mort cruelle d'heure en heure. En quelle angoiſſe penſes-tu qu'il ſoit? Eſtimes-tu que l'horreur qu'il a de l'attente des tormens qui luy ſont preparez, luy ſoit guere moindre peine, que les tormens & la mort qu'il attend? E V. Certainement ie croy qu'il n'y a pas grande differēce, & qu'il meurt autant de fois qu'il vit d'heures & de minutes.

T H E.

T H E. Tu vois comment il est desia iugé, & si ne l'est pas. Il est assez iugé & condamné quât à foy, veu qu'il a sa conscience, sa confession, son tesmoignage, & son procez contre foy, & qu'il se tient desia pour mort. Mais toutesfois si a il encore plus grand horreur d'estre mené en iugement, & d'ouyr la sentence de son iuge, & d'estre condamné & executé publiquement. Car combien qu'il soit desia assez condamné, estant en la prison, neantmoins il faut que le iuge en prononce authentiquement sa derniere sentence, & que son iugement soit mis en execution.

*Les degrés
du iuge-
ment de
Dieu.*

E V. Veux-tu conclurre, que nous en pouuons dire autant des Diables & des reprouuez? **T H E.** La comparaison conuient tresbien: laquelle ie suis content te faire ouyr de la bouche de Chrysostome, duquel i'ay desia fait mention: afin que tu cognoisses qu'il n'a pas esté d'autre sentence, ne ceux de son temps. Il dit, parlant des tormens du riche, qui estoit en enfer: Je vous baille vn exemple, afin que nous puissions cognoistre la verité par exemples: Feing quelcun, qui ait esté pris en briganderie, & mis en vne prison tenebreuse, & aux ceps, & en la torture, attendant sa sentence: mais toutesfois n'estant point là sans peine. Car il entend par le lieu, que c'est qu'il doit souffrir. Car combien qu'il n'ait pas encore receu peine ca-

*Chryso.
Tom. 6.*

In Luc.

ca. 16.

Hom. 15.

pitale, & que le iour du iugement ne soit pas encore venu, toutesfois il entend par la prison, par les tenebres & par la crasse & l'ordure, en laquelle il est, & par la faim & le bruit des chaines, & par le gemissement des prisonniers, & par les larmes de ceux qui sont avec luy, en quelle peine il doit estre. Car si les preambules des peines sont si grâs, que sera-ce au plus fort des tormens? S'il n'est point encore venu au iugement, & la peine n'est point encore parfaite, & il desire de l'eau froide: que souffrira il au iugement? Tu peux iuger par cecy comment cependant que les meschans vivent en ce monde, ilz sont semblables aux malfaiteurs, auât qu'ilz soyent pris. Quand Dieu les appelle de ce monde, il les cite deuant soy, pour cōparoiſtre en iugement: & sont comme s'ilz estoient iettez en prison, attendans leur derniere sentence, qui se baillera en ce grand iour, auquel tous procez, toutes causes & appellez prendront fin. Voila la cause pour laquelle saint Pierre fait mention des liens & des chaines, desquelles Dieu a lié les Diables, qu'il reserue à son iugement, vsant des comparaisons humaines & materielles, pour nous declairer les choses diuines & spirituelles. Ceste est aussi la cause pour laquelle les malins espritz prient à Iesus Christ, qu'il ne les vueille pas enuoyer aux abyſmes, se plaignans & lamentans, pour

ce

1. Pier. 2.

Matt. 8.

Mar. 1.5.

ce qu'ilz sentent approcher leur iugement par sa venue. Et pourtant ilz prient: Iesus Filz de Dauid, pourquoy nous es-tu venu tourmenter deuant le temps? Nous ne pouuons douter, qu'ilz ne fussent desia tormentez parauant, comme le malfaiteur, qui est aux cepz & aux liens: mais ilz ont horreur, quand ilz voyent leur iuge, & qu'ilz sentent approcher leur derniere sentence.

E V. Ce que tu as maintenant dit, me semble bien suffisant, pour satisfaire à vne question, laquelle m'a esté proposée il n'y a pas long temps, & laquelle i'ay trouuée fort difficile de premiere arriuee. La question est telle: c'est assauoir, si apres que l'ame est separée du corps, elle va tout droit en paradis, ou en enfer? Car si elle va droit en paradis, ou en enfer, il semble que le iugement en soit desia fait, & qu'il n'en faille plus attēdre d'autre: ou si nous en deuons attendre vn autre, que les ames ny des fideles, ny des infideles, n'ont point encore de lieu assigné, pour receuoir felicité, ou male diction. Et pourtant aucuns disent, qu'elles dorment, iusques à celle grande iournée.

l'Estat des ames apres la separation des corps.

T H E. Il ne faut pas estre ebahy, si les dormeurs songent: mais nous deuons plus estre les Dormeurs.
ébahiz, de voir songer les veillans, & croire aux songes des dormeurs: Car si ainfi estoit, les œuures de Dieu iroyent contre leur nature,

plustost en diminuant qu'en croissant : & les fideles deuroient plus craindre la mort corporelle , que les infideles . Car les infideles seroyent mis à repos par la mort : & les fideles seroyent priuez de celle portion de la felicité eternelle, laquelle ilz auoyent desia goustée en ce monde , & qu'ilz deuoient auoir plus ample , apres estre deliurez de la prison de ce corps mortel . Ie croy certainement, que si S. Paul eust estimé , qu'il luy eust fallu dormir si long temps en corps & en ame , apres son decez , sans auoir plus ample fruition des biens celestes, qu'il n'en auoit eu en ce monde , qu'il n'eust iamais dit, Ie ne say lequel ie doy élire : Ie suis certes en perplexité des deux , ayant de sir d'estre separé du corps, & estre avec Christ : ce qui m'est beaucoup meilleur . Mais demourer en chair, est beaucoup plus necessaire pour vous . Car au lieu de receuoir plus grand bien, comme il desiroit, il fust empiré . Parquoy, mieux luy valloit celle portion du bien celeste, qu'il auoit desia goustée, viuât en ce corps, qu'en estre totalement despouillé , & dormir, estant insensible comme vne pierre , deux ou trois mille ans . Qu'en dis-tu Hilaire?

H I. Ciceron n'estoit qu'un Payen , qui n'estoit pas bien certain & bien assésuré de la vie eternelle , ne parfaitement resolu de l'immortalité des ames : mais toutesfois il dit, qu'il

ne

ne voudroit pas viure nonante ans, en telle sorte, qu'apres auoir passé soixâte ans, il dormist *Tusc. q. li.* le demourant des nonante:ains, qui plus est, il *L.* adiousté à ce propos: Les porceaux ne voudroyent pas cela, non pas seulement moy. A ce conte, il estime la vie des porceaux meilleure, que celle de l'hôme cependant qu'il demeure endormy: à cause que le dormir, est vne image de *Image de mort.* la mort, laquelle se presente tous les iours en dormât. *THE.* Et pourtant ie cōclud, que combien que le Seigneur a cōstitué par sa prouidence que les corps dorment en terre, comme en leur couche, iusques à la resurreccion generale, & iusques à ce que le nombre de leurs freres sera accomply: neantmoins iamais les fideles, ne les infideles, ne sont sans leur Paradis & leur Enfer: lesquelz croissent & s'augmentent de iour en iour, d'autant plus, que plus ilz approchent de leur consommation, iusques à ce qu'ilz soyent paruenuz au dernier degré de felicité, ou d'infelicité: de benediction, ou de malediction. *THE.* En la maniere que tu procedes, tu ne nous laisseras plus ne Limbe, ne Purgatoire. *THE.* Quant au Limbe, si on le prend pour le Sein d'Abraham, & pour l'estat des Peres anciens, qui ont precedé l'aduene-
ment de Iesus Christ, ie ne veux pas beaucoup disputer des motz, si nous conuenons en la chose. Ie suis bien content de confesser, que l'estat

1. Cor. 3.

des anciens, tant viuans que trepassez, comparé au nostre, pourroit estre estimé au regard d'iceluy, comme vne prison, au pris d'un palais: si nous regardôs les ombres & les figures, souz l'obscurité desquelles ilz ont esté detenez, au pris de nous, & la seruitude de la Loy Mosaique, vfans de telles comparaisons que S. Paul. Car il compare tout ce peuple ancien,

Gal. 4.
Cōparaisō
de l'ancien
peuple de
Dieu avec
les Chre-
stiens.

Rom. 8.

aux petis enfans, qui sont souz leur pédagogue, & aux seruiteurs, qui sont souz la crainte de leurs maistres, à comparaison du peuple Chrestien. Au contraire, il compare les Chrestiens aux vrayz enfans naturelz & parfaitz, qui sont desia hors de seruitude & de tutele, disant, qu'ilz n'ont point receu l'esprit de seruitude & de crainte, mais l'esprit d'adoption & de liberté. Surquoy nous deuons noter, que l'Apostre ne veut pas nier simplement, que ces bons Peres anciens, n'ayent eu le mesme esprit d'adoption & de liberté que nous auons receu, & qu'ilz n'ayent esté Filz de Dieu, & parfaitz en leur estat, tant pourtant, comme nous. Mais pour magnifier la vertu & la gloire de Iesus Christ, il nous veut monstrier, que les biens que nous auons receuz par luy, en sa venue, sont sans nulle cōparaison trop plus excellens que ceux qui ont esté communiquez aux anciens, tellement qu'on pourroit appeller leur lumiere, Tenebres, au pris de la nostre, cōme il l'appel-

pelle celle de Moyſe, au pris de celle de Ie-^{2. Cor. 3.}
ſus Chriſt.

E V. Ie te confeſſe que ce que tu as deduit
iuſques icy, a fort belle apparence, & que tu as
traité des pointz, deſquelz on peut tirer beau
coup de bõne doctrine: mais toutesfois i'ay en
core quelques paſſages de la ſaincte Eſcriture,
qui me ſemblét fort euidentz & de grãd poids
pour approuuer ma ſentence. Il y en a princi-
palement deux, en la premiere epiſtre de ſainct
Pierre, auxquelz tu ne peux contredire, qui
approuuent bien manifeſtement ce que i'ay
allegué de Chryſoſtome : & vn en Zacharie,
duquel ie parleray par apres. H I. Ie voy
bien que vous ne mettrez point de fin à la
diſputation preſente, ſi ie ne vous en admon-
neſte..

*Les paſſa-
ges de S.
Pierre.
touchant
la deſcen-
te de Ieſus
Chriſt
aux en-
fers.*

E V. Ie cognoy bien maintenant que tu
crains, Hilaire, que ie ne mette & toy & Theo-
phile au bout de voſtre ſcience, par ces paſſa-
ges, & que ie ne vous contraigne tous deux de
vous rendre. H I. Ie te confeſſe bien, quant à
moy, que ie me trouueray bien empesché à
m'en depeſtrer, ſi ie me fourroye dedans: non
pas que l'empeschement m'en viñt, pour la
difficulté qui y pourroit eſtre, à repouſſer les
argumens que tu pretens en tirer contre nous:
mais en la difficulté de trouuer le vray ſens &
l'expoſition naïue du paſſage. Car il eſt ſi ob-

seur, tesmoing mesme le publique consentement de tous, qu'il te fera bien difficile, d'en tirer argument, qui ait point de certain & de ferme fondement, pour prouuer ce que tu veux prouuer par iceluy. Parquoy tant s'en fait, que ie craigne le dommage que tu nous peux faire, par iceluy, qu'il n'y a riē que ie desire tant, que d'en ouyr la tractation & la declaration. **THO.** Je ne le desire pas moins. **HI.** Mais pour autant que la chose ne pourra pas estre dépeschée en vn mot, ie suis d'aduis qu'il sera plus expedient, que nous preniōs vn autre iour tout expres, pour traiter tout au lōg ces passages. Car ie crains, s'ilz sont traitez à la haste, que beaucoup de choses ne soyent omises, auxquelles nous pourrions tous beaucoup profiter. **THE.** Si Eusebe s'y accorde, ie n'y contredis pas. **EV.** Ne moy aussi.

LE SOMMAIRE DV CINQ

iesme Dialogue des enfers, appelé,
La descente aux enfers.

Combien qu'il est facile à iuger, par ce que nous auons traicté au dialogue du Sein d'Abraham, en quel sens nous prenons cest article du Symbole: Il est descendu aux enfers: toutesfois pour ce que ce point sera traité plus spécialement & plus amplement en ce dialogue, & plusieurs autres matieres, à ce propos, ie l'ay

l'ay intitulé: La descente aux enfers. Car ce qui y sera deduit touchant la personne de nostre Seigneur Iesus Christ, se peut aussi rapporter à nous, entant qu'il nous conuient estre conformes à luy, & en ceste vie & en l'autre, & en aduersité & en gloire. Parquoy les enfans de Dieu ont aussi leurs enfers, auxquelz il faut qu'ilz descendent apres Iesus Christ leur maistre, auant que monter au ciel apres luy, mais bien differans à ceux des reprouués. Les principaux poinctz qui seront icy traitez, seront ces deux passages de la premiere epistre de saint Pierre, & celuy de Zacharie touchant le puitz sans eau, desquelz il a esté fait mention en la fin du dialogue prochain, & l'exposition de l'article du symbole, concernant ces matieres. Or pource que ces passages ont esté exposez en diuerses sortes, à cause de leur difficulté, nous en proposerons diuerses expositiōs: afin qu'un chascun puisse plus facilement iuger de la difficulté qui y est, & eslire à son iugement, celle qui luy plaira le mieux. Et à l'occasion de ces choses, il sera parlé des diuerses manieres, selon lesquelles nous pouuons entendre Iesus Christ estre descendu aux enfers, & des diuerses opinions des Theologiēs, touchant ceste descente de Iesus Christ. Il sera aussi parlé de la soufferte de Iesus Christ, tant en corps qu'en ame, & du iugement de Dieu qu'il a porté pour nos pechez, & de la vertu d'iceluy & de son esprit tant enuers les esleuz qu'enuers les reprouuez, tant mortz que viuz. Item des afflictions & tentations des fideles, & de leurs armes & consolation en icelles: de l'obscurité qui peut estre aux saintes escritures, & de la doctrine que nous en pouuons prendre, & du moyen qu'il faut tenir en la Prophetie, & la tractation des saintes escritures, & sur tout aux passages obscurs & difficilz: du sommaire des deux epistres de S. Pierre, & des iugemens de Dieu, sur les meschans. Finalement de la predication pour les mortz, & des diuerses opinions & erreurs des hommes touchant icelle.

LE CINQUIESME DIALOGUE,
des enfers, appelé: La descente aux
enfes.

Hilaire. Eusebe,
Theophile, Thomas,
Hilaire.



V pensois, Eusebe, nous auoir fait si grand peur, par la production des passages desquelz tu nous as menassé, que nous n'oserions plus comparoistre, pour soustenir nostre cause contre toy. Toutesfois nous voicy tous prestz, pour ouyr & ce que tu proposeras, & ce que Theophile respondra à tes propos. Car Thomas & moy ne nous voulons mesler d'autre chose, sinon d'ouyr. Car ces matieres sont trop hautes pour nous. E v. Il est biẽ de besoing que Theophile soit bien pourueu de responses, pour defendre sa cause. Car ie pense qu'il sera bien empesché, de se pouuoir defendre, qu'il ne soit cõueincu, & toy avec luy, de renier les articles de la Foy. Car que pouuons nous entẽdre autre chose, par ce que saint Pierre dit, que Iesus Christ est allé par son esprit, & a prêché aux espritz qui estoient en la prison, & que l'Euangile a esté annoncé aux mortz, si non que l'ame de Iesus Christ est descendue aux enfers, au Limbe des Peres & en Purgatoire,

Les passa
ges de S.
Pierre.
1. Pier. 3. 4,

re, cependant que son corps reposoit au sepulchre, & qu'elle leur a annoncé les ioyeuses nouvelles de leur rançon & deliurance, obtenue par sa mort & passion, comme nous le confessons aussi, aux articles de nostre Foy, disans: Il est descendu aux enfers. Si vous me niez cecy, ne me niez vous pas cest article de Foy?

THE. L'attendoye desia de long temps ceste obiection & replique: & me suis esbahy comment tu n'as prins tantost au commencement ces tesmoignages, tant pour fondement de ton Purgatoire, que de ton Limbe des Peres. Mais ie pense que tu les as gardez pour l'arriere garde, avec l'article du Symbole.

EV. Je ne doute point, que tu ne te sentes maintenant plus pressé, que tu ne l'as encore point esté. Car tu ne peux entendre, par celle prison, de laquelle saint Pierre parle, ne paradis, ne l'enfer des dânez. Car paradis n'est pas une prison, & Iesus Christ n'est pas descendu en l'enfer de la gehenne. Tu ne peux donc entendre, par celle prison, sinon le Limbe, ou le Purgatoire, ou tous les deux. Car saint Pierre parle expressement des mortz & des espritz des trepassez, non pas des vifz.

THE. Puis que saint Pierre fait mention tant seulement de la prison, & non pas des prisons, ie pense que tu te contenteras bien, si ie t'en laisse l'une, veu que tu es en grand dan-

gier de les perdre toutes deux. E V. Ce que saint Pierre a dit, Prison, en nôbre singulier, non pas Prisons; au pluriel, n'empesche point que celle prison ne se puisse entendre, & du Purgatoire, & du Limbe. Car saint Pierre n'a pas voulu distinguer, en ce passage, les estatz des ames: mais s'est contenté de comprendre les deux estatz de toutes les ames fideles, par ce mot de Prison. Car combien que celles qui estoient en Purgatoire, estoient en vne prison plus aspre, que celles qui estoient au Limbe: toutesfois il y auoit tousiours prison, & pour les vns & pour les autres. T H E. Tu serois bien esbahy, si ie te monstroye par viues raisons, que celle prison se peut entendre, & de l'enfer de la gehenne, & de paradis. E V. Ie ne le pense pas, si tu n'es de l'opinion de Vvesel, qui met Purgatoire en Paradis.

*De la real
le descente
de l'amede
Iesus
Christ en
la gehenne* T H E. Quand ie te diroye, que l'ame de Iesus Christ est descendue realement iusques en l'enfer de la gehenne, ie ne seroye pas le premier, qui auroye mis ce propos en auant. Car il y en a, tant entre les anciens docteurs, que les nouueaux, qui ont pësc auoir bien bonne raison, de l'affermir, & qui plus est, qu'elle y auoit souffert: combien que ie suis d'opiniõ bien differente. Beda le venerable a fait mention de cecy, non pas affermant qu'il fust ainsi, mais alleguant l'opinion d'aucuns sans les nommer

mer toutesfois. Je pense qu'il l'a entendu d'Origene. Il y en a encore aujourdhuy, de ceux mesmes qui font profession de l'Euangile, *AEpinus in Psal. 16.* qui reiettent fort loing ceux qui sont de contraire opinion. E v. Si ne leur accorde-je pas toutesfois. Car quelle apparence y a-il en ce-cy? N'ont pas trop plus iuste raison les Docteurs, qui disent, qu'elle est seulement descendue aux ames, qui estoient en Purgatoire & au Limbe?

THE. Il y a telle apparence, que ie n'offeroye excuser de blaspheme ceux qui afferment cela. Pour le moins ie suis assure, que S. Augustin n'a esté nullement de telle opinion. Car si elle luy eust pleu, il n'eust pas esté tant empesché en la respõse qu'il a faite a Euodius, touchant la descente de Iesus Christ aux enfers, qu'il a esté: & ne l'eust pas passée, sans en faire quelque mention aussi bien que de certaines autres, qui sont autant ou plus estranges. Toutesfois, ceux auxquelz elle a pleu, ne sont pas sans raisons, par lesquelles ilz luy baillent assez de couleur, pour éblouyr les yeux des pources ignorans. E v. Je les voudroye bien entédre. THE. Ilz disent, puis que Iesus Christ est venu pour deliurer l'humain lignage, de damnation eternelle, qu'il a esté necessaire, pour satiffaire à la iustice de Dieu, qu'il ait porté la malediction & damnation, que tout le

Les raisons de ceux qui disent que l'ame de Christ a souffert en enfer.

gère humain auoit meritée. E v. Je leur accorde cela: mais Iesus Christ n'a-il point satisfait à cela, quand il est mort pour nous? THE. Je n'en fay point de doute, quant à moy: mais ilz respondent à cecy, que Iesus Christ a souffert & a porté nostre malediction & damnation, quāt au corps, par la passion & la mort qu'il a endurée: mais tout cela ne suffit pas. Car le peché de l'hōme, qui a meritē celle punition & damnation eternelle, n'a pas seulement esté en la chair & au corps de l'homme, mais beaucoup plus en l'ame. Parquoy il n'a pas esté ordonné de Dieu, que le corps & la chair tant seulemēt emportassent la peine, mais l'ame aussi. Puis donc que l'homme estoit adiugé, à cause de son peché, à damnatiō eternelle, en corps & en ame: il estoit aussi requis, que Iesus Christ pour pleinement satisfaire pour luy, souffrit ce qu'il deuoit souffrir. Ce qu'il n'eust pas fait, s'il ne eust aussi biē souffert en l'ame cōme au corps. Parquoy ilz concluent, que comme il a souffert au corps, icy en terre, il a aussi souffert en l'ame, là bas aux enfers: afin que sa satisfaction fust du tout entiere & parfaite. E v. Certes leur raison à plus d'apparence que ie ne pensoye: mais toutesfois, elle me semble vn petit mal conuenable à la personne de Iesus Christ.

THE. Tu n'as pastort. Car pour le premier, s'ilz veulent que les peines de nostre Seigneur

gneur Iesus soyent en tous endroitz correspondantes à celles que les pecheurs, pour lesquels il est mort, auoyent meritées : il n'eust pas seulement esté nécessaire qu'il eust souffert en corps, icy enterre, & que l'ame eust aussi souffert aux enfers, pour vn temps : mais qu'il eust souffert & en l'un & en l'autre, à tous iamaiz comme les damnez. Mais Dieu son Pere s'est contenté de ceste peine, en laquelle il n'a point esté detenu long temps, pource qu'il a regardé, non seulement à la peine qu'il a endurée, mais à la iustice, innocence & obeissance d'iceluy, que luy a fait trouuer la peine, que Iesus a soufferte pour vn temps, suffisante pour obtenir quittance aux fideles, de celle peine eternelle, qu'ilz auoyent meritée par leurs pechez. D'autre part, il n'a pas esté de besoing, *Response aux raisons precedentes.* que l'ame de nostre Seigneur Iesus Christ soit descendue aux enfers, pour y souffrir. Car elle a assez souffert en terre, en laquelle il a porté ce iugement & ceste condamnation, que nous auions meritée. Car le corps n'a pas souffert sans l'ame. Mais qui plus est, si ainsi estoit qu'on *Soufferte de l'amede Christ.* peust separer les douleurs del'un d'avec les douleurs de l'autre, cependant que le corps & l'ame sont cōioinctz ensemble, par la vie: nous aurions iuste occasiō de dire, que l'ame a pluſtoſt souffert que le corps, & que les douleurs du corps sont premierement venues de l'ame.

Matt. 26.

Mar. 14.

Luc 22.

Matt. 26.

Luc 22.

Ican 18:

Car que signifioyent ces parolles: Mon ame est triste & angoiffée iufques à la mort? Dont venoit celle fueur, tant angoiffeufe, qui decouloit iufques en terre, comme des gouttes de fang? & celle complainte qu'il a faite à Dieu fon Pere, au iardin? & ce trouble, cest espouantement, & cest horreur, defquelz il a esté faify? feló le tefmoignage des Euāgeliftes. S'il n'eust esté en vne angoiffe extreme, trop plus grāde que nul entendement humain ne la peut comprendre, quel befoing eust il eu, que les Anges le fuffent venuz confoler? Mais qui n'auroit iufte occafion d'estre fort esbahy, de voir Iefus Christ tant espouanté & troublé, comme les Euangeliftes le nous propofent, pour la mort qu'il deuoit endurer, s'il n'eust regardé à autre chofe qu'à la mort fimplemēt, & s'il n'eust point eu d'autre apprehenfion? Pensons nous qu'il ait eu moins de cœur, de courage, de conftance & de vertu, que tant de martyrs, qui font allez tant ioyeufement à la mort, voire cruelle & ignominieufe, pour luy? Mais que dy-ie des martyrs? Combien voyōs nous tous les iours de pures brigans, voleurs & autres mal-faicteurs, qui font menez à la mort cruelle & honteufe, pour leurs forfaitz, qui la prennent fort en gré, & monftrent vne grande afſeurance & conftance? Pensons nous que Iefus ait esté de moindre courage que ceux cy, en

vne

une si bõne cause? Il faut biẽ qu'il y ait icy quel que chose , plus que celle mort de la croix, qui luy estoit prochaine, & que ce qui apparoissoit par le dehors. Son corps n'estoit point encore pour lors tormenté par les bourreaux . Il n'auoit encore sinon l'apprehension de la mort, laquelle ne le tormentoit rien, au pris de l'apprehension du iugement de Dieu, qu'il deuoit porter . Donques quand il est entré en ces angouisses, il a commẽcé desia pour lors à descendre en cest horrible enfer, auquel il deuoit estre detenu pour nous, pour vn temps. Car quel enfer veux tu imaginer plus grand , que sentir Dieu courroucé contre soy , & porter *Que c'est que enfer.* son ire & sa fureur, comme estant delaisé de luy, & estre en l'estat qu'il estoit, quand il a crié: Mon Dieu, mon Dieu , pourquoy m'as tu *Matt. 27.* delaisé? Combien qu'il fust vray Dieu & vray homme, & que sa diuinité ne peust estre separée de son humanité, toutesfois l'humanité a esté pour lors, comme si la diuinité en eust retiré tout le sentiment & le secours de sa faueur & presence, & comme si elle eust esté abyssmée en corps & en ame , iusques aux enfers, & du tout delaisée de Dieu. Il n'estoit donc pas de besoing, que l'ame descendit en autre maniere, pour souffrir les peines, que nous auions meritées. Car les lieux n'aggrauent pas les peines mais la grauité & pesanteur du iugement de

Dieu, ou qu'il soit. Parquoy, ceux qui afferment ce qui a esté dit parauant, manifestent bien, qu'ilz ne sauient que c'est qu'enfer: ne que Iesus Christ a souffert pour eux en la croix: ne quelle est la vertu & l'efficace de sa passion & de sa mort. E v. Tu reprouues donc totalement ceste opinion.

Autre opinion de la descente de Iesus aux enfers. T H E. Tu l'as bien peu entendre, par ce que i'en ay dit. I'approuueroye bien plustost, l'opinion de ceux qui ont entédu ce passage, nō pas d'une descente reale de l'ame de Iesus Christ aux enfers, mais d'une descente spirituelle, par laquelle il ait esté annoncé, par la vertu de l'esprit de Iesus Christ, aux espritz des reprouuez, qui estoient aux enfers, que leur incredulité & rebellion leur estoit cause de damnatiō

eternelle, & qu'ilz n'en auroient point de deliurāce, par la mort & passion de Iesus Christ.

E v. Approuues-tu ceste intelligence & exposition? T H E. Ce que saint Pierre fait mention des incredules & desobeissans, y baille quelque couleur. Car il dit: Christ aussi a souffert vne foys pour les pechez, luy iuste pour les iniustes, afin qu'il nous amenaist à Dieu, estant mortifié en chair, mais viuifié d'esprit: auquel aussi il s'en alla, & prescha aux espritz qui estoient en chartre, qui auoyent iadis esté desobeissans, quand on attendoit vne foys la patience de Dieu, és iours de Noé, lors que l'arche

s'ap-

s'appareilloit, en laquelle petit nombre, assavoir huit personnes, furent sauuées par eau. En prenant les parolles de saint Pierre en ce sens, il nous faut aduiser, si telle exposition conuiendroit fort bien, avec ce que saint Pierre a dit parauant, qui luy a donné l'occasion d'y adiouster cecy. E V. Cela seruira bien à l'intelligence.

*Du sens des
parolles de
S. Pierre.*

THE. Il a parlé parauant, des afflictions & persecutions des fideles, qui engendrent de grandes tentations aux hommes. Car quand nous voyons, que tout le monde se dresse contre eux: nous les voyons pleurer, persecuter & mettre à mort cruelement, & perir sans aide & secours quelcōque: & les meschans, rire, gaudir, triompher & auoir tout à souhait: cependant, il semble que c'est fait d'eux, & qu'il n'y a rien, ny plus miserable ny plus malheureux sur la terre, que ceux qui ont mis leur esperance en Iesus Christ. Car nous voyons bien les malheurs qui leur aduiennent, & la mort qui les presse, & la prosperité & les triomphes des meschans: mais nous ne voyons pas la benediction & la vie qu'ilz ont cachée en Iesus Christ: & comment Dieu besongne en eux, par son S. Esprit, ny la ruine semblablement qui est preparée aux meschans. Et pourtant saint Pierre a voulu môstrer cecy plus clairement, & a pris l'exemple de Iesus Christ, pour ce faire: qui est

*L'estat de
Iesus en sa
passion.*

le moyen le plus conuenable qu'il pouuoit trouuer pour nous mettre la chose bien clairement deuant les yeux . Ce qu'il met en auant, vaut autant comme s'il disoit: Aduisez à Iesus Christ. Vous sauez cōment il est mort, & pour quoy. Quād il est mort, que pouuoit on iuger de luy, selon la chair, en considerāt ce que luy est aduenu au corps & à son humanité, & en ce qu'on en pouuoit apercevoir par le dehors, sinon qu'il estoit perdu & abyrmé? C'est cela qu'il appelle Mortifié en chair, Toutesfois la chose s'est trouuée bien autrement qu'il ne sembloit, au iugement de la chair. Car alors qu'il sembloit estre totalement englouty de la mort & des enfers, & du tout maudit & abandonné de Dieu: ceneantmoins sa vertu diuine n'a pas laissé pourtant d'estre tousiours en luy, autant puissante que iamais: cōbien qu'il semblast ou qu'il n'en eust point en soy, & qu'il ne fust qu'un homme comme les autres, voire encore le plus miserable & le plus mal-heureux de tous: ou que la nature diuine s'estoit du tout absentée separée & retirée de la nature humaine, & qu'elle l'auoit du tout abandonnée. Mais cela n'a esté que pour quelque temps, & non encore sinon au sens de la chair, & de l'homme exterieur, composé de chair & de sang: mais quant à la presence de Dieu, il n'a point esté delaisié: comme il l'a bien manifesté

ran-

tantost apres par sa resurrection, en laquelle la
 vertu de son Esprit diuin, qui est l'Esprit de Rom. 1.
 Dieu, s'est manifestée, abolissant la mort, & ap-
 portant la vie, à cest homme Iesus Christ, qui Esa. 53.
 auoit esté tant humilié & abbatu deuant les psal. 22.
 yeux de tous, & fait le dernier des hommes, & Rom. 15.
 l'opprobre & le vitupere de tous. C'est cela
 qu'il appelle Viuifié de l'Esprit. Surquoy S. Comment
 Pierre veut conclurre, que les fideles, estans les fideles
 persecutez, & portans l'opprobre & le vitupe- se doiuent
 re de Christ, ne doiuent pas seulement regar- regarder
 der à ce qu'ilz souffrent, & au iugement que en Christ.
 les hommes, & mesme leur raison humaine
 peut faire d'eux, mais se doiuent regarder, en
 la conformité qu'ilz ont en cecy, avec ce que
 Iesus Christ a souffert. En laquelle derechef il
 ne faut pas qu'ilz considerent tant seulement
 celle mortification & abiection, qui est appa-
 rue en la chair d'iceluy: mais aussi sa resurre-
 ction & son exaltation, & ceste vertu diuine,
 qui estant cachée en sa mort, s'est manifestée
 par sa vie. Et à quel propos tout cecy? A celle
 fin que tous les fideles se tiennent pour asseu-
 rez, que comme ilz souffrent avec luy, qu'ilz
 regneront aussi avec luy, & que leur vie, qui Collo. 3.
 est maintenant cachée en luy, fera manifestée
 en son temps, comme la sienne, quand ce que
 nous sommes fera apparü, & qu'ilz seront con- Rom. 8.
 formes à sa gloire, comme ilz auront esté à son

1. Cor. 5.

Cōformité
avec Iesus
Christ.Tribulati
ons.

1. Pier. 1. 4.

Matt. 5.
Luc 6.

vitupere : & que tous leurs ennemis & les per-
secuteurs de l'Euangile seront confus & mis
en opprobre eternal , comme ceux de Iesus le
ont esté , apres qu'ilz ont eu fait tout ce qu'ilz
ont voulu , & qui leur a esté permis de Dieu.
Car il n'y a point de doute, que tout ce qui est
adueni au chef, & à ses ennemis, par le sembla-
ble n'aduienne aussi aux membres de ce chef,
& à tous leurs ennemis . Donques, si nous som-
mes asseurez d'estre membres du corps de Ie-
sus, nous nous deuons aussi tenir pour asseurez
de cecy. Or les tribulations & les persecutions
pour son Nom , nous sont comme des Sacre-
mens , pour nous confermer en ceste asseuran-
ce , laquelle nous auons par la Foy en Iesus
Christ . Car elles ont promesse & signe exte-
rieur : & d'autant que nostre Foy est plus es-
prouuée par le feu de tribulation, comme l'or
en la fornaiſe: d'autant elle se mōstre plus puis-
sante & plus vertueuse , & nous rend plus as-
seurez de la benediction & felicité qui nous
est promise & preparée en Iesus Christ , & par
Iesus Christ . Ne te semble-il pas, Eusebe, que
sainct Pierre baille icy vne doctrine aux Chre-
stiens de grande consolation, contre tous les al-
fautz & toutes les tentations des tyrans , & du
monde & de Satan?

E V. Ouy certes. Mais à quel propos fait
il parapres mention de ces espritz , auxquelz
l'esprit

l'esprit de Iesus Christ est allé en la prison, en laquelle ilz estoient detenuz ? Car voicy le point, auquel toute la difficulté gist. THE.
C'est la cause, pour laquelle i'ay exposé ce qui precedoit, afin qu'on puisse mieux iuger de l'exposition la plus conuenable à ce passage. Car il ne faut point douter, que celle qui sera la moins contrainte, & qui de suite conuendra mieux au fil du texte, ne soit la meilleure. Mais tu as proposé les parolles de saint Pierre. vn petit autrement qu'elles ne sont couchées. Or suyuant ce qui a esté dit, saint Pierre fait deux choses. La premiere, il vient au deuant d'une obiection, qu'on luy pouuoit faire, sur ce qu'il auoit dit. L'autre, c'est qu'il le confirme par vn argument fort puissant. Car on luy pouuoit repliquer, que l'exemple n'estoit pas propre, à cause que Iesus Christ est bien different aux autres hommes. Parquoy, il ne nous falloit pas comparer à luy. Il ne s'enfuit donc pas, qu'il nous faille attendre le mesme qui luy est aduenu, entant que celle vertu diuine, qui estoit en luy, n'est pas en nous. Surquoy il respond, que si est, & qu'il ne nous faut non plus douter de nostre vie & exaltation, que nous doutons de la sienne: veu qu'il est nostre chef, & que nous sommes ses membres. Pour prouuer cecy, il prend vn argument, de la comparaizon du plus grand au moindre. Il

*La communion
et la vertu
de l'Esprit de
Christ.*

1. Pier. 4.

*Exposition
du passage
du 4. chap.
de S. Pierr.*

dit en somme pour le premier, que la vertu diuine de cest Esprit de Christ n'est point temporelle, & seulement pour vn temps, mais qu'elle est eternelle. En apres, qu'elle n'est pastellement demeurée enclose & limitée en luy, que elle ne soit point paruenue aux autres: ains que elle a esté de si grande efficace, qu'elle est paruenue, non seulement iusques aux viuans, mais aussi iusques aux mortz. Laquelle chose conuient bien avec ce qu'il dit au chapitre suyuant à ce mesme propos, apres qu'il a parlé des ennemis de l'Euangile, qui doiuent rendre conte à celuy qui est préparé pour iuger les vifz & les mortz. Surquoy il dit: Car pource aussi il a esté euangelizé aux mortz, afin qu'ilz foyent iugez en chair, selon les hommes, mais qu'ilz vivent d'esprit selon Dieu.

E V. Comment entens-tu ce passage?

T H E. I'enten que saint Pierre veut declairer par cela, que combien que les fideles ne soyent en rien differans aux autres quant à la chair & à l'apparence exterieure, ains meurent & sont condamnez à la mort comme les autres: toutesfois ilz ont cela d'auantage, que les infideles: assauoir, que l'esprit de Iesus Christ vit tousiours en eux, & qu'ilz ont leur vie en luy, & Iesus Christ pour leur iuge & defendeur, qui declairera en celle grande iournée, ce qui nous est maintenant caché. En apres, que la ver-

vertu de son Esprit est si grande, qu'elle s'estend iusques aux mortz, & qu'elle les viuifie & conserue, mesme en la mort. Or si elle a telle puissance en la mort, n'en aura elle point en la vie? Si elle est paruenue iusques aux mortz, voire qui estoient mortz long temps avant son aduenement: ne paruiendra elle point iusques aux viuans? auxquelz il a dit, Toute puissance m'est donnée au ciel & en la terre. Voycy, ie suis avec vous, iusques à la consommation du monde. Esuiuyſſez vous: car i'ay veincu le monde: & sur tout maintenant, qu'il regne en gloire eternelle? Car si sa mort a esté si vertueuse, quelle fera la vie?

Mat. 28.

E V. I'enten maintenant l'argument: mais à ce que ie puis entendre, tu ne prens pas icy l'esprit de Iesus Christ pour l'ame humaine de iceluy, mais pour son saint Esprit, & la vertu d'iceluy. THE. Je ne nie pas, que l'ame humaine ne soit quelquefois appelée du nom de Esprit: cōme quand Iesus Christ dit, Seigneur, ie recommande mon esprit entre tes mains. Et saint Estienne, Seigneur Iesus, reçois mon esprit. Et quand saint Paul diuise tout l'homme en trois parties, assauoir le corps, l'ame & l'esprit: il ne prend pas l'esprit pour l'Esprit de Dieu, en ce passage. Nous ne pouuons donc prendre en ces trois passages le nom d'Esprit, pour autre, que pour l'Esprit humain. Mais icy,

*Comment
l'Esprit de
Christ est
allé aux
mortz.
Esprit
pour ame.
Matt. 27.*

*Act. 7.
1. The. 5.*

il oppose l'esprit à la chair, comme deux choses contraires. Quand l'Escripture vse de telle opposition, elle entend communement par la Chair, l'homme exterieur & les choses exterieures. Et par l'Esprit, l'homme interieur, & les choses interieures & spirituelles, non pas le corps & l'ame d'iceluy. Et pourtant, apres que il a dit, que Iesus Christ a esté mortifié en chair & viuifié en esprit : il n'a pas dit suyuantment, Lequel esprit est allé aux espritz, qui estoient en chartre, comme tu le recitoist tantost : mais, Auquel esprit, ou Par lequel, il est allé, &c. En quoy il declaire manifestement, qu'il ne parle point là de l'esprit humain, lequel Iesus Christ a rendu en la croix : mais de celuy mesme, par lequel il a esté dit parauât, qu'il auoit esté viuifié. Car cest esprit humain n'auoit pas ceste vertu de soy mesme. Parquoy, il a esté besoing qu'il l'ait receue de l'Esprit de Dieu, qui luy a esté communiqué ; quant à sa nature humaine, par celle vertu & nature diuine, à laquelle il a esté conioint. Et pourtant Iesus Christ luy mesme a dit, La chair ne profite rien, c'est l'Esprit qui viuifie : nous admonestant par cela, que sa chair & son humanité mesme n'auroit point la vertu d'ellemesme de viuifier, si elle ne la receuoit de la nature & vertu diuine, à laquelle elle est coniointe, & si elle n'estoit communiquée par la vertu de son Esprit à ceux qui en sont

L'Esprit
diuin &
humain de
Christ.

Jean 6.

sont viuifiez . Et quand ceste vertu diuine ne eust esté coniointe avec sa nature humaine : il n'eust pas peu dire, qu'il auoit puissance de laisser son ame & sa vie, & puis de la reprendre: & n'eust pas eu la puissance de se ressusçiter soy-mesme, non plus que les autres hommes . Tu vois donc icy clairement, que saint Pierre ne entend point icy de descende reale de l'ame humaine, ou de l'esprit humain de Iesus Christ aux mortz : mais tout le contraire . Car en declarant, que cecy a esté fait par la vertu de l'Esprit diuin de Iesus Christ, qui penetre iusques là: il montre manifestement, qu'il n'a point esté fait par vne presence locale de l'esprit humain d'iceluy, & qu'il n'a point aussi esté de besoing . Or en prenant les parolles de saint Pierre en ce sens, il semble bien que ceste exposition soit la moins contrainte, & la plus conuenable au fil du texte, pour le moins iusques icy, que nulle autre . Tu peux donc cognoistre, pour le premier, par cecy, que l'exposition de la descēte reale de l'ame de Iesus Christ aux enfers des damnez, de laquelle il a esté parlé, ou au limbe & au purgatoire, ne peut point icy auoir de lieu, & qu'elle n'auroit point de liaison fort conuenable, avec les choses precedentes. E V. Pourquoi non?

T H E. Tu en peux iuger par celle antithese & opposition de la chair & de l'esprit, de

*Examen
des autres
expositiōs.*

laquelle nous auons parlé, sans les autres raisons, qui seront encore declairées plus ample-
ment en la deduction de ce propos E V. Ce
que tu as dit iusquesicy, semble bien auoir
quelque correspondance conuenable avec les
propos precedans: mais ce qui s'ensuit para-
pres, comment le ferons-nous conuenir. Car si
tu ne veux point recognoistre ne de limbe, ne
de purgatoire, ou prendrons-nous ceste pri-
son, de laquelle il est icy parlé? & ce sermon
qui a esté fait aux espritz detenuz en icelle? &
ces rebelles & desobeissans, qui ont esté du
temps de Noé? Ou les chercheras-tu? En enfer
avec le mauuais riche?

*Difficulté
du passage*

THE. Je te confesse que ce passage ne
est pas sans grandes difficultez: voire telles
que tous sont contrains de le recognoistre, &
que plusieurs grans personages, qui sont esti-
mez des meilleurs Theologiens qui ayent
point esté, ont confessé tout franchement, que
ilz n'y pouuoient rien entendre, ny trouuer
exposition qui leur peust satisfaire. La princi-
pale difficulté procede des manieres de parler
de saint Pierre, & principalemēt de ces motz,
lesquelz tu as maintenāt recités. Parquoy il est
bien requis, pour le premier, d'aduiser en quel
sens & en quelle signification il les faut pren-
dre. Je t'ay desia dit en quel sens il falloit pren-
dre l'esprit de Iesus Christ, duquel il est icy
parlé,

parlé, & son allée. Il reste maintenant d'adui-
fer à la signification des autres, & à conside-
rer si ces manieres de parler sont point figu-
rées, ou s'il les faut prendre en leur simple si-
gnification, comme elles sonnent. Pour le
moins il y a certains motz, qu'il faut prendre
par translation & langage figuré, quelque ex-
position qu'on leur puisse bailler. Surquoy il
sera bon, que nous examinions encore les au-
tres expositions, qui ont esté faites sur ce passa-
ge, lesquelles semblét auoir plus de couleur: a-
fin que par la conferance d'icelles nous puis-
sions mieux iuger quelle est la plus propre, &
la moins contrainte: & s'il est plus conuenable
d'entendre par ces espritz, auxquelz Iesus est
allé par le sien, ou les mortz, ou les viuans: & si
nous les prenōs pour les mortz, si nous les de-
uons entendre des fideles, ou des infideles. Car
il y a des raisons d'un costé & d'autre, qui nous
en peuuent faire douter.

*Les pointz
à cōsiderer*

E V. Il me semble qu'on ne peut enten-
dre par ces espritz, autres que les trepassez.
T H E. Mais lesquelz, les fideles, ou les infide-
les? Si tu entens les fideles: comment te semble
il qu'on pourra accorder cecy avec ce qui
s'ensuit des rebelles & des desobeissans, qui
ont esté du temps de Noé? Si d'aventure nous
ne le voulions prendre comme aucuns, qui en-
tendent par iceux, plusieurs qui perirent au

*Les Es-
pritz en
quel sens
doiuēt e-
stre pris.*

deluge : qui toutesfois voyans le iugement de Dieu sur eux , peurent recognoistre leurs fautes , & en obtenir pardon . Il me semble que Vvessel l'a ainsi entendu . Parquoy , combien qu'ilz ayent esté puniz corporellement : toutes fois ilz auroyent obtenu grace de Dieu , selon ceste opinion , par leur repentance .

1. Pier. 3.

E V. Mais cecy me semble tout contraire aux parolles de saint Pierre . Car il dit notamment , qu'il n'y eut que huit personnes sauuées . THE. Tu dis vray . Mais on pourroit encore respondre ce que Vvessel respond à ceste obiection : c'est , que cela se peut entendre du salut corporel , entant que Chan , qui estoit l'une de ces huit personnes , n'a pas esté approuué de Dieu , ains a parapres esté maudit , comme membre pourry de l'Eglise .

E V. Mais quand bien nous le voudrions ainsi entendre , pourquoy parleroit plustost saint Pierre de ceux qui ont esté du temps de Noé , que des autres , soit qu'il parlaist des fideles , ou des infideles ? THE. Nous parlerons de cecy parapres . Mais aduise encore à vne autre difficulté , qui t'est la plus contraire de toutes . Si tu entens par ces espritz les infideles , tu mettras ton limbe & ton purgatoire par terre . Car vous n'entendez pas qu'autres y soyent allez , que les fideles , & qu'ilz ayent esté ordonnez pour autres . Dauantage , quand saint Pier

re dit, exposât ce qu'il a voulu entendre par ces espritz, que ces mortz auxquelz Christ a esté prêché, ont esté euāgelizez, afin qu'ilz fussent viuans selon Dieu par esprit: il declare là, bien manifestement, que cela ne se peut entendre que des fideles trepassez: si nous prenons le nom de Mortz en sa signification naturelle.

E V. A ce que i'en voy, de quelque costé que nous nous tournions, nous trouuerons tousiours des difficultez, desquelles il nous sera fort difficile de nous déuelopper. Derechef, si nous prenons ces espritz, pour les fideles, comme il semble que ce second passage le requiert: la sentence de ceux qui entendēt que Iesus Christ soit allé annoncer par la vertu de son Esprit, la condamnation aux damnez, sera mal aisée à soustenir.

T H E. Nous examinerontost plus à plein ceste sentence. Mais cependant, tu dois entendre, qu'il y a plusieurs expositeurs, qui pour se depeschier de toutes ces difficultez, ont pris ce mot Mortz, en autre sens: & cecy derechef en diuerfes manieres. Il y en a qui le prennent bien en sa signification naturelle, *Autre exposition.* sans regard au temps auquel saint Pierre a escrit cecy: mais regardans au temps auquel ceste predication, de laquelle il parle, a esté faite, ilz le prennent pour les viuans.

E V. Je ne puis pas bien entendre ces choi-

festant contraires. Car quel propos y a il de le prendre pour les viuans, & pour les mortz tout ensemble? **T H E.** Ilz le prennent comme si sainct Pierre parloit de ceux qui estoient desia mortz alors qu'il escriuoit ces choses, qui toutesfois auoyēt esté preschez du temps que ilz viuoyent: afin qu'apres auoir passé parla voye commune à toute chair, & satisfait à la sentence de Dieu, contre le peché, par la mort, à laquelle ilz estoient subietz, à cause d'iceluy, ilz fussent viuifiez par l'Esprit, alors que par le iugement de Dieu, ceux qui se moquent icy des fideles, & les persecutent, les tenans comme des monstres, & comme malheureux & execrables, seront condamnez & confus en la mort eternelle. Or en le prenant ainsi, ce passage ne conuiendrait pas bien, pour exposer l'autre, si nous ne prenions ces espritz, desquelz il est parlé en ce premier lieu, en ce mesme sens, & pour les fideles tant seulement: sinon que nous voulussions prédre l'un des passages pour la manifestation de la vertu de l'Esprit de Iesus Christ, pour la condamnation des meschâs: & en l'autre, pour le salut des bons.

E V. Ceste exposition semble auoir quelque couleur, comme si sainct Pierre vouloit admonester les fideles de son tēps, que le semblable à ce qui est fait enuers eux, a esté fait enuers leurs predecesseurs: qui ia soit qu'ilz ayent

yent esté en opprobre aux meschans, à cause de Iesus Christ & de la parolle de Dieu: toutesfois ilz attendent la vie en leur mort, par l'Esprit viuifiant de Iesus Christ.

THE. Voila comment ceste exposition se pourroit appliquer. Mais il y en a des autres qui entendent que saint Pierre ne parle icy que des viuans, auxquelz Iesus Christ a préché l'Euangile, tant en sa propre personne, que par ses Prophetes & Apostres, qui ont tous parlé par son Esprit. Parquoy, on peut bien dire, que Iesus Christ leur a préché, veu que ce n'estoit pas eux qui parloyent, mais Iesus Christ, qui parloit en eux par son Esprit. Ceux cy prennent les parolles de saint Pierre par metaphore & par allegorie. Car ilz entendent par les espritz qui estoient en prison, les mortz, desquelz il est dit au chapitre suyuant, que l'Euangile leur a esté presché: disans, que saint Pierre expose le premier passage, par le second. Or par ces mortz, auxquelz il a esté préché, ilz n'entendent pas derechef les trepassez: mais *Les vifz* prennent ce mot par metaphore, entendans par *appeller* iceluy, les pecheurs qui sont mortz par peché, *mortz* au sens que Iesus Christ a dit: Laissez enseuelir aux mortz, leurs mortz: & au sens auquel S. Paul a dit, La vefue qui vit en delices, icelle en viuant est morte. Ilz entendent aussi que saint Pierre ait appelé ces mortz du nom d'Esprit,

Mat. 10.
Iean 20.

Les vifz
appeller
mortz

Mat. 8.

1. Tim 5.

Gal. 2.

Rom. 13.

1. Theff. 5.

1. Pier. 1.

Esa. 42.

49. 61.

Mat. 16. 18.

au chapitre precedant, prenant vne partie de l'homme, & la plus noble, pour tout l'homme, vsant de celle figure qu'on appelle Synecdoche qui est fort cōmune aux saintes Escritures, cōme nous les voyons en ces passages, auxquelz il est dit souuentefois: Toute chair: toute ame, pour tout hōme, ou toute personne. Ilz disent cecy, pource que saint Paul a diuisé les parties de l'hōme en trois: en l'esprit, l'ame & le corps, escriuant aux Thessaloniens. Ilz estiment aussi que saint Pierre a appelle ces hōmes, desquelz il parle, Espritz, ayant regard au corps qu'il appelle Prison, comme il appelle le sien, & celuy des fideles, Tabernacle. Enquoy ilz pensent que saint Pierre a derechef eu regard à ce que Esaie, prophetisant de Iesus Christ a dit, qu'il ouuriroit les yeux aux aueugles, & qu'il deliureroit les prisonniers de la prison, & leur diroit, Sortez: à cause que l'ame, qui est morte par peché, est detenue par iceluy, cōme vn prisonnier, qui est aux liens, aux ceps, & en la prison. Pour ceste cause, nostre Seigneur Iesus Christ a vsé de ces motz, Lier & Deslier, pour retenir & pardōner les pechés. Ceux qui l'exposent en ceste maniere, nonobstant qu'ilz soyent d'accord, quant à l'interpretation de ces motz, Prison, Espritz & Mortz: toutesfois ilz sont quelque peu differés, quāt à cest esprit par lequel Iesus Christ est allé, & a presché aux
espritz

Espritz detenuz en la prison.

E V. En quoy? T H E. En ce que les vns
l'exposent pour la manifestatiō de Iesus Christ
qui a esté deuant son aduenement: les autres,
pour celle qui l'a suiuy. Ces seconds cy, enten-
dent par l'Esprit, le saint Esprit, que Iesus
Christ a enuoyé, & donné à ses Apostres, par
lequel il a prêché l'Euangile aux Iuifz & aux
Gentilz, qui parauant auoyent esté rebelles &
desobeissans à la Parolle de Dieu. Parquoy, il
les appelle Espritz rebelles & desobeissans, de-
tenuz en la captiuité d'erreur & de peché. Car
ia soit que Iesus Christ soit monté au ciel, & ait
retiré son corps d'entre nous: toutesfois il est
toufiours entre nous par la vertu de son Esprit,
par lequel il parle en ses Apostres, & ministres
& Pasteurs Euangeliques, à nous, depuis le ciel:
& préche & admoneste toufiours les pecheurs,
& touche leur cœur, & conduit & adresse leur
esprit par le sien, pour les faire entrer en son
Eglise, & pour sauuer ses éleuz en icelle, & les
deliurer du deluge de la fureur de Dieu, com-
me Noé en a esté deliuré par son arche.

E V. Que te semble-il de ceste exposi-
tion? T H E. Il n'y a rien de contraire à la
Foy: mais neantmoins il y a trois poinctz qui
empeschent qu'elle ne me peut bien satisfaire.
Le premier, c'est que ie ne trouue point que
les saintes Escritures ayent accoustumé d'ap-

*Quel est
l'esprit qui
a prêché
aux mortz*

*Iean. 20.
Act. 2.*

Eph. 2.

*Matt. 18.
Matt. 10.
Iean. 10.*

1. Cor. 12.

pellier les viuans du nom d'Esprit. L'autre, c'est que saint Pierre appelle ouuertement du nom de Mortz, ceux qu'ilz appellent icy Espritz, quand il s'expose parapres. Et de prendre ce nom de Mortz par allegorie, il n'y a point de bon fondement. Car quand ce mot est pris en ce sens, comme aux passages qui ont esté alleguez de Iesus Christ & de saint Paul, la correspondance des circonstances y est moins contrainte: si nous ne le voulons prendre comme i'ay tantost dit, sans allegorie. Le troisieme, c'est que ce qu'ilz disent n'est pas fort bien conioint avecce qui est dit du temps de Noé: combien que cela pourroit encore passer, en le prenant comme ilz le prennent, pour exemple & similitude.

EV. Tu as aussi dit, qu'il y en auoit des autres, qui rapportoyent ces espritz à ceux qui ont precedé l'aduenement de Iesus Christ.

THE. Ceux cy semblent auoir leur exposition moins contrainte: combien toutesfois qu'il y a tousiours quelque chose, qui ne coule point doucement. Ilz entendēt par l'Esprit de Christ sa vertu eternelle, par laquelle il a iadis esté Sauueur & Iuge du monde, comme il est à present, le sauuant par l'eau, comme il fait maintenant par le Baptisme. Et pourtant ilz entendent, qu'il est allé par son Esprit, c'est à dire par sa vertu diuine, & par sa Parolle, parmy le mon-

monde, comme il a passé parmy Egypte, déclarant sa puissance, en destruisant les Egyptiens, & sauuâs les Israelites. Autât en a-il fait du Exo. 12. 17.
Gen. 6. 7. tēps du deluge: & fait encore aujourdhuy. Car il a annôcé son iugement aux meschans & aux iniques, & les a abyfmez par le deluge, ainsi que maintenant il l'annonce à tous: afin que ses seruiteurs soyēt sauuez, en l'arche de son Eglise: & les autres abyfmez, par le iugement de Dieu. Pource Noé est appelé le Heraut de iustice: pour monstrier, que par iceluy, l'Esprit de Iesus Christ annonçoit aux hommes, la iustice & le iugement de Dieu, comme vn Roy annôce la guerre par son heraut d'armes, à ceux qui luy sont rebelles, & qui refusent la paix. Car le mot duquel saint Pierre vse, quand il dit, que Iesus Christ a presché aux espritz, ne signifie pas seulement prescher, mais aussi publier vn mandement & vne ordonnance, comme vn heraut. Et ce mot Heraut, duquel saint Pierre vse parlant de Noé, est prins de celuy mesme, duquel il vse icy: disant, que Iesus Christ a presché aux espritz. Semblablement quant à l'esprit, S. Paul nous monstre clairement que l'esprit de Dieu & l'esprit de Christ, est tout vn, quand il dit: vous nestes pas en la chair, Rom. 8.
Gal. 4. mais en l'esprit, entant que l'esprit de Dieu habite en vous. Or qui n'a l'esprit de Christ, n'est pas des siens. Il est aussi escrit, que Dieu a par- Heb. 1.

lé iadis par ses Prophetes en diuerſes manieres, lequel a parlé aux derniers iours par ſon propre Filz. Parquoy il n'y a point de doute que ceſt eſprit duquel Dieu a dit, qu'il ne iugeroit plus entre les hōmes, ne fuſt l'eſprit de Chriſt, par lequel Dieu s'eſt touſiours maniſté.

Gen. 6.

E V. Quant à ce que ſainct Pierre appelle ces hommes Eſprit, qu'en diſent ilz? T H E.

*Les eſpritz
prisoniers.*

Outre ce qui en a deſia eſté dit, aucuns pour le premier eſtiment qu'il l'ait encore fait, regardant à leurs penſées & affectionſ, poſſédées des mauuais eſpritz. Et fondent leur interpretation, ſur ce qui eſt eſcrit: Dieu a veu que

Gen. 6.

toute la péeſce du cœur, eſtoit addonnée à mal. Et ſur ce que ſainct Paul (parlant de la uiſſance

2. Cor. 10.

qui luy eſt donnée par le miniſtere Euangelique) dit, qu'elle eſt pour abbatre toute hau-teſſe qui s'eſleue contre Dieu, & pour mener captiues les penſées des hommes, à l'obeiſſance de Chriſt, les deliurant de la ſubiection des eſpritz mauuais, qui tiennēt captifz les eſpritz & entendemens des reprouuez. Il ſemble auſſi que la reſponſe que Ieſus Chriſt a fait à ſes diſciples, deſirās que le feu deſcendit du ciel, pour ardre & conſumer celle ville de Samarie, en laquelle on luy refuſa logis, puiſſe au-cunement ſeruir à ce propos. Car quand il leur dit: Vous ne ſauez de quel eſprit vous eſtes, il

Luc 10.

appelle leur penſée & mauuiſe affection, &

ceux

ceux qui sont menez d'icelle, espritz. Nous en vsons aussi souuentesfois, en nostre commun langage, quand nous disons d'un homme: cest un bon, ou un gentil, ou un mauuais & dange-reux esprit. *E v.* Entendent ilz donc, par les espritz qui estoient en prison, ceux qui estoient en la prison spirituelle: ou desquelz les espritz estoient detenez en captiuité & prison, par les malins espritz?

T H E. Il est vray, & regardent encore à ce que l'Escripture appelle, ceux qui perirent par le deluge, les filz de Dieu, qui veirent les filles des hommes: & à ce qui est là escrit, que le Seigneur frappa toute ame, & osta tout esprit du milieu, & qu'il a dit, en les menassant, qu'il leur osteroit son Esprit. Pour ceste cause ilz estiment, que saint Pierre a esté induit, à appeller telz personnages, espritz, à cause que cependant que leurs espritz dormoyent, & estoient detenez par les malins espritz, ilz ont esté surprins & abyomez, par les eaues du deluge, & l'esprit leur a esté osté, comme à celuy qui a esté estoufé en l'eau. Ilz regardent aussi à ce que ce mot duquel saint Pierre a vsé, que nous interpretôs prison & chartre, signifie semblablement la veille, la garde, & la guette qui se fait de nuit: tellement qu'il leur semble, que S. Pierre ait regardé à la parabole de Iesus Christ, qui admonnest un chacun de veiller, comme

Gen. 6.

Mat. 24. 42

le seruiteur loyal, attendant son maistre pour-
tant qu'il ne fait, à quelle heure il doit venir. Il
ne fait, si ce sera à la seconde, ou à la tierce, ou
à la quarte veille de la nuit. Et pourtant que
ceux cy n'estoyent pas bien sur leur garde, ilz
y ont esté surpris, comme ceux qui s'endor-
ment au guet: ce qui n'est pas aduenü à Noé.
Pour toute resolution, ilz veulent tomber sur
ce sens: Ia soit que Iesus Christ soit mort, quant
à la chair, & quant au corps & à son humanité,
& qu'il ait esté reuelé & manifesté en icelle,
seulement en ces derniers iours, toutesfois il a
esté de tout temps & de toute eternité, & a esté
viuifié par l'Esprit: c'est à dire, par sa vertu e-
ternelle & diuine puissance, par laquelle il ne
s'est pas seulement ressusçité des mortz, mais
nous a aussi rendu sa chair viuifiante, & a cōuer-
ty la mort en vie, viuifiant par icelle, tous ceux
qui estoient mortz par peché. Et afin que nul
ne mesprise Iesus Christ, à cause qu'il est mort,
& a esté crucifié, comme vn homme vil & ab-
iect, & comme s'il n'eust pas eu vertu & puis-
sance pour se deliurer de la violence de ses en-
nemiz, & d'eiter la mort: il monstre qu'il est
tellement mort, qu'il n'y a vie qu'en sa mort:
& que nul ne peut viure que par luy: & qu'il
n'est point seulement d'aujourd'hui, mais de
toute eternité: & que par ce mesme esprit &
vertu diuine & eternelle, desia autrefois, il est
venu

*Le sens des
parolles de
S. Pierre.*

Iean 6.

Heb. 13.

venu au monde, & a iugé & condamné les rebelles, les espritz hautains & peruers, opressez des malins espritz: qui n'estoyent point sur leur garde, mais dormoyent, sans penser au iugement de Dieu, iusques à ce que le deluge les *Gen. 6. 7.* a surprins, comme il fait encore à present, par ce mesme esprit, par lequel il iuge & condamne le monde, & sauue & viuifie ses eleuz, ainsi *Iean 16.* qu'il a fait du temps de Noé. *E v.* Il me semble que ceste exposition a assez belle apparence, sinon que ie trouue l'interpretation des espritz, vn petit trop subtile, & prinse vn petit de trop loing.

T H E. Ie suis bien aussi de ton opinion. *E v.* Puis que tu n'as encore peu trouuer exposition, pour bien cōtenter ton esprit, entre toutes celles qui ont desia esté recitées, & que tu reiettes la nostre si loing: ie desireroye bien que tu m'en peusses amener vne si propre, qui peust bien satisfaire & à ton esprit & au mien.

T H E. Ie le voudroye bien aussi de ma part: mais il m'est fort difficile: ains qui plus est, quand ie considere d'vn costé l'obscurité du *L'obscurité du passage de S. Pierre.* passage (lequel nous pouuons bien tenir pour l'vn des plus difficiles à biē entēdre & bien exposer, qui soit aux sainctes escritures) & de l'autre costé la diligence que tant de sauans personnages ont mise, pour entrouuer la vraie intelligēce, & qu'il n'y a nul d'iceux, qui puis-

se encore fatisfaire, non seulement aux autres, mais à soy-mesmes, certes ie ne say comment y mettre la main. Car il m'est bien plus facile, de reciter les sentences des autres, & de monstrier en quoy elles ne me peuuent fatisfaire, que d'en bailler quelque meilleure expositiō, que aucunes qui en ont desia esté baillées. Pour ceste cause, i'en ay bien voulu reciter plusieurs, afin que tu peusses conferer les vnes avec les autres, & élire celle qui te semblera mieux contenter ton esprit & ton iugement, si ce que i'en diray ne te plait: qui ne sera parauenture pas en beaucoup different, à ce que les autres en ont desia dit: ou si toy-mesmes n'en peux apporter quelque meilleure que tous les autres.

E V. Ainsi faisant, tu ne feras tort à personne: pour le moins ie pourray entendre, quelle sentence te plait le mieux.

T H E. Quelque obscurité qu'il y ait en tous ces deux passages de S. Pierre, si ne suis ie pas toutesfois de l'aduis de ceux qui disent, que saint Pierre considerant l'horrible iugement de Dieu, qu'il a declairé sur les hommes, par le deluge, a esté comme rauy, & qu'il a dit ces choses, comme transporté d'entendement: non pas toutesfois estant delaisé de l'esprit de Dieu. Ie trouue meilleur ce qu'ilz disent, qu'il peut estre que saint Pierre a eu quelque reuelation particuliere, des choses desquelles il a parlé

*Luch in
Cōment. in
Gen. ca. 6.*

*Reuelatiōs
particul-
eres.*

parlé si obscurément, comme saint Paul tes- 2. Cor. 12. 13
moigne de soy, qu'il a esté rauy en paradis, &
iusques au tiers ciel: & qu'il ne fait si c'est en
corps, ou hors du corps: & qu'il a là veu des
choses, qu'il n'est pas loisible à l'homme de ra-
conter. Car le Seigneur non seulement a reue-
lé souuentesfois beaucoup de choses à aucuns
de ses Prophetes, & de ses Apostres, & de ses
seruiteurs, qu'il n'a pas reuelées aux autres, ny
à tous: mais aussi il a souuentesfois annôcé par
iceux des secretz à son Eglise, desquelz au- Propheties
cachées.
cuns n'ont peu estre entendus parfaitement,
iusques au temps qu'ilz ont esté accomplis: &
les autres, demeurerent encore cachez, iusques en
leur temps, qui sera pour le moins manifesté en
l'autre monde s'il ne l'est en cestuy cy.

E V. Je croy que nous pouuons bien di-
re cela, de plusieurs visions & Propheties, qui
sont en l'Apocalypse, desquelles la vraye &
certaine intelligence nous est encore autant
cachée & couuerte, comme celle des visions
& Propheties des anciens Prophetes, nommé-
ment d'Ezechiel & de Daniel, l'ont esté en l'E-
glise ancienne, auant qu'elles ayent esté accom-
plies: entre lesquelles il y en a encore aucunes
aujourd'hui si obscures, que ie ne pense pas
qu'il y ait beaucoup d'hommes modestes &
de iugement sobre, qui s'osent vanter d'en a-
uoir la vraye & la parfaite intelligence. T H B.

*Le profit
que nous
deuons rap-
porter des
passages
obscurs de
l'escriure.*

I'approuue bien ton dire en cecy. Or soit que ce passage de saint Pierre doye estre reputé de telle qualité, ou autrement: pour le moins vn chacun recognoit & confesse bien, l'obscurité qui y est, laquelle nous doit admonester, que Dieu au milieu de ceste grande lumiere de sa parolle, qui nous est reuelée aux saintes escriptures, il nous a bien encore voulu laisser en icelles, quelques pointz obscurs & difficiles à entendre & à comprédre, non pas aux choses que nous ne pouuons ignorer, sans dommage de nostre salut: mais en celles que nous pouuons ignorer sans dommage d'iceluy, iusques au temps qu'il a ordonné, pour les nous manifester plus clairement, & nous en donner la parfaite intelligence. Et cecy pour beaucoup de causes bien iustes. La premiere, pour nous esueille à l'estude, & corriger nostre negligence & paresse. La seconde, pour nous apprendre à tenir plus cher les thresors qu'il nous ouure en sa Parolle, & à mieux imprimer en nostre memoire, la doctrine qu'elle nous propose. La troisieme, pour abbatre nostre orgueil & nostre arrogance, & la presumption & la fausse opinion que nous auons coustumierement de nous-mesmes, de nostre fauoir & de nostre esprit. Car incontinent que nous auons le moindre fauoir du monde, il nous semble que nous ayons des ailes pour voler iusques au ciel, com-

*Presomp-
tion hu-
maine.*

me les Anges, & que nous soyons comme des
 petis dieux, sachans tout, sans rien ignorer. La
 quelle presomptiō & fausse persuasiō de nous-
 mesmes, est cause que nous voulons tous estre
 incontinent maistres, contre l'admonition de ^{laq. 3.} sainct Iaques, & qu'on trouue plus de maistres
 que de disciples. Car il n'y a presque nul, pour
 ignorant qu'il soit, qui n'ait honte d'appren-
 dre, ou qui ne soit pour le moins bien negli-
 gent & paresseux à l'estude, & sur tout des
 sainctes Escritures, qui est le principal & le plus
 necessaire de tous. Et pourtāt Dieu nous a vou-
 lu bailler matiere, en ceste philosophie celeste,
 pour nous faire vn petit suer quelque foys: nō
 pas pour nous desgouter & reculer de l'estu-
 de d'icelle, mais pour nous y inciter & aigu-
 fer d'auantage, & pour nous abbatre vn petit
 nostre caquet & nostre gloire & folle presom-
 ptiō: & pour nous mōstrer par experience, que
 c'est que nous pouuons de nous-mesmes, par
 tout nostre estude & labeur pour penetrer aux
 secretz de sa sciēce diuine, quād il ne nous bail-
 le point la clef, pour y trouuer ouuerture, quel
 que excellent esprit & entendement aigu que
 nous ayons. Il nous a aussi voulu monstrier, dōt
 proce de la cause de la cognoissance de Dieu
 que nous auons, & que les vns sont illuminez,
 & les autres demeurent aucugles: & si nostre
 vertu naturelle est cause de nostre illumina-

tion, ou la grace & la bonté de Dieu. Or ce seul passage de saint Pierre, à l'occasion duquel nous tenons ces propos, nous peult suffire, par son obscurité, quād il seroit bien tout seul aux saintes Escritures, sans auoir son semblable, pour nous enseigner toutes ces choses. Car il n'y a eu encore theologien, ny ancien, ny nouveau, pour expert & dextre qu'il ait esté, auquel il n'ait peu seruir comme d'espreuue & de docteur, pour apprendre à se cognoistre soy-mesmes: & le reste que nous auons dit, & à prier Dieu, pour l'intelligence de sa parolle, & à luy donner l'honneur & la gloire de toute science & de toute sagesse, laquelle appartient à luy seul. **E v.** C'est donc vn passage, à ce conte, auquel nous pouuons beaucoup apprendre, mesmes en ignorant le propre & naturel sens d'iceluy, si nous en fauons tirer la doctrine & le fruit que tu as maintenant proposé: mais quand i'oy ces propos de toy, ie crains cependant, que tu ne mettes ces choses en auant, pour eschapper d'en dire ta sentéce.

T H E. Il est tout certain, que i'auroye plustost fait, de te confesser tout rondement, ou que ie n'y enten du tout rien, ou bien peu, ou que ie ne m'y puis bien satisfaire, de quelque costé que m'y tourne. Car ie ne doy pas auoir plus grand honte de confesser cecy franchement, qu'aucuns des plus excellentz theolo-

logiens, qui ont esté de nostre temps. Toutefois ie ne laisseray pas pourtant, de te declairer pour le moins, quelle sentence me contente le plus, iusques à ce que i'en aye vne meilleure. Car ceux mesmes qui ont confessé ce que i'ay dit, n'ont pas laissé pourtāt, d'en dire ce qu'ilz ont peu, & qu'ilz en ont pécé le meilleur. D'autre part, ie ne veux pas suyure vn tas de fantasti-
*Espritz fa-
tastiques
& despe-
ratifz.*
ques, & d'espritz creux & desperatifz, qui iugēt de la religiō Chrestienne, cōmes'il n'y auoit riē de certain, & qu'ō n'en peust riē tirer des saintes lettres: ains qu'il fallust attendre quelque nouveau oracle du ciel, & quelque reuelation miraculeuse, à cause des diuersitez d'opinions qui sont entre les plus sauās mesmes, au sens de plusieurs passages des saintes Escritures. Car quant à ce qui est necessaire à nostre salut, nous en auōs autāt de reuelatiō & de certitude, qu'il nous en faut, si nous ne desdaignōs point l'escole du S. Esprit, qui nous est ouuerte en l'Eglise de Iesus Christ, par la parolle d'iceluy. Ce-
*Le moyen
qu'il faut
tenir aux
passages
obscurs.*
pendant, si nous rencontrons quelque passage obscur, il ne nous faut pas pourtant laisser de trauailler, apres l'intelligence & l'exposition d'iceluy, & d'en proposer nostre aduis à l'Eglise, par telle condition, que nous gardions tous iours les reigles, que S. Paul nous baille, pour moderer la Prophetie en icelle. La premiere c'est de ne sortir point hors des bornes de

1. Cor. 12.
Rom. 12.

1. Cor. 14.

la doctrine generale & certaine, qui nous est
 desia reuelée, & de laquelle nous sommes des-
 ia bien asseurez par la claire parolle de Dieu,
 & de ne forger point de nouueaux articles de
 foy, & de doctrine nouuelle, sur quelque passa-
 ge obscur & plein d'abiguité, qui soit cōtraire
 aux articles de nostre foy, & à la doctrine com-
 mune de la vraye Eglise de Dieu, qui a cer-
 tain fondement aux sainctes Escritures, & a es-
 té approuuée de tous tēps, par tous les vray-
 s seruiteurs de Dieu. L'autre c'est, puis que les
 espritz des Prophetes doyuent estre subietz
 & soumis aux Prophetes, que nous soumettiōs
 tousiours ce que nous mettrons en auant, qui
 pourra encore auoir quelque ambiguité, au iu-
 gemēt de la vraye Eglise, & de ceux auxquelz
 Dieu a donné plus de ses graces: & que nous
 ne demourions en nostre sentence, sinon ius-
 ques à ce que queleun se leue, auquel il soit re-
 uelé quelque chose de meilleur, qui apporte
 aussi son talent en l'Eglise, afin que par la com-
 municatiō mutuelle des dōs de Dieu, tous vien-
 nent en l'vniō de foy & de doctrine. Cela estāt
 bien obseruē, nous sommes hors de dangier.
 Car si nous ne frappons du premier coup au
 blanc, & ne venons au vray but du passage à
 nous proposē, pour le moins nous en approche-
 rons aucunemēt, & ne dirons rien contre l'hon-
 neur de Dieu & l'edification du prochain:

mais

mais pourrons bailler par les conferences que nous ferons des Escritures, quelque ouuerture aux autres, qui leur pourra seruir, & qui les fera paraenture voir plus loing que nous mesmes ne voions, & leur donnera entrée à plus grande intelligence que nous n'auons: comme nous le voyons souuentefois aduenir par experience. Car il en prent souuent en cecy, comme quand on tire le feu d'une pierre, en la frappât souuentefois du fusil.

E V. J'ay experimenté ce que tu dis, par plusieurs fois. T H E O. Aduisons d'oc, en quoy nous nous pourrons resoudre, pour le present, sur tout ce qui a esté dit iusques icy, touchant ces deux passages de saint Pierre. Tu as desia peu entendre, en quel sens ie pren ce qui est dit de l'Esprit, par lequel Iesus Christ est allé aux espritz enclos en la chartre, & celle allée d'iceluy semblablement: non pas pour vne allée reale & locale de l'ame & de l'esprit humain de Iesus Christ: mais d'une allée spirituelle, par laquelle la vertu de Iesus Christ a esté manifestée, par ce mesme esprit, par lequel il a esté viuifié. Quant aux espritz auxquelz il est allé, ie l'ayme mieux entendre des mortz, que des viuans: tant pour raison de l'autre passage qui s'ensuit au chapitre prochain, que pour les autres raisons, qui ont desia esté touchées. Mais voicy maintenât le plus fort, c'est assauoir, s'il

conuiendra mieux d'entendre par ces espritz, ou les fideles, ou les infideles, ou tous les deux enfemble. Car tu as desia ouy des difficultez qui me pressent d'une part & d'autre. **E V.** Les ayant considerées, comme tu les as proposées, ie trouue la chose bien difficile à accorder, soit que tu les prenne pour les fideles, ou pour les infideles: mais encore plus, de les prédre pour tous les deux ensemble.

T H E. Nous aduiferōs à tout cela. Quant à moy, il me plairoit fort bien, & trouueroye l'exposition assez douce, en les prenant pour les fideles, si ce n'estoit que ie ne puis aisément comprendre, comment ce qui est dit par apres des infideles, se puisse raporter à autres, qu'à ces espritz parauant mentionnez, sans faire violence à la lettre: sinon qu'on peust presumer, que le passage eust esté corrópu, ou que nous le prinssions, comme ie le diray tantost. Car les mōtz Grecz, desquelz saint Pierre a vsé, en la langue greque, comme nous les auons en noz exemplaires, ne se peuuent autrement construire. Toutefois si cela n'estoit, le sens conuiendroit fort bien au reste, tant à l'argument que S. Pierre traite, qu'à ce que i'ay traité du Sein d'Abraham, & de l'efficace eternelle de la mort & passion de Iesus Christ, tant enuers les viuans qu'enuers les mortz.

E V. Mais ce qui est là dit de la prison,
con-

conuiendroit mal, à ce que tu as dit du Sein d'Abraham. Car tu en ferois vne prison, & conséquemment de Paradis: ce que tu as tousiours nié. *THE.* Il y a deux moyens, pour soudre ceste difficulté. Car pour le premier, tu as desjà bien entendu, comment aucuns prenoient ce mot, qu'on expose cōmunement par prison & chartre, pour vne guette & vne veille, pour ce que le mot signifie l'un & l'autre. Si nous le voulions prendre en ceste seconde signification, il se pourroit fort bien raporter, à celle promesse qui a esté faite de Iesus Christ, aux peres anciens, & à l'attente qu'ilz en auoyent, & en laquelle ilz se reposoyent en ce Sein d'Abraham, lequel n'a pas ainsi esté appelé, pour ce qu'Abrahā y receuoit les autres, mais pour ce que luy & tous ses enfans, selon l'esprit, & non pas selon la chair, y ont esté receuz de Dieu, attendans là leur consommation par Iesus Christ, comme le regardāt venir de loing, ainsi comme ceux qui sont en vne guette, d'un tel desir comme il nous a esté manifesté en Simeō, pour se rassasier du tout en luy. S'il sembloit plus conuenable de le prédre pour chartre & prison, nous pourrions dire à bonne raison, que saint Pierre a ainsi voulu parler, pour mieux amplifier la grace de l'Euangile, comme comparant ceux qui ont esté souz la seruitude de la loy & souz les ombres & figures

*Comment
le mot de
prison peut
estre appli
qué aux es
pritz fideles.*

d'icelles, à ceux qui seroyent comme en vne prison, au pris de ceux qui ont receu plus grand lumiere, par l'Euangile, comme il a desia esté dit souuentesfois. Mais cependant, il ne faudroit pas penser, que le Sein d'Abraham ait esté vne prison, en laquelle il y ait eu aucune facherie: ains que les choses sont ainsi proposées, par comparaison de l'accroissement des benefices de Dieu, & de la manifestation plus ample de sa gloire.

Zach. 9.

*L'exposition
dupas-
sage de Za-
charie.*

Mat. 26.

1. Cor. 11.

EV. Il me semble toutesfois, qu'en le prenant en ce sens, les parolles de saint Pierre conuiendroyent fort bien, avec la Prophetie de Zacharie, disant: Tu as aussi mis dehors tes prisonniers, par le sang de ton Testament, du puits auquel n'y a point d'eau. Il me semble que ce puits conuient fort bien au Limbe, auquel les bons peres. anciens attendoyent leur deliurance, par le sang de Iesus Christ, qui est le sang du nouveau Testament. THE. Ce passage est vn petit autrement couché en Hebrieu, que tu ne l'as recité, selon la translation commune. Il y a, en le prenant mot par mot: Et toy aussi, au sang de ton alliance: i'ay enuoyé tes prisonniers hors de la fosse, en laquelle n'y a point d'eau. Retournez à la forteresse, vous prisonniers, qui auez esperâce. Ces parolles sôt dites, en la personne de Dieu, qui parle à son Eglise. Et pourtant, quand il dit: Toy, assauoir Syon,

Sion, qui est l'Eglise: il faut entendre, pour par faire le sens, Es sauuée, ou quelque autre telle chose, par le sang de ton alliance: c'est à dire, par la vertu de l'alliance que Dieu a faite avec toy par la promesse de Iesus Christ, faite à Abraham: par le sang duquel ceste alliance a esté confermée & consommée, comme il a esté figuré par l'effusion du sang des bestes immolées, en figure de celuy de Iesus Christ: comme vn testament est confirmé & consommé par la mort du testateur. Et puis il declaire la maniere comment cecy a esté fait, & comment la vertu de ce sang s'est manifestée, quand il a dit, I'ay mistes prisonniers hors du puits, ou de la fosse qui n'a point d'eau. Le Seigneur veut dire en somme par ces parolles, qu'il deliurera son peuple, qui est comme captif, qu'il tient pour ses enfans, & les enfans de son Eglise, detenez en l'abyssme de toutes miseres. Mais il en parle, comme si la chose estoit desia faite, selon la commune maniere de parler des Prophetes, tant pour declairer, que la chose que Dieu promet, est aussi certaine, comme si elle estoit desia accomplie, que pour reduire en memoire à son peuple les deliurances anciennes desia faites de Dieu par plusieurs fois, tant enuers luy, qu'enuers ses Peres, qui ont toutes esté figures de la grande deliurance faite par Iesus (de laquelle nous attendons tous la plei-

Luc 11.
Marc 14.
Heb. 7.8.
9.10.

ne conſommatio en la vie eternelle) & principalement celle d'Egypte, qui eſtoit fort ancienne, & celle de Babylone, qui eſtoit encore preſque toute fraiche, & de laquelle le peuple, duquel Zacharie a eſté Prophete, auoit ne a guere eſté deliuré. Et pource il a entendu par les Priſonniers, ſon peuple captif: par le Puits & la ſoſſe, vne captiuité, vn gouffre & vn abyſme de toutes miſeres & malheurs, duquel il n'eſtoit poſſible de ſortir par moyen quelcôque, ſi Dieu n'y mettoit la main luymeſme. Par tant, ce miſerable eſtat du peuple de Dieu, eſt à bon droit appellé, Puits & ſoſſe, voire encor' ſans eaue, pour mieux monſtrer la grandeur de la miſere humaine, & la difficulté d'en ſortir, qui y eſt: & pour mieux manifefter la grande uiſſance & miſericorde de Dieu, par laquelle nous en ſommes deliurez. Car puis que c'eſt vn puits & vne ſoſſe, il y a grande profondeur. Or ſ'il y auoit de l'eaue, il y pourroit encore auoir quelque eſperance d'y auoir quelque reſſraiſſement, & d'en pouuoir ſortir ou en nageant, ou en quelque autre maniere. Mais puis qu'il n'y a point d'eaue, il eſt comme vn deſert ſterile, ou comme vn maresſchage, auquel il n'y a point d'eaue ſuffiſante pour nager, ny delectable & conuenable pour boire, ny terre bien ferme, pour ſ'y ſouſtenir, mais ſeulement vn borbier puant, de terre & de
eaue

*Puits ſans
eaue.*

eaue pourrie, infecte, meslée & confuse l'une parmy l'autre. Parquoy, on n'y peut ny marcher, ny nager. Car quâd on en pense tirer vn pied & vne iambe, on enfonse de l'autre: & par ainsi c'est tousiours à recommencer.

E V. Certes la comparaisn me semble bien propre, pour nous mettre bien claiement deuant les yeux l'estat & la misere du genre humain. Car il nous en prend en ce monde, comme il est dit en commun prouerbe: Estre arresté en la bource. Mais combien que ton interpretation a vn fort bon sens: toutesfois ie

*Herere in
luto.*

crain que tu ne face violence aux parolles du Prophete, afin que tu ne sois contraint d'approuuer mon opinion. THE. Tu vois tout clairement, qu'il n'y a point là de contrainte, ains que le sens coule tant doucement que rien plus, & qu'il conuient au possible, avec ce qui va deuât & apres. Car le Prophete n'adresse point là sa Parolle aux mortz. Car ilz sont desia deliurez de ces miseres: mais aux viuans, comme il appert bien par ce qu'il dit incontinent apres: Retournez-vous à la forteresse, vous prisonniers, qui auez esperance. Cecy ne peut estre appliqué bien proprement aux morts, mais aux viuans tant seulement, auxquelz le ministere de la Parolle de Dieu s'adresse, entant qu'ilz sont encore en la course & au combat,

2. Timo. 4

& en estat auquel ilz se peuuent amender &

conuertir à Dieu, & auoir recours & refuge à luy, contre leurs ennemis. Et d'alleguer que le Prophete parle aux mortz par apostrophe, adressant ses parolles aux absens, à la maniere des poetes, ceste cauillation & subtilité ne conuiendroit pas bien icy. Or combien que les parolles du Prophete s'exposent assez d'ellesmesmes, & que i'aye beaucoup de bons Docteurs de nostre temps, en faueur de mon exposition: toutesfois ie suis encore content de te proposer l'exposition que saint Augustin en baille, qui ne va pas fort loing de mon intelligence, afin que tu entendes, que i'ay aussi des anciens Docteurs, voire des principaux, en ma faueur.

Voicy ses parolles touchant ce passage: On peut, dit il, exposer en diuerses sentences, & selon la droite Foy, ce qu'il veut qu'on entende par ce puits. Toutesfois il me semble, qu'il ne peut rien mieux estre signifié par iceluy, sinon la profondeur seche de la misere humaine, estant comme sterile, en laquelle n'y a point de ruisseaux de iustice, mais vn borbier d'iniquité. Il est certes parlé de ce puits aux Pseaumes: Et il m'a tiré du puits de misere, & de la bourbe du borbier. Tu vois quelle sentence semble auoir le mieux pleu à saint Augustin.

E V. Tu ne veux donc point prendre ce puits & celle fosse de Zacharie, pour l'estat des ames, qui estoient au sein d'Abraham.

*August. de
ciuit. Dei
li. 18. c. 35.*

Psal. 39.

THE. Tu peux bien iuger toy mesme, tant par les parolles du Prophete, que par le tesmoignage de Iesus Christ, touchât le sein d'Abraham, Luc 16. quelle raison il y pourroit auoir : & s'il n'y auroit pas beaucoup plus d'apparence, de le prendre pour l'estat, auquel le riche estoit, & les autres reprouuez, s'il le falloit rapporter à l'estat des mortz, qu'à l'estat de ceux qui estoient au sein d'Abraham avec Lazare. Car quand le riche demande à Abraham, qu'il enuoye Lazare, qui trempe son doigt à l'eau, pour luy en mettre vne goutte sur la lague: il declare bien qu'il estoit en vn gouffre d'angoisse, auquel il n'auoit point vne seule goutte d'eau, pour e- Eau & feu en l'autre vie. steindre sa soif, au milieu de celle grande flamme de feu de la fureur de Dieu, en laquelle il ardoit : & qu'il y en auoit là ou Lazare estoit: ou autrement, il eust esperé & requis en vain, qu'il luy en eust apporté. Or tu n'ignores pas, que les ames sont espritz, qui ne mangent ny boient, comme les corps, & qu'elles n'ont besoin d'eau materielle, pour esteindre leur soif & leur ardeur. Mais comme Iesus Christ nous a voulu proposer l'image de la fureur de Dieu, sur les reprouués, condamnés à mort eternelle, par la vehemence, l'ardeur & le torment du feu materiel, aussi par le contraire, il a pris l'eau, qui est contraire au feu, pour nous donner à entendre, par la similitude, la com-

paraison & la nature d'icelle, la grace, la faueur & la benignité, par laquelle ses eleuz sont re-créés & consolés, en la vie eternelle. Puis donc que ceste eaue de la douceur & bonté de Dieu, estoit au sein d'Abraham, tu peux bien entendre, qu'il ne se peut prendre, pour ce puits de Zacharie, auquel ceste eaue est requise. Car ie ne pense pas, que tu sois si lourd, que tu estimes, qu'il faille prendre les parolles de Zacharie charnellement, sans figure: & l'eaue de laquelle il parle, pour de l'eaue materielle, & nō pas pour l'eaue de la grace & de la faueur de Dieu enuers son peuple.

E V. Tu peux bien ainsi iuger de moy: mais puis que tu m'as fermé la gueule de ce puits par ton interpretation, en sorte, qu'au lieu que ie t'ay cūidé enfermer en iceluy, pour venir à bout de mō intētion cōtre toy, tu m'y as quasi cūidé enclorre: & que tu m'as declairé en quel sens on pourroit approprier celle prison, de laquelle saint Pierre parle, aux espritz des fideles, ie voudroye bien ouyr maintenant en quelle maniere tu la peux appliquer aux infideles: combien que cecy me semble bien plus facile, que l'autre que tu as desia fait. Car nul ne trouue estrange, d'appeller enfer, vne chartre & vne prison. T H E. Il est vray: mais encore fera il bon d'aduiser aux passages de l'Escrature, qui nous peuuent seruir à nous mon-
strer

ſtrer combien l'application peut eſtre conue-
nable à l'intention & à la procedure de ſainct
Pierre. Il n'y a point de doute, que ſainct Pier-
re ne pretède, entre les autres choſes qu'il trai-
te en toutes ces deux Epiſtres, principalement
à induire les fideles à renoncer totalement &
à eux & au monde, & ſe ſoumettre & eux &
toutes leurs affectiions charnelles, à l'obeiſſan-
ce de Ieſus Chriſt & de ſon Euangile: ſe remet-
tant du tout à luy: ne penſans à autres choſes,
qu'à la vie celeſte, & qu'ilz ne ſe laiſſent point
deſtorner de ce propos, quelques aſſaux qu'ilz
ayent par les perſecutions & tentations des
meſchans & de leurs triôphes: mais qu'ils y per-
ſeuerent par vraye & viue foy, en toute pa-
tience & conſtance, iuſques à la fin, eſtans aſſeu-
rez que leur eſperance en Ieſus Chriſt, ne les
deceura point, mais qu'ilz en auront la iouiſ-
ſance au royaume de Dieu: & que les meſchâs
qui luy ſeront rebelles, n'eſchapperont point
ſon iugemēt, quoy qu'il tarde: combien qu'ilz
le ſemblent eſchapper, ſelon le iugement de la
raiſon humaine, pource que cela n'apparoit
pas touſiours en ce monde, mais ſouuantesfois
tout le contraire. Or entre les autres raiſons
qu'il met en auant, il prend l'exemple de Ieſus
Chriſt, comme il a eſté dit: & exhorte les fideles
à patience, à l'exemple d'yceluy, afin qu'ilz
reconoïſſent en leurs tribulations, la corre-

*Le ſommaire
des deux-
eſpiſtres de
S. Pierre.*

tion de Dieu, & qu'ilz la reçoient comme enfans debonnaire, de la main de leur Pere. Puis il conclud par la comparaifon des aduerfitez des enfans de Dieu, combien le iugemēt de Dieu fera grand & horrible contre fes ennemis. Car ſi elle eſt ſi aſpre ſur le bois verd & le bon arbre: que fera-ce du bois ſec & des mauuais arbres? Car tout arbre qui ne fera bon fruit, fera coupé & mis au feu. Or il eſtoit bien neceſſaire, pour confermer la Foy & l'eſperance des fideles, de leur remonſtrer la vertu & la puiſſance de celuy auquel ilz ont fiché l'ancre de ceſte eſperance, pour demeurer fermes en icelle, qui eſt cachée en luy, ſouz le voile de la chair qu'il a priſe pour nous, tant pour deliurer & ſauuer les ſiens, que pour deſtruire & defaire ſes ennemis. Car l'un ne peut aller ſans l'autre: veu que l'office d'un bon iuge eſt de condamner & punir le coupable, quand il abſout & deliure l'innocent par ſon iugement. Or eſt il ainſi, que Ieſus Chriſt eſt ordonné de Dieu ſon Pere le iuge des viſz & des mortz, lequel iugera vne fois tous ceux qui l'auront iugé, tant en ſa propre perſonne, en la chair qu'il a priſe pour nous, qu'en la perſonne de tous ſes membres: & vers lequel tous ceux qui auront eſté iugez en luy, pour luy, & avec luy, trouueront repos, & ſeront releuez de leur cauſe, & l'auront & pour aduo-

cat

Luc 23.

Mat. 3.

Chriſt iuge de tous.

cat & pour iuge fauorable, qui prononcera la sentence à leur faueur & gloire eternelle, & à la confusion & ruine eternelle de leurs ennemis. E. V. Voila vne grande consolation pour les fideles.

T H E. Elle ne pourroit estre plus grande. Mais ceste puissance diuine de Iesus Christ n'est point bien cognue des hommes, & ne le peut estre souz la face & la couuerture de ce monde terrien, qui est tant monstrueux & tant incertain, au iugement de la raison humaine, qu'elle ne peut nullement discerner par iceluy & par sa prudence entre les benedictions & les maledictions de la Loy, qui sont preparées & aux bons & aux mauuais, iusques à ce qu'elle soit plus parfaitement illuminée par la declaration qui s'en fera au temps de la restauration de toutes choses. Pour laquelle chose saint Pierre propose les exemples anciens des plus grans & des plus horribles iugemens de Dieu, qui eussent encore esté manifestez au monde, iusques à son temps. Il met enauant en sa seconde Epistre, qui ne contient autre doctrine que la sienne, (soit que luy mesme l'ait escrite, ou qu'il l'ait faite escrire à vn autre en son nom) l'horrible iugement de Dieu contre les anges rebelles, & celuy du deluge, par lequel Dieu a fait vengeance generale du monde vniuersel, & celuy duquel il a puny Sodome & Gomor-

*Seconde e-
pistre de
S. Pierre.*

re & leurs circonuoisins. Car il n'y en a point de tous ceux cy, qui ne doieue à bon droit faire dresser les cheueux en la teste, d'en ouyr seulement parler, & singulierement aux Epicuriens, Lucianistes, moqueurs & contempteurs de Dieu & de ses iugemens. Car qui ne doit trembler, quand il oit les argumens & conséquences que saint Pierre tire de ces exemples? disant, Si Dieu n'a pas espargné les anges, qui auoyent peché: mais par chaine d'obscurité, les ayant iettés en enfer, il les a liurés, pour estre reseruez au iugement: & s'il n'a point espargné le monde ancien, mais a gardé Noé, luy huitieme, heraut de iustice: & a amené le deluge au monde, plein de meschans: & s'il a condamné à subuersion les citez de Sodome & de Gomorre, les reduisant en cendres, & les mettant pour exemple à ceux qui viuront sans crainte de Dieu, & en a deliuré le iuste Loth, qui estoit oppressé des abominables, par leur infame conuersation: comment espargneroit il maintenant les meschans, qui ensuiuent la trace de ceux la? Car la mesme rebellion & le mesme crime, merite mesme peine: & le iuge qui estoit pour lors, est tousiours vn mesme iuge, & n'a point changé de nature. Parquoy il ne changera point aussi de iugement. Et pourtant il conclud tresbien: le Seigneur fait deliurer de tentation les fideles, & reseruer les iniustes

2. Pier. 2.
Iugemens
de Dieu
horribles.

2. Pier. 2.

iustes, pour estre tourmentez au iour du iugement.

E. V. Voila vne sentence pour nous bien esueiller. T H E. elle nous esueillera bien encore d'auantage, si nous aduifons vn peu de plus pres à ces parolles, par lesquelles elle est prononcée, & si nous les pesons au poids qu'il les faut peser. C'est vne sentence, qui oste aux meschans toutes les choses, par lesquelles se seduisans euxmesmes, ilz se promettent impunité, sans craindre punitiō, pour leurs forfaitz: & qui oste toutes les illusions des apparences mondaines, qui peuuent éblouyr les yeux des fideles mesmes. Car enquoy se fient les meschans: *Vaines esperances des meschans,* En leur grandeur, en leur force, en leur puissance, richesses, dignitez, noblesses, autoritez, parentages, prudence, sagesse, cauteles, finesses, & en la grande multitude qu'ilz voyēt de leur bande. Or qu'ilz aduisent sur cela, s'il est question d'excellence, en chose quelconque, quelle comparaifon il y a entre les hommes & les anges. Qu'ilz aduisent à ce que S. Iude dit à ce mesme propos: Et les anges, *Chute des anges,* dit il, qui n'ont point gardé leur commencement & principauté, mais ont delaisié leur domicile, il les a reseruez souz obscurité, en liens eternelz, iusques au iugement de la grande iournée, comme Sodome & Gomorre, & les villes circonuoisines: lesquelles ayans paillardé en

*Nature an-
gelique.*

*L'enfer des
Diables.*

pareille maniere, & s'estans débordées apres
autre chair, ont esté proposées pour exemple,
ayant receu iugement du feu eternel. S'il est
donc question d'excellence, & de noblesse, &
d'ancienneté: y a il nature entre toutes les cre-
atures, à cōparer à la nature angelique, en tel-
les choses? S'il est question de force, de princi-
pauté & de seigneurie, de science, & de toutes
choses exquisés & dignes d'admiration: qu'est
ce que tous les hommes en ont, aupris des an-
ges? S'il est question de la multitude, ilz n'esto-
yent pas en petite bende. Toutesfois tout cela
ne les a peu garder du iugement de Dieu, que
ilz n'ayent esté abbatus par iceluy de leur
principauté, liberté & gloire, en seruitude &
captiuité extreme, & en confusion & tenebres
perpetuelles: auxquelles, cōbien qu'il ne nous
faut pas imaginer, qu'ilz soyent detenus en v-
ne prison materielle, & par chaines materiel-
les, comme des prisonniers: toutesfois ilz de-
meurent tousiours captifs, attendans leur der-
niere sentence, comme il a desia vne fois esté
dit entre nous. Car en quelque lieu qu'ilz so-
yent, puis que la fureur de Dieu les poursuit,
ilz portent tousiours leur prison & leurs chai-
nes avec eux, & trainent tousiours leur licol,
comme des malfaiteurs, duquel iamais ilz ne
se peuuent depestrer, & par lequel Dieu les ar-
reste bien tousiours, quand il luy plait, & là ou
il

il luy plait. **EV.** Si nous considerons bien celle cheute des anges, nous qui ne sommes que des vers de terre, aupris d'eux: nous apprendrions bien à nous humilier & à craindre le iugement de Dieu, & nous despouiller de toute vaine esperance.

THE. Tu dis vray: mais considerons aussi les autres exemples, & laissant les anges venons aux hommes. S'il est question des hommes & de la multitude & de toutes les excellences, desquelles nous auons desia fait mention, en parlant des anges: quelle comparaïson y a il, entre ce premier & ancien monde, & les hommes qui ont vescu en iceluy, & qui a esté *L'exemple du deluge.* comme la fleur & la ieunesse & l'excellence des hommes, & nous & ce vieux monde refuseur, auquel nous viuons, tout chenu & hors du sens, vieil de temps, ieune de sens & d'entendement, tant debile & tant caduque, qu'il n'en peut plus, & qui va tout tōbant par pieces, qui est cōme la derniere vieillesse du monde, & *1. Cor. 15.* comme le lossiet & la lie, en laquelle toute l'ordure de tous les aages precedens s'est venue depurer & vuidier, pour faire vn amas de tous vices, & de toute ordure & infection: auquel foy, charité, loyauté, innocence, iustice, equité, *Mat. 24.* & toute sainteté & vertu, est du tout esteinte, afin que la mesure de la fureur de Dieu, qui par sa grande douceur & patience, nous attend

Filz de
Dieu.
Gen. 6.

Geans du
temps du
deluge.

L'exemple
du deluge.

à repentance, soit en brief toute pleine, iusques
au comble, pour hastier le iugement de Dieu.
Moyse declare quelle sorte d'hommes estoient
alors sur la terre, quand il les appelle filz de
Dieu, ou pource qu'ilz estoient de la sainte
lignée de Seth, de laquelle ilz auoyent fortli-
gnés, ou pource qu'ilz estoient filz des iuges
& des princes, & des hommes les plus renomi-
més qui fussent esté de ce temps, ou pource
que la sainte escriture a de coustume, en la lan-
gue des Hebrieux, d'appeller du nom de Dieu
les choses excellentes & magnifiques, comme
elle appelle les hommes d'autorité & de re-
nom, Dieux, & Cité de Dieu, Paradis de Dieu,
la cité de Ninieue, & la terre de Sodome & Go-
morre, & les grandes montagnes, & les grans
cedres, Montagnes & Cedres de Dieu. Moïse
aussi appelle ceux cy & leurs enfans, Geans &
tyrans, les puissans de la terre, qui de tout tēps
ont esté gens de renom. Toutesfois toute leur
puissance, leur gloire, & leur renom, & leur ty-
rannie, n'a pas peu destourner l'eau du delu-
ge, par lequel Dieu a fait vne lexiue sur la ter-
re, pour la lauer & nettoier de l'ordure & de
la puantise de l'iniquité des hommes, desquel-
les elle estoit toute infecte, en telle sorte qu'el-
les crioyent & montoyent iusques au ciel, &
que la terre ne les pouuoit plus soustenir; com-
me il a parapres purgé par le feu & la foudre
du

du ciel, la terre de Sodome & de Gomorre, & Gen. 19.
 le pays circonuoisin, pour semblable cause.
 Auxquelz exemples sainct Iude adiousté en-
 core celuy des Egyptiens, qui furent abyfmez
 en la mer. Le Seigneur n'a point icy regardé à
 la grande multitude. Il n'a regardé qu'à la Gen. 6. 7.
 Foy & à la iustice, qui a esté en salut à Noé & à 8. 9.
 Loth, & aux leurs: lesquelz le Seigneur a sau- 2. Pier. 2.
 uuez en bien petit nombre, destruisant tous 1. Pier. 3.
 les autres par vne horrible fureur & vengean-
 ce espouuantable. Et pour autant que cest e-
 xemple du deluge, est vne belle image de ce
 grand & dernier iugement, par lequel tout le
 monde sera iugé par Iesus Christ, & auquel S.
 Pierre dit que les meschans, sont reserués, avec 2. pier. 2.
 les Diables, comme il a pris en sa seconde epi-
 stre ce mesme exemple, avec celuy des anges
 & de Sodome & de Gomorre: aussi en ce pas-
 sage que nous traitons maintenant, il l'a mis en
 auant, suiuant l'exemple de Iesus Christ son
 maistre. Car il l'a aussi proposé à ses disciples, Mat. 24.
 les admonestant d'y penser, & de se souuenir
 du temps de Noé & de la femme de Loth, pour
 tant qu'il n'y a exemple, qui doie plus esmou-
 uoir les hommes, & les mieux induire à penser
 au iugemēt de Dieu, que nous attēdons, & plus
 espouuāter les meschās, que ceux la. Car il est
 mōstré manifestement en iceluy, que Dieu ne
 laissera iamais de punir l'iniquité, quād mesme

*Vaine fi-
 ance en la
 multitude*

tout le monde y feroit adonné, & que tout le monde defaudra pluſtoſt que ſa iuſtice, & que iamais foy, verité, iuſtice & vertu ne periront, ny ceux qui les ſouſtiennent, pour petit nombre qu'ilz ſoyent : non pas quand il n'y auroit qu'un ſeul homme, voire le plus pource le plus chetif & le plus miſerable de tous les hommes de la terre, contre tout le reſte du mōde: comme il en a monſtré l'experience en Noé & en Loth. E v. Cela eſt bien cōtraire au iugement des hōmes, qui penſent touſiours eſtre les plus aſſeurez, du coſté de la plus grand part.

*Iugement
de Chriſt.*

THE. Il n'y a rien qui les deſoyue au-iourdhuy plus, que celle folle opinion. Or S. Pierre ne s'eſt pas contenté, d'auoir ſimplemēt propoſé ceſt exēple: ains a encore voulu monſtrer, que comme Ieſus Chriſt eſt ordonné le iuge des viſz & des mortz, tant s'en faut que les meſchans qui le perſecutēt en ſes membres, & qui perſecutent ſon Euangile, eſchappent ſes mains & ſa puiſſance diuine; depuis qu'il a eſté maniſteſté en chair, & qu'il a veincu en icelle la mort, Satan & enfer, & a eſté exalté en gloire, que meſmes ce iugement qui a deſia eſté fait par le deluge, tantōſt au commencement du monde, deuant qu'il ait eſté maniſteſté en chair, a eſté fait par luy, en ſa vertu diuine: & que luy-meſmes en a deſia eſté le iuge, lequel apres auoir deſia icy puny en chair ces grans
Geans

Geans & tyrans, qui ne craignoient ny Dieu ny les hommes, il tient encore à present en fer re leurs hautains & arrogans espritz, qui ont esté si grans contempteurs & moqueurs de Dieu, & de ses iugemens, qui ont tant long tēps mesprisé la douceur, la patience & la longue attente de Dieu, & Noé son Heraut, & toutes les admonitions & remonstrances qui leur ont esté faites: tant par la viue voix d'iceluy, que par son exemple, & par l'edifice de son Arche, qui leur deuoit estre comme vn sacrement du iugement de Dieu, qui estoit desia à leur porte: lesquelz il detient, comme prisonniers en chartre & en prison: comme il detient par chaîne d'obscurité les mauuais anges, lesquelz ilz ont fuyuz, pour les mener tous ensemble en monstre, avec tous leurs autres alliez & cōpagnons, qui ont fuiuy leurs pas, pour leur bail-
 leur leur derniere sentence à tous ensemble. Et pource que S. Pierre dit icy, que ces espritz sont en chartre, & comme il est couché en aucuns exemplaires grecz, enclos & enferrez, cōme il a dit des Diables, en la secōde Epistre. En quoy il declaire aux fideles, qu'il ne faut point qu'ilz s'espouuantent beaucoup des mefchans, & qu'ilz les craignent trop, ou qu'ilz
 aient trop grande enuie sur leurs prosperité & triomphes: combien qu'ilz les voyent horriblement desbordez, cōme Diables deschai-

*Aseurance
pour les fideles.*

Mat. 24.

nez, faifans tout ce qu'il leur plait, fans contradiction quelconque, attendu qu'ilz ont vn tel iuge & vn tel Seigneur, qui les rembarrera, & les enchainera bien, quand il luy plaira, & quand il le iugera expedient, autant aifément qu'il a fait ces grans & horribles Geans, qui ont esté du temps de Noé. Parquoy qu'ilz aduifent de fuyure pluftoft l'exemple de Noé, se fians en la promesse de Dieu, que celuy des meschans & des moqueurs, & des blasphemeurs de l'Euangile: ains qu'ilz les laissent à part, trauaillans en l'edifice de l'arche, qui est l'Eglise, & la maison de Dieu, qu'ilz se contiennent en icelle, avec Noé & les fiens, attendans la venue du Seigneur: veillans & prians & estans tousiours sur leur garde, comme le bon seruiteur, qui attend son maistre, lequel Iesus Christ nous propose pour exéple. Qu'ilz ne se scandalisent point, s'ilz sont en petit nombre, au pris des meschans, & qu'ilz ne se troublent en rien, des eaux du deluge, ny de tous les vens, tempestes, tourbillons, vndes, flotz & vagues qu'ilz pourront voir en la mer de ce monde, en laquelle ilz nagent. Car puis qu'ilz sont en l'arche, & en la nacelle de laquelle Iesus Christ est le Seigneur, le maistre & le gouverneur, ilz sont asseurez, qu'ilz ne periront iamais, quelque tempeste qui les surprenne, cependant qu'ilz demoureront en la nacelle
avec

avec Iesus Christ, non plus que ses Apostres & ^{Iean 6.} disciples, quand ilz se sont trouuez en semblable dangier avec luy. Et pour les mieux asseurer de cecy, il met le Sacrement de Baptisme ^{Baptisme.} en auant, par lequel Dieu nous rend tesmoignage, qu'il nous a receuz en son arche : c'est à dire en son Eglise & en sa maison, & qu'il nous aduoue pour ses enfans, pour nous sauuer en icelle comme Noé & les siens, au milieu du deluge de sa fureur, quand il abyssera les meschans par iceluy, comme il a fait du temps de Noé, & pour les asseurer en icelle, qui est arroufée du sang de son filz Iesus Christ, comme les maisons des Israelites, du sang de l'Agneau, quand il frappera ses ennemis, comme ^{Exo. 12. 13.} il frappa alors les Egyptiens, en deliurant son peuple. Car le Baptisme nous est comme vn seau, & vne testification de toutes ces choses, le quel est plaque & attache aux promesses de Dieu, qui nous en sôt faites, pour nous y mieux confermer. Partant nostre Seigneur Iesus ^{Mat. 24.} Christ, parlant des signes horribles qui doyuent preceder son dernier aduenement & iugement, duquel il a proposé comme vne petite image en la destruction de Ierusalé : il dit à ses Disciples : Quand vous verrez venir ces choses, (desquelles il tesmoigne que les meschans blesmiront, transiront & secheront de peur) Leuez, dit-il, voz testes en haut. Car vostre deliurance approche.

E V. Ceux la donc sont bien-heureux, qui sont vrais membres du corps de l'Eglise de Iesus Christ. Parquoy toy Theophile & tes semblables, qui vous en estes separez, pour faire des sectes à part, deuez bien craindre. T H E. Mais toy & tes semblables, qui auez delaisé la vraye Eglise de Iesus Christ, & Iesus Christ son chef, pour suyure la Synagogue de Satan, & l'Antechrist Romain son chef, lequel vous tenez pour vostre chef, comme les Turcz tiennent leur Mahumet. Partant, saint Pierre, apres auoir parlé du Baptisme, & ayant monstté la correspondance & conuenance qu'il auoit avec le deluge & l'arche de Noé, il declare aussi par apres (afin que personne ne s'abuse, en la vaine fiance des signes visibles, qui sont aux Sacremens) quel est le vray Baptisme, duquel il parle, donnant à entendre qu'il n'entend point icy par le Baptisme, seulement le signe exterieur de l'eau, & l'administration exterieure d'iceluy, qui est cõmune & aux vrais enfans de Dieu & aux hypocrites : mais qu'il entend cela du vray Baptisme, qui a la chose coniointe avec le signe, par le moyen de la Foy de ceux qui le reçoient : lequel n'oste point seulement les ordures de la chair, mais qui a attestation de bonne conscience deuant Dieu, par la resurrection de Iesus Christ, qui est à la dextre de Dieu, estât allé au ciel, auquel sont

Vray bap
tesme.

1. Pier. 3.

font faitz subietz les Anges, les puissances & les vertuz: qui est tellement regnant là sus en gloire, que sa diuine vertu & puissance pour sauuer les bons, & destruire les meschans, s'estend tousiours, non seulement iusques à la terre, mais aussi iusques aux enfers.

E V. Ceste conclusion ne me plait pas mal: mais cependant, tu ne m'as pas encore bié donné à entendre, par ce grand discours que tu as fait, dequoy a seruy celle allée de Iesus Christ aux espritz, qui estoient en ceste prison, de laquelle tu as parlé. Tu m'as bien donné à entendre, que la vertu diuine de Iesus Christ & de son esprit, a iugé le mode de tous temps, & qu'elle s'est tousiours manifestée dès le commencement du monde: mais il semble que S. Pierre parle icy d'une allée d'iceluy, qui a apporté quelque chose avec soy, d'auantage que parauant. Car il ne fait pas mention seulement de l'allée de Iesus Christ, en esprit, aux espritz prisonniers, mais aussi de sa predication, qui leur a esté faite par luy, de laquelle tu n'as encore rien touché. *Predication aux espritz.* T H E. Quand saint Pierre n'eust voulu proposer autre chose, sinon ce que tu as maintenant touché, si est-ce toutefois, que cela emporteroit beaucoup. Car ce n'est pas peu de cas, de induire les hommes à croire, que Iesus Christ crucifié, qui est tant vil & tant abiect deuant les yeux des hommes, &

Col. 1. 1.

1. Tim. 3.

Eph 1:

duquel la doctrine a esté de tous tēps en grād opprobre & contradiction au monde, est eter-
 nel & d'une vertu diuine & eternelle, & qu'il
 a esté, voire Dieu tout-puissant, auant qu'il ait
 esté fait homme, & l'est de toute eternité & le
 fera à tout iamais : comme saint Paul tasche
 aussi souuentesfois à le monstrier, comme la
 chose est à la verité. Mais au lieu que saint
 Paul, selon les matieres qu'il traite, & les hom-
 mes auxquelz il a affaire, dit vne fois, que tout
 a esté fait & créé par luy, l'autre qu'il est le Sei-
 gneur & le prince des Anges & de toutes crea-
 tures, & autres choses semblables, aussi saint
 Pierre a pris occasion de la matiere qu'il trai-
 toit de monstrier le semblable, par sa puissance
 sur les meschans, voire iusques aux motz, pour
 donner à entendre qu'ilz ne luy sont pas enco-
 re eschappez, combien qu'ilz semblent luy e-
 stre eschappez, au iugement des hommes. Mais
 si cela ne suffit, ie ne reiette pas la sentence de
 ceux qui entendent, par ceste allée & ceste pre-
 dication, la manifestation de laquelle nous a-
 uons desia touché quelque chose, qui a esté fai-
 te aux meschans & aux reprenez, en la mort
 & resurrection de Iesus Christ, par la vertu di-
 uine, qui est en luy. Car comme saint Paul tes-
 moigne, que Iesus Christ manifesté en chair, a
 esté veu des Anges, & que les Anges mesmes
 ont profité de beaucoup en sa venue, en la ma-
 niere

niere qui a desia esté dite, & comme nous auõs
aussi monstté, que sa vertu est paruenue ius-
ques aux fideles trespassez, & qu'elle leur a ap-
porté grand accroissement de ioye & de gloi-
re, il n'y a pareillement point de doute, puis
qu'il est le iuge des Diables & des meschans,
comme il est le Sauueur des Anges & des bõs,
qu'elle ne se soit aussi manifestée en plus gran-
de vertu que parauant: de l'autre costé, veu
que l'une des manifestations depend de l'aut-
re, & qu'elles sont tellement coniointes en-
semble, que l'une ne va point sans l'autre. Nous
auons veu desia quelque tesmoignage de ce-
cy, en ces malins espritz desquelz nous auons
parlé, qui supplioyent Iesus Christ, qu'il ne les
enuoya pas aux abysses & qui se plaignoyët, Matt. 8.
qu'il les estoit venu tormenter deuant le tēps.
Car s'ilz se sentent desia tant pressez, qu'ilz
n'en peuuent plus, de l'horreur de la fureur
de Dieu qui les poursuit desia dès le cōmence-
ment du mode, ilz ont plus iuste occasion d'en
estre encore effrayez d'auantage, quand plus
ilz voyët approcher ce iugemēt, auquel saint
Pierre dit qu'il sont reseruez, avec tous les re-
prouuez leurs adherans: & qu'ilz voyent leur
iuge, qui est venu prédre chair humaine, pour
reparer le genre humain, lequel ilz ont tasché
de ruiner totalement en ruine & malediction
eternelle avec eux, & pour destruire toutes

leurs œuures, & les iuger & condamner auten-
 tiquement & solennellement, estant accompa-
 gné de ses saintz, contre lesquels ilz ont touf-
 iours fait guerre mortelle. Car ilz seront leurs
 iuges avec Iesus Christ, en la maniere qui a
 aussi esté dite: lequel les iugera en celle mesme
 chair humaine, par laquelle ilz ont pris occa-
 sion, pour renuerfer tout le conseil & toutes
 les œuures de Dieu. O quelle confusion tom-
 bera alors sur leur teste! En quel horreur &
 en quel desespoir seront ilz, quand ilz verront
 regner ceste pource chair mortelle, en cel-
 le gloire eternelle, de laquelle ilz sont cheuz
 & trebuschez? Et cecy non seulement en Iesus
 Christ leur iuge, & le chef, & le premier nay
 de tous les enfans de Dieu, mais aussi en tous
 les membres d'iceluy.

E V. Tu es entré maintenant en vne ma-
 tiere bien haute. T H E. Il est vray, & si est ve-
 ritable, comme tu en peux iuger par les tesmoi-
 gnages des saintes Escritures, que tu as desia
 ouys. Or si Satan, le chef des malheureux, avec
 tous ses anges, a esté si fort effraié, de la ve-
 nue de Iesus Christ, & en a receu vne si gran-
 de & si horrible playe, il n'est à douter, que les
 reprobuez, desquelz il est le chef, qui sont des-
 ia condamnez avec luy à prison perpetuelle,
 pour estre menez en iugemēt avec luy, en leur
 temps, n'en ayent aussi senty leur part, & que

*La cõmu-
 nion des
 reprobuez.*

ce qui est aduenü à leur chef, ne soit aussi paruenü iusques à eux, par le moyen de la conionction & vnion qu'ilz ont ensemble, comme les eleuz de Dieu l'ont avec les Anges celestes, & avec Iesus Christ leur chef. Car si les Diables craignent celle iournée, leurs alliez n'ont pas moins d'occasion de la craindre, & d'auoir horreur de la venue du iuge, qui doit presider en icelle. Car si les Diables se trouuent horriblement confus, voyans les hommes mortelz faitz immortelz, regnans en la gloire immortelle, de laquelle ilz ont esté chasiez, il n'y a doute que la confusion ne soit aussi fort horrible, sur les reprouuez, quād ilz verront leurs freres, les vrays & legitimes enfans de Dieu, en possession de cest heritage immortel, duquel eux se verront deiettez, cōme bastardz, par leur propre coulpe, & qu'ilz orront celle voix de Iesus Christ, qui appellera tant doucement leurs freres en cest heritage, tant horrible & tant espouuantable contre eux, qu'elle les fera trebuscher aux abysses de malediction eternelle, comme foudroyez d'un tōnerre & d'une foudre foudroyante du ciel.

E v. Si Esau a esté tant despit, & a tant pleuré, gēmi & soupiré apres auoir vendu son droit de esné & s'estre veu priué de la benediction de son pere, donnée à son frere Iacob, lequel il n'estimoit rien au pris de soy, il est facile à

Gene. 25.
Heb. 12.
Esau

iuger, quelz seront les pleurs, les fouspirs & les gemissemens, & les grincemens de dentz des reprouuez, desquelz Iesus Christ fait si souvent mention, quand ilz seront menez sur ce grand eschaffaut, pour estre en spectacle & en monstre à tout le monde: & principalement à ceux desquelz ilz ont faitz leurs folz & leurs badins, leur passetemps, leurs ieux, leurs farces leurs spectacles & leurs triomphes, comme Herodes, Pilate & les Iuifz & tous les heretiques & les persecuteurs de l'Eglise l'ont fait enuers Iesus Christ & ses membres.

THE. Tu as touché vn exemple, auquel ie voudroye bien que tous voz Euesques, Prestres & Moynes & tous leurs adherans, considerassent diligemment. Car ce sont voz grâs Esauz, qui pour la soupe grasse, de la cuisine de la grande ribaude de Babylone, mere de fornicatiō, & pour la delectation de ses adulteres, quittent ce grand heritage, & le vendent pour si vil pris, & ne cessent de persecuter les vrais enfans de Dieu. Et vous qui les suyuez, aduisez aussi ou vous en pouuez tōber. E v. A Dieu ne plaife, que nous soyons telz, & que nous suyions telz personnages. Maistoy & tous tes semblables, qui pour manger de la chair tous les iours, & pour viure en vostre liberté charnelle, sans ieufnes & abstinence, sans confession & messe, ayant du tout ietté bas le ioug

ioug de la saincte eglise Romaine, vous ne
 voustrouuiez en ce reng, plustost que nous.
 THE. Quant à ce reproche que tu nous fais,
 Dieu sera alors iuge, pour manifester qui au-
 ra eu meilleure cause, & de quel costé il y aura
 eu plus grande abstinence & sobrieté, ou gour-
 mandise & dissolutiō, & qui aura mieux conuer-
 ty la vraye liberté Chrestienne, en licence
 charnelle, & fait meilleure confession, & qui
 sont plus à louer, ou ceux qui ont ietté bas le
 ioug de l'Antechrist, pour porter celuy de Je-
 sus Christ, ou ceux qui ayment mieux porter
 celuy del'Antechrist, que se soumettre à celuy
 la: & qui disent avec les meschans desquelz il
 est parlé aux Pseaumes: Rompons les liens, &
 iettons bas le ioug, lesquels le Seigneur & son
 Christ pretendend mettre sur nous. Toutef-
 fois cependant & toy & moy, & tous les au-
 tres, pensons souuent à cecy, & nous gardons
 de nous seduire nous-mesmes, & de seduire les
 autres avec nous: ou d'estre seduitz par eux, &
 d'abuser de la cognoissance que Dieu nous a
 baillée à tous, & de detenir sa verité & iustice
 en mensonge & iniustice. E V. Dieu nous
 doit la grace à tous d'y bien aduiser.

THE. Or toutes ces choses bien confi-
 derées, lesquelles ont esté dites sur cecy, il
 nous sera facile à iuger, du sens auquel nous
 deuons prendre ceste predication, faite aux

2. Pier. 2.
Manifesta-
tion de Ie-
sus Christ
aux es-
pritz des
trepasser.

espritz detenuz en chartre. Tu as desia ouy l'exposition du mot, duquel saint Pierre vse, tant en ce passage qu'en celuy auquel il appelle Noé, Heraut de iustice. Ce mot couient bien à la matiere proposée. Car celle manifestation de l'Esprit de Iesus Christ & de sa venue, a esté aux espritz infideles, comme vn nouveau adiournement, & la voix d'un Heraut, leur annonçant leur iugement approcher, & la venue & la vertu du iuge, deuant lequel il leur falloit rendre conte. Ou si nous voulons prendre ces espritz, pour ceux des fideles, nous prendrons ceste predication, pour la manifestation de la vertu de la mort & passion de Iesus Christ, qui est paruenue iusques à eux, en la maniere qui a esté dite. En la prenant en ce sens, nous pourrions dire, que saint Pierre, ayant proposé de monstrier quelle estoit la vertu diuine de Iesus Christ, par la manifestation qui auoit esté faite du fruit de sa mort & passion, iusques aux mortz, par la vertu d'icelle, tant enuers les fideles que les infideles, en poursuyuant son propos, apres qu'il a parlé en general de ces espritz, il n'a pas poursuiuy toutes les deux parties également iusques au bout: mais s'est arresté seulement aux desobeissans & rebelles. pource qu'il estoit tombé en ce propos, à l'occasion des afflictions & persecutions des fideles. Laquelle chose n'est pas nouvelle

aux

aux saintes Escritures, & singulierement aux Epistres de saint Paul, auxquelles il ne pour-
 suit pas tousiours iusques au bout toutes les
 parties de tous les propos qu'il commence,
 mais les plus necessaires: ou pour ce qu'il iuge
 qu'il n'est pas de besoin, ou que ce qu'il laisse à
 poursuyure, se pourra facilement entendre
 de soy-mesme, par le reste qu'il poursuit, prin-
 cipalement si elles sont semblables ou contrai-
 res. Car la nature de telles choses, est de se de-
 clarer presque les vnes par les autres. Don-
 ques S. Pierre peut icy auoir fait le semblable,
 monstrant comme Iesus Christ est odeur de
 vie à la vie, à ceux qui sont sauuez, en mon-
 strant comment il est odeur de mort à la mort,
 à ceux qui perissent, & son Euangile, nouuelle
 de malheurs extremes à ceux cy, au lieu des
 bonnes & ioyeuses nouuelles, qu'il apporte
 aux autres. Car combien que ce qu'il dit icy,
 semble mieux appartenir aux espritz infideles
 qu'aux fideles, toutesfois ce qu'il adioint tan-
 tost apres, du salut de l'Eglise, figuré par l'ar-
 che de Noé: & cela semblablement qu'il dit au
 chapitre suyuant, destrepasés fideles, declare
 asses que les fideles doiuent attendre & espé-
 rer de Iesus Christ, quant à leur part.

E V. tu conclus donc en somme par cecy,
 que nous pourrôs ainsi respôdre à la principa-
 le difficulté, qui nous baille le plus d'empes-

chement, en l'exposition de ce passage, si nous voulons entendre par ces espritz, les fideles & les infideles generalement. **THE.** Il est ainsi. Mais si nous les aymons mieùx prendre seule ment pour les infideles, au sens que nous auons touché le dernier: nous dirons que Iesus Christ est allé en esprit à ces espritz, & leur a presché, en leur faisant sentir plus fort le iugemēt qu'il leur a apporté, par sa venue, en la maniere qui a esté amplement deduite. Car puis qu'il est question des mortz, ie ne puis entendre ce pas sage, ny ceste predication, en la maniere que aucuns la veulent prendre: de laquelle nous parlerons tantost. Car il ne nous faut pas imagi ner, que Iesus Christ ait fait vne predication verbale de voix & de bouche, entre les mortz, foyent fideles ou infideles, comme elle se fait entre les viuans. Car comme Dieu parle & se manifeste à ses Anges, qui sont espritz immor telz, autrement qu'aux hommes mortelz, enue loppez de leurs corps terrestres, il ne faut point aussi douter, qu'il n'vse de tel moyen, en uers les espritz bien-heureux, conuenable à sa maiesté, & à la nature des espritz. Par le sembla ble, il a aussi ses moyens, pour annoncer son iu gement, & faire sentir son ire & sa fureur aux Diables & aux espritz reprouuez, & pour se faire cognoistre à eux, iuge espouantable. Et pour ce que le Seigneur a accoustumé de faire

*Predicatio
spirituelle*

tou-

toutes ces choses en son Eglise, par la predication de sa Parolle, S. Pierre a peu à bon droit appeller predication entre les mortz, la manifestation de la vertu & de la grace ou fureur de Dieu, qui leur est au lieu de la predication, que les viuans ont, se voulant accommoder au sens des viuans & leur donner à cognoistre les choses à eux incogneues, par les noms de celles qu'ilz cognoissent. Car nous ne pouuons parler des choses appartenantes à l'autre monde, ny les donner à entendre, sinon par les motz des choses de ce mode icy, qui ont quelque conuenance & similitude avec icelles. Par quoy, puis que celle manifestation de Dieu, de laquelle nous auôs parlé, est la predication des mortz : saint Pierre n'a pas parlé improprement à cause de la conuenance qu'elle a avec la nostre, quant à la fin de l'une & de l'autre, en ce que Dieu en vse, pour se faire cognoistre tel qu'il veut estre cogneu d'un chacun, & en ce monde & en l'autre. D'autre part ce mot emporte encore quelque maiesté, & est bien propre en ce lieu, pour magnifier la predication de l'Euangile, qui est tousiours en grâd mespris & vitupere aux meschans, en ce mode. Car S. Pierre dône à entendre par cela, que bõ grémaugré que les meschâs en ayēt, ilz seront toutesfois contrains, apres qu'ilz auront resisté à Iesus Christ, tant qu'ilz aurōt peu,

& qu'ilz auront perfecuté & blasphemé son E-
 uangile, en toutes manieres, d'ouir la predica-
 tion d'icelle, voyre d'une forte espouuantable,
 & en vn lieu, auquel il ne leur profitera rien de
 l'ouir, sinon pour leur aggrauer leur iugemét
 tousiours de plus en plus, & en vn lieu, auquel
 ilz ne la pourrôt point perfecuter, ny la fuir, ny
 luy fermer leurs oreilles, cōme en ce monde.
 Car puis qu'ilz n'ont pas voulu ouir la voix de
 Dieu, parlât à eux tant doucemét, tant amiable-
 ment & tant familièrement, par la bouche de
 ses seruiteurs, heraux, ambassades & messa-
 giers, les Patriarches, les Prophetes, les Apo-
 stres, les martyrs & tant d'autres excellens per-
 sonnages, leurs propres freres, de leur chair &
 de leur sang, & sur tout par la bouche de Iesus
 Christ son propre filz, qui est descendu en ter-
 re, du haut throne de sa maiesté celeste, pour
 enseigner les hommes en forme humaine, &
 en habit d'un pource seruiteur, par lequel il a
 parlé à nous, en propre personne, ains ont resi-
 sté & blasphemé de tout leur pouuoir, & les
 seruiteurs & le maistre & le Seigneur: ilz sont
 bien asseurez, qu'il parlera à eux vne fois plus
 asprement en son courroux espouuantable, &
 en rigueur extreme, & en forme hydeuse &
 terrible à eux: & qu'ilz seront iugez par ceste
 mesme Parolle qu'ilz ont icy mesprisée, & per-
 secutée, qui dure eternellement: comme l'e-

xem-

Deut. 18.
 Heb. 1.

Luc 1. 2.
 Iean 1.
 phil. 2.
 Heb. 1. 2.

Psal. 1.

Esa. 40.

xemple leur en est proposé, aux rebelles, qui Mat. 5. 24.
 ont mesprisé la voix de Dieu, les admonestant
 par la bouche de Noé & de Loth. Car ceste pa- 2. pier. 2.
 rolle de Dieu, qu'il a manifestée à son Eglise, L'authori
 est de telle autorité, qu'elle fera iuge, non té de la pa
 seulement des hommes, mais aussi des Diables rolle de
 & des anges. Car il n'y a point d'autre verité Dieu.
 de Dieu, que ceste icy, ny d'autre iugement,
 que celuy qu'il a reuelé à son Eglise par icelle.
 Parquoy S. Paul ne veut pas qu'on y change Gal. 1.
 rien, non pas seulement quand luy mesmes, vn
 si excellent Apostre, mais quand les anges du
 ciel aussi l'entreprendroyent. Voila quant à
 ce mot de Predication. E V. Ceste derniere
 consideration n'est pas mauuaise.

T H E. Ie dy maintenant, pour la conclu-
 sion de ceste exposition, qu'en prenant ainsi de
 suite les parolles de saint Pierre, les appli-
 quans aux espritz infideles, comme il a esté dit:
 nous conclurons, que saint Pierre, voulant
 monstrier la grandeur de la vertu de Iesus
 Christ, s'estendant iusques aux mortz, a icy
 poursuiuy plus expressement la partie appar-
 tenante aux infideles, pour les causes qui ont e-
 sté alleguées, & au chapitre suyuant, celle qui
 appartient aux fideles. Surquoy ie conclu de-
 rechef, que puis que la vertu de Iesus Christ
 est si grande, qu'elle paruiet en toutes manie-
 res iusques aux mortz: nous n'auons besoing

de voz prestres , pour faire penetrer le merite de sa mort & passion , par le moyen de leurs Messes,iusques en purgatoire,pour l'appliquer aux ames , qu'ilz detiennent là prisonnieres, pour obtenir leur deliurance . Car il n'y a nul qui ait ceste vertu diuine en soy, que luy : & il n'a pas ordonné le ministere de l'Eglise,par lequel il la manifeste enuers les siens , pour les mortz,mais pour les viuans.

E V. Comment qu'il en soit, tu as tousiours nostre purgatoire pour recommandé,& noz prestres,au memento de ta Messe. Mais laissons-les vn petit à part, pour le present , & me dis maintenant ce que tu as tantost touché , de l'opinion de ceux qui prennent ceste predication de Iesus Christ aux mortz , en autre sens que toy,lequel tu ne peux approuuer. THE. Je me suis déueloppé au moins mal que i'ay peu,des difficultez qui me pressoyent,en l'exposition de ces deux passages de saint Pierre, laissant à vn chacun son iugement franc , sans condamner ceux qui les ont mieux traitez que moy,& sans donner empeschement ny loix à ceux auxquelz Dieu aura donné plus de grace,pour les mieux traiter.Ce que i'en ay dit,ie l'ay plus dit pour esclaircir ce que les autres en ont desia peu dire,& pour aider leurs expositions aux pointz qu'ilz me semblent auoir les mieux touchez , & pour satisfaire à ta requ-

queste & bonne affection, que pour esperance que i'eusse d'apporter quelque chose de nouveau. Car ie suis de telle nature, que i'ayme trop mieux suyure ce que les autres ont bien dit deuât moy, que me mettre en hasard, pour inuenter quelque chose de nouveau, qui puisse mettre trouble en l'Eglise, & estre en scandale à personne, & que parler contre la verité de Dieu, reuelée par sa Parolle. I'ay bonne esperance, que ie ne feray tombé en ce dangier, en ce que nous auons traité iusques icy. Et pourtant qu'il y a des opinions d'aucuns sur ce passage, qui me semblent trop dangereuses, & trop loing de l'Ecriture: i'ay dit que ie ne les osoye approuuer. **E v.** C'est cela que ie desire ouyr maintenant de toy.

T H E. Il y en a, auxquelz il vient quasi en fantasie d'affirmer qu'il y aura quelque predication apres le decez de ceste vie, pour conuertir en l'autre monde ceux qui seront icy mortz infideles, & que tous seront sauuez à la fin par ce moyen, quelques malheureux qu'ilz ayent esté. Il y en a des autres, qui moderent vn petit ceste opinion. Car ilz n'estendent ceste predication, sinon à ceux qui seront mortz en ignorance, par faute d'auoir esté instruits, ia soit qu'ilz ne fussent de mauuaise volonté. Il y en a encore des autres, qui estiment que ceste predication sera proposée à tous ceux qui

L'opinion de ceux qui cuidoient qu'il y ait encore predication en l'autre monde.

n'auront pas icy creu , de quelque qualité que ilz foyent, comme elle est proposée en ce monde & aux bons & aux mauuais , & aux dociles & aux indociles : & que ceux qui y croiront, seront sauuez : & ceux qui demoureront obstinez en leur infidelité, seront cōdamnez à damnation eternelle , sans esperance de iamais obtenir grace : & me semble que V vessel, duquel nous auons parlé , a fort approché de ceste opinion : laquelle il semble qu'aucuns des sauans de nostre temps mesme , ne reiettent pastrop loing . Il y en a des autres , qui semblent n'approuuer point aucunes de ces opinions , mais estiment , que s'il y deuoit auoir quelque telle predication apres ceste vie, il y auroit plus de apparence qu'elle fust ordonnée de Dieu ou pour les petis enfans, qui seroyent partis de ce monde auant qu'ilz fussent venus en aage, qui peust estre capable de la cognoissance de Dieu & de sa Parolle : ou pour le moins de ceux des infideles, qui ont esté punis avec leurs peres & meres & au deluge, & au feu de Sodome & Gomorre, & aux autres iugemens de Dieu, & qui meurent iournellement. Il y en a aussi qui ont mis en question & en doute sur ce passage : assauoir-mon si Iesus Christ estoit descendu aux enfers , pour en deliurer les damnez : pource qu'ilz ont esté d'opinion, que le nom d'Enfer ne se prenoit iamais aux saintes Escritures, qu'en

qu'en mauuaise partie : & que le sein d'Abraham ne pouuoit aucunement estre comprins souz ce nom : comme il a esté desia touché en vn autre lieu . Sainct Augustin a deduit toutes ces matieres assez amplement : combien qu'il ne baille pas sa resolution de toutes , principalement en laquelle il se vueille certainement resoudre . Que te semble de toutes ces choses, Eusebe?

*August. ad
Enod.
Epist. 99.*

E V. Quant à moy , combien que ie ne veux, non plus que toy , rien diffinir ne determiner temerairement de l'estat des trepassez, sinon entant que i'en ay le tesmoignage ou de la sainte Escriture , ou des bons Docteurs anciens, ou de sainte mere Eglise: ie conclu toutesfois, que quand ainsi seroit, que ceux cy l'estiment, si ne seroye-ie point d'aduis, que personne s'y fiasst, en sorte qu'il laissast de faire son deuoir en ce monde . Parquoy, ie voudroye aussi suyure, en cest endroit, ce que saint Gregoire dit , touchant le purgatoire . Il ne doutoit pas qu'il n'y eust vn purgatoire , & qu'on n'y peust estre purgé de ses pechez , apres ceste vie , comme ie doute de cecy : toutesfois il iuge que c'est tousiours le plus seur, de se gouuerner tellement en ceste vie, qu'on n'ait point besoing de ce remede en l'autre . Cela qui me sembleroit auoir le plus d'apparence entre toutes celles opiniōs , ce seroit ce qui a esté dit des

*Grego. in
dialo.*

*Predicatio
pour les pe
tieus enfans.*

Ninivites.

Jon. 4.

petis enfans. Car nous voyons que Dieu a mesme eu quelque fois grand pitié de ceux des infideles. Et comme il appert en ceux de Ninivue, au liure de Ionas, il semble mesmes que Dieu ait espargné les grans, en partie, à cause des petis enfans, par ce qu'il a dit à Ionas, comme par grande compassion: Et moy, ne pardonneray-ie pas à Ninivue la grande cité: en laquelle il y a plus de six vingts mille creatures humaines, qui ne fauent quelle difference il y a entre leur main dextre & leur fenestre, & aussi plusieurs bestes. Dieu disoit ces parolles à Ionas, comme par reprehension & reproche: pource qu'il estoit marry de la grace qu'il faisoit à celle ville, apres sa conuersion. Et pourtant il dit cela, pour luy donner à entendre, que quand il n'y auroit autre raison pour l'esmouuoir à misericorde, que le regard des petis enfans, qui n'ont point encore l'aage de discretion, qui y sont en nombre de plus de six vingts mille, qu'il n'endeuroit pas estre marry mais en deuroit auoir compassion; & en estre bien ioyeux. Et ce qu'il dit des bestes, presse Ionas encore d'auantage. Car si humanité nous enseigne, d'auoir pitié & compassion des bestes mesmes, combien doit elle estre plus grande enuers les hommes, & sur tout enuers les petis enfans, & ce petit aage innocent? Car il y a trop plus de raison, de porter faueur aux petis

tisenfans, de quelque race qu'ilz soyent, ou des fideles, ou des infideles, qu'aux grans, quelque ignorance qu'ilz puissent prétendre. Car cōbien que celuy qui cognoit la volōté de son maistre, & ne la fait point, merite de recevoir plus de coups, que celuy qui ne la fait & ne la fait, cōme Iesus Christ le dit: ceneantmoins, ce luy qui ne la fait & ne le fait point, n'eschappe rapas pourtant du tout les coups. S. Paul baille bonne raison de cecy, quand il monstre, que tous ont receu de Dieu la Loy naturelle, imprimée en leur cœur, qui a telle vertu en la conscience qu'elle les accusera ou excusera, au iour du iugement. Car il n'y a nul, pour ignorant qu'il soit, qui n'ait ce tesmoignage en sa conscience contre foy, qu'il a souuentes fois, dit & fait beaucoup de choses, lesquelles il cognoissoit bien estre mauuaises, par l'admonition d'icelles: s'il l'eust voulu ouir, cōme messagiere de Dieu. Laquelle chose est suffisante, pour la condamnation de tous ceux qui n'auront obtenu remission de leurs pechez, par Iesus Christ. Mais il y a autre raison, aux petis enfans, qui ne sont point encore paruenus iusques à cest aage, auquel ilz ayent peu ouyr & entendre la voix & l'admonition de la conscience. **T H E.** Quant aux petis enfans, tu as desia ouy, ce qui en a esté dit, quand nous auōs parlé du salut des enfans mornez, & de la na-

Luc 12.

Rom. 2.
Loy naturelle.Du salut
des enfans

ture du peché originel, & de la punition de l'iniquité des peres sur les enfans, & les enfans de leurs enfans. S'ilz sont enfans des fideles & des éleuz de Dieu, compris en son alliance, tu as entendu, ce qui a esté dit de leur sanctification. S'ilz sont enfans des infideles, & hors l'élection & l'alliance de Dieu, nous n'auons point passage en toute la sainte Escriture qui nous baille ouuerture. & iuste occasion de presumer qu'il y ait quelque maniere de predication, hors ceste vie, pour le salut de ceux la. Parquoy, il n'est pas de besoing qu'on mette enauant vne doctrine tant nouuelle & tant incertaine, pour trouuer moyen de sauuer les petis enfans, soyent des fideles ou des infideles. Il nous doit suffire, que Dieu fait les moyens, par lesquelz il veut sauuer ceux qu'il a proposé de sauuer en son conseil éternel. Nous sauons quel commandement & quelle promesse nous auons de luy, touchant les nostres: & quelle esperance nous deuons auoir de sa misericorde, & du merite de Iesus Christ enuers iceux. Touchant ceux des infideles, qui sont du tout hors l'alliance de Dieu, nous n'auons point besoing de nous soucier beaucoup du moyen que Dieu tiendra avec eux, sinon autant qu'il nous en est declairé aux saintes Escritures. Car quelque chose que Dieu ait ordonné, soit des grans, soit des petis, il ne peut
faire

faire tort à personne, quand mesme il les damneroit tous. Car il n'y en a point qui ne l'ayent bien merit  de leur nature, & qui ne doiuent recognoistre, qu d ilz obtiennent salut, qu'il procede de la bont  & seule grace de Dieu: comme il a d s a est  suffisamment mon tr , en traitant les matieres, desquelles nous auons tantost parl . Car qui pourra reprendre le iuste iugement de Dieu, par lequel il a puny non seulement les grans, mais aussi les petis, & au temps du deluge, & en Sodome & Gomorre, & en la terre des Canan cens, & des Amalechites, & autres semblables. Dieu n'a point laiss  pour les petis enfans, de faire vengeance & des grans & des petis, apres sa longue patience, au temps qu'il auoit ordonn    cela. Parquoy, ie ne doute point, qu'il n'en fust aduenue autant aux Ninivites, si Dieu n'eust eu plus de regard   leur repentance, &   leur Foy & conuersion, qu'  leurs enfans &   leurs bestes. Donques la plus grande consolation, que nous pouuons auoir, pour raison du salut de noz enfans, il la nous faut aller chercher au c tract de l'alliance que Dieu a faite avec nous & noz petis enfans: non pas en predication qui leur soit reseru e hors de ceste vie. Car ceste esperance a trop petit fondement.

E V. Ie pense que ceux qui ont cherch  ce remede, pour le salut tant des grans que des

*Iustifier
& magni-
fier Dieu
par men-
songe.*

petis, après ceste vie, l'ont fait pource qu'il leur a semblé, que la rigueur de Dieu surpasseroit sa miséricorde (qui est chose bien contraire à sa nature) si le nombre des damnez estoit si grand, & celuy des sauuez si petit, comme il seroit, si tous ceux deuoyent estre damnez, qui n'auront pas creu à la parolle de Dieu, en ce monde. **T H E.** Comment qu'il en soit, il nous faut tousiours conclurre, pour finale resolution, que la parolle de Dieu est veritable, & qu'il ne nous en faut pas forger vne nouuelle, ny faire Dieu menteur, pour le iustifier, & magnifier sa miséricorde. Car il se iustificiera trop mieux par sa verité, que nous ne le iustifierons par nostre mensonge : & magnifiera mieux sa miséricorde, en punissant les meschans, que nous, en les aßeurans, & leur baillans hardiesse en leur meschanceté, par telle vaine esperance, fondée en l'erreur & en la fausse opinion des hommes, non pas en la verité & la promesse de Dieu.

*Ceux qui
n'ont point
creu en ce
monde.*

Car pour le premier, quât à ceux qui s'en sont allez de ce monde, sans auoir du tout aucun grain de la semée de la crainte de Dieu, mais ont totalement resisté à son saint Esprit, à la lumiere naturelle, & à la cognoissance qu'il leur a baillée; ou à la predication de son Euangile, nous ne leur pouuons laisser ne predication, n'autre remede après leur mort, pour leur salut: si nous ne voulons tomber en l'erreur des

Ori-

Origenistes & des Anabaptistes. Car quand Ie
 fus Christ a declairé quelle estoit la puissance
 des clefz, & de lier & délier, qu'il a donnée à
 son Eglise, il a dit: Ce que tu lieras & délieras Mat. 16. 18.
 en terre, sera aussi lié & délié aux cieux. Ceux
 donc qui partiront de ce monde, estans liez
 de ce lien, n'en seront iamais déliez. Car apres
 qu'il a baillé le commandement de prescher
 l'Euangile à toute creature, il adiouste Incon-
 tinent: Qui croira & sera baptizé, sera sauué: Mar. 16.
 qui ne croira point, sera condamné. Il ne parle
 pas icy de l'Euangile, qui sera presché en l'au-
 tre monde, mais de celle qu'il a cōmandé pres-
 cher à ses Apostres, & à tous ses vrais mini-
 stres. Aussi saint Augustin reiette celle opini- Augu. epi.
99. ad
Euod.
 on, traitant ce passage de saint Pierre, & dit:
 Ne pensons pas, que l'Euangile ait esté presché
 aux enfers, ou qu'il y doie encore estre pres-
 ché, pour faire des fideles, comme s'il y auoit
 aussi vne Eglise là constituée. Tenons nous
 donc à ce qui est escrit: Qui ne croit au filz de Ican 3. 5.
 Dieu, est desia condamné. Mais s'il est question
 des eleuz, qui ont eu desia en ce monde quel-
 que grain de la semence de Dieu, qui ont che-
 miné en sa crainte, combien qu'ilz ayent enco- Predicariō
aux infir-
mes apr's
leur mort.
 re esté enuoloppez de beaucoup d'erreurs &
 de tenebres, il y a autre consideration. Non pas
 que i'entende que l'Euangile leur soit presché
 apres le departement de ceste vie, autrement;

sinon qu'ilz auront là plus pleine cognoissance
 de ce qu'ilz auoyent seulement icy cogneu,
 comme parmy des tenebres. Car s'ilz sont en-
 fans de Dieu, la semence de Dieu, qui est en
 eux, les sauuera: comme nous en pouuons iu-
 ger par l'exemple de Corneille le Centenier.
 Auant qu'il eust ouy la predication de saint
 Pierre, il n'auoit pas parfaite cognoissance de
 Iesus Christ. Il estoit encore Payen en apparen-
 ce extérieure: mais si n'estoit il toutesfois pas
 du tout sans semence de la crainte de Dieu, ne
 sans quelque commencement de Foy, & ob-
 scure cognoissance de Iesus Christ: ou autre-
 ment ses oraisons & ses aumosnes n'eussent pas
 esté approuuées de Dieu, auquel on ne peut
 plaire sans Foy. S'il fust donc mort, auant que
 saint Pierre fust venu à luy: ie ne pense pas
 pourtāt, qu'il eust esté du tout reietté de Dieu:
 & que celle cognoissance ne luy eust suffy à sa-
 lut, ou que Dieu ne se fust plus plainemēt dōné
 à cognoistre à luy, ou par quelque inspiration
 diuine: ou quelque autre moyen, tel qu'il luy
 eust pleu: voire en l'article de la mort, plustost
 que le laisser perir. Nous pouuons presumer le
 semblable, tant des Iuifz, que des Payens, qui
 auant l'aduenement & la manifestation de Ie-
 sus Christ en chair, ont eu la Loy de Dieu e-
 scrīte en leur cœur: nonobstant qu'ilz n'ayent
 pas eu tous tant pleine cognoissance de Iesus
 Christ,

1. Iean 3. 5.

Corneille.
Act. 10.

Heb. 11.

Rom. 2.

Christ, que nous auons à present. Car ia soit que la cognoissance de Iesus Christ soit à tout homme necessaire à salut: il ne s'ensuit pas pour-
 tant, que nul ne puisse estre sauué, si elle n'est
 pleine & parfaite en luy. Car qui eust iamais en
 ce monde tant pleine cognoissance d'iceluy,
 & vne Foy tant parfaite, qu'il n'y eust rien
 à dire?

*Quelle co-
gnoissance
de Dieu est
necessaire
à salut.*

E V. Il n'en fut iamais point trouué de tel.
 T H E. Il suffit donc que ceste cognoissance &
 Foy ait prins racine en nous, & que nous tra-
 uailions tant qu'il nous sera possible, de l'aug-
 menter & accroistre. Et puis quand nous au-
 rons fait nostre deuoir, au mieux qu'aurons
 peu, le Seigneur qui a commencé son œuvre
 en nous, la parfera, iusques à son iour, comme
 l'Apostre le dit: & supplera & recompensera
 par sa grace, le deffaut de la Foy, & cognois-
 sance qu'auons receue de luy (ainsi qu'il fait
 de noz œuvres, qui sont toutes imparfaites, à
 cause de l'imperfection de nostre Foy) moy-
 ennant qu'il n'y ait eu du mespris, & trop
 grande negligence en nous, qui ne peut estre
 qu'aux reprouuez. Ainsi donc que Dieu, par
 sa grande misericorde, supporte l'imperfecti-
 on de nostre Foy, & ne laisse point de nous re-
 ceuoir pour ses enfans: pourueu que la semen-
 ce & la racine d'icelle en soit viue en nous: aus-
 si ie ne peux soustenir par aucun tesmoignage

Phil. 2.

de l'Eſcriture ſaincte, que nul ait iuſte occaſion d'eſperer ſalut, apres ceſte vie, qui d'icelle fera departy, ſans aucune cognoiſſance de Dieu & de Ieſus Chriſt ſon Filz. Parquoy, ie me tien à ce que l'Eſcriture m'en a reuelé: & laiſſe le reſte avec les ſecretz iugemens de Dieu, qui nous ſont cachez & couuers: & conclu, que c'eſt touſiours le plus ſeur, de trauailler tant apres la cognoiſſance de verité, cependan que nous ſommes en ce monde, que nous en puiſſions auoir autant qu'il nous eſt de beſoing pour noſtre ſalut: & que noſtre nonchalance & meſpris ne nous ſoit point cauſe de damnation. Il faut donc cheminer, comme dit Ieſus Chriſt, cependan qu'il eſt iour. Car quād la nuit ſeraveneue, nul ne pourra plus rien voir ne trauailler. Et ſi nous en faiſons noſtre deuoir, nous ſommes tout certain, que le Seigneur ne nous defaillira point, & qu'il ne s'eſloignera point de nous, ſi nous le querons, & deſirons d'approcher de luy. Car il eſt impoſſible qu'il ſe cache de ceux qui le chercheront, & qu'il a élu, & leſquelz il a propoſé de glorifier, & rédre bienheureux par ſa cognoiſſance, mais qu'on le cherche en verité & ſans hypo-
Pſeau. 145.
 criſie, cōme il le dit par ſon Prophete. Et combien que nous n'ayons paſtous ſi grande & ſi haute cognoiſſance de luy, ne tant de ſes dons & graces, que ſes Prophetes & Apoſtres: tou-
 tef-

tesfois il nous en baillera autant qu'il nous sera
nécessaire & expedient. Dequoy nous nous de
uons contenter. Voila ce que i'auoye à dire,
pour le present, sur ce point, & cela surquoy
il me semble le plus seur de s'arrester & resou
dre, sans s'en enquerir plus curieusement.

E V. Ie m'accorde biē à toy, en cela. Mais
au reste ie ne say encore cōbien ie doyue ad
iouster de Foy, a beaucoup de propos que tu
as tenuz, touchāt la descēte aux enfers de Iesus
Christ. Ie voy bien que tu conclus, que tous les
deux passages alleguez de S. Pierre, ne me ser
uent de rien pour prouuer vne descēte rea
le, de l'ame de Iesus Christ, n'y au Limbe, ny
au purgatoire, ny en la gehenne. Nous confes
sons neantmoins, aux articles de nostre Foy, *L'article
de la de
scēte de Ie
sus Christ
aux enfers*
que Iesus Christ est descendu aux enfers. Puis
que c'est vn article de Foy, nous ne le pou
uons nier, sans nier, nostre Foy & nostre Chre
stienté. T H E. Nostre difficulté ne git pas
sur ce point. Car ia soit que le Symbole du
Concile de Cōstantinoble, ne face aucune men
tion expresse de cest article, comme il a desia
esté touché en vn autre lieu, & que Cypriē tes
moigne, qu'il n'estoit pas iadis en l'ancien sym
bole de l'Eglise, toutesfois nous ne le nions pas
pourtant, mais cōfessons ouuertement, que Ie
sus Christ est vraiment descendu aux enfers,
& en corps & en ame, & en toutes les sortes

En cōbien de manie- res Iesus Christ est descendu aux enfers que ceste maniere de parler peut estre prise aux saintes Escritures, excepté celle, en laquelle les Diables & les reprouuez y descendent, pour n'en sortir iamais. Car Iesus Christ y est tellement descendu, qu'il en est retourné victorieux & triomphant. Donques nostre differend ne git pas en la descente simplement, mais en la maniere & nature d'icelle.

E V. Si ainsi est comme tu dis, tu en confesses plus, que ie ne t'en demande. Car ie ne parle que de la descente de l'ame, & tu y adioustes celle du corps aussi: & neantmoins nous ne sommes point bié d'accord ensemble, touchât noz intelligences. T H E. Ce que tu dis est vray: mais paraenture, quand tu auras ouy ma finale resolution, tu ne trouueras pas tant estrange mon opinion, que tu penses. Car s'il est question de prédre le nom d'enfer, pour le iugement, l'ire & la fureur de Dieu: ie t'ay desia declairé, cōment Iesus Christ est descendu en cest enfer, quand il a esté angoissé & humilié iusques à la mort, voire la mort de la croix, & qu'il a beu & épuisé en icelle, tout le calice de la fureur de Dieu, au nom des poures pecheurs, pour lesquelz il est mort. C'est là ou il a triomphé de Satā, & ou il luy a brisé la teste, & rompu ses chaines infernales, & toutes les portes d'enfer, comme il a desia esté prouué par saint Paul, selon ce qui est escrit: O mort, ie

ie feray ta mort. Ou est maintenāt tō aiguillō? Oſet 13.
1. Cor. 15.
 & toy enfer ou est ta victoire? Parquoy il n'a
 point eu de beſoing d'y deſcēdre autrement,
 en ceſt endroit, pour deſpouiller le Diable,
 qui a l'empire & le regne de la mort & d'en-
 fer. En apres, ſi nous prenons enfer pour le ſe- Heb. 4.
 pulchre, & la ſepulture, & l'eſtat des trepaſſez,
 cōme il eſt pris ſouuentesſois, il y eſt auſſi de-
 ſcendu en corps, quand l'ame en a eſté ſeparée,
 & qu'il a eſté mis au ſepulchre, avec ſes peres,
 ſelon la chair, cōme les anciens patriarches: &
 en ame, quand ſon ame a eſté receue en l'eſtat
 des ames d'iceux, & qu'elle a eſté conioincte
 avec icelles. Et quand elle a eſté derechef con-
 ioincte avec ſon corps, & rappellée de ceſt e-
 ſtat des trepaſſez, par ſa reſurrection, apres a-
 uoir combatu contre le peché, la mort, Satan
 & enfer, alors cela a eſté accompli, que ſainct
 Pierre a allegué de Dauid. Tu ne delaſſeras Pſal. 16.
Act. 3.
 point mō ame en enfer, & ne permettras point
 que ton ſainct voye corruption: C'eſt à dire, tu
 ne me laſſeras point en la mort, comme les au-
 tres, mais me remettras en la vie, deliurāt mon
 corps de la ſoſſe, le reioingnant avec ſon ame,
 en vie immortelle. S'il eſt auſſi queſtion de cel
 le deſcente, par laquelle il a fait ſentir & parue-
 nir la vertu de ſa mort, iuſques aux eſpritz des
 trepaſſez, tant fideles que infideles, tu as ouy
 ce qui en a eſté dit fort amplement. Voila les ma

nieres, par lesquelles ie puis comprendre, par la doctrine des saintes escritures, que Iesus Christ est descendu aux enfers. Si tu m'en peux monstrier quelque autre, biē fondée en icelles, tu ne me trouueras point opiniastre. Mais pour le present, ie me contente bien de cecy, pour ma consolation. Car quelle consolation puis ie demander plus grande, qu'estre asseuré par la parolle de Dieu, qui ne ment point, que Iesus Christ mon sauueur, m'a clos les enfers & les a despouillees pour moy & pour tous ses eleuz, & qu'il en est retourné victorieux en la maniere qui a esté dite, & que luy qui est mō chef est maintenāt en ma propre chair regnant au ciel, & qu'il en a pris possession pour moy, & qu'il m'y garde mō logis avec les autres fideles, si ie demeure conioinct avec luy, par vraye & viue foy.

E V. Tu m'as tant pourmené de ça & de là, que ie ne te fay plus que dire, pour le present, touchāt ceste matiere. Parquoy ie seroye bien content, que Thomas prinst vn petit la cause en main, pour me rafraichir vn peu, pour r'entrer tantost plus fort au combat. Car il me semble que i'aye assez trauaillé pour vn coup. Tu fays Thomas sur quel arrest vous estes demeurez, toy & Hilaire. THO. Ie suis bien cōtent de tenir ma promesse, de ma part, mais que vous me baillez vn petit de temps,
pour


pour penser à mes affaires, & à m'équiper de mesmes.

E V. Je pense que Hilaire ne t'en fera point de difficulté. H I. Je suis à tout, quant à moy, & me trouuerez prest à toutes heures.

E V. Puis donc que nous demourons sur cest arest, ie te prie, Thomas, que tu soustienne nostre cause, vn petit mieux à bon escient, & vn petit plus viuement. Car il semble que tu ne t'en faces que iouer. Aduise donc, de n'accorder pas tant facilement à noz aduersaires ce qu'ilz disent. Et si tu te portes bien, ie ne despere pas encore, de la victoire. Car ie n'ay encore déployé tous mes harnoy.


T H O. Tu verras par experience, comment ie me porteray. Pour le moins ie ne te trahiray point, que tu n'y soyes present & ne te vendray point qu'à beau argent content.


F. I N.



Fautes de la correction.

Pag. 98. li. 33. Licie. & li. 34. Trophonius. pag. 99. Purgatoire de. pag. 122. li. 19. pays. pag. 157. li. 15. esplucher. pag. 158. li. 13. l'auteur. pag. 224. li. 27. The. pag. 232. li. 18. ensuyuy. pag. 237. li. 28. trop. pag. 240. li. 27. doye. pag. 251. li. 12. tes chapelletz. pag. 261. li. 25. s'il y a. pag. 291. li. 16. Ostiriens. pag. 326. li. 1. Morauiens. pag. 327. li. 6. eussent. pag. 375. li. 14. pas homme. & li. 24. comment. pag. 380. li. 13. Christ. Et tãtost. pag. 383. li. 28. aupres de luy seroit. pag. 415. li. 24. felicité, & son. pag. 417. li. 24. regardât. pag. 420. li. 6. doctrine, sans le purgatoire que ie n'ay pas conté. pag. 426. li. 10. par eaux. pag. 435. li. 23. hebreux ont pris ou. pag. 442. li. 8. n'ôt pas. pag. 447. li. 29. Me pourrois tu donner à entendre cecy encore vn petit plus clai remét? pag. 450. li. 21. recognoiste. pag. 454. li. 29. autres sont. pag. 467. li. 16. la soustienne & la. pag. 507. li. 5. Ilz entendent donc. pag. 512. li. 8. escritures nous. pag. 514. li. 27. que ie. pag. 528. li. 6. Car s'il est. pag. 534. li. 9. qui eussent. pag. 537. li. 20. Pource. S. Pierre. pag. 547. li. 1. aduisez que.





Vessel met purgatoire en Paradis p. 480.

10-2-3

S



